

許同莘編

張文襄公年譜

商務印書館印行

MG  
K827=52  
27

許同莘編

張  
文  
襄  
公  
年  
譜

商務印書館印行



3 2173 2698 6

# 目錄

卷一.....	一
始生至四十五歲	
卷二.....	二九
四十六歲至四十九歲	
卷三.....	四一
四十九歲至五十三歲	
卷四.....	六九
五十三歲至五十八歲	
卷五.....	八九
五十八歲至六十歲	
卷六.....	一〇三
六十歲至六十二歲	
卷七.....	一一九
六十二歲至六十六歲	

卷八……………一六五

六十六歲至六十八歲

卷九……………一八一

六十八歲至七十一歲

卷十……………二〇九

七十一歲至卒葬

## 凡例

- 一、此書網羅事實、彙備國史取材、所採自遺稿外、凡檔冊邸鈔官書方志及同時諸公奏議詩文日記之屬、觀覽所及、咸有採摭、其得之口述者、必確鑿可信、然後著之。
- 一、章奏函電已入全集者、祇舉大綱。全集所遺、則節存切要者、故注有詳略之別。
- 一、未刊之稿、倍全集而有贏、此書紀載凡不見本集者、大率取資於是。
- 一、公學術爲一代所宗。論學之言不宜缺略、而年譜以月日爲先後。條分件繫、難於適合、茲附於每卷之後。詩文無月日可考者、附每年之後、年不可考者從闕。
- 一、遺聞軼事可見性情風格者、標舉一二。私家所記失實者正之。
- 一、官書錄疆吏奏摺、其月日據遞進之日書之。此書以發摺之日爲據。其施行在先奏聞在後者、以行文之日爲據。故間與官書互異。
- 一、書中於並時之人、書名書字書別號書邑書本職書銜書諡、視文勢語氣爲之、未能盡一、職非史官、不當用國史之例。閱者諒之。
- 一、前人年譜之式。或旁行斜上、或聯屬成文、或提綱附注、本無定體、惟事實多則眉目宜醒、茲參用雷塘庵弟子記及顧閻年譜例、大字提綱、小字分注、間有考訂、亦附注中、正文不及詳者、則每卷之後、各爲識語。
- 一、此書草創於辛酉以前、以蒐採蒸雜、屢作屢輟。及脫稿、則公夙昔交游與夫門生故吏、已多物化、猶幸毀庵陳公竹君趙先生皆享大年、得以就正。陳公并審定義例、闕定前三卷文字。趙先生多所指示而不欲著姓名、其詩文紀事、則得之雲門樊先生爲多。早歲及晚年事實。則得之公子仁侃公孫厚琬從子樞族孫宗芳

爲多。此外參閱諸君、不及徧舉、并識於此。

此稿付印之時、因小註雙行、排字不便、暫照正文字體而以括弧別之。并記。

## 序

汪梅村之在胡文忠幕府也、就所聞爲誦鄂記。閩文介得其稿而藏之。張文襄督湖廣、議刊行。文亦以書至、則事迹具焉。文襄復曰、書體例不盡一、敍次不盡合法、注多支蔓語、何疏率若此。宜刪節改正、始可付刊。梅村、績學人也、記翔實若無可議、而文襄病之、著書固若是其難也。文襄之世、又非文忠時比。文襄身繫朝局、鑿密之重者四十年。值瀛海大通、學術政事、新舊遞變。文襄困心衡慮、支柱其間。其不見於文字者、惟當日與文襄上下議論及朝夕於左右者知之。同莘生晚、從文襄之日少。文襄既歿、輯遺書、始得徧觀所爲文字。而並時人物、後先物故。幸而得見其人、又皆憂傷憔悴、言之而不能盡記。於此而欲述聞見爲一書、其疏率殆什百於梅村。然及今不爲、則他日雖有人焉、欲爲之而愈不易。而數十年間朝章國故、且失墜不可考。夫士生乎後世、敍次古人文章事業、考其年月、著其本末、以抒景慕之思。雖未必果合於古人、而論者有取焉。況乎得見其人、粗悉其身世。而恍於著書之難、才之不克副、諉其責於來者。是便私圖、負知己、而非公義所宜出也。既得遺書而刊印之、遂及斯譜、自草創迄於寫定、歷十五年、爲卷十、其體例斟酌於前人之作而加詳焉。其失也繁而不殺、由繁而簡、以合於文襄所云一體例合敍次之法者、則後賢刪節改正之事也、許同莘謹記。

# 張文襄公年譜

閩陳寶琛閔定

無錫許同莘謹編

## 卷一



(南)

公諱之洞、字孝達。一字瀟濤。又號壺公。先世山西洪洞縣人。明永樂二年。遷山右民實畿輔。始祖本。自洪洞徙瀋縣。本子立。立子端。官南直隸繁昌縣荻港巡檢。自瀋縣徙南皮縣東門之印子頭。是爲東門張氏。端子淮。正德戊辰進士。河南按察使。以文章忠義有聲於時。淮七傳至山西孝義知縣乃曾。又徙畢家塘。顏所居曰孝義堂。是爲公高祖。曾祖怡熊、字叶占。浙江山陰知縣。兩世爲縣令、皆以廉惠聞。祖廷琛、字獻侯。貢生。四庫館膳錄。議敘兩建漳浦東場鹽大使。題補古田知縣。乾隆季年。福建將軍魁倫與大獄。閩中官吏繫獄者。督撫藩臬道府十餘人。應縣以下七十五人。漳浦公以鹽場官署侯官縣。又兼署近省一縣及省城首領佐貳各官。凡館九家。囚繫之官皆屬焉。所謂護拯救者甚至。識者以爲有陰德。其後必昌。考鑾、字又甫。號春潭。徙居城南三里雙廟村。(今名雙妙村)。少孤。食貧力學。艱苦卓絕。舉嘉慶十八年鄉試。以大挑試令黔中。補安化知縣。署清平鎮遠。寧等州縣事。治行稱最。調貴筑。遷古州同知。署黎平。遵義安順諸府事。尋擢知興義府。娶劉夫人。布政司經歷澹州劉廷式女。繼娶蔣夫人。嘉慶乙丑進士。嘉定知府盧龍蔣策女。繼娶朱夫人。嘉慶甲戌進士四川邛州直隸州知州臨桂朱紹恩女。道光十七年丁酉八月初三日。朱夫人生公於興義府官舍。

道光二十年庚子公四歲

朱太夫人卒。〔太夫人善鼓琴。遺琴二。贈公自朱夫人卒後。不復娶。命側室魏氏撫字之。及公貴。魏氏以覃恩累封夫人。〕

道光二十一年辛丑公五歲

入塾。從何養源先生受讀〔問字義必索解乃止〕。

道光二十二年壬寅公六歲

六月。贈公丁母蘇太夫人憂。開知府缺。

道光二十四年甲辰公八歲

九月。贈公服闋。如貴州。仍知興義府。

道光二十五年乙巳公九歲

讀四書五經畢。〔籌鏡思索。每至夜分。倦則伏案而睡。既醒復思。必得其解乃已。其後服官治文書。往往達旦。自言乃幼時好夜坐讀書故。〕

道光二十六年丙午公十歲

讀九經畢。學爲詩古文辭。〔贈公訓子。以儉約知禮爲宗。過庭授學。多乾嘉老輩緒言。蹈中僻遠。難得書。錫俸購數十廚。置諸子學舍。令於日課外。聽以己意觀之。大率吏部書近代說經之書及朱子書爲多。所親或誣曰。兒童豈能解此。贈公曰。姑令縱觀。不解無妨。浸灌既多。長大後自有解者。又勸諸子曰。貧、

吾家風。汝當力學。」

### 道光二十七年丁未公十一歲

作詩文。工力日進。〔興義府教授敖君爲古風一篇。贈公命和。援筆立就。後在粵時敖君之子持先集刻本來謁。此詩附見集中。公語左右云。贈公當時見詩而喜。酌酒飲之。并獎古硯一方。〕

### 道光二十八年戊申公十二歲

詩文爲塾師獎許。〔興義府署與試院鄰。試院、贈公所建也。樹石佳勝。有天香閣。盡見城東南山水。讀書其中。裏所作詩文爲一冊。曰天香閣十二韻草。贈公寄示兄口於任所。得復以敏才勿露爲勗。公終身誦之。其後於少作略盡。按贈公之兄銜、字鐵夫。任縣教諭。此事公所自言。而未舉其名。故闕。〕

### 道光二十九年己酉公十三歲

從韓果靖公受業。〔韓公名超。字寓中。昌黎人。道光甲午副貢。以直隸州州判需次貴州。沉勇慷慨。胡文忠稱爲血性奇男子。贈公延致署中。命四子受業。未幾。韓公就文忠於黎平。公受業師前此有曾指之張蔚齋貴西垣黃升三王可貞敖嘉韓張育巖趙斗山諸先生。後此有丁誦孫童雲達袁燮堂洪次庚諸先生。曾先生、名敏笏。道光乙酉拔貢。張先生、名國華。副貢。貴先生、名貴乙。附生。黃先生、名政鈞。舉人。南雄州州同。王先生、名含章。道光甲辰舉人。普安縣訓導。敖先生、名國琦。道光丁未進士。陳留知縣。張先生、名元炳。嘉慶庚午舉人。趙先生、名拔才。嘉慶庚午舉人。丁先生、名嘉謀。武進人。道光戊戌進士。翰林侍讀。童先生、名章。道光癸巳進士。定番州知州。袁先生、名理。附生。洪先生、名調笙、號南陵。咸豐辛亥舉人。樂陵知縣。公自言得力於丁先生最多。袁先生、公之姑夫也。又嘗從胡文忠公開業。抱冰堂

弟子記。經學受於呂文節公。史學經濟之學受於韓果靖公。小學受於劉儼石觀察。古文學受於從舅朱伯韓觀察琦。回籍應試。道經湖鄂。乘小車行。後督湖廣。閱荊州萬城隍工。至安陸隄上。指點村落。謂此當日經行地也。在晉州度歲。從父越山先生官晉州訓導。留住暑中。越山先生名鉞。古田公兄廷雲之子。道光乙酉拔貢。

### 道光二十年庚戌公十四歲

入南皮縣學。兄弟四人同應試。按公三兄皆入縣學。惟不詳何年。爲學政程侍郎（廷桂）所器。回晉州。

亦明洪秀全起金田。贈公募義勇。謹斥埃。擒其黨闖入南盤江者。餘黨數千人皆背遁。贈公上書黔撫請用李化龍八道進兵之策。不果行。

### 咸豐元年辛亥公十五歲

### 咸豐二年壬子公十六歲

回籍應順天鄉試。中式第一名舉人。報至貴州。胡文忠在黃平軍中。與贈公書云。得令郎領解之信。與滄溪開口而笑者累日。南溪、韓果靖公也。是科主試者。尙書滿洲文端公麟魁。蕭山朱文端公鳳標。旌德呂文節公賢基。文節家世傳經。公質疑請益。所學益進。留京。寓外家蔣氏。

### 咸豐二年癸丑公十七歲

二月。江寧不守。畿輔戒嚴。七月。出都。值霖雨霰旬。自通州乘舟至東鹿。賦詩紀行。所爲詩入集自是年始。八月。弟小潭卒於貴州。公兄弟六人。長之灑、字遠瀾。次之潛、字仲穆。之淵、字荃江。次即公。又次之澄、字小潭。之涌、字閏濤。姊妹八人。長適劉拔貢肇均。次未詳。三適鹿文端公傳霖。四適

慶雲崔銘傳。五道南皮黑龍村劉書源。七字許氏，未嫁而孀卒，守貞以終。六八皆幼孀。」□月。抵貴州。省贈公於興義。〔贈公出入險阻四年。吳文節公（文鎔）督雲貴。贈公上圖練方略萬言。文節大奇之，署紙尾曰。東南事一以委君。旋以他人事詿吏議。文節與巡撫再疏復公官。權貴西道。雲南回部反地濱貴西道轄。出私錢募壯士出境會戰東川城下。馳謁大府陳方略。用其策，東川平。〕

### 咸豐四年甲寅公十八歲

遵義教匪楊鳳龍。連陷安南、普安、進攻興義。贈公悉力固守。設方略擊敗之。公兄弟及姊孀鹿文端公皆登陣。〔時郡兵調發略盡。贈公鳩士民率僚屬固守。自以身當北門賊衝。趣家人登樓磨薪。曰。城陷。卽自焚。苦戰三晝夜不息。賊縱火攻門。城垂破。贈公陰絕死士下城繞出賊後。賊驚擾。贈公猝出城。令曰。願擊賊者從。出城三十里。次於普坪。民爭趨赴。數日內衆至三萬。下令寬宥從。散去不問。殺賊自歸者實。鄉團助戰者獨本年租。於是附賊者皆解體。一戰破賊。擒其魁再秉成等。斬之。凡十二日。境內悉平。〕是年石夫人來歸。〔嘉慶癸酉拔貢都勻知府灤州石煦女。〕

### 咸豐五年乙卯公十九歲

侍贈公於軍中。贈公破楊鳳於花江。苗民反。龍里貴定邪教起。贈公權貴西道、破走之。遣公北歸。〔石夫人偕行。〕自澧州渡江入蜀。〔雨中行棧道。與伯仲叔三兄相遇。〕除夕。宿紫柏山留侯祠。〔念去年此日身在圍城。愴然有作。〕是年女檀生。

### 咸豐六年丙辰公二十歲

三月。赴禮部試。考取歸羅官學教習。七月。贈公卒於貴陽。〔苗匪之起也。贈公已病。以官民固請。強

起視師。既破賊。再權貴東道。而巡撫撓其權。所部餉又不時給。盡質衣物以哺軍。久之得餉。以次攻克茶山。湘子嗣。鬻朝渚賊巢。雨濕薰蒸。病益劇。請解兵柄。許之。七月二十四日卒。後七日。郡勻城陷。代理郡勻知府石均原任都勻知府鹿壯節公丕宗暨夫人蕭氏皆殉難。石公、石夫人之兄。鹿公、文端父也。〕

咸豐七年丁巳公二十一歲

兄仲穆先生奉贈公之喪歸南皮。 〇月。卜葬於雙廟之阡。劉夫人蔣夫人朱夫人皆合祔。

咸豐八年戊午公二十二歲

十月。服除。

咸豐九年己未公二十三歲

二月。將赴會試。族兄文達公（之萬）爲同考官。循例迴避。〔文達與公同出三世祖端後〕。在籍辦清平圖練。〔凡二十餘村。有團練規約。〕 〇月。入都。〔仲穆先生在籍辦團練事〕。

咸豐十年庚申公二十四歲

三月。恩科會試。文達公爲同考官。仍迴避不起。出都。以詩別陸盾生給諫。〔名素樞。桐鄉人。公會代給諫草奏。荷旨獎問。故詩有馬周慚媿負常何之句。〕 六月。子權生。〔原名仁權。公以二十字紋子孫輩行。曰。仁厚遵家法。忠良報國恩。通經爲世用。明道守儒珍。〕 八月。英法兵陷京師。文宗顯皇帝北狩。公感憤時事。有海水詩。 〇月。至濟南。入巡撫文達公文煜幕府。

咸豐十一年辛酉公二十五歲

三月。歸南皮。(因濟南卑濕患脚氣故)。留數日。赴任邸。爲獻縣劉仙石先生教其仲子。(先生名書年。公姊婿伯洵拔貢之父。官貴陽知府。著有經說一卷。刻入功順堂叢書。)同邑季藝堂太史薦公於欽差大臣勝保。御之。(藝堂名崇文。咸豐庚申進士。官右庶子。公致藝堂書云。到此日後。與伯洵閉戶讀書。研究古今王伯得失之要。此心稍有寧靜氣象。又云。旅進旅退於戟門之下。將焉用之。致一無用少年。而使足下有過譽之名。弟不爲也。南皮縣志言藝堂才器過人。其讀書經史而外。凡天文、地理、兵書、壬遁以及各國語言文字、無不窮究。與公最友善。)

### 同治元年壬戌公二十六歲

正月。入都。三月。應會試。挑取謄錄第三名。(同考官范鶴生先生得卷亟薦之。額溢被擯。范先生、名鳴銖。武昌縣人。時官內閣中書。翁文恭日記。見范鶴生處一卷。一場沈博絕麗。三場繁徵博引。其文真史漢之遺。余決爲張香濤。卷在鄭小山處。竟未獲雋。令人扼腕。鶴生爲之竟夕永歎。欲以本房他卷往易。爲監臨所阻。)五月。赴河南。七月。入毛文達公(昶)幕府。(文達以副憲在籍奉旨督辦團練。幫辦剿匪事。陸眉生給諫居母喪。文達奏請派赴河南。襄辦軍務。給諫與公有通家之好。遂約偕行。五月二十五日。行抵歸德營次。七月。給諫卒於軍。家貧不能歸葬。公經紀其喪。事畢欲行。文達固留。延致幕府。八月。至開封。先是張勤果公曜以布政使統軍剿賊豫南。欲致公於幕下。公屬從子桐辭謝。)九月。族兄文達公按事河南。十一月。署理河南巡撫。毛文達公出省督師。公入巡撫署。爲文達草疏言事。疏入。兩宮皇太后勅容嘉歎。(國史張之萬傳。之萬署河南巡撫。甫視事。疏請釐定折漕。有旨嘉其直陳漕弊。不避嫌怨。飭部施行。按公所具草。蓋卽此疏。)上書韓果靖公。陳贈公積勞病故狀。(贈公之卒。總督某有慚於平時。不以勞勩上聞。至是果靖爲貴州巡撫。公上書曰。咸豐乙卯秋冬之間。貴州畔苗讎起。都勻麻哈貴定以下諸郡縣。咸被攻圍。警報狎至。巡撫蔣君強起先君子於家。使率師辦賊。先君子以在興義城守。勞瘁成疾。固

辭不獲。扶病視事。當是時。賊去省會數十里。新募之軍才萬五千人。自出省門。步步荆棘。轉戰而前。身  
在行間者二百餘日。大小數十百戰。殺賊萬計。一定清水江之亂。一擒賊渠楊崇妹。兩解貴定之圍。至於蒙  
犯霜露。絕甘分少。自同將校。有少壯之所不能堪者。度支懸罄。不賒給餼。自質服御百物以給軍實。以次  
安輯流亡。鳩集團練。爲我殺賊。不用官錢。至丙辰七月。迭覆賊巢。遂達都勻城下。徒以當路掣肘。搯腕  
怵鬱。發憤歃血。而且日夜坐臥一帳。寒暑蒸濕。勞苦過差。遂成沈痼。此當日三軍之所共見。士民之所周  
知。故總督某。怒其方正。誣以無功。罷歸省城。其時病已危篤。至省八日而卒。此而謂之沒於王事。夫復  
何疑。而總督行其已私不以入告。於是先君子拳拳憂國之苦心。冒死百戰之成勞。開然而就漸滅矣。是年七  
月。巡撫以先君子題補貴東道。有旨令總督查明覆奏。於是飾詞上聞。更以他人題補。其覆奏有云。節節退  
守。始退至龍頭營。又退至舊縣。而且年近七旬等語。時先君子年止六十四耳。夫由貴定退割龍頭營。乃巡  
撫恐賊從他道入犯。飛檄調遣。令駐其地。以扼省城門戶。非擅退也。若謂又退至舊縣。則更妄矣。龍頭營  
去省六十里。舊縣去省百餘里。誰不知之。在先君子費志以終。植闕與否。何足損益。惟血戰效命以死。而  
反蒙敗北畏葸之聲。如此沉寃。其孰甘之。伏惟吾師託志忠雅。勇於爲義。倘蒙博采輿論。以疏上聞。請照  
軍營病故例賜卹。俾地下之靈。藉以不朽。則之洞兄弟等沒齒糜頂。豈敢忘德。昧死呼籲。惟吾師可否  
之。

### 同治二年癸亥公二十七歲

韓果靖公以贈公死事狀上聞。奉旨遣贈太僕寺卿銜。蔭子之涌以州判候選。○月。入都。三月。會試。  
四月初九日。榜發。中式第一百四十一名貢士。○仍出范鶴生先生門下。先生喜而賦詩。有再到居然爲此人  
之句。公以詩謝。是科主試者。河內李文清公棠階。大興沈文定公桂芬。襄陽單文恪公懋謙。滿洲文恪公載  
齡。○十四日。正大光明殿覆試。列一等第一名。二十一日。廷試。○對策指陳時政。不襲故常。閱卷大

臣皆不悅、議置三甲末、文靖公寶鑿重賈之。」閱卷大臣置二甲第一。試卷進呈。兩宮皇太后拔置一甲第三。二十四日。臚唱。賜進士及第。二十五日。謝恩。二十八日。朝考。列一等第二名。五月初八日。引見。授職翰林院編修。（自應小考鄉會試至殿廷諸試、不攜片紙隻字。所刊鄉會試硃卷殿試朝考卷。不改易一字。）四月。爲劉芝泉侍御（其年）草疏。劾御史吳台壽申救勝保朋黨誹法、飾詞挾制、并劾其兄吳台朗貪緣招搖狀。「疏曰、竊臣見御史吳台壽申救勝保一摺、披閱未竟、駭然以驚、憤填胸臆。不意方今朝廷清明之世、臺諫中竟有毫無廉恥、毫無忌憚之小人如吳台壽者也。伏思勝保一員、現經廷臣雜治。其罪狀之虛實、聽之研鞠諸臣。或殺或宥、聽之宸斷。非微臣所敢與知。若如該御史所奏之狂悖誣罔、則竊有不敢已於言者。其間頗倒是非、妄造黑白、不足深論。其牽引先帝、妄議聖德、造作虛聲、恣喝誕妄不經之言。冀以熒惑宸聰、間執人口、可謂不遺餘力矣。夫朋黨之弊。唐宋明以來、歷代有之。搆亂國政。攻訐異己。權貴爲之包容、臺諫聽其嗾使、貽禍國家、至深且烈。獨至我朝、事事一秉乾斷、此弊廓清。乃該御史首犯不韙。公然（此下原文有脫字）黨魁。此風一開、朝局將不可問。區區之愚、是用大懼。敢將該御史原摺悖謬之處、爲我皇上敬陳之。該御史云。文宗顯皇帝崇上廟號詔旨。以豐縣之捷稱武功首。若謂此不足以爲功。是將以誣勝保者誣先帝等語。夫豐縣之役、其視僧格林沁殄滅連鎮馮官屯。胡林翼肅清湖北全省。曾國藩肅清江西全省。爲功孰多易知也。特以奏績在先。故敘次居首。況國家命將出師、豈得一勝之功。遽爲鐵券。此次勝保之案、糾劾出自諸臣。而遽問出自皇上。若如該御史斥言者以誣先帝之罪。縱不爲言者地。獨不爲皇上帝乎。其悖謬一。該御史又云。恪遵諭旨。按律科罪。所謂陷君不義、有累聖德等語。給事中趙樹吉雖有參劾勝保之疏。朝廷並無卽行正法之旨。該御史待定讞未平而後疏論、未爲晚也。何以汲汲申救、惟恐不及。其爲阿私死黨、彰明較著矣。而況憑空臆斷。竟以不義累聖等語、指斥乘輿。其悖謬二。該御史又云。明亮阿桂等獲咎逮問。旋復起用、等語。無論勝保之材略器望。非阿桂等之比。卽阿桂等之獲咎、豈嘗弱於斯罔、跋扈貪劣、有如勝保乎。國家刑憲、自有權宜。其赦宥者、非情有可原、卽功浮於過者

也。英親王勘定中原。可謂功矣。而幽死。卒羹堯削平青海。可謂功矣。而縉者。張廣泗開關苗疆。可謂功矣。而大辟。一意姑容。究恐無此政體。今該御史甫嘗對簿之初。卽爲仗鉞之請。膽大妄爲。乃至此乎。其悖謬三。該御史又云。勝保有克敵禦侮保衛地方之功。無夷師失地貽誤大局之罪。等語。臣尤所未喻。勝保始爲欽差大臣而賊騎長驅入直。督辦皖豫髮捻。而皖北糜爛。辦陝西回匪而三輔爲墟。臣不知其所克者何敵也。喪師敗績。勝保恆事。然此猶爲將之常耳。至苗沛霧毛羽未豐。原非難制。勝保一意縱容倚任。而今日成江淮腹心之害矣。又髮賊餘黨陳得才。自狗逆被擒以後。衆止數千。狼狽西竄。勝保逍遙於潁州太和之間數月。並不遏擊。致冷入關大掠。回匪乘之而起。今陳得才盤踞山南。禍猶未艾。又直東教匪。本非勁敵。上年勝保督辦。不剿而撫。苟且塞責。至今寔成燎原。近畿殘破。以上三端。而曰未嘗貽誤大局。臣不知所謂大局者何事。所謂貽誤者何等也。其悖謬四。該御史又云。各省將帥。爭奪功名。使朝廷殘害功臣。下寒將士之心。上戕君父之過等語。此次參劾勝保之疏。大率係外省督撫統兵大臣。交章入告。百口一辭。不知更緣何故。爲此寒心。其悖謬五。又云。借星象風占以誅戮大臣。此端華肅順所以嫁禍柏葰等語。以二凶斥趙樹吉。比擬尤屬不倫。其悖謬六。該御史又云。黨援之說。宋歐陽修朋黨論辨之甚明。焉得以一己之偏辭。隔天下之公論等語。然則該御史不諱爲勝保之黨朋矣。歐陽修謂惟君子有朋。故八元十亂之屬。皆目之爲朋。該御史以此自況。是目勝保爲君子矣。將推勝保爲皋陶庭堅而且附於望散乎。無恥極矣。其悖謬七。該御史引唐陸贄言。曰畔者得以爲辭。平人亦爲懷惑等語。苗沛霖首鼠觀望。本未嘗甘就範圍。就令終歸決裂。亦與勝保無預。若如所云。是朝廷輕受制於將帥。自今以後。不敢逮一臣誅一將矣。其悖謬八。總之該御史自知強詞奪理。清議不容。非牽引先帝。無以箝皇上之口。沮言者之氣。非造爲陷君不義有累聖德殘害功臣之說。無以脅會審諸臣。使之不能議重典。而其所以挾制朝廷者。則尤在將帥寒心畔人藉口等語。臣謹按春秋之法。人臣無將。將則必誅。今該御史特以兩宮深隔九重。皇上冲功。遂爲此詭妄之言。意存禁嚇。使朝廷不敢不聽。律以無將之義。臣知其無所逃。該御史之兄吳台朝。前在咸豐年

間。以居心巧詐革職。發綠得入勝保軍營。保至道員花翎。招權肆惡。中外皆知。所以該御史效命私門。甘心鷹犬。且冀起用之年。爲三窟之地。原摺流布。舉國譁然。伏讀前降諭旨。如吳台壽所奏。亦無以服天下。等因。欽此。是其鬼域情狀。已在燭照之中。原未嘗據爲定論。特恐黨局既開。此輩必且謂朝廷不加譴責。益復恣睢無忌。散布謬言。中傷善類。此後若有不法之大臣。誰復敢抗疏搏擊乎。阻廢國法。禁制言路。蟠結黨援。思之寒心。臣所爭者。非勝保一人之罪名。乃本朝臣子之風氣。若該御史之狂悖無上。而猶覲顏與之同列。臣實羞之。疏入。有旨吳台壽吳台朝均革職。

### 同治二年甲子公二十八歲

三月。有送翁仲淵殿撰（會源）侍親出塞詩。翁文勤公同書。因案逮入詔獄。公兩入獄中省視。二年十二月。刑部奏擬罪名。有旨發往新疆効力贖罪。至是將就道。公賦詩送行。七月。以金陵克復。奉上諭內外大小臣工各加一級。

### 同治四年乙丑公二十九歲

四月十八日。散館考試。列一等第一名。五月。石夫人卒於京寓。有悼亡詩十首。（本集錄存五首）。

### 同治五年丙寅公三十歲

四月二十五日。翰詹大考。列二等第三十二名。（以考卷脫一字故）。五月初八日。引見。

### 同治六年丁卯公三十一歲

四月十五日。保和殿考試差。七月十二日。奉旨充浙江鄉試副考官。偕正考官張光祿（澤卿）出都。□月□

日抵杭州。入闈。九月十五日。發榜、所取多樸學之士。〔知名者五十餘人。尤著者袁昶許景澄陶模孫詒讓譚廷獻沈善登錢丙奎王棻等其後皆成就卓卓爲前後數科所不及。〕出闈後奉八月初一日諭旨簡放湖北學政。與疾遊杭州山水。〔購善本書若干種。自言此行有三願。差爲不負。謂佳士奇書好山水也。〕十月。離杭州。舟中賦詩二十首。過蘇州、游虎邱滄浪諸勝。十一月十三日。行抵湖北省城。十六日。接篆。〔奏報到任。疏云、學政一官、不僅在衡校一日之短長、而在培養平日之根柢。不僅以提倡文學爲事。而當以砥礪名節爲先。又勝試院楹帖云、剔弊何足云難、爲國家培養人才、方名稱職。衡文祇是一節、願諸生步趨賢聖、不愼登科。〕十二月。札行各屬、發題觀風。聽生盡量能自占、各盡所長。引用隱僻典實、許自注書名出處。平日具有著作者、可隨卷送呈。〔札云、學政履任、例有觀風之舉。本院屬當下車、式循前軌。期與此邦人士、研究實學、其相磋切、務得通經學古之士、經世致用之才、仰府州官吏轉行學官。將發去題目、限文到三日內、召集諸生、依法課試、如童試之中、有志在觀摩願隨同課試者聽。此次發題較多、良以學業文筆、各有優絀、許其量能自占、各盡所長。引用隱僻典實書名、自於篇末注明。限二月內彙齊、並姓名清冊封送來轅。聽候校閱、第其高下。其辭義精美列在高等者、本院當優予獎賞、鈔發傳觀、都爲一編、刊版流播。摹帷按部之時、仍當量加甄拔。如能全卷統作、並皆通博雅贍、尤當從重獎勵。特是因題爲文、僅見一斑、其有平日學術淵源、具有著作、若經史纂述、詩古文辭之屬。或哀然成集、或錄寫數首、可隨同試卷一併送閱。〕

### 同治七年戊辰公三十二歲

正月。出省。按試德安。以次考試漢陽黃州等府。五月。回省。考試武昌。七月。奏報考試情形。〔原奏略曰、湖北文風素優。尤以下游數郡爲最。近以屢經兵燹、人民轉徙、書籍散亡、較之往昔承平全盛之時、雖覺少遜。然才華發越讀書力學者、頗不乏人。臣每按行一處。輒宣播朝廷崇尚實學至意。以根柢之學砥礪

諸生。遇有講求經學博聞強識者，必特加甄拔，懸牌獎勵，並捐廉從優獎賞，以冀聞風興起。其有浮薄卑汙、健訟多事者，隨時訪查確實，分別註劣褫革。於登落日，必以端品行務實學兩義反覆訓勉。現擬將已試各府諸生才學秀出者，飭調來省。授以廬舍，籌給膏火。送入江漢書院肄業。並捐廉購買經史書籍皮置其中。俾得誦習摩挲，專務實學。至應試人數既多，弊端難免。查槍冒之弊，弊在廩保。傳遞之弊，弊在丁役。臣於濫保者，立加懲罰，以治其外。不許丁役下號，以治其內。并挂牌懸賞，如有招搖作弊，拿獲者嚴辦。首告者重賞。務期弊絕風清。不敢稍存疏忽。」奏請變通廣額章程。〔原奏略曰：軍興以來，各省團練捐輸，俱蒙聖恩，准廣學額。惟是人才有限。捐數無憑。近年楚省加廣學額，往往一學道額兩倍原數。雖定例加額不得過正。然防剿捐輸，既許毋庸併計。永遠暫廣，又屬相違而行。以至一州縣所取動至六十之多。楚省文風雖優，不再期之間，取士逾百。雖曰拔尤，實同竭澤。大學已多節取。小縣更難求精。恐數屆以還，必至三黜不備。且得之過易，根柢淺薄。文藝粗疏。初學者略識之無，便懷微倖之想。幸中者未嘗學問，更無求進之心。將向來文物菁萃之區，變為荒蕪蕭陋之習。不學者以為得計。老成者深有隱憂。況人數過衆，則官師之約束難。取額過寬，則士林之流品雜。其於士習文風，殊有關係。定例雖有可缺勿濫之條。然朝廷增其名而使者減其實。既非臣子所當爲，亦乖立法之本意。伏思一縣菁華幾何，開報動逾數萬。在議興時不肯過刻者，朝廷寬宥之深恩。而呈報時不無虛濫者，胥吏朦蔽之故智。伏祈敕下各省督撫。於捐輸團練經費，呈請廣額者，必須切實核減，再爲入告。并飭部臣將原定章程量加變通。稍爲從嚴。庶名器無過輕之虞。人文無日下之患。疏入。下部議行。〕按試襄陽以次考試鄖陽安陸。〔鄖陽距省遠，循例於歲試後接辦科試。〕十二月。自安陸啓程。是年女穉登。

### 同治八年己巳公三十二歲

正月。抵省城。奏請改經文爲經解。〔先是御史游百川奏請令應試生重報明認習何經，凡科試生員，概令考

試經解。部議奏准通行。公按武陽照新章試辦。至是奏言經學一道、最爲難精。欲其淹博貫串、原非倉猝可辦。惟學問之道、須由淺以入深。爲治之方、須實一而勸百。此次場內、但擇其能闡發大意明貫通暢者、格外優定。其疎淺者、但加訓勉、不爲苛責。查科試一場、例有默經一段。此次既遵旨報名認習一經。自未便同出一題。因令其各默各經、以免名實相戾。至童試人數衆多、未必皆能講求經義。且若令一律應試經解、經古一場勢不能容。而新生覆試日、例有經文一篇。當即酌量情形。於點名册先將認習之經報明。於進取覆試日按册認真考試。習平日留心經書與否。但經文究爲格式所拘。未能樸實說理。此後可否即將新進文童覆試經文改作經解。似與新章命意正相符合。疏入下部議。」二月。按試荊州。以次試宜昌荊門等處。

○月。回省。創建經心書院。〔江漢書院因舊制。不足以容多士。時李文忠公以湖廣總督兼署湖北巡撫。公商之文忠、別建精舍。區爲經義治事。按部所至。披其尤異者、讀書其中。按經心書院初名文昌書院。李文忠朋僚函稿有復公書云。文昌書院創始艱難。執事提倡風雅、振拔寒賤。弟甚願觀厥成。前與小東方伯籌議、而集費拮据、據稱先擇土地、秋後興造。一面緘取蕪州經古書院章程。商提經費。詳定立案。計開下回省時、當有成議。此函下注同治八年七月初五日。蓋是時猶未有經心書院之名。又公有致黃子壽先生書聘重講席。〕七月。出省。按試德安。〔各屬按試次序如前。不具述。〕十一月。仲兄仲穆先生卒於學署。〔先生工文辭。以優行附生注選中書科中書。改湖北候補知府。有遺詩□卷未刊。〕

同治九年庚午公三十四歲

○月。唐夫人來歸。〔湖北按察使遵養唐威恪公樹義女。〕選刻江漢炳靈集。〔歲利兩試既竣。擇其文尤雅觀者。改定刻之。四書義爲第一集。試律爲第二集。府試古學之文爲第三集。書院課士通經學古者爲第四集。觀風之作爲第五集。〕十月。任滿交卸。〔曾文正與許仙屏書、往時邵文端張海門視學吾鄉、最得士心。遺張香濤在湖北亦愜衆望。三人者、皆宏獎士類、津津樂道。按公督楚學時、物望交推、勞苦亦甚。有送妹顯

芬入詩、句云、人言爲官樂。那知爲官苦。我年三十四。白髮已可數。自注、庚午十月初八日正交卸學篆時也。〔入京覆命。〕〔寓南橫街。〕始與潘文勤公〔祖蔭〕王文敏公〔懿榮〕吳憲齋中丞〔大澂〕陳毅庵師傅〔寶琛〕諸公定交。〔文勤寓米市胡同、所居密邇、時出所藏吉金拓片、屬公與王吳兩公審定。〕

### 同治十年辛未公三十五歲

四月。子仁頌生。仲穆先生燕詞、命爲之後。五月初一日。與潘文勤騰客於龍樹寺。名士畢集。奏誼亭作雅集園。〔誼亭題云、時雨乍晴。青蘆瑟瑟。縱論今古。竟日流連。歸作此園。以紀鴻爪。葉鞠裳太史卽席賦詩。有絕似東坡龜字遜清談、枵腹生槐龍之句。自注、未攜行廚。客至無饌。召餘慶堂咄嗟立辦。〕充翰林院教習庶吉士。〔移居化石橋。〕九月九日。慈仁寺登高。有詩。〔李蕤客作序。〕十月。弟閩濤卒於京師。十二月十四日。消寒齋集。〔賓主九人。出所得宋人香山九老圖卷。各紀以詩。明年二月初三日。又以消寒之集、請朝鮮使者閱致庠朴鳳彬。賓皆東向、取古人尙右意、又記以詩。今佚。〕

### 同治十一年壬申公三十六歲

正月初二日。獨遊慈仁寺。謁顯亭林先生祠。三月三日。修禊南窪。〔有和董礪樵七古一首。佚。〕十三日。極樂寺海棠初開。置酒會客。〔有詩。〕游可園。〔俗稱三貝子園。〕二十三日。游花之寺。〔有詩。〕四月二十五日。游崇效寺。〔觀青松紅杏圖卷。〕五月。和潘文勤銷夏六詠。六月十九日。游十刹海。觀荷花。泛舟上游。坐漁家秦氏園。〔皆有詩。〕七月初五日。潘文勤公爲虛成生日會。據漢人石刻畫象摹寫爲圖。公既與會。因題詩其上。八月十五日。游天寧寺。方略館進呈平定粵匪方略、剿平捻匪方略、代撰恭進表。九月初九日。游慈仁寺。屢登閣登高。〔有詩。〕恭逢皇帝大婚典禮、撰樂章四章、禮成、賞加侍讀銜。是年清祕無事。得詩最多。十二月二十九日。唐夫人卒。

### 同治十二年癸酉公三十七歲

正月。皇帝親政。恩詔加一級。五月。考試差。六月二十二日。奉旨充四川鄉試副考官。閏六月。備正考官鍾侍講（寶華）出都。道豫陝入蜀。〔過華山灤橋馬鬼劍閣皆有詩〕。中途霖雨。至成都、勞頓致疾、即日入閣。榜發。所拔多學行超卓立。〔如吳謙吳德澹諸人是〕。出關後奉八月初一日諭旨。簡放四川學政。十月十五日。接篆。〔報到任疏云、四川省分、人文素優。惟棚數較他省爲多。弊端亦較他省爲甚。至軍興以還、學額日廣。品行實學。尤須極力講求。臣惟有首勵以廉恥。次勉以讀有用之書。至於剔弊摘奸。惟力是視。〕

### 同治十三年甲戌公三十八歲

正月。考試成都府屬生童。附考松潘理番兩廳。資縣茂三直隸州。〔舊時成都考試。凡攻訐冒籍槍替及身家不清者、提調官輒不理。奸徒糾衆、伺學使轅門外、待其覆試而搶之。且索重賄。名曰拉槓。其人亦歷數十健兒爲保護。關於學轅。動有殺傷。乃懸牌示衆。攻訐者當親訊。拉槓者飭提調率兵擊辦。於覆試日放牌後訊之。或扣除、或坐誣、或勒釋、剖斷公明。士論翕服。又以武童橫悍滋事。皆由業師主使。名曰教習。向例武童冊結須填教習姓名。因卽令教習結保。各自稽察。無教習具結者不得與試。武試遂靜。又訪出著名槍替撞騙者十餘人。知照按察司通緝。積憤以此者。稍知斂戢。〕創建尊經書院。〔省城舊有錦江書院。造就不廣。商之督部吳勤惠公。別建書院。剋期興工。〕五月。伯兄遠瀾先生卒於姚州任所。〔由定興教諭歷知麗江碧巖諸縣。署姚州卒。〕出省。按試眉州。修蘇文忠公祠。〔眉州試院旁有蘇祠、三蘇故宅也。久而不治。臨發、斥費屬有司修之。〕七月。按試嘉定。以次試敘州瀘州敘永重慶各屬。十一月。試酉陽。〔山行十餘驛。荒山絕壁。大雪嚴寒。行役勞苦。爲各屬最。〕十二月。試忠州。〔酉陽忠州。定章歲科併

試。」

### 光緒元年乙亥公三十九歲

正月。按試石碭州。以次試綏定順慶保寧潼川龍安各屬。〔石碭州綏定龍安。皆歲科併試。〕七月。回省。辦恩科鄉試錄遺。〔錄遺生監一萬餘人。例以七月初旬開考。冊送恩促。先是順天學政錢寶廉奏請隨棚錄遺。而御史孫鳳翔奏請仍照舊制。部議由各學政酌量情形奏明辦理。公謂隨棚錄遺之法、於川省最宜。在川北試辦數棚。即以六月造冊。及是從容考校。仍許未取者到省補考。〕八月。奏報歲試各屬情形。〔原奏略曰、川省試事最繁。積弊太深。所有彙飭士習、培養人才。剔除弊端、體恤寒畯各事宜。謹皆盡心竭力、執法授情、次第辦理。川省積習。文武叢生取進後。教官任聽書斗多方勒索。不滿其意、即不送覆。陸續冊送。數日方畢。未送下棚補覆。甚至下屆始補。寒士痛心疾首。百弊由此叢生。相沿已久。實堪痛恨。臣力排浮議。必欲挽此頹風。嚴檄苦口。多方督催。自開棚已來。所有新進文武童、一律依期送覆。從此嚴申照辦。總期永遠革此惡習。以仰副朝廷嘉惠士林之至意。〕奏參石碭廳訓導曾懋官粗莽鄙謬。請旨革職。九月。出省。按試寧遠雅州邛州各屬。〔循例歲科併試。在邛州度歲。〕撰輯軒書目答問成。是年春。尊經書院成。選高材生百人肄業其中。延聘名儒。分科講授。手訂條教。略如詒經精舍學海堂例。院中爲覆堂。祀蜀中先賢經師。復以邊省圖書不易。捐俸置四部書數千卷。起尊經閣庀之。暇日蒞院爲諸生講說。獎勵惠公雅尚經術。開書局刊行小學經史諸書。公積而大之。流布坊間。資士人誦習。又爲文勸紳富捐舍學田。優免新生卷費。其後改設學校多取給焉。軺車所至。搜采窮巖墘。漢隸上庸長嚴季男諸石刻。始登金石家著錄。〔嚴季男刻石在夔江吹角壩。屬校官曾楷林移至成都。置學署。〕

### 光緒二年丙子公四十歲

正月。回省。科試成郡生童。附試松潘理番賓州綿州茂州各屬。〔吳勳憲公受代東歸。以詩送行。〕三月。奏報考試情形。〔川省每屆歲試。文武生臨點不到報部除名者。少則五六百人。多則八九百人。公令各學官查覆。可原者補考。無故避考者始咨部除名。其以前欠考革除呈懇開復者。爲之咨部請復。奏言川省近年諸生太多。愈多則愈貧。就館投親。謀食他省。困踣難歸。深屬實情。謹核其情節。如素無劣蹟。所呈近理。當飭該學詳查。取具同學族鄰切結。該學印結。詳請臺案咨部請復。臣愚以爲寒士一袴。亦頗不易。被黜玩法者。必應嚴辦以端士習。樸樸無他者。儘可從寬以恤寒儒。疏入。報聞。〕

〔奏陳整頓試場積弊。〕〔辦法八條。曰懲鬻販。禁訛詐。禁拉揸。學包攬。責廩保。禁滋事。杜規避。防鄉試頂替。大指以爲考試弊端各省皆有。然未有如川省今日之甚者。弊竇日巧。盤結日深。士子以舞弊爲常談。廩保視漁利爲本分。以致寒士短氣。匪徒生心。訟端日多。士習日敝。於人才風俗大有關係。臣多方整飭。似尙漸覺廓清。特是立法必貴其久。除惡務絕其根。若暫就清虛。而不思立爲成法。誠恐乍奸犯科者。逾時復萌。仍無裨益。竊謂法不貴嚴。貴於必行。法不宜過重。過重則必不行。士愛民望。邊省尤甚。川省人心浮動。獄訟最多。大凡戶業公局峻訟詐財之案。必有文生在內。燒香結盟。糾衆滋事之案。必有武生在內。激揚之道。固不僅在考試一端。然童試乃士子進身之始。糊場爲萬衆菁萃之時。若此時卽專以作奸犯科抗官滋事爲務。通省郡縣。相習成風。則異日成名。必蹈故轍。愚見慎。羣思效尤。爲患殆非淺鮮。故欲治川省之民。必先治川省之士。又奏言、川省最多訟棍、而訟棍多係實監文武生暗地唆架、堂堂扛幫。遇有上控事件、尤所樂聞。出頭承辦。廣募衆費。以爲訟費。浮開疊敘。藉此爲生。且徧嚇富家。若不厚贈。便當牽引拖累。此輩大爲民害。所以地方官平日不能擊辦、事後不問坐誣者。緣川省州縣、每處必有數局。每局除他項紳士外。必有數文武生。既預局事。與官丁吏胥皆有來往。多有陰事爲其所挾。喜則爲關說助惡之人。怒則爲反顏訐控之舉。以故官吏雖甚苦之而無可如何。此爲川省敗壞士習之根。查學政全督本有生監構訟主簿申報之條。擬令各州縣各學除平日隨案詳辦外。其有素行狡譎、不能遮行定案詳辦者。凡遇學臣接臨、各將健訟諸生姓名彙摺、開

單各自呈遞。不得互相關會。如既爲州縣學官開報。放告日又被人控。或無故控人。健訟屬實。立飭懲辦。局立被控。不准徇隱。此舉與定例舉報優劣之意略同。無如習俗失真。以爲學政一官。但司校閱文章。無暇整飭士習。川省教官。直不知有註劣之例。尤爲可怪。屢經諭飭。無一開報。應請敕諭申明嚴仿辦理。疏入。下部議行。」按試眉州。蘇祠工竣。爲文記之。〔以所藏善槧三蘇文粹施祠中。〕有登樓詩。〔登樓詩、共我登樓有衆賓、毛生楊生詩清新、范生書畫有蘇意、蜀才皆是同鄉人。自注、仁壽學生毛庶豐、綿竹學生楊銳、華陽學生范溶、皆高才生、召之從行讀書、親與講論、使寧經學。〕四月。按試嘉定。以次試絳州濟州絳永重慶順慶保寧潼川各屬。八月。王夫人來歸。〔公喪偶久。王文敏有妹才而賢。及試龍安、文敏之父遠塘先生祖源方知府事。吳勤惠爲之作伐。因定聘焉。是歲秋、王夫人來歸。贈隱有文待詔漁家樂卷。成婚之三月。出長卷共賞。慨然有借隱志。按公與文敏在京時比舍而居。夫人待字之年。具幽閑之德、夙有所聞。近人李密言記此事。謂公按試龍安、知府例爲提調、供張一切。帳額畫折枝甚工、詢之知爲太守之女所畫。到省請禮府爲媒云云、乃傳聞之誤。文敏之子漢章嘗爲同華言、夫人不習翰事、更未爲人作畫也。〕十一月。任滿將受代。爲尊經書院記。〔書院章程未定。至是具槧、與舅文薛侍郎商推定議。又爲記四千餘言、示諸生以學術教條、刻之於石。〕交卸啓程。〔四川學政所入素豐。公裁革頂充書吏承差陋規二萬兩。又訂定恩優歲貢及錄遺諸費。不許婪索。及去任。無以治裝。舊所刻萬十書經版。始得成行。〕至綿竹、與誼叔裕學使宗浚書。〔書云、身雖去蜀、獨一尊經書院、惓惓不忘。略有規模。未臻堅定。通省佳士、豈能蒐采無遺。就目力所及者言之。大率心賞者盡在其中。〕至涪縣。欲游青城山。聞有司將具供張而止。至漢中。游紫柏山留侯祠。至鳳翔。宿喜雨亭。游東湖。歲暮抵西安。〔袁太常視香嚴老人六十壽言節略。公兩爲學政、所至網羅遺才宿士、若繆編修荃孫、樊大令增祥、王侍郎文錦、王祭酒懿榮、鄭貢生知開、蒯太史光典、左比部紹左、本劣巡廩鼎、袁制部寶璜、林吉士尚唐、教以治縣門律、通知時務。會文正嘗嗟異之、以前輩若洪亮吉之督路學、朱笥河之視院學、聞學、阮文達之督浙學、無以踰也。按繆

編修光緒初在吳勤憲幕府。執贊於門。非公所取士。王文敏早歲官戶部。與公相識在同治九年。初無師生之誼。易兵備自光緒庚辰始由王雪岑廉訪<sup>介</sup>。著弟子籍。林吉士。番禺人。公督粵始識之。延入廣雅書院。爲史學分校。此誤。是歲充文淵閣校理。〔按履歷冊、光緒二年任滿回京下、書歷充國史館協修纂修起居注協修文淵閣校理本衙門撰文。史館本傳。充文淵閣校理在光緒二年十二月。是歷充國史館起居注諸職、尙在是年入京以前。然不詳月日。并記於此、以待校補。〕

光緒二年丁丑公四十一歲

正月初□日。登牛首山。望終南曲江樊川輞川諸勝。〔自漢中至此所經皆有詩〕。初六日。發西安、再致譚學使書。〔以蜀才告。曰四校官五少年。四校官。縣教諭楊聰、雅安教諭蕭□□、署茂州訓導李星根。梁山教諭譚煥廷也。五少年。楊鏡、廖登廷、張祥齡、彭毓嵩、毛瀚學也。〕道經華山下。將登山、不果。〔以往返須三日費而止〕。二月。入京覆命。〔寓永光寺中街〕。四月。議穆宗教皇帝升祔位次。〔太廟九室。一室一世。數盈、當別建。廷議紛紜不決。潘文勤時官禮部侍郎。公詳稽歷代之制、爲三議以進。畿輔先哲傳張佩綸傳。穆宗升祔。詔廷臣集議位次、佩綸請建文武世室於後殿左右、恭奉太宗文皇帝廟主以次遞遷。張之洞讀其疏、歎曰、不圖鄭小同杜子春復生於今日。遂造廡訂交焉。按吳縣潘氏藏公與文勤手札、有言升祔事者。其一札云、頃已見張侍講文矣、一摺兩片、正摺即某第一議也、一片用第一議以駁第二議也、又一片即申論昭穆可以遞遷之說也。陳毅庵師傳云、侍講原奏、偶與公合、非相襲也。兩公相識亦不始於是時、先哲傳云云、微誤。王雪岑廉訪云、曾聞之於公與侍講定交始於張文達百熙之介。〕五月。充教習庶吉士。十一月。女仁孀生。

光緒四年戊寅公四十二歲

二月。旱。詔求直言。公爲黃漱蘭通政具疏陳時政得失。〔有旨分別施行。又奏劾戶部尙書董恂於荒政務從嚴斥。在總理衙門語言舉止。爲衆議詆訾。目爲奸邪。有旨詹事府左庶子黃體芳以傳聞無據之詞。詆董恂爲奸邪。措詞過當。著交部議處。副吏部奏黃體芳應降二級留任。奉旨應詔陳言。係因公起見著寬免處分。〕子權娶於歐陽劉氏。〔伯洵拔貢之女也。陳師傳云。時國子監祭酒缺出。通政以次當選。因被議而止。新婦入門之日。通政往賀。公言我負漱翁者再。通政慨然曰。是何傷。文章出君。氣節屬我。及寬免處分。爲章奏陳謝。有句云。漠廷禱雨。不誅卜式之狂言。宋帝知人。無待蘇洵之過慮。蓋仍目董爲奸邪也。兩公戀直如此。〕九月。吏部左侍郎崇厚奉使俄羅斯議伊犁事。公爲張幼樞侍講草疏。請飭先赴新疆體察形勢。與左宗棠定議而後行。勿授全權大臣名目。〔疏入不省。按是時公未開坊不得上摺言事。故以上兩摺由黃通政張侍講具奏。〕

### 光緒五年己卯公四十二歲

二月。奉旨補授國子監司業。王夫人卒。三月。穆宗毅皇帝梓宮奉安山陵。扈從至遵化州。禮成。吏部主事吳可讀以死請豫定將來大統仍歸承繼大行皇帝嗣子。兩宮皇太后命王大臣大學士六部九卿詹詹科道妥議具奏。四月初一日會議。〔諸臣以繼統似涉建儲。非家法。不敢參議。〕初十日。復會議。十一日覆奏。公別爲奏上之。請明降懿旨。將來繼承大統者。即承繼穆宗爲嗣。奉懿旨。皇帝將來誕生皇子。其繼大統者。爲穆宗毅皇帝嗣子。所有吳可讀原奏。及王大臣會議摺。徐桐翁同龢潘祖蔭聯銜摺寶廷張之洞各一摺。并諭旨均錄一分。存毓慶宮。五月。以四川東鄉縣知縣孫定揚逐例苛斂。激衆鬧糧。又誣民爲逆。具稟請剿一案。前在四川學政任內。實有見聞。大員查辦。覆奏不實。疏請飭部核議。〔六月。刑部議奏平反。孫定揚等治罪有差。〕五月。奉旨准與日本人竹添光鴻相見。〔光鴻來華游歷。聞名請見。日本使館奏贊田邊太郎爲介於總署。奏聞請旨。光鴻來見。執禮甚恭。〕七月。奏請修省弭災。直言不宜沮抑。〔自五月以

來、甘肅陝西四川地震。太白晝見。雲氣有異。御史孔憲綱請修何金壽先後以言事獲咎。而翰林院侍講王先謙奏言。宜防流弊。有旨嘉納。并飭嗣後不得以雷同附和之辭相率演陳。故公有此奏。按編修與宗室竹坡侍郎寶廷張幼樵侍講黃漱蘭通政公稱爲翰林四諫。八月。畿輔旱。奏請速籌賑濟。奉旨補授左春坊左中允。九月。奉旨補授司經局洗馬。奏請大舉海疆運京師及山西河南等省平糶。并請飭查緩補災區。速籌拯救。十二月初五日。奏陳俄約貽害。請修武備。議改約。治崇厚以應得之罪。崇厚至俄。爲俄人所愚。訂約十八條而還。廷臣交章論劾。詔以崇厚不候諭旨。擅自回京。交部嚴議。其所議各條。并總理衙門前後各摺。發大學士六部九卿翰詹科道公同集議。駐天津英領事斯本思得公原摺鈔本。詳英文徧傳各國。俄使詰李文忠洩漏機密。文忠以聞。有旨飭軍機大臣傳問。明白回奏。公聲明並未洩漏。然不測所由。後督兩廣。斯本思來見。具言前事。乃知俄使所見。卽其譯文也。十六日。奏陳練兵籌餉之策。奉旨召見。飭隨時赴總理各國事務衙門以備諮詢。前後兩摺。均奉旨發廷臣集議。故事中允洗馬上摺由翰林院掌院學士代奏。奉特旨則否。故有飭赴總署之命。國史館以查一臣上列傳奏保。加四品銜。香嚴老人六十壽言。公在史館。凡有大著作。多出其手。李慈銘越縯堂日記。錢辛伯陳伯潛爲國史館總纂官。專修儒林文苑兩傳。其議發之張香濤。

### 光緒六年庚辰公四十四歲

正月初三日。廷臣上會議摺。明旨宣布崇厚罪狀。派曾紀澤赴俄另議。二十一日王大臣續上會議摺。公奏言。邊防實效全在得人。原摺用陳師傳稿。本集未載。補錄於此。竊臣仰承諭旨。於會議事件。異與諮商。邊防之法。現經王大臣等籌議覆奏。臣惟邊防事宜。不外廷議數端。而究之邊防之有益無益。有效無效。必以得人不得人爲斷。得其人則皆勝算也。不得其人則盡空文也。大抵得人之道。約有數端。一曰至誠。責大以直舉。不薦不止。庶條目以求才。不得不休。二曰秉公。務求物望。務拔幽滯。黜尸素。禁濫等。不以

喜怒爲愛憎。不以異同爲去取。三曰虛心。不患下無才。但患上不求。朝廷以樞臣爲耳目。樞臣嘗以公論爲耳目。宜儲之於夾袋。不可取辦於臨時。四曰破格。勿計年資。勿泥成例。奇傑之才不拘文武。艱鉅之任不限疏戚。五曰器使。足食足兵。量能授任。南船北馬。各用所長。卽塞外番僧。泰西智巧。駕馭有方。皆可供我策遠。六曰節取。邊才每多偏駁。健將每涉不羈。不以一眚掩大德。不以二蠹棄干城。或取其技能。或采其議論。七曰造就。有邊事始有邊才。頗牧衛霍。非本天生。皆有習練。疆圉孔棘之秋。正磨厲人才之具。戎朝平準回。平金川。平川楚教匪。平輿捻。每辦一次軍務。卽出一次人才。是其明證。總之廷議之所館籙。臣下之所能請者。不過曰前派重臣。不過曰宜召宿將。不過曰飭大臣薦舉。不過曰請旨考核對調。至於派何人。召何將。薦舉之用與不用。考核之嚴與不嚴。則其中真精神。真消息。全在朝廷。惟有仰懇皇太后皇上責成軍機大臣。將廷議所稱派重臣召宿將薦舉考核各條。平心鑒裁。竭誠翊贊。然後邊防一事。不至勞師糜餉。徒令海內騷然。而終歸於有名無實也。又陳餘濤六條。補廷議未盡之意。〔陳師傳云。自俄事起。公及張幼樵侍講與余三人。累疏陳言。各明一義。公辯忠稍遲。侍講下筆最速。三人不分畛域。或公口占而侍講屬草。或兩公屬草而公具奏。或余未便再言而疏草由兩公具奏。公所建議者大意。不外修備籌防相機操縱。而事機迫切。尤在是歲之初。朝旨令會惠敏赴俄另議。卽從廷臣之請。然修備籌防。未計及也。按抱冰堂弟子記。言疏論俄約事。凡數十上。考軍機處月摺公摺片言俄事者凡十九件。本集已備錄之。又四件則汎論用人邊防賢效云云。卽其一也。弟子記言數十上者。蓋侍講及陳公所奏。或有公原稿在內。而此十九件中亦不必盡出公手。侍講之子仲焯。所言亦同。〕二月。奉旨補授翰林院侍講。五月。奉旨補授翰林院侍讀學士。充教習庶吉士。六月。奉旨補授右春坊右庶子。十口日。王大臣會議英法請赦崇厚事。公遵旨赴內閣諮商。〔俄人爲詞恫喝。英法居間。首以赦崇厚請。南北洋大臣入告。旨下廷議。王大臣謂宜曲從。〕十九日。奏陳經權二義。〔正崇厚之罪。必誅無赦。爲守正之策。釋崇厚而加南北洋大臣嚴譴。責令識罪修防。以示不測。爲通變之策。〕二十一日。王大臣議奏崇厚罪名。〔比照增派制書已行

律、擬斬監候。謂條約係欽定、卽與制書無異、雖未奉御批、而畫押用印、卽是已行。奉旨依議。嗣會惠敏抵俄。奏請寬崇厚罪、示轉圜。旨如所請。」七月。奉旨充日講起居注官。奏陳海防事宜。「凡十三條。並臆舉知名宿將劉銘傳等十二人。又言改約中界務商務兩條、尤須堅持。松花江行船一條、舊約專就黑龍江與松花江會處由此順流至烏蘇里河會處而言。辭義甚明。旨下會紀澤於議約時參酌辦理。又命會國荃督辦山海關防務。鮑超募勇駐津榆間。從公請也。」八月。奉旨補授左春坊左庶子。奏請急籌戰備。「聞俄艦東來已近。故有此奏。旨令廷臣妥議。顧全大局。公奏言縱不開決裂之端、亦必思抵制之法。原約最重數端、無論如何、要以改動爲期。」九月。奏請飭使俄大臣會紀澤另議新約。注意重務。并陳西防東防事宜。日本滅琉球。請改約推廣商務。十月。公奏言琉球案宜緩辦。商務宜擇無弊者允行。十二月。因案與毀應陳公交章奏請裁抑奄官。「恭親王見而稱贊。曰、此真奏疏也。先是有中官率小奄二人奉命挑食物入盒賜醇邸。出東右門、與譏軍爭毆。遂毀食盒而入。以毆搶告。兩宮震怒。立褫譏軍統領職。門兵交刑部、將置重典。陳師傅擬上疏極諫、公謂措詞不宜太激。止言漸不可長、門禁不可弛、如是已足、我當助君言之。若言而不納、則他日臺有大於此者、不能復言矣。陳公以爲然、改正義爲附片。有云、皇上遵懿旨、不妨加重、兩宮遵祖訓、必宜從輕。出自慈恩、益彰盛德。公猶慮其太峻、夜馳書云附子一味、請勿入藥。陳公以示張侍講、侍講曰、精義不用可惜。卒上之。公聞而歎曰、君友諫不納、如何冀主上納諫乎。翌日、以議俄事過陳公於直廬。陳公問消息如何。曰、如石投水、意謂留中也。又數日、皇太后視朝、諭樞臣此案可照原議、毋庸加重。公聞之、折簡相慶、云、如石投水、竟成佳識。是夕、置酒盡歡。」奏請飭部妥議分發人員章程。「是年與高陽李文正公倡建畿輔先哲祠。「祠在宣武門外下斜街。無碑記。陳師傅云、光緒五年、直隸告災。李文正倡議募振款於京內外。既竣事。商之沈文定、以餘款建畿輔先哲祠。文定雖南人而籍隸順天、樂觀厥成。其規畫一切、則公主之。按祠屋爲剽割憲有銘故宅。稍加葺治。張颺民爲公五十壽詩。記是年臺有去年捐振拾流亡、今年建祠祀賢良之句。颺民詩注、鄉祠有如意齋北學堂君子館綠勝齋諸勝、則建祠

後所名也。如意齋藏趙忠毅鐵如意拓本，公集田琬德政碑字，爲鐵如意頌，君子館藏河間獻王君子館碑故  
名。是年公與張侍講書，屢言隱鄉賢書畫事。又有札云，由龍樹院詣先哲祠，日晡必到，望卽過綠勝齋共  
話，且看補種竹樹已活否也。五月初三日，致李文正書言，購得史閣部議卷，價銀四十五兩，又中秋日書  
云，先哲祠改製中龕神牌暨楹聯書畫碑碣表工裝飾等費，自春間至今，約計在二百金左右。二十八日書云，  
先哲祠祭禮自當存錄，以爲後法，據此，則祠成嘗在是年夏秋間，所購書畫，將以藏諸祠中。其入祀人名位  
次，皆公所定。聞有書與李文正，言之甚詳，惜未之見。稱先哲祠者，敝杭州先覺堂例。中龕祀聖賢、  
聖，謂伯夷叔齊也。時有議雜賢哲祠者，公謂賢哲之賢，其義較寬，若中龕稱賢哲，則旁龕皆不得爲賢矣。  
說詳公致張侍講書。」

### 光緒七年辛巳公四十五歲

二月。奉旨補授翰林院侍講學士。三月初七日。慈安皇太后崩。十六日。行午奠禮。「按翁文恭日記。是  
日。翰林院編修唐景翼負手登階，左右閒望，恭邸呵之始下。命查職名，將劾之，午祭退，公邀文恭於門，  
曰，此人何罪，彼不齊集，將奈何。況中門未啓，可恕也。事得解。一說，恭邸開公言，命勿問，此語在退  
朝前。文恭所記，乃事後語。」左文襄公奏調所部助修畿輔水利。五月。戶部侍郎孫文懿公（詒經）奏舉  
人才。請敕公與張侍講親詣履勘。隨時函商王大臣督飭興修。奉旨張之洞張佩綸均毋庸派往。「畿輔水患頻  
仍。左文襄在樞府。抑鬱無以自見。奏請授春秋諸侯城成周例。率所部用命。文懿疏入。旨下左宗棠覆奏。  
五月。李文忠奏陳直隸河道地勢，言永定大清滹沱北運南運五大河，又附麗五大河之六十餘支河，觸壩  
堤埝，無一不壞，減河引河，無一不塞，疏濬工程，皆極煩鉅，萬萬無此財力。惟有次第酌辦，旨令酌度情  
形，隨時妥商辦理。六月。左文襄奏言，舉材助理，蓋以臣與李鴻章議論時有異同。恐意見驟有未融，或啓  
爭執之漸。張之洞張佩綸持論明通。於臣與李鴻章素稱投契。又同籍貫。於畿疆地形水勢尤所熟諳。必能據

實疏通、俾衷至是。惟自開工至今。拒馬牝牛及各水業已就治。永定全河可期順軌。張之洞張佩綸兩員是否仍須派往助理。應候聖裁。按公致張侍講書云、此等事總須通籌全局、計畫經營、分別輕重緩急先後次第、再為發策。豈有率爾操觚者。極好題目、而文章草率。贊助難。補救亦難。又云、恪靖既衷不謂然、而又數數顧、與之正論則不入。附和則不能。默然聽受則不成禮。何適而可。此兩札在文襄覆奏前。越綬堂日記謂李奏言皆有據、而不免故發難端。公謂難於贊助補救者以此。左軍治河、旋亦結束。充成安宮總裁。慈禧太后自上年來。以疾不視朝。四月。始聽政。五月。彗星見參井之間。入紫微垣。十日不退。六月。奏請修政弭災。其要有四。曰去貪壬。厲言路。飭武備。嚴禁衛。翁文恭日記、六月初十日、旨飭廷臣盡心匡弼、十五日。特旨嚴門禁、著該大臣遵照章程、實力奉行、以梅啓熙張之洞請也。又特旨敕內外問刑衙門。清理庶獄、審理京控之件、禁侵挪錢糧、核關稅盤金、各省防軍汰弱留強、考察屬吏、並以時事艱難、飭中外大臣破除成見、宏濟艱難、凡有言責者、直言無隱、以張之洞周德潤洪良品之言也。又奏請慎重東南疆寄西北界務。原奏略曰。方今急務、無過東南之海防、西北之邊防。黎培敬已授江蘇巡撫、而展轉候代。岑毓英已授福建巡撫、而遠在蠻荒。曾國荃已授陝甘總督、而家居療病。到任均需時日。疆圍有重。何從措手。相應請旨促令該督撫等迅速赴任、早籌防務。至兩江總督兼領南洋。為東南半壁所寄。尤為重要。劉坤一嗜好素深。比年精神疲弱。於公事不能整頓。彭玉麟與之籌議江防、頗為掣肘。且沿江礮臺多不可用。每一發礮。煙氣眯目。甚或毋毀。而劉坤一不能別加營造。一日有事、豈不可危。方今中朝汲汲以禁煙為自強要策。而疆臣蹈之。何以服遠人乎。伏望朝廷懇念東南雄劇。疆寄非輕。別簡清強威重大臣、使代其任。海防至重。臣不敢不極言之。如一時難得其人、或於彭玉麟楊岳斌二人中簡擇一人。令其常駐金陵以下。督辦江海防務。或亦可稍輔其不及。又曰。伊犁參贊大臣升泰。由雲南布政使自請前赴邊地效力。是以命往西域經理界務。其人才器如何、臣未深知。第觀其慷慨請纓、志氣甚壯。已為人之所難。抑臣思之。語云、大巧難於學習。今新疆分界、即使劉錦棠金順張曜錕給諸人為之、則軍威久播、熟悉地形。俄迴哈薩

克布魯特各部皆所敬懼。自易越理。若深一不習地理又不知名之委贖。恐辦大益也。豈僅辦益。恐多一生手。轉致橫生意見耳。且該大臣因其祖富俊曾鎮遼東。故於東陲形勢掌故皆加講求。夫其人習於東而用之於西。似亦不足以盡其所長也。可否將分界責成劉錦棠等。而升泰則發往東三省量加策遣。或尙有實效可觀。後二旬。陳師傳因星變陳言。論劾內外大臣四。其一卽兩江。旨令彭玉麟查辦。七月。奉旨劉坤一著夾京。彭玉麟署理兩江總督。奉旨補授內閣學士。兼禮部侍郎銜。香嚴老人六十壽言。在內閣協同批本。票籤着時有疑舛。往復駁正。至於十反。七月。孫厚現生。彗星復見。太白經天。閏七月。再疏請早定疆寄。弭災防患。八月。有旨簡用陝甘新聽諸臣。如公所請。九月。孝貞顯皇后梓宮奉移普祥峪。永安於定東陵。公扈從。至遵化州。有詩。禮成。加一級。十一月十八日。奉上諭補授山西巡撫。十二月初八日。陛辭請訓。奉皇太后懿旨。時事艱難。如有所見。隨時陳奏。并留心訪求人才。十二日。出京。過保定留一日。二十日。過娘子關。入山西境。沿途體訪民生吏事。二十二日。至太原。二十四日。接篆視事。

贈太僕寺卿張公神道碑。公偉軀。幹。廣額方頤。目威而慈。聲若洪鐘。言論宏達而不繁。坐立至老不跛倚。在官廉而不濇。尤厚於宗族。卒之日。家無餘財。嘗官鯁直不阿。奸面折人過。亦好拯人之危。僚屬始懼而終感之。興義遺愛祠碑。公少孤貧苦。久處田間。故習知民間疾苦事。三世爲州縣官。故習知吏事。性好學。至老不倦。聽政之暇。率危坐讀書終日。在郡纂府志。創建試院於城中。增修珠泉書院。延名師以教士。又建十八先生祠。祀明季忠臣吳貞毓等。視士民如子弟。士民亦視公如父師。郡人秀異有志者。每於課試書院日。集於一堂。論學談藝。課卷皆手評定之。或招入署。從容款接而教誨之。文化之興。公之力也。按文襄行事本末。類贈公者十七八。錄此以見淵源所自。

公生長兵間。早歲卽有志於經世。嘗聞人言。咸同之際。公盡讀書。夜觀星象。至於歔血。同治壬戌。卻張勳果見招書謂。平生志趣。一雅不欲以文人自命。而縱橫大略。略涉藩籬。是歲在開封。聞武進人劉申孫

爲申受禮部之後。能承家學。訪之於二百里外。禮部講公羊之學。公說經不主公羊、而早歲乃不拘家法。於皇清經解、有譏語百數十條。同莘錄所見者入於雜著。其未見者蓋尚不少。袁忠節云公讀書沈思穿穴。一事一義、必了徹其究竟。從不妄下丹鉛。嘗勝其坐曰：兵家盡補能康世、經義成明乃著書、其後數歷所至、以教士練兵並重、實基於此。

同治間大難初平。一二鉅公主持風雅。以金石考訂相尙。公集中爲潘文勤考釋藏器之作、大率成於是時。然有考釋、無收藏。援據考辨。不離經傳。光緒初。蜀學任滿。入都供職。忱世變之日亟。不復措意及此。張幼樵開學欲與公及陳公毅屬分纂史事切於實用者。公復書云、若欲有所撰述、他體裁皆不宜、擬爲皇朝經世文續編、蒐羅五十年奏疏吏牘、並近日名家文集、選擇錄之。此體有畔岸而無偏倚。然有今無古、若以古今通爲一書、思之未得其方。按此是偶然興到語。亦未著手及此。

光緒初。言路發舒。時論有清流之目。陳師傅歷爲同莘言請抑奄宦事云、公心苦、主於斡旋。余性巖近於率直。兩人言事類如是。同莘編遺集成。見而欣然。欲作序發揮此意而不果也。宮廷之際、人所難言。不幸而始終其事、故晚年詠史、有調停頭白范純仁之句。

光緒八年壬午公四十六歲

正月。令司道府州考察屬吏。〔山西官民積習燻散。以清明強毅率之。立定課程。丑正二刻卽起。寅初閱公牘。辰初見客。下車以察吏求才爲先務。凡實任候補各員、或爲守兼優、或瑕瑜不掩、或優美而未學、或有才而不羈、或有名無實、或一長可取、或貪鄙巧詐、物議沸騰、或陋劣昏庸、不堪造就、令司道府州各限半月、將屬員中確知實蹟應舉應劾者、填註事實、確加考語彙呈。不拘一格。〕裁各屬解撫署公費銀、廳庫供支撫署卓飯銀。並禁革一切陋規。〔凡裁二萬五千一百五十兩。嗣推之通省、爲各府直隸州衙門別籌津貼。其向收州縣公費者、河東道全裁。餘酌減。瘠苦州縣全裁。尙非瘠苦者減半。尙不解送者、申明永禁。爲閩省屬官歲省銀七萬八千九百一十六兩。又嚴禁餽送上司水禮。此後有於裁減之外橫索巧取者劾治之。〕籌減陽曲等處差徭。〔山西差徭最爲民病。閻文介會忠襄剔弊改革、西南各路有驛州縣、一瀆積患。惟省會之陽曲縣、東路之平定州並所屬盂縣壽陽縣、南路之靈石縣、差累尤甚。而役繁費重、措手爲難。前任衛靜瀾撫部議籌辦法。未及行。公檄知府馬丕瑤察勘東南兩路、勒限舉行。陽曲則躬自督飭辦理。籌款生息。官設差局。並買補驛馬。嚴定應差章程。嗣推及於南路之忻州、北路之榆次縣。〕定明備所樂舞生章程。〔城文廟、舊製樂器祭器、十無二三。衛撫部委員赴山東按式製備。調直隸定州樂舞領催僧生等五人來晉教演。挑選樂舞各生一百八人。立明備所。以七年九月開辦。至是舉行祀事。禮無違失。布政司詳請立案。因移咨王可莊學使仁堪。准以樂舞生作僧生。給衣頂。免縣府試。並酌免本身差徭。遇有事故、准豫爲呈明、以備用之樂舞生頂補。〕二月。籌抵例錢攤捐。〔山西年解部銀二十八萬餘斤。例支價脚銀一萬一千餘兩。

不敷之款、撥之州縣、凡三萬九千餘兩、公委員赴省外訪究利害、先奏請將舊欠攤款撥案撥補。嗣委廉幹之員總司官鐵局事。歲省一萬六千兩。〔承旨起團敬銘於解州。〔文介退居解州。累詔起用。均以疾辭。公陸辭日。皇太后命傳旨宣召。乃派知府馬丕瑤賈手書敦勸。文介感動。四月。至太原。時已有旨授戶部尚書、公敷宣恩旨。正言規勸。文介幡然就道。並告公以晉省應興應革事。清審其一也。〕四月。裁革委員例差。嚴禁營伍積弊。〔將領不恤士卒、剋扣科派者、從嚴參辦。州縣藉興工修志按畝攤派者。嚴行禁革。〕勅詈害民不職之同通州縣官九人。保獎循良之吏知府馬丕瑤等六人。〔其餘不知振作不免瘡累者、嚴檄教戒、許其自新。嘗言人才難得、當節取而磨厲之。一省政治清濁、責在大吏。道府以下、無非視風氣爲轉移。故懲勸並用。〕遵旨廬舉人才。〔凡京秩十四人。外官二十九人。八旗大臣可膺邊寄者六人。武職十人。素無通識者什之七。疏入、樞垣驚詫。蓋一疏而特保六十人。前此所未有也。〕越南事亟。奏請鑿兵遣使、先發預防、並遣重臣駐粵籌辦越事。奏請限制洋人游歷內地。〔洋人游歷護照。每填游歷十八省字樣。爲其毫無禁阻、地廣路歧。奏請祇准指定一二處。嗣總署議。此後洋人游歷各省。由何處至何處。經過何處。均於照內註明。不得泛稱十八省。并通行各使飭領事遵照。〕設教案局。〔山西民教交涉之案日多、歸化城又新准俄商通行、教士遇案徑向撫署饒舌。因設教案局。以冀導道司之。衡量事理。據約准駁。徑致函撫署者不答、令州縣秉公剖斷。教民遇刁教士生事者、令主教驅逐撤換。教堂安分講理者嘉獎之、教士之饒稍戢。〕六月。奏請派直隸口北道奎斌兼辦山西豐寧兩廳押荒事宜。〔豐鎮寧遠兩廳、有各旗官寬馬廠。公以墾荒濟餉爲籌邊善策。而兩廳距省千餘里。晉吏又無習邊事者。口北道奎斌辦張獨多三廳押荒有效。轄境近兩廳。奏准飭其兼辦、酌仿直隸章程試行。〕特參貽誤善後之已革山西布政使葆亨前冀寧道王定安等。奏明整飭晉省治理。〔先陳八事。一、荒地未墾尚多。請寬起徵年限、以勸墾荒。一、晉省向無魚鱗冊。過割不清。催徵爲累。惟清丈可爲民除害。請嗣後有紳民呈潔清丈者、准勘明舉辦。一、差徭爲州縣虐政。現分別裁減。請降旨飭邊境文武員弁不得騷擾。如額外需索。卽據實參奏。一、禁種罌粟。先齊

贖。後礦餉。先腹地。後邊廳。并設戒煙局多方勸戒。屬官有嗜好廢事者、撤任停委。弁勇不戒者汰黜。一、裁減各州縣應解公費銀兩。禁止餽送水禮。嚴定章程。奏明立案。一、州縣有常年攤捐十七款、官累不支、分別裁抵。十七款之中。有例解錢款及綱緝紙張諸色。請准另籌抵解折解。一、擬於包頭鎮建倉積穀。并於磧口多建石倉以儲之。以備緩急。一、晉省前收各省振款十五萬餘兩。前已移作善後之用。請提歸正款、以昭核實。原奏有云、前撫臣銜榮光考究經年。以一切利病原委告之於臣。加以臣數月來之鉤考思索。灼見晉省公私困窮。幾乎無以自立。物力空匱。人才艱難。上司政出多門。屬吏慳不畏法。民習頹惰以蹙其生。士氣衰微而廢其學。軍律日即蕩地。吏胥敢於爲奸。譬如尪羸之軀。而復爲百病諸創之所攻削。固非表裏兼治不可。伏望斷自宸衷。稍適常格。俾臣得盡力爲之。又、四月中與張劬樵學士書云。晉事路得綱領。正有經營。以今觀之。大有可爲。薄劣亦相能了。但得朝廷垂鑒、求無不允。則今日之晉。雖不能爲強國。足可以爲治國。」奉上諭覽奏具見實心爲民、潔己率屬。深堪嘉尚。山西積弊相沿。吏治日紊。又當災祲之後。民困未蘇。亟宜興利除弊。整頓紀綱。俾地方日有起色。即著悉心次第經理。以肅吏治而厚民生。設局清查庫款。〔山西庫款、自道光二十九年後未澈底清查。軍費報銷善後交代各案、虧挪掩覆、繁碎繳繞、爲奸蠹窟穴所在。公奏請清查。設清源局於撫署。限期竣事。并請免造歷任交代冊。開具簡明清單。改題爲奏。〕七月。請展緩協撥各餉。〔晉省財賦太絀。本務尤多。故有此請。〕請鑿通口外七廳邊缺。〔醇化、薩拉齊、和林格爾、托克托、清水河、豐鎮、寧遠七廳、理事同知、例以滿員補用。今昔情形不同、請不分滿漢、量才銓授。〕山陰地震。〔上年冬、山陰縣岱岳鎮地中有聲如雷、是年入夏後、地震累日。七月、地大震、南至代州。北至懷仁縣、居民大恐。〕率屬修省祈禱。整飭郵政。〔賈補缺額馬匹。嚴禁侵蝕馬乾。及拉扣商民羸馬。〕八月。山西鄉試。入闈監臨。〔山西科場支應。向由陽曲縣承辦。科派追呼。官民交困。士子食物至不堪下咽。公先期籌款。永免攤派於民。設科場支應所。百物務求豐潔。惟嚴禁浮華靡費。大修貢院。建兩廊七十餘間、爲士子應點之所。建皇華館、備主考官駐節。內簾同考官例調本

省科甲出身實任者。而職守重要、未便一概調取。因選候補之員出身科甲者、親加考試、分派校閱收掌各差。光緒山西通志。貢院於光緒八年拓修。內籙各考官所居、謄錄對讀諸所、悉更諸爽塏。其外門垣樓闕、無不增高於舊。而裁藻鑑堂及後來所益之千餘號舍。改銜鑑堂曰豐樹堂。又於院內左右環以長廊。興工二年。用銀三萬有奇。皆出籌款。其科場經費、文場約需銀二萬二千餘兩、武場約需銀三千八百餘兩。除動公款銀六千四百餘兩外。不敷之銀、舊由府廳州縣捐廉公幫。是年裁節冗費。別定章程。籌款生息。文武兩闈支用裕如矣。按貢院修理之費、取之於葆亨家內之道府同通州縣佐雜三十餘人捐款。今貢院已改學堂。惟豐樹堂扁額尚在。叔允蓉江先生卒於揚州。〔屠寄安襄鄖荆兵備道張公墓志。公弱冠補縣學生。援籌餉例得官兵部主事。丁父憂。服闋。投効湖北軍營。咸豐十年春。擒匪自安徽被剿、回竄湖北。疊陷蕪水黃州麻城。略黃安孝感。分踞漢南。武昌大震。時巡撫胡文忠口境辦賊。駐師英山。省城守備虛。在事者多駭避。獨戶部主事闕文介主糧臺與公日夜規畫防守。跣步不離局。事定、深為胡閣三公所器。敏功、以直隸州知州留省補用。同治四年。署襄陽樊城同知。時捻匪出沒河南。輕騎犯漢東州縣。屢以秋冬窺樊城。公以襄樊互為唇齒、營南北要衝。無樊即襄亦不守。而瀕漢且盡失其險、則日夜督紳民登陴守禦。間出奇挫其鋒。以故賊不得逞、而樊屹然為巨防。六年夏、鄖陽蛟發、水下汎樊城、平地數尺。小民登屋攀樹、鵲望待援。米店居奇、價踊貴。公責令平糶、躬擲舟載粥飯分餉飢民。夜率紳團防守襄陞。數日、水勢陡落、民不為災、獎於後功、補缺後以知府用。加運使銜。賞花翎。當提督郭松林之剿捻漢東也。軍中糧匱。飛書乞糶數千石。公恣同滅賊、傾貲購餉。士馬飽騰。後郭軍平捻山東、追錄籌餉功、奏獎補知府後以道員用。中間代理均州知州襄陽通判、歷署棗陽孝感二縣知縣。援例過道員班。光緒六年。署安襄鄖荆兵備道。其在棗陽也。值捻匪初平、習亂多盜。劫財物不足。并賂賣其婦女、或質富家子勒贖。公嚴捕巨魁、置之法。追生口被略還者無算。期月之後、境內肅然。在安襄鄖荆任時。廣招流亡、復其田業。兼命屬吏赴江浙采買桑秧、勸民樹藝。並僱機匠教之組織。至今瀕漢上下、桑陰比戶、機聲盈耳、皆以為張公之利焉。未幾、奉檄委脩漕運剝

船三百艘。工成。押解入遼。觸暑上道。舊疾血動。行至揚州卒。時年四十有八。九月。參革縱丁擾民之知縣一人。十月。校閱武鄉試。〔循成案分三圍。公校閱堂圍。委布政使校閱東圍。按察使校閱西圍。〕編練撫標馬步親軍。〔撫署有值班練軍營弁二十名。効力武舉進士世職等二十名。令都司張福啓督率教練以爲馬隊。與親軍步隊四十名練作馬步合陣。別於撫標挑選馬兵五十名。步兵一百名。曰撫標馬步親軍營。〕飭各屬買補常平倉穀。〔丁戊大饑以後。倉穀久虛。曾忠襄奏定以賑款五十萬兩並籌款五十萬兩買穀還倉。而州縣延宕未辦。是歲穀賤。限期買補。并還社義倉穀。因災動用者。〕禁種罌粟。〔嚴禁地方官私收畝稅。及營弁衙役得賄包庇者。令民改種有益易生之物。種煙之地。查出充地方公用。三年後本人悔過者。原地發還。〕特委知縣不職者二人。十一月。袁陳豐寧兩廳押荒升科辦法。〔嚴禁委員攤派需索。佃民呈繳押荒地價。即可領照。永爲世業。官荒馬廠畝徵銀一分四釐。王公馬廠畝加徵私租四釐。牧地官荒。不徵私租。設鄉里保約。需察一如內地。〕請停同通任雜鹽務各官分發三年。〔捐納到省者日多。有妨吏治。奏請無論指省改省。概停分發三年。部議准停一年。明年十二月期滿。奏請再停一年。〕請定就地正法章程。〔晉地界直隸兩省。游匪出沒。迭飭文武防營講求緝捕。調派兵勇。於南北路分段梭巡。申保甲守助之法。手定章程。委准仿屬舉辦。并以就地正法舊章。語意渾括。至是又屆一年期滿。請詳定章程。以資懲遏。〕籌定裁抵攤捐辦法。〔札布政司文云。數月以來。經本部院督同司道局員。稽考舊章。審度情事。力籌款項。詳酌章程。應裁應抵。議定辦法。將舊日所攤及黃絲油紙辦考棚費各款。概予免攤。其分別裁抵款目。條列札行。〕十二月。築汾堤。〔是年汾水盛漲。平陽知府周天麟請築隄西門外。爲一勞永逸計。批飭增寬培厚。一律如式。不可惜費。〕查禁煙館。是年設令德堂。選通省高才生入堂肄業。治經史古學。〔省城舊有晉陽書院。王可莊學使上年選高材生五十人肄業其中。治古學。公到任。以書院地隘。而太原府署後有明晉齋寶賢堂故址。就其地別建精廡。曰令德堂。會銜入奏。工未舉。學使丁愛去官。公與新任呂學使鳳歧就橋頭街寬屋開辦。延洪洞王願齋兵部軒爲主講。聞喜楊儀村舉人深秀鄉寧楊秋涓舉人篤爲襄校。山西獻徵。願齋

幼治三禮學許氏說文。道光丙午入都。見張石舟。遂究地理學。又識王荏友苗仙露何子貞。由說文兼及金石考訂。祁文端屬輯漢儒訓詁中涉義理者爲一書。顧齋謝之。謂不能持漢宋之平徒取愛爭也。張文襄督四川學。聘主尊經講席。辭之。文襄撫晉。開令德堂。顧齋總校事。楊秋涓篤張鐵生于鑄楊儀村深秀協講。五日一會。聽者翕然。文章軌轍。不爲俗學所囿。秋涓精三禮。訓詁尤專。署陽曲訓導。初爲襄校。後改分校。日爲諸生講儀禮說文解字。乙酉考選拔及鄉試。有文能運用許氏說及史學詞章具有根柢者。皆堂中肄業生也。按王楊皆治核學。承乾嘉老輩師法。公遺稿有委秋涓充襄校兼監院札文。云、襄校責近經師。以漢學爲本。監院責近人師。以宋學爲本。務須體用兼勗。由淺及深。尤須嚴守規矩。禁絕嗜好。不准絲毫沾染惡習。當時教法如此。考王學使以是年秋丁憂。山西獻徵言學使與公會奏。則籌設此堂當是年夏秋間。秋涓充兼院在光緒九年。蓋至是教法亦漸加密矣。」

### 光緒九年癸未公四十七歲

正月。籌辦練軍。〔上年十二月、奏請於直東等省、募馬隊四五百名、來晉訓練、緝盜防匪。部復山西無專之區、轉籌添募、恐滋糜費、應勿庸議。公奏言。今北徼商路日開。西陲藩籬未固。海防邊防皆不可緩。整頓邊兵、惟北人宜、臣意欲辦山西練軍、以備他日推廣。不獨爲巡緝計。亦不獨爲一省計。奉旨允准。嗣調記名總兵李先義補用副將吳元愷等督帶操練。〕釐定廳州縣交代章程。〔晉省交代懸案八百有奇。有積至三十年者。因裁禁交代繁費。嚴立限制。明定功過。令司督飭核算。勁抗不清結之州縣官十八。勒限結報。〕減免各屬差徭。改舊有差局爲清徭局。〔差徭名目繁多。令各屬詳報。不准一字欺隱。飭與紳耆妥議章程稟復。嗣飭各屬、每月底由局將月內所支車馬費數目、官用局用各項錢文。餘錢現存何處、分別管收除在、開單榜示。〕飭各屬審理命盜案不得刪改口供。三月。遵旨督飭所屬勒限三月戒除煙癮。〔御史劉恩溥奏請革除銅習。奉旨中外文武大小各員、如有吸食鴉片者、務當痛自清洗、晉省官以嗜嗜好者、前

此撤參停委不一。而積習未改。至是又通行嚴禁。孫厚璣生。四月。設洋務局。延訪人才。設桑棉局。募蘇州織綢減匠充管教習。設鐵絹局。經辦綢緞紙王項貢品。綢緞紙爲任土之貢。官民俱累。上年奏請折解。詞戶部工部內務府議復。令仍解本色。故設局承辦。蓋剔宿弊。不再攤派於民。飭各屬嚴禁諱盜及買空賣空。五月。再申種煙之禁。先就著名產煙之宣城代州。委員弁分查互勘。徧歷谿谷。悉數剷除。各屬民戶聞風自拔。禁令遂行。六月。遵旨解款撫恤蒙部。內外蒙古上年苦旱。駝馬盡斃。臺丁潰散。奉旨妥籌撫恤。公奏言山西雖極支絀。不得不急顧邊外大局。即日籌解四萬兩。續修晉政輯要。晉政輯要。其先蓋歷任傳抄之本。自乾隆五十四年刊行後。久未續刻。至是因清查庫款。具悉原委。局專將竣。命續修之。以明職守。循原例爲吏戶禮兵刑工六門。分目附目二百餘條。光緒十四年書成。凡四十卷。鑿板印行。甄別屬吏。奏參庸劣不職者九人。七月。整頓釐金。百貨釐金收數微眇。洋藥陝甘土藥行銷擴內。藥釐爲委員侵蝕者半。因札司催收。派員密查。勘修韓侯嶺驛路。籌賑山東水災。山東河決爲災。公奏言。山西前當丁戊大饑之際。山東官紳公私捐助。凡四十三萬餘金。全活晉民無算。以受爲施。誼爲允當。於善後項下撥濟三萬兩。通省官員捐二萬二千三百兩。并曉諭紳民量力捐助。嗣各縣有抑勒書捐者。出示停止。八月。籌濟順直災賑。於善後款內撥解二萬四千兩。通省官員捐銀一萬六千兩。議復御史光熙奏。山西災後荒地撥旗民屯墾。勢不可行。原奏以山西與吉林黑龍江並論。請以荒地撥旗民耕種。俾裕生計。公奏言晉地瘠薄。農利不豐。自大饑荒蕪。數年以來。饒沃之區。陸續墾闢。所墾多礮礮斥鹵。且散在數十州縣。一州縣之內。又分屬數十村。並非連阡畧陌。可以創立聚落。分置營屯。所請於情形不合。疏入。其議遂寢。知縣外補壅滯。奏請變通選法。外出之缺。改一咨一留。原奏略曰。竊維吏部古號銓曹。今日亦言銓選。銓者。稱也。謂立法量才。如稱之平也。外補難則害官方。內選滯則困寒賤。選補並重。斯爲大公。且即用一班。乃國家取士掄才爲民社擇人之上選。軍功候補兩途。皆由歷練辛苦而得。濫等雖不能免。要自幹練爲多。若事急則優其階資。時平則扼其仕進。亦無以昭大信而勸將來。即使一時一項、

時有出缺多寡之不同。而選補各不偏枯、人情自無缺望、既以昭平允之定法、亦以示簡易之宏綱。」其丁憂起復者、請仍留原省補用。〔請毋庸另捐分發指省等銀。此外由府州下至佐雜、事理相同。請類推酌議。原奏略曰。以禮去官。非有過謫。漢魏以來。棄官行服者。史冊稱美。戶部虛免交銀兩有礙常捐。是則有力者進用。清貧者投閒。似未平允。大抵外省牧令。奇士罕覩。中材居多。要在洞悉一方民情。多識本省成案。則駕輕就熟、其信易孚、其政易成。古語有云。大巧拙於熟習。若起復者仍歸原省候補。於吏治亦有裨益。夫省有限之常捐。而可以全無窮之政體。此亦厚風俗惜人才之一道也。疏入。俱下部議。〕欽差大臣戶部尚書額勒和布署都察院左副都御史張佩綸赴陝西查辦事件。道出山西。率司道迎於驛次。〔欽使先期牌示沿途州縣驛站。禁革一切浮文。公遵例禁。不敢出郊迎候。令太原知府馬丕瑤候於王胡驛。使輒行近省垣。來咨解釋例意。謂出郊無礙。公率司道出城六十里。迓於驛門。慮倉卒不得盡所欲言。預疏數十事。即席問答。十月。欽使事竣回京。公請迂道省城。而司道以爲不便。仍迎送於王胡驛。〕九月二十四日。閱兵。〔太原營守備裕海不守軍律。撤任示警。按公在任閱兵、蓋非一次、茲記月日可考者。〕奏陳口外七廳改制事宜。〔改理事同知爲撫民同知。籌議未盡事宜凡十二條。曰分別缺項、曰定章補署、曰更議管轄、曰審築城垣、曰編立戶籍、曰清理田賦、曰建設學校、曰變通驛路、曰籌補道糧、曰添設公費、曰募練捕兵、曰議停巡牧。疏入、下部議。〕奏結已革藩司葆亨道員王定安參案。十月。勅罷文武不職官員九人。法兵入越南。邊防告急。〔春夏以來。廷議和戰不決。入秋法兵連陷北寧北圻諸鎮。揚言奪我瓊州。〕十一月。奏陳戰守事宜。并瀝陳不可罷兵。〔又言法患未已、請嚴督滇桂之戰。急修津廣之防。〕濬文韓河。〔自文水縣張家莊迄汾陽縣西河保。挑引河一道。并挑通上河頭一帶。令附近孟鑿河之瓦鑿白石兩河。均自西南斜入文峪。〕籌議京員津貼。〔戶部因言官條奏、議給京員津貼。每人自數十兩至二百兩。合計需二十六萬兩。令各省關提解外銷之款。山西應年解三千兩。公奏言宜籌正名經久之道。欲正名而足用、莫如作正開支。其指撥各款、釐金取之奏案一成、鹽務取之雜課、關稅取之溢解。提其十分之三、多則百萬、少可得九十萬。十分之

二、亦可得六十萬。名正言昌。取之有名。稽之有籍。既無窳貧內顧之憂。必有國而忘家之報。又疏請加輸餉料道津貼。以饒其行檢。養其風稜。疏入下部議。竟寢不行。請將年例應解物料分別免解。〔晉省例解之物。大宗有五。曰織綢紙絹。如解足舊欠之數。需庫銀十萬餘兩。攤捐三十萬餘兩。公奏言耗重金以充府庫。積此不急之物。似爲非計。請將典禮所用之織綢。軍實所資之絹。新陳並解。其織綢紙三項。免陳解新。旨下所司議奏。〕十二月。與北洋大臣會奏。晉鐵運銷奉天上海等處。請變通成例。改由天津出海。仍就產鐵地方講求鑄鍊。招商行運。〔平定孟縣一帶爲產鐵之區。運銷奉天等省。而定例鐵斤不准下海。陸運成本過重。銷路不暢。因咨商北洋大臣。請由海道運銷。嗣准咨復。條約章程。並不禁鐵下海。惟洋商請領土貨三聯單。經過內地。免征釐稅。於地方稅課不免有損。如鐵商先交課。然後發賣。則洋商無可藉口。因飭司籌議辦法。咨商會奏。此疏北洋主稿。見李文忠公奏議卷四十八。〕復申種煙之禁。令各州縣籌辦社倉。〔就前人成法暨通省情勢。酌定章程十一條。通飭遵辦。〕湘毅軍修井陘南關至東門驛路成。奏報清查庫款完竣。〔起道光二十九年十二月。訖光緒八年終。凡舊管二百一十八萬餘兩。新收一萬五千五百二十三萬餘兩。開除一萬五千八百二十一萬餘兩。實在存銀七十二萬餘兩。〕奉頌賜御書福字。〔歷年任。歲終均有福字之賜。後不備載。〕是年通計全省未墾有主新荒地二千七百四十六頃。無主新荒地七千二十八頃。額徵銀七千餘兩。米豆穀一百餘石。奏請俟實在開墾之日起。展緩三年。再行啓徵。各縣輸買倉穀凡八十五萬石有奇。定額未費者十一萬石有奇。各部立案。年終考核地方官禁煙功過。請旨分別獎懲。〔通省禁種罌粟。南濱黃河。北抵邊外。或十去八九。或十去六七。〕籌推廣興學辦法。〔咨商學使。凡十條。曰減社錢以廣義學。曰籌經費以修書院。曰去棚費以汰積弊。曰免差徭以尊學校。曰重歲貢以勸求學。曰戒鴉片以作士氣。曰嚴教官以端表率。曰裁陋規以恤寒素。曰清學田以復舊章。曰整武校以資練習。〕各州縣文廟禮器闕失。命補治之。命山西書局續運南省書籍。〔上年命書局運南省書籍發售。是年九月。又命籌餉局撥五千兩。合書局存銀三千兩。匯天津招商局代運。以便士人購求。〕請展緩校閱營伍。〔是年

爲校閱山西營伍之期。奏言丁戊之間、兵丁死於飢者甚多。幾至無人應募。近年雖已募補、不免貧困延羸、技藝生疎。軍實敝壞。無款修理。惟撫標精兵營練軍暨大同鎮練軍兩枝稍可觀。擬俟明年春夏間、口外七廳改制規模已立、練軍亦漸推廣整飭。先赴北路出邊一行。既察邊情、兼核軍實。再俟河東鹽務整頓漸有起色。親赴南路、以閱營伍而兼巡邊。屆時再旨奏明。如有良庸不職之將弁。仍隨時考察參劾。

光緒十年甲申公四十八歲

籌議開采鐵礦。張副憲上年過晉。公言購洋鐵非計。宜於晉省煉鐵成條。供津局之用。是年九月。副憲入晉。公致書於時事有所論列。兼及鐵政。總署議於山西設局煉鐵。屬公籌辦。公謂此年來刻意經營者、數窮奉行。飭晉督局試購洋銅鑄錢。晉督局紅銅由漢口陸運。費繁本重。委員赴天津考洋銅價值。合計運費、所省不貲。因咨北洋飭招商局購洋銅運晉。開兩爐鼓鑄。二月。甄別武職。劾罷副將以下二十一人。三月。奏頒黃穆宗毅皇帝聖訓一部。再疏論七廳改制事宜。七廳編查戶籍、綏遠城將軍豐紳等鑿有礙土默特各旗游牧、請復舊制。公言其不可。仍申前請。奉旨豐紳等奏業經戶部議復。仍著該撫等妥商具奏。漢邊軍事失利。沿海戒嚴。四月初一日。奉三月十七日上諭張之洞來京陸見。飭冀寧道議令練軍經久章程。札冀寧道文云、本部院擬立令德堂。以爲考課諸生經史古學之所。原設橋頭街。屋宇湫隘。不足萃集圖書。栖息羣彥。經本部院奏明修造。並飭太原府陽曲縣勘定該府署後寶賢堂故址、及工程所委員繪具圖說前來。自應急遂興工、以朝早觀厥成。查令德堂爲該道專責、自應詳議章程、以期歷久可行。所有懇請主講、編立功課、修繕雜支、如何籌款動用、應用書籍、如何購置藏皮、課卷日記、如何定式刊印、以及監院教諭如何資成稽查、兼差分校如何責成教習駐院、高才如何體察勤惰、書役齋夫巡更雜役、如何添設約束、應由該道一一議立章程、分條請示、酌定辦理。按令德堂章程、定於公去任以後。見晉政輯要卷二十三。諸生肄業者、初僅三十人、後廣爲五十人、續增至七十人。其後通省人才多出於此。講堂之東有四徽君

彌。祀傳青主閩百詩范彪西吳蓮洋。庚子以後，議結教案。以令德堂子教士，改爲教堂。旋以銀十萬元贖回。今爲師範學校。舊有晉藩寶賢堂法帖石刻尙存。」籌議選練山西主兵。酌改營制。減額加餉。「奏陳事宜十二條。曰改定營名、曰修建營房、曰分防移調、曰練習火器、曰出省加餉、曰酌給公費、曰限制長夫、曰支食廉俸、曰分設汎弁、曰變通借補、曰改鑄印信、曰暫留守兵。大指取勇營之簡易、參以制兵之持久。開單繪圖、請下部議。以規久計。」請緩解歷年生素絹。「歷年欠解生素絹凡二十二批，庫款支絀請緩解以紓積累。」奏定潞鹽起運預繳陝釐辦法。「潞鹽運陝、引商困於重疊抽釐、議定在晉納課時完釐解陝、以恤商運。」奏報四門韓侯嶺修路竣工。「四門驛路。夙稱天險。衛撫部奏明興修。公到任後。迭派將弁督兵分段修治。西起榆次縣什貼鎮。東訖獲鹿縣土門口。凡三百八十餘里。塹山填谷。開渠築隄。隄內樹桑。隄外樹柳。可以方軌而行。東天門舊路險峻。旣修治之、又於山麓開新路七里。聽民所由。至是全路工竣。韓侯嶺爲省南驛路最險者。自坡底鎮起。至霍州北關。凡九十里。分十一段施工。兼用土石。鑿石彌。開水道。築證關牆。一如四天門法。此外自潞安府西至洪洞縣曲亭鎮、開路三百五十里。潞安府東北至黎城縣東陽關、開路一百四十里。平遙縣東圍至沁源縣赤石橋、開路八十里。偏關縣至朔州秤溝、開路一百二十里。皆商旅所必經。而素不通車者。四天門韓侯嶺路工用營兵、間雇民夫、所費祇三萬餘兩。餘路由地方鳩工興治。竣工後就載負車驛酌抽微資、責成紳士經營。爲歲修之費。」初八日。交卸篆務起程。「沿途追憶應告後任事、隨筆記之。行抵平定州。留一日。十五日。宿於獲鹿。致書奎樂山護院。並諭汾河文峪工事。在晉三年。勞頓過度。心忡氣喘。鬚髮多白。誥誡屬吏。至於舌本枯澀。不能多言。途中路用藥餌。藉資調攝。」二十三日。至京。「宿天寧寺」。

公於晉政、其勤至矣。始至之日、官積累、民積困、軍積弱、庫積欠、刻意振作、而同志無人。致張幼樵副憲書云。晉事日不暇給。事事皆牽連相困。欲整頓一事、不能不百廢具舉。惟苦人才不足。稍可靠罷了。事者、俱已委任優待。大率一人兼二事、甚或三事。若將中廟磨練造就、未嘗不可。然非一兩年內所能猝

辦也。又云。文案無人。一切筆墨皆須己出。不惟草疏。卽公牘亦須費心改定。甚至自創。非不知任人則逸之義。其如未得其人何。此二札在到任之初。歷二年。綱舉目張。民有餘糧。官有餘力。此卷光緒九年之冬。具著清查庫款之數。通省墾荒積穀之數。皆公殫心竭慮而後得之。非循例文字也。遺囑於州縣來文之言禁煙者。批語無一重複。無一蹈空。如此者數十件。今輯入本集者什二三耳。山陰俞虞軒侍郎云。公在晉時。蚤作夜思。無片刻暇。詩文皆轍筆不爲。不用幕友。惟慎選僚屬。委以簿書筆札。侍郎亦僚屬之一。司例案事。從未干部中駿詰。公稱其精練。今墓本拱矣。惜當日未從問公軼事也。

公在晉。欲大舉經營鐵礦。籌鉅款購外洋軍火以練晉軍。語見致張副憲書中。其論邊事。謂北徽商路日關。西陲藩籬未固。深謀本計。邊備爲先。大青山以南。歸化城以東以西。延袤數千里。西漢元朔以來。久爲郡縣。卽定襄雲中五原三郡之地。開地招墾。以壯邊塞之藩籬。建倉屯糧。以足營伍之兵精。均爲今日籌邊要義。蓋目光所注。在數十年以後。抱冰堂弟子記云。邊外七廳蒙地。開墾升科。屯田練兵。確可舉辦。自歸化城東至豐鎮。西至和林格爾。規畫已有大略。適擢粵督去。未竟其事。後任疆而行之。辛丑以後。遂大舉興辦。實當日發其端也。

分德堂教士之法。漢學宋學並重。已見上文。其遺事有可述者。楊秋涓精篆隸。書經篆製門聯。壬午冬。課諸生。公肩輿入門。見篆聯。鴻命停輿。審視良久。入堂點名畢。語僚屬曰。吾今日不止閱諸生佳文。并得飽觀絕蹟也。遂以巨紙乞秋涓篆書窳風伐檀篇。分書唐風蟋蟀篇。榜之廳事兩壁。及調任兩廣。又乞依原式臨石鼓文。分刻十簋。臨繹山碑。分刻二樹。既成。推拓以贈知好。事見山西獻徵。

四月二十五日。宮門請安。召對。二十八日。奉上諭署理兩廣總督。〔請樞臣代表力辭。皇太后不悅。嚴詞責之。〕二十九日謝恩。五月十五日。陛辭請訓。十八日。出都。〔至天津。航海道滬起粵。〕閏五月十六日。行抵廣東省城。二十日。接篆視事。〔命司道首府各舉候補官才勝文素著。入署辦事。〕奉五月二十八日上諭。張樹聲奏陳吏治軍政財用民風各端。著張之洞到任後。將一切應辦事宜認真經理。總期有利必與。無弊不革。以資治理。而重地方。籌辦省城防務。巡視外海內河各砲臺及省城外陸軍各營壘。〔時法艦縱橫海上。警報狎至。粵東帶海爲疆。而臺灣缺。將惰兵疲。彭剛直公玉麟前督部張靖達公樹聲悉意經營。猶未完具。公抵任。亟籌戰守之備。夜以繼日。剛直駐南石頭。靖達駐長洲。同心禦侮。分省防爲三路。前路曰虎門。虎門內外設砲臺六。水師提督方耀湘將提督裴雲慶王永章任之。中路曰黃埔。黃埔之尾曰長洲。其兩岸曰沙路。曰魚珠。准將提督吳宏洛蔡金章總兵王孝祺鄧安邦遊擊黃增勝任之。而南路曰南石頭。曰石壁村。曰五斗口。湘將提督陶定昇副將利輝任之。有敵警則剛直親督虎門一路。靖達親督黃埔一路。公親督魚珠一路。而將軍長善倪撫部文蔚分任城守。是爲水防。其陸防則省城東路以陸路提督鄭紹忠東七營任之。輔以提督安典所部砲隊。西路以紹忠西二營任之。輔以副都統尙昌懋鍾泰所部旗兵四營。而令紹忠居中策應。並博采羣策。儲備人材。令各營掘壕以守。築堤爲障。名曰地營。勸諭紳民舉辦團練。奏派任籍學士李文田督辦。以佐官軍所不及。又雇募沙艇。號召漁拖。於沙道較窄處設法圍截。築土臺守禦以阻敵人旁抄分擾。〕籌辦瓊崖潮州防務。〔省防之外。瓊廉最要。潮州次之。瓊防責之瓊州鎮總兵吳全美。雷瓊道王之春。有勇十四營。廉防則北海一口以高州鎮總兵張得祿與奏辦團練之總兵李起高任之。所屬欽州興越之海甯州毗連。法船游弋。飄忽無定。令參將莫善喜與奏辦團練之前廣西提督馮子材嚴密防守。酌增營數。潮防則

責成鎮守聯軍餉。就地布置。」六月。法人擾臺灣之基隆。公會彭剛直公張靖達公倪撫部奏請速決和戰之計。諭沿海各省進循。七月。法人攻福建之馬尾。遵旨接濟援應。〔撥臺灣洋槍一千四百支。餉銀十萬兩。洋船壯軍火不遲。惟餉銀得達。〕「飭游擊方恭救帶勇五營自汕頭赴福州。〔未行而閩軍敗。乃止。張副憲督師失利。禍且不測。公發電慰之云。盡職聽勸。必無他慮。〕」初三日。奉上諭補授兩廣總督。初六日。明旨宣戰。飭沿海督撫嚴密防守。法船入口。即行轟擊。照會駐澳門葡官嚴守局外公法。出示曉諭中外曲直。商教利害。十四日。奉旨法船有赴粵之說。非於陸路出奇。恐難制勝。著彭玉麟等嚴密布置。〔剛直誓守沙角砲臺。奉旨重臣宜顧全局。不可株守一臺。該尚書加意慎重。按此旨蓋因公密奏而發。〕「頒商船帶水章程。令廣州府籌各口港況。令法領事率法國教士商民出境。〔領事不願令教士離粵。強之乃行。〕」嚴禁匪徒藉端毀壞各國教堂。凌辱安分洋人。〔是月。出示沿海居民及越南新嘉坡檳榔嶼等處華人立功報效。英使以粵官宣布文告於英國屬地。有所指摘。請曉諭更正。奉旨。以忠義激勵人民。原無不可。惟新嘉坡等處非我屬地。恐傳聞失實。輾轉沿譌。別生事端。命樞廷傳旨申飭。〕」八月。敵陷基隆。奉旨扼要嚴防。急籌接濟。直攻西貢等處。以期牽制。〔自初五日至十九日五奉電旨。粵防益亟。選團勇三千人。編爲七營。以固省防。十八日。官軍復基隆。殺土人爲法前驅者二百餘。奉旨著曉諭居民。以爲戒。〕」公奏請飭吏部主事唐景崧率四營道牧馬高平宣光一帶。往會劉永福。合軍擊法規越。〔永福久居越南。以任俠爲衆所推。法越事起。緬華工開鑛者爲七圍以拒法。屢創之。越王授永福三宣提督。及臺圍急。公奏援臺惟有急越。請爭越以振全局。又言牽敵以戰越爲上策。圍越以用劉爲實濟。吏部主事唐景崧久在越地。與劉永福相得。現乞假在龍州。請令速募四營出關。與永福軍合。速籌餉械濟之。并給永福餉二萬兩。得旨允行。永福以提督記名。景崧加五品銜。嗣有旨督促。八月二十日。景崧率軍出關。九月。永福請餉。復奏准賞銀五萬兩。〕」九月初五日。敵封禁全臺海口。初八日。張靖達公卒於軍。〔剛直亦病。公感憤慷慨。志氣彌厲。〕」十三日奉旨。凡有可援臺之處。竭力籌畫。切勿畏難坐視。十八日。奉旨著派兵輪加送得力兵將赴臺助援。〔公

奏如飭南北洋撥船，於閩海一帶結隊游弋，截法大運兵煤糧船，較爲得力。奏旨著李鴻章酌度辦理。十一月。奏派前廣西提督馮子材募勇十八營。由欽州上思州入越。越那陽。令總兵王孝祺率八營由梧潯溯西江。至龍州出關。赴諒山。是時官軍在越者，蘇元春陳嘉十八營營谷松。爲中路。楊玉科方友升九營營甲。爲西路。王德榜十營營那陽。爲東路。皆距諒山百數十里。而桂撫潘鼎新率葉家莊董履高駐諒山。蘇軍腹背多傷。方軍戰不利。退觀音橋。法添兵來華。以大隊併力越南。揚言先悉桂軍出越。再拒漢軍。公議桂軍力單。如粵師出東路。而桂軍攻西路。則敵首尾不能相顧。馮軍前征越匪。著有威靈。又罷兵未久。其衆易集。王孝祺本任容防。察其材可大用。故有此奏。參將莫善喜自請率師圍越。令率五營爲馮軍後援。以參將陳榮輝三營輔之。唐景崧攻宜光不克。募一營益之。於是廣軍規越者四十營。分道並出。令廣西按察使李秉衡總理關外諸軍營務。明賞罰。決戰守。爲雲桂出關各軍奏請借洋款充餉。總署奉旨。張之洞籌濟臺越軍事。具見公忠。深堪嘉尚。卽著分別妥速辦理。張之洞奏撥全局在爭越南。爭越南在此數月。籌請。深合機宜。著電咨雲貴疆臣共知此意。所請依議行。自海疆有事。商稅驟減。粵協湘滇桂諸省餉械。數逾鉅萬。而省防水陸各路袤延四百餘里。築臺購械。塞河安雷。辦糧儲料。所費不貲。又展設海陸電綫。自省城分送欽廉雷瓊。張靖遠公督粵時。奏借洋款二百萬兩。公抵任。撥案借三百萬兩。又請飭督撫撥借省省息公款二十萬兩。供粵省海防。南北洋奏准借洋款三百九十八萬餘兩。由戶部指定各省關分還。爲分撥滇桂及鮑超劉永福軍餉并援臺規越購械之用。其加之粵省商民者。有關防經費。及前任籌定之海防經費。然爲數少。旋亦停罷。粵海關月有致督署公費三千兩。監督補紅封以進。公訝之。以循例對。公曰。既循例。請備公文。遂按月發善後局專款借用。各屬奉款辦買。例有呈督院者曰貢餘。皆卻不受。裁督署門丁。以委員司承宣。禁絕餽送。財用出入。責成於司府。纖悉不以私。故軍用浩穰而人不疑。募德國武弁教練製械築臺等事。宣戰旨下。各國皆守中立。惟德械如期運到。知其可信。以講求海防必須洋弁教習。先後募致七人。十一月。設龍州至宜光臺站。自龍州至左育。凡十七處。通滇桂唐劉各處文報。十一月。唐景崧

會演將何秀林丁槐及劉永福黃守忠等攻宣光。奪其壘。粵軍參將晏敬懌力戰死。宣光城堅。得地勢。敵築臺城中。俯瞰我軍。粵軍進攻。敵發砲應之。敬德已傷復進。遂及於陣。都司盧贊重傷。軍不稍卻。敵氣沮。滇軍遂奪敵寨。劉軍奪其舟。敵嬰城固守。諸軍晝夜環攻。三日不息。十五日。粵軍擒逸賊二百餘。會演冒死奪獲城外敵壘。敵潰。死傷無算。粵軍逼城而壘。懸敵山嶺壘城中。城堞多毀。自是數日一戰。盡拔城外柵。斷其樵汲。敵糧垂盡。十五日。敵隘至廉州欽州。知粵軍大舉規越。揚言封北海港。截餉械。五日乃去。奏准暫弛閩姓之禁。廣東舊有閩姓捐。光緒元年。粵撫奏准申禁。奸民私於澳門設局。葡官收重稅。而華民牟利者仍徧於內地。言者或謂弛禁便。或謂弛禁不便。是年秋冬間。迭奉廷寄。飭熱羅弛禁利害。粵商以弛禁請。認捐巨餉。公飭司道府縣籌議。并咨訪衆紳。僉謂可行。遂會彭剛直倪撫部寬奏。奉旨依議。抱冰堂弟子記。閩姓驅歸澳門徒供漏卮。因與彭剛直奏開其禁。歲收巨餉。此事素爲各衙門利藪。議及此者必遭謗毀。以廉正素爲官民所信。自督署及承辦大小委員不取規費一文。故事舉而民無怨。按是年電牘鈔本。自軍務外皆闕。故本集無此電。事詳摺中。十一月十二日。大學士會同刑部奏擬已革廣西巡撫徐延旭罪名。奉上諭。徐延旭督辦廣西關外防務。遷延不進。羈無紀律。任用非人。以致失誤軍機。著照所擬斬監候。秋後處決。張之洞保薦徐延旭兼資文武。實屬失當。惟該督於簡任兩廣後募兵籌餉。頗著勤勞。著從寬交部察議。先是編修蔣璧方奏言徐延旭罪不容誅。應請宣示。正妄舉詭人之罪。疏入。留中。至是明旨交部議。嗣吏部議奏。降一級留任。十三日。奉旨法大股來犯。易於聚職。馮子材王孝祺兩軍。著張之洞飭令速進。與桂軍聯絡攻剿。法盡調河內山西北甯兵。益以客匪散匪。凡一萬餘人。以攻桂軍。又自法調兵六千來越。時馮王兩軍先後至龍州。而軍械未集。公迭電嚴飭進戰。並聽桂撫調度。不爲遙制。十九日。桂軍敗績。馮子材扼守鎮南關。王孝祺守關外之由崖。十九日讞報。敵兵分兩路。一攻軍理。一攻谷松。二十日。敵全軍忽并力攻谷松。桂軍力戰三日。敵破猛。多傷亡。至二十二日。先鋒營陳嘉敗退。創甚。蘇元春軍亦敗。諸軍皆退至諒山。旋進扼諒山前三十里之威坡。二十七員。敵攻威坡。子材率八營。專

祺率兩營馳援。敵稍卻。二十八日。敵復來。葉家祥以五營先奔。敵攻桂軍董履高營。履高折足。所部五營遂潰。潘鼎新乘諒山走鎮南關。二十九日。諸軍皆潰。爭奔入關。糧餉器械喪失殆盡。桂粵兩軍相去遠。鼎新調兵赴救。一日。令數易。比粵軍至。諒山已失。子材扼鎮南關以拒之。孝祺扼由崖以備。滇粵兩軍圍宣光。不下。滇軍作地道。粵軍作雲梯。以攻宣光。地雷發。城毀者數丈。敵殊死戰。景崧操鄉音登高諭城中。客教匪多散去。敵船犯浙江之石浦。浙撫告急。敵揚言棄臺圍粵。公擬親赴黃埔魚珠一帶督剿。彭剛直親駐沙角。值歲除。誠諸軍不得稍弛。三十日。飭馮王兩軍出關迎戰。

### 光緒十一年乙酉公四十九歲

正月初二日。諒山敗聞。再飭馮王兩軍越日出關。初三日。奉旨潘鼎新身臨前敵。王孝祺著聽候調遣。馮子材著幫辦關外軍務。所統各營亦歸潘鼎新調派。初五日。奉旨。聞諒山失事。著潘鼎新與蘇元春馮子材激勵將士迅速進取。法踞諒山。必分兵救宣。垂成之功。恐將墜動。著飭各軍力將該城攻克以分敵勢。滇粵各軍餉械。著張之洞妥籌接濟。初六日。奉旨著張之洞於借款內無論已得若干。迅速接濟滇粵各軍。臺灣槍械斷不可缺。著趕緊速解。時籌餉尙可措手。籌械最難。粵省槍礮子彈均購自香港英商。而駐使曾惠敏公。詰英商以接濟法國軍火。不守中立。英遂并粵省采辦而拒之。公電奏請敕會紀澤等設法。謂此戰事第一緊要關鍵。初九日。敵軍攻鎮南關。桂將楊玉科戰歿。十一日。敵軍焚關而退。桂撫既入鎮南關。即退幕府。旋退憑祥。又退海村。退龍州。各軍無復隊伍。難民逃軍蔽江而下。關內大震。十一日。法兵焚關自退。李乘衡辦後路。與馮子材合力鎮撫。阻前軍潰竄者。子材建議。於關內十里之關前隘跨東西兩嶺築牆掘塹。以所部守之。營於嶺半。王孝祺軍屯其後半里許。爲犄角之勢。是時蘇元春陳嘉屯幕府。蔣宗漢方友升屯憑祥。皆爲馮軍後路。魏綱屯艾瓦。防芫荳。在關西百里。王德榜屯由隘備抄襲。在關外東三十里。獨粵軍當中路。爲前敵。二十一日。敵艦封吳淞口。二十一日。封北海口。防我軍由欽廉襲越也。公與剛直

計、擬調馮軍十營回援。而是時尤葑已捷。令其聲言東歸。仍駐前防。子材言彙願則兵力單。恐難措拄。乃揚言不日率數十營即到。以定衆心。公飭鎮道塞北海港口。廉州防軍營陸路。以靜待動。敵軍知欽廉有備。不至。十六日。滇粵諸軍敗於宣光。〔諒山既失。敵分兵救宣光。岑襄勤令何秀林等邀截於左。劉永福血戰一日。殺二百餘人。滇將吳鳳典等爲敵所乘而敗。劉軍不支。唐景崧率隊援之。未至。劉軍已潰。敵軍入宣光。唐軍退保牧馬。公聞報。頓足歎恨。飭景崧斜出襲諒山。劉永福部將黃守忠隨軍助勦。〕京察考績。二十四日。上諭張之洞籌濟軍事。不分畛域。交部議敘。〔副部議加一級。〕二月初六日。與彭剛直公電奏關內外軍情可憂。潘撫才力竭蹶。請速簡知兵大員督辦廣西關內外軍務。並奏可否令李秉衡暫行護理辦後路軍務。初八日。馮子材會諸軍敗法人於鎮南關。〔馮子材築長牆成。諸軍漸集。越人密報。法將出扣波襲尤葑。奪高平省。斷滇桂兩軍通路。以繞出鎮南關之背。子材遣五營扼扣波以邀之。蘇元春率所部暨魏綱軍趨尤葑以待。正月二十七日。敵騎果至。馮軍已先在。突出擊之。敵驚走。退歸文淵。二月初二日。敵又爭扣波。遇馮軍而遁。子材請於潘撫。調蘇軍還中路。敵揚言初八日入關。子材料敵必以初七日星期一出兵。決計先發。初五日。馮王兩軍夜擊文淵。敵寇山築壘。三面施礮。攻擊竟夜。至初六日午。敵益盛。孝祺率死士由山後攀崖而上。破其二壘。敵敗走。我軍傷亡亦多。乃還。初七日。敵分三路來攻。我軍殊死戰。東嶺先鋒三壘爲敵踞。蘇軍援至。合力拒戰。至夜未收隊。初八日晨。復戰。敵以殘隊循東西嶺下擊。而大隊犯中路。勢銳甚。子材與諸將約。有退者、不論何軍皆斬之。於各路設卡截殺逃者。子材自當中路。元春助之。王孝祺當右。陳嘉蔭宗漢當左。約王德榜率軍自由隘截其後。敵薄長牆。有越入者。子材謂諸將曰。法再入關。有何面目見粵民。何以生爲。以帕裹首。赤足草屨。持矛大呼躍出。率其二子相榮相華搏戰。子材年已七十。諸軍見之皆感奮。合力死鬪。孝祺馬中敵。易騎復戰。手刃退者十數人。陳嘉蔭爭東嶺三壘。蔣宗漢繼之。卻而復上者七。遂奪東嶺。西嶺敵亦敗。關外游勇客民千餘皆自來助戰。伺隙狙擊。王軍自後奪其輜軍。敵彈盡。遂大潰。陣斬頭目數十。虜法兵千餘。追出關外二十餘里而還。是日。滇軍亦大捷。

於臨洮府。初九日。奉上諭。擢鼎新調度乖方。卽行革職。蘇元春督辦廣西軍務。李秉衡護理廣西巡撫。十三日。馮子材會諸軍克諒山。初九日。子材出關攻文淵州。諸軍從之。敵走。初十日。克文淵。遂攻諒山。十二日。敵禦軍於巴坪。合擊敗之。諒山城對岸曰羅羅嶺。諸軍攻羅羅嶺。王德榜王孝祺兩軍攻尤力。士卒多傷。孝祺部將潘瀛先登。遂奪其壘。十三日。馮軍克諒山。敵悉衆遁。分兵追之。搜法兵匿山谷者。皆斬之。十四日。馮子材克長慶府。十五日。復觀音橋。陳嘉王德榜追敵至谷松。復有斬獲。十六日。令參將莫善善等從間道到廣安。十七日。蘇軍克谷松。十八日。奉上旨。法已大創。必圖報復。我軍應穩紮穩守。蘇元春等不得恃勝驕進。致有挫失。馮子材定二十一日督師進攻郎甲。總製北甯。並規取太原一帶。王孝祺軍進駐黃門關。公飭唐景崧率黃守忠襲北甯。滇軍二十一日以後。連戰皆捷。奪梅枝關。克廣威府。逼興化而軍。越地裏至北寧太原河內。西至興化寧平南定山西。官民響應。建馮軍旗號。願爲嚮導。助我供糧。十九日。中法訂立停戰條約於巴黎。上年四月。全權大臣李鴻章奉旨。與法國水師總兵福祿諾訂備條款五條於天津。未批准。戰事遽起。總署令總稅務司赫德居間接洽。自上年之冬。往返磋商。至是定議。仍以津約爲底本。令稅商金登幹在法簽約。二十二日。奏旨。法人現來議和。於津約外別無要求。業經允其所請。約定越南宣光以東三月初一日停戰。十一日。華兵拔隊撤回。二十一日。齊抵廣西邊界。宣光以西三月一日停戰。二十一日。華兵拔隊撤回。四月二十二日。齊抵雲南邊界。臺灣三月初一日停戰。法國卽開各處封口。仍着督飭防軍嚴密整備。毋稍疏懈。按光緒條約。此旨爲二月二十八日所發。蓋電旨在前。明發在後。故日期不同。二十三日。請展限撤兵。二十三日。奏言停戰則可。撤兵則不可。撤至邊界尤不可。二十五日。請展限十日或半月撤兵。如能克河內。可以北甯易保諒。全局俱振。奉旨仍飭如期停戰。撤回邊界。延延嚴密。二月初二日。請乘撤兵限內速議稍款。略謂我雖撤兵。彼亦不得進兵。沿途立有甌脫之地。開仗以來停戰以前法人物業毀損者勿議。難甯澎湖宜令卽退。聽越朝貢中國。法不得與劉永福尋釁。津約但言於法商務有益。應增爲中法商務從此有益。初四日。閩軍七百人餉銀一萬兩爲法人所

擄。初五日又言法船絡繹赴臺。而我坐受欺詐。請飭北洋商法令將臺口即日弛封。是時於撤兵事累有陳奏。詳見前文。請錄宣光國城諸軍功。〔宣光之役。公推岑襄勳主稿入奏。惟此節特電致總署言之。謂宣光雖未克。而血戰最苦。請與臨洮勝仗一體論功。奉旨允行。〕奏陳馮子材扼關戰越功。奏旨。馮子材著督辦欽廉一帶防務。廣西邊防一切善後事宜。若李秉衡與馮子材蘇元春會商妥籌。奏明辦理。其粵東西各軍、著張之洞調和將帥。以資得力。〔此事為調和馮蘇兩提督而發。〕勅設龍州至關前隘電綫。〔以起軍雖撤。龍防永不能撤故也。〕議設製造槍彈局於南甯。〔前此槍彈購自外洋。苦戰時無以應。乃購機製造。至是機器到粵。公電南李護撫。謂桂防無了期。宜設製造局於南甯。待覆慮設局經費。乃止。僅以新到精槍發各營。而存舊槍於龍州。發安分團練應用。〕令欽廉守將籌練兵械臺諸事。〔飭乘衆情振奮之時認真籌辦。〕奏請告法人勿害越民。〔我軍既撤。法人逞忿戕越民助我者。故有是請。以起人助法。我未加害為詞。四月。開屠殺甚慘。又電奏痛切言之。〕請以中法界務商務交涉海沿邊疆臣酌議。〔以法人欲通商廣西故。〕十三日。開屠開詳約將盡押。請飭樞臣總署全權大臣詳駁。并電敕沿海沿邊疆臣籌覆再定。〔詳約十條。法人所擬。三月間。赫德與法外部往返接洽。旋法使巴德納到津。李文忠奉旨會商。略有修改。四月二十七日盡押。公迭電奏請。卒難挽回。惟約內增不礙中國威靈體面一語而已。〕五月。粵海解嚴。〔總署令開海口、聽法兵商船出入。公謂廣東內河紛廣。兵船一入。險失憂廢。粵民憤怒生事。再有要挾、無從措手。與彭剛直及將軍都統巡撫奏請緩議。〕十一日上諭。廣西關外各軍屢獲大勝。張之洞撥軍籌餉。用奏膚功。著賞戴花翎。靈雨水溢。粵東西各屬告災。奏請勸款振撫。并籌工賑。〔廣西水災尤重。父老言百年以來所未有。委員分路拯濟。并籌款集捐、以工代賑。趕築基圍以顧晚收。是時軍務略定。公積勞致疾。延客臥內。籌商賑務。抱冰堂弟子記。粵省從來不辦災。不辦賑。辦災自此始。〕奏陳海防要策。〔首儲人材。就原有博學館設水陸師學堂。聘用西師。以募到之德弁講習戰法。譯兵書及格致之學有關軍事者。次製器械。用左文襄福建船政局兼鑄礮廠之議。閩局造礮。粵廠造槍造藥。次開地利。於省城設礦物局。招商試辦。先驗礦砂。再分投勘辦。〕

疏入。留中。」教練廣勝軍洋操。「上年閏五月，奏准護山並記名總兵李先義到粵。是年正月，立廣勝軍，精選弁勇，不限籍貫。凡二千五百人，以洋弁教練而不取洋操陣式。就中法戰事，舍短取長。每半月親臨校閱。至是入奏。廣州旗營有槍礮隊。將軍都統亦以洋操教之。」六月。裁革軍十營。「留八營分屯龍州。上思欽廉各處。馮子材往來欽龍兩界之間。視急則赴。」勤軍四營。景軍六營。「奏請造龍州礮臺。「於續借洋款內撥十萬兩應用。」創設廣安水軍。「粵海虎門迤西，爲蕉門橫門磨刀門虎跳門五口。敵艦可入。而我設防未固。上年造船板礮刻一百號。分立三營。至是船成。曰廣安水軍。」造虎門內外礮臺成。「凡十六臺。均仿西法。」遵旨出示許法國教士入口。「五月。總署來電。將許法國商人教士入粵。公言粵正裁勇。又值水災。保護難周。宜暫緩。法藉口不撤澎湖之師。總署屬出示弛禁。公猶言不便。奉旨飭速准教士入口。如有疏虞。推該督是問。」七月。籌遣撤鮑軍辦法。「方事之亟。鮑春霆爵帥奉旨募勇入滇。至是中途道撤。鮑奏需銀四十餘萬兩。粵已協解十萬。公言宜分途遣撤。川黔湘鄂路程，皆所經歷。深知取道不宜迂遠。從之。」子仁僂生。「側室李氏出。」八月。參劾府縣正佐不職之員十五人鹽務洋務營伍不職之員八人。修廣肇兩屬民田圍隄。「夏間西江盛漲。自高要至新會。民田基圍衝決無算。撥款振之。大舉興修。爲經久計。」德國代造魚雷艇成。「上年訂購二艘。及是北洋所購定遠戰艦工竣來華。附之至粵。」欽差大臣周德潤鄒承修奉旨分勘雲南廣西邊界。行抵廣州。稟皇太后懿旨。張之洞在廣東辦事認真。甚肯用心。汝可傳諭知之。彭剛直公回籍。「廣雅堂詩集彭剛直公挽詩自注。凡防海規越，計畫兵食，及諫阻停戰撤兵諸事。余意皆與公合。摺奏電奏皆余屬稿。聯銜會奏。不易一字。」公奏留所部八營扼守大角沙角等處礮臺。九月。勘界大臣自廣州啓程。公選習法文工測繪者三人以從。選文武員弁諳沿途形勢者先赴欽越交界處測勘。「法文測繪學生取之福州船政局。文武員弁取之本省。并請桂撫選派諳習形勢之將弁先分路往勘。繪圖籌辦。」續裁景軍三營。以所部移駐思陵。「唐景崧奉旨隨勘滇界。公以所部無統率。奏請隨勘桂界。奉旨毋庸議。因裁三營。留本部一營及黃守忠二營。旋景崧簡放臺灣道。所部全裁。黃守忠營歸馮子材統率。」覆奏籌議大治水師事宜。

〔分海軍爲四大枝。粵海居其一。統於京師。每支設帶水鐵甲船三。鐵甲雷船六。經費取之新增洋藥稅釐併徵。徐設船澳。以備修理。選員弁生徒出洋練習。以遊學各國爲一途。駕船巡歷爲一途。奉旨先從北洋精練一支。此外分年興辦。俟餉項有著。次第推廣。〕十月。懲治欽廉盜匪。〔咨馮督辦子材飭屬緝辦。游勇土匪。由萃軍訊明正法。地方官縱盜不辦者。咨督撫懲辦。〕拒英德約領事開通沙面之請。〔前辦省防。於沙面攔河築壩。至是領事謂礙商務。請撤之。以事關海防。電總署力拒。明年二月。奏言永不宜開。請飭總署立奏。〕遵旨商榷界務。請飭馮子材蘇元春會辦。整軍會哨於其上。〔出使大臣許景澄以法國輿論入告。謂諒山在分水嶺東。宜歸中國。奉廷寄云。或謂諒山宜歸粵界。或寬留甌脫。周德潤鄧承脩相繼辦理。張之洞如有所見。可詳告商榷。此奏即商榷之一。奉旨耀兵無益。議界必博采衆說。設法辯難。切勿輕率從事。嗣法使以兵至。並派十餘騎迎我使者。我迎彼亦如之。會議時各帶衛隊。十一月。奏言越地設團四起。設界宜緩。待彼久不能定。然後以甌脫爲排解之策。〕十一月。英人滅緬甸。〔奏言緬歸英。滇境兩面受敵。請救總署與英使議。禁勿滅緬。〕令肇羅道督修所屬衝要圍基。派大員分路查辦匪鄉。〔奏言成公正紳蓄。設立鄉長社長族正族副房正房副。凡歷年械鬪拜會搶擄劫殺等匪犯。細送究辦。并奏請嚴定械鬪罪名。〕發兵剿瓊州黎匪。派員周歷海口。測繪地圖。〔上年七月奉旨勸辦。至是以已繪者間略未備。派明幹之員帶測繪生洋弁詳細測勘。明年正月。設海國館司之。〕初八日。中法開議界務於文淵州。〔鄧欽使李護撫是日出關。廣東道員王之春參贊界務。我議諒山迤西至芫蕘。高平省至保樂州迤東。自祿平那陽先妥州至海寧府。盡歸華界。法使不可。相持不決。奉旨。越界之地。其多寡遠近不必過於爭執。總以按約速了勿令藉端生釁爲主。公迭電奏陳。而駐京法使亦可嘗至總署。以停談餉餉。旨令按原界劃明。以後稍有改正。再妥商續辦。現議多畫之界。均作罷論。〕派兵輪剿捕欽廉海賊。十二月。查明欽越接壤地界。請及時改正。〔邊地自宋明以來不設關卡。半爲安南侵蝕。公言勘界一歸越壤。卽淪爲異域。請按志乘改正。以重邊防。〕請卸已故廣東布政使沈銘經。〔奉旨沙餘經生平專蹟。宣付史館。列入循吏傳。〕會倪撫部奏復廣東盜案案地正法章程。〔抱冰定將子觀

廣東素爲盜藪。官幕拘泥刑名例章。且畏解勘之費。多諱飾不辦。盜風日熾。海防竣事。乃明法以治盜。奏復松文清廣東盜犯正法章程。與巡撫苦爭三月。議乃行。十八日。奏陳病體難支。請開缺回籍調理。奉旨賞假一月。毋庸開缺。是月初九日。倪撫部引病疏請開缺。公不知也。及公疏發。而撫部以摺稿相示。亟具奏陳明緣由。謂目前地方要緊。仍與撫臣及司道籌商妥辦。不致上貽宸廬。疏入留中。拜疏後語僚屬云。將還鄉著書。期以十年。意中所欲言者。不於此時打寫。身後一無著作矣。劉永福至廣州。永福居越南二十年。和議既定。岑襄勳奏請早爲位置。若在北圻。弱患不足。啓紳有餘。公奉旨妥籌安插。請令統三千人屯思欽。歸馮子材統率。粵給餉械。有旨劉永福一軍。岑毓英奏僅餘五百人。著飭督率入關。黎思欽一帶。公檄催速行。并調黃守忠所部來粵。永福請帶三千人。公派員爲之部署。令先到龍州。給銀二萬兩安置。其部衆家屬孤寡所部傷亡將士。許奏請獎卹。時法人聲言永福不退保勝。法亦不退澎湖。奉旨嚴催起程。許添募粵勇合二千人。五月。永福率所部至雲南文山縣。九月。至廣西南甯府。派道員方長華前往經理營務。曉以等威之辨。其屯駐之地。先議上思歸順。繼議瓊廉。而皆不便。乃令屯廣州城外。觀其紀律。爲買大宅以待之。月給餉五千兩。是月。到省入謁。慰以盡釋疑慮。戒以奉法束下。勉以異日勳名。所部存一千人。編爲五底營。又親兵一百人。派委員孫鴻勳陳文埜經理營務。爲講書史。示禮敬。永福奉令維謹。嗣簡放南澳鎮總兵。仍駐廣州。黃守忠統一營駐廣西之甯隘。奏派提督馮子材率兵赴九頭山亞瓊瀾一帶剿捕海盜。

### 光緒十二年丙戌公五十歲

正月奉旨九頭山兵船前往。現分畧未定。豈可自生枝節。著尅日撤回。倘固執成見。致起釁端。定惟該督是問。〔法使疑粵省將占九頭山。擬調兵船前往。李文忠入告。樞廷不知公已入奏。故有此旨。時公方請飭邵李兩使與法議以九頭山屬華。及奉旨。奏言追盜與爭畧不同。斷無不奉旨而往據地之理。仍請照前奏與法議明。〕二月。覆奏廣西邊防事宜。以廣西提督移駐龍州。設太平歸順道。升歸順州爲直隸州。於

太平府設鎮邊縣。柳慶鎮總兵。〔廣西與越南接壤。綿二千餘里。山青紛歧，處處可通。原設隘所一百九。分卡六十六。而鎮南關至龍州一帶爲通衢。該駐兵二十營，分屯設險。路寬者築臺安礮。路窄者設卡開濠。甚僻者掘斷禁阻。設太平歸順兵備道經理中外交涉事宜。駐龍州。〕築鎮南關三路礮臺。〔安礮一百四尊。〕請催駐香港領事。〔香港華民日多。會惠敏前與英議設領事。不果。公請敕總署商英速辦。是時美國舊金山有傷害華僑之案。粵民大譁。公奏請敕駐使商美延保護懲禁。又駐粵某領事積憤包私，賄官免究。察得其實。力駁之。〕與出使美日秘古國大臣會奏派員周歷南洋各島。〔先是公議勸各埠華僑捐資購船，巡歷保護。編修鍾德祥條陳時務，請派員駐南洋各島。奉旨俟張蔭桓到粵後會商具奏。是月，張欽使至廣州。定議入奏。令委員體察具報。〕整頓潮橋鹽務。〔潮州運同由部選。自爲報銷。不歸運司調度。額銷日虧。公請以潮州知府兼署運同，責成整頓。行之一年，加課三萬。次年，復正雜十三萬舊額。〕英君主命其內閣以時辰表贈。具摺奏聞。奉旨准其收納。〔英俄前此有違言。將啓釁而香港無巨礮。知粵省定造克虜伯礮兩尊。密來商借。公以香港守固則粵亦受其利。許之。事既解。英贈此以表意。公原奏第言爲交涉和平辦理故。以借礮未便明言也。旋以乾隆鑿鶴鹿花瓶一對，對聯一幅，綢緞八匹答之。〕三月，肇慶潮州稅廠梧州圍積弊。〔勒石六陸通衢。永遠通行。肇慶商民過境歲可省十二萬餘兩。梧州可省二十五萬兩。肇慶於額外解三萬兩。梧州於額外解一萬兩。奏明以肇慶潮州新墾之款於五門海口分築礮臺二十餘座。陸續興工。期以十年成之。又肇慶稅廠書吏巡丁浮收累商。罰繳八萬五千元。助充肇廣一帶修築圍隄之費。〕設廣雅書局。〔是爲粵省有書局之始。〕設於菊坡精舍。後就機器局修葺應用。集費四萬三千兩。發商生息。又商指每年五千兩。合之息款凡七千三百九十五兩。以充常年經費。蒐羅經學通人著述，陸續刊行。以踵皇清經解之後。吏部子部集部諸書，可以考鑑古今裨益經濟維持人心風俗者。一律蒐羅刊布。令門人繆荃孫在京訪求應刻之書。以南海廖澤琴爲總校。經部首刊者，洪稚存毛詩天文考。北江全集所遺者也。致繆筱珊嘗云。廣州開書局刊書擬分三類。一續學海堂經解。一補史考史史注之屬。一洋務。此類合近日外國記述及

中華人書關涉洋務邊海各防者、擇要纂成一書。事體太大、須思一收束。倉卒不能定。望代思之。子集兩部有佳者。亦可帶刊。按粵局未刻洋務書。惟屬人在上海譯述。詳見下卷。又按廣雅書局以光緒季年停辦。圖變後。版片盈積。編次錯亂。番禺徐紹榮董理圖書館事。擇版式畫一者得二百五十餘種。彙爲廣雅叢書。其屬於史學者九十三種。別爲史學叢書。病體未痊。奏請續假。奉旨著再曠假一月。上年冬疏請開缺以是年二月奉到給假之旨。故至是月續假。奏設北海鎮總兵。裁陽江鎮。改設高州鎮總兵。廉州邊海要衝。高州鎮未能兼顧。故專設北海鎮。四月。拒法領事索賠教堂損失。領事師克勤上年回粵。請查辦教堂損失。駁之。嗣改派法蘭亭來。要索如故。駁之愈峻。法調白藻泰爲領事以示修好。白藻泰到任請見。覆以須不提議和以前事乃可。法使聞於總署。奉旨飭見。白藻泰來。亦不言賠償事。嗣因其認毆弁兵。請飭總署銜法使禁約。鄧欽使至自鎮南關。法人聞中旨祇令就原界勘明。遂并已讓讓之保樂新南海甯三城皆作罷。僅允東瓊展十里、西段十五里。欽使以聞。奉旨伊旣翻悔不認、則先勘原界、更不可緩。卽迅速會勘、所爭新界暫置不論。切勿固執已見、貽誤大局、致干重咎。然先勘舊界、實爲棘手。時春深瘴起。欽使電奏乞病。奉旨仍先勘原界。如病重不能親往。卽著李秉衡前往會勘、而李護撫亦電公轉奏乞病。公爲增敬語。有云。三城實有可得之機。法國斷無輕開之望。奉旨李秉衡有何把握而爲此臆度之語。鄧承修李秉衡著交部嚴加議處。倘再玩延。着英治罪成案具在。公謂始終引病於事無益。總宜先勘一二段。於是東自南關分勘至隘店隘。西至平而關。三月初十日晝押。桂界交涉如是而止。欽使赴龍州休息。旋來廣州。約以十月朔起。勸欽越界。五月。奏陳廣東財政艱窘。分擬節省請緩另籌三項辦法。請敕部通籌熟計。戶部迭次來文清查借款之數。因奏言粵省自借及代他省所借洋款凡七百萬兩。合之前任所借凡九百萬兩。皆供海防之用。本省所借者、以商人承包洋藥釐金每年八十五萬兩、專款存儲、分年歸還。代他省所借者、請指定專款歸還。前因籌防所收之牙捐富捐房租、先後停止。另勸各商捐款爲水陸巡緝護商弭盜之用。嗣戶部於指款債還一節、以無從籌措覆奏。嚴禁白鴿票。白鴿票婦女可在家點票爲賭。貽害最烈。故嚴其禁。查勘香山縣

瓊州鉛鑛。試造淺水兵船四艘成。(此黃埔船廠所造。曰廣元廣亨廣利廣貞。工竣後親往閱驗。續造二艘。曰廣茂廣己。) 緬河海巡緝營。(合海防鹽務釐金各輪船十五艘。編爲三營。別以內河輪船八艘編爲二隊。分段巡緝。不論外海內河六門內外及省河西北兩江等處。有私梟盜匪。立即兜拏。) 修廣肇兩屬圍隄工竣。(六縣一百七十五圍。加高培厚。添造石工。章築基址。凡用款二十五萬五千兩有奇。取之於牙捐賑捐罰賦等項。不動振款。) 查澳門葡人租地界限。(以葡人越界占地故。) 六月。大閱營伍。懲獎有差。十四日。奉四月二十七日上諭。倪文蔚來京陛見。廣東巡撫著張之洞兼署。二十一日。銷假。兼署撫篆。循例兼理廣東學政。奏派提督馮子材赴瓊州剿撫客匪黎匪。(瓊州客黎勾結爲患。時欽越海面盜匪漸靖。請派馮子材赴瓊妥籌剿撫。奉旨。餘匪就撫。義無盡誅。著馮子材妥籌安插。隨時會商張之洞妥慎辦理。七月。萃軍注瓊州。募足二千名底營。八月。公奏言客匪黎匪皆宜剿撫兼施。客誅其兇悍爲亂抗拒不悛者。撫其安分謀生真心悔罪者。或卽用爲前驅。攻黎自贖。或遷往他處相宜地方。黎則先剿積年逆首陳鍾明一股。將附和擾害之外匪亂黎痛加懲創。以次招徠良黎。相機進兵。如勢順情通。能從此長驅深入。開通黎峒十字路。設立土司。開墾植蔗。利民通商。於海防實有大益。得旨允行。九月。諸軍入黎山。破其巢。戮匪首陳鍾青陳鍾明等。餘匪依險潛伏。軍士入瘴地而病。遣醫往治。撤瓊軍六營。募土勇補之。旋克馬嶺廖弓諸巢。客匪亦就撫。戮餘惡者二人。) 七月十二日。交卸兼理學政篆務。(患肝病一月未癒。) 整頓善後釐金各局。特參貪贓昏惰諱匿釀案之州縣官十人。設局製造淺水輪船。(款由將弁捐助。) 九月。議勘廣西礦苗。(李謫撫慮邊防正亟。游勇散練。勾結土匪。易於滋事。乃止。) 創設槍彈廠。(在廣州城北門外二十里之石井墟。占地二十一畝。) 孫厚疏生。令欽州汛兵勿駐欽越交界處。(越人訛言率兵三千入越相助。法人聞之。遣兵備禦。總署電問有無其事。公覆電闢之。令欽州救勿派兵駐守汛地。) 十月。高廉各屬旱。招商運米平糶。奏准暫免稅釐。 鄧欽使赴欽州勘界。(十一月朔一日。行抵東興。時越地游勇義兵相結。攻破海寧。殲法國員弁甚衆。自請服屬中國。公奏言勘界未定。法遽用兵四出。自釀禍端。似宜照會法國暫勿用武。請敕總署

北洋妥籌界務速竣之法。又法兵擅入中國界。屯船攻擊。請敕切詰法使，令各船駛離華界。奉旨越既攻法。豈能勸法弭兵。法使至總署，謂越攻海寧。由粵主使。雖嚴切駁辯。總不釋然。惟當守定現界。和平辦理。勿妄加收撫。倘激成邊釁。惟該督是問。然粵省實無主使之事。惟沿邊緊急。不得已於東興駐兵五營。防游勇竄入而已。」十一月。設沙田總局。〔廣東自道光二十四年後。迭辦沙田升科。未頒部照。民不之信。至是戶部奏催辦理。因請頒發部照。隨丈隨給。升科起征。永免攤派。設局總司其事。〕十二月。以廣東賸賣人口出洋之風日熾。奏准復就地正法舊章。派員巡緝香港一帶華界海面。〔海盜私梟猖獗。派副將黃金福管帶輪船七艘。在香港附近一帶緝捕。照會英領事轉知香港總督飭屬協助。〕奏准開兩廣鐵禁。由海道出洋銷售。〔向章、運鐵發賣、畫分地界。不得繞越。謂之旗程。十三年十月。并奏准刪除此例。暫免稅釐。〕內地任意販運。〔參續裁勇丁六千一百六十六人。薦舉才守兼優盡心民事之州縣官包永昌等八人。勅罷不職州縣三人。拒日本兵艦來粵。〔日本在法新造之敵磅兵船未到。派兩艦來汕頭各港訪尋。會長崎有殺華兵案。粵民情激、電駐使阻之。〕開議欽越界務。〔法使狄隆以十一月抵邊。請照雲南辦法按圖勘界。先是公參稽志乘檔案、並據委員查覆、知華界沒入越南者甚廣。應辨明認還。畫為四綫、列舉十證、奏請相機操縱。而雲南勘界商酌改正者、凡方七千四百里。公與鄧欽使商。就此發端。時法越相攻。殺其勘界隨員海士。公慮法必以兵力盡取越地。西例用兵所得之地不以讓入。法既得地。必不再容置喙。二十一日。在芒街會議。狄隆謂我志圖不足憑。又言海士為中國人所殺、而二十一日之前、法兵已占江平長山等地、阻之不得。會議累日。狄隆狡執殊甚。欽使與公往返電商、議定三條。一、由北市至竹山。彼此較圖意見相合。二、由竹山至白龍尾、彼此較圖意見不合。應請示本國。三、如有別處較圖意見不合、彼此請示。未奉明旨之前。均不另派兵及官員前往。第三條公謂不妥、而欽使已議定入奏。〕

光緒十三年丁亥公五十一歲

正月十五日。皇帝親政禮成。恩詔加一級。各官以前處分。悉予開復。瓊州黎匪漸就肅清。移師崖州。勦生黎爲亂者。〔手定撫黎章程、刊發傳布。令紳士分遣習黎語者歷各峒曉諭之。自上年至此黎人就撫者八萬餘。以此役賴地方紳團協力、軍餉多出地方捐募、以後撫黎開路、尤資倡導、奏請編定瓊州鄉會試中額。以資鼓舞。瓊州黎匪既清。海南之崖州、黎氛未息。遣將率數營督團勦撫。調劉永福四營助之。適永福請假回賓州原籍。命同知孫鴻勳率之以行。及抵崖。軍士犯法。察其不可用。調回原防。〕鑄設鑄錢廠。〔各省制錢皆缺、上年秋、戶部奏准飭直隸江蘇各督撫購機器鑄錢、例應鑄錢之省、開鑄製造。粵省議購英國機器試鑄。并仿製銀元。制錢每文重庫平一錢。銀元每元重庫平七錢二分。〕二月初九日。交卸兼署巡撫篆務。〔吳撫部大徵抵任。〕宿恙未痊、奏請給假。奉旨給假一月。欽起界務定議。南至嘉隆河。北抵北嶺十萬山分茅嶺。西至蘭中墟北。皆歸於我。〔分茅嶺爲自古漢越分界。相傳馬伏波立銅柱於此。居民分布十萬山之間者、爲嘉隆八莊。舉籍經賦、釐然可考。而地處荒遠。官不過問。有三不要之目。公思復漢界之舊。又以瀕海白龍尾江平一帶關繫海防、且白龍尾爲龍門協汛地、必應屬華。總署意在速了。主清現界、請旨電飭不必強爭。將白龍尾江平暫從緩議。駐京法使亦請先勘彼此不爭之處。有不決者、法使與總署面商、然公與欽使猶堅持力辯。法知我不可奪。卒以嘉隆八莊屬華。自嘉隆河至丈二峒中、迤東爲華界。十萬山分茅嶺包括其內。三月初二日畫押。凡拓地數百里。地屬越界而居民願內徙者聽。此爲陸界。其竹山海口以東、白龍尾以南、以署電有先辨老界後商更正語、擬乘此提議屬華。欽使派員費海圖赴總署、以備考證、公亦電署言之、請他日會議時疊加限制。〕開廣西府江險灘。〔水道自桂林至梧州曰府江。石多而灘險。上年開鑿五處。至是以火藥炸之。入冬水涸。又命工開鑿。凡開險灘三十五。商民稱便。〕三月。請總署罷稅司代徵六廠稅釐之議。〔海軍初設。艱於籌餉。總稅務司赫德請洋藥稅釐并征、若香港澳門協助緝私、可增巨款。而香澳附近有粵省釐廠六、如裁廠而令稅司代征、分撥粵省應用。則於粵無損、於餉源有益。總署商之英葡、歷一年而定議。是月、稅務司馬根來。議撤六廠。公慮稅司此議爲干內政攙利權之漸。力請駁斥。奉電

皆。明不得不撤之故。云、事關籌餉大計、特旨允行。又與外洋交涉。斷不能朝令夕改。當懷邊辦理。因飭  
司局移交接辦。」延梁編修鼎芬主講端溪書院。〔肇慶端溪書院、爲總督課士之所。自移駐廣州、不復親臨  
考校。公欲擴充端溪、故慎選主講。及廣雅書院成、山長率端溪經古諸生移居省城。其專課時文者。仍留肇  
慶。繼編修主講廣雅者、爲朱待御一新。兩公皆以直言被譴。都人士用此慰藉。云、好主人在、不患無書院  
坐。公意在激勵風節、利害非所計也。〕二十八日。與吳撫部巡視海口、閱各臺營操演。四月。萃軍攻克  
崖州之南淋。全瓊肅清。〔將士染瘴有病歿者。撤軍休養。派弁兵團勇搜捕餘匪。度要隘分建棚卡。以資控  
制。〕改鄭仙祠爲三君祠。小蓬仙館爲七公祠。〔鄭仙祠祀安期生。小蓬仙館祀王子晉呂純陽李青蓮。以其  
崇尙虛無。罔資觀感。改鄭仙祠祀虞仲翔韓文公蘇文忠公。取後漢書黨錮傳語、顏曰三君祠。改小蓬仙館祀  
陶桓公宋文貞韓襄毅王文成李恭毅阮文達林文忠七公。皆有功德於粵者。〕設在陳開學來。〔陳公自甲申罷  
職家居。公屢約來游。是年春、船政局委員魏瀚來商造船。屬其歸時將書致意。是月至粵。館於衙齋者兩  
月。日夕傾談。間爲具草。下文六廠代徵利害續造淺水兵輪兩疏。陳公所撰也。是秋陳封公年六十。以文爲  
壽。〕奏陳稅司代征六廠稅釐之害。仍請下總理衙門戶部核議。〔函致總署謂、所陳險隘混界侵權擾民有  
礙海防虛誑不實各節、皆熟察情形博采衆論而言。非故作危詞。亦不敢因嚴旨緘默。按赫德欲沿海設巡  
船、兼有海防名目。歸其調度。公覆奏力駁而止。〕閏四月。創建廣雅書院。〔端溪地勢巖可展拓。而省城  
粵秀越華應元三書院專課制義。學海堂菊坡精舍則有課程而無齋舍。皆不足以容多士。乃度地省城源頭鄉得  
一百二十四畝。築齋舍二百間。講堂書庫悉備。名曰廣雅書院。并建祠祀先儒周子、曰濂溪祠。祀歷代名賢  
有功兩廣文教及歷年院長品學足式者、曰嶺學祠。工料百物、力求精好。環以清渠。周遭植樹。費出於紳商  
樂輸。官爲監造。是月二十日竣工。明年落成。凡用銀十三萬八千八百六十六兩。提公費銀十萬兩存匯豐銀  
行生息。爲常年經費。規制皆手定。抱冰堂弟子記、粵省鹽商承充埠商、數年一次。承充時督署鹽運司署皆  
有費。多者數萬。少者數千。與運司英煦約、勿取此款。留備公用。凡在粵所辦書院書局祠廟等風雅事、大

率取給於此。及粵海關家丁潛書罰款。〔假期屆滿。奏請開缺回籍調理。奉旨再賞假一月。毋庸開缺。設辦理洋務處。〕〔廣東有洋務局。始自光緒七年。在督糧道署。至是改爲辦理洋務處。移設督撫署旁。以藩臬運三司糧道會辦。督飭各衙門講求洋務。練習人材。〕〔續造淺水兵船。〕〔前此試造四艘。海軍衙門令駛天津操驗。船小不能出洋。其續造者。祇行於近洋內港。至是與船政局議造出海兵輪四艘。曰廣甲廣乙廣丙廣丁。并造中號兵輪四艘。十四年。經費不足。停中號船未造者。〕五月。欽越海界定議。江平黃竹白龍尾等處均歸於我。〔總署與法使定議。六月。咨行到粵。即飭欽州文武籌樹界編牌設汛諸事。八月。法兵撤退。居民知內屬。歡呼稱慶。九月。派廣元廣甲兩船駐白龍尾。常川巡緝。〕〔槍彈廠成。凡用銀四萬八千六百餘兩。〕設電報學堂。〔課華法各文兼讀經書。〕六月。議改瓊州鎮制兵爲練軍。減額加餉。洋醫請設局瓊州。不許。〔電雷瓊道云。洋人每藉行善事影射侵占。招引族類。愈推愈廣。爲害無窮。速令撤局他往。〕奏報分路查辦匪鄉情形。〔自開辦至此。漸次肅清。正法者九百零六名。〕創辦水陸師學堂。〔廣州舊有實學館。習洋文算學。到任後改名博學館。及是改爲水陸師學堂。水師分管輪駕駛兩班。以英文爲主。陸師分馬步槍礮營造三項。以德文爲主。選博學館學生三十名爲內學生。武弁二十名爲營學生。文生二十名爲外學生。此爲省有營學生之始。〕請停止粵鹽行湖加價。假期復滿。奏言所患肝鬱氣痛怔忡眩暈等症有增無減。請開缺回籍調理。奉旨再賞假二月。毋庸開缺。七月。橫州大水。〔飭沿江各縣防護基圍。〕增修學海堂齋舍。〔增廣名額。改季課爲月課。〕定粵鹽行閩恤商之法。〔潮鹽行銷汀州各屬。釐重銷疲。與閩省商定核減。於起運時代收解繳。〕調繪粵海圖成。吳撫部赴澳門勘界。〔澳門租地以圍牆爲界。圍牆之外。關閘之內。爲望廈等村。葡人歷年侵占。爭持已久。是年藉口協緝洋藥走私。欲議新界。公與撫部會謂不可。四月間。專摺論之。撫部往勘之先。電達總署。得覆慮此行著迹。令勿往。撫部意不謂然。及抵澳。葡官宴拜甚恭。周歷各村。三日而返。與公會商。知界約必宜緩定。再疏具奏。旨下所司。嗣遣澳門同知駐關。嚴定界限。資以兵衛。香山紳士劉永康等亦捐款修拓前山寨城。以扼要衝。〕八月。五十年辰。歲頒賞餉

筆鐐邊錫福扁額一方。福壽字各一方。金佛一尊。紫檀嵌玉如意一柄。蟒袍面一件。小卷吉綢八件。湯綢八件。〔官冊公年少一歲。故以是年賜壽。故事漢文臣五十不賜壽。武臣五十賜壽者惟楊芳一人。此異數也。屬吏餽屏聯禮物皆不受。其日閉轅門不納賀客。廣州明倫堂士紳素不周旋大府。以公與舉育材。撰文爲壽。腰爆竹三萬。至轅門。不得入。昇歸明倫堂燃放。時以爲趣事。〕盤頓澳門前山操防。河決鄭州。〔憂全溜入淮。電詢各處。知水入淮渦兩河。未至奪溜。〕九月。請禁火油入口。〔沙角火油船失事。死者七百餘人。聞之惻然。以粵省火災多因火油所致。請禁入口。或以重徵爲禁。疏入報聞。平日秉燭治事。戒家人勿用火油。晚年猶然。〕十月。奏明銷假。以到任已逾三年。循例籲請陞見。奉旨毋庸來見。閱牛山轍臺。〔牛山水陸要衝。在省河東路北岸。距省城七十里。〕續裁勇丁七千九百八十五名。〔以瓊州肅清匪鄉辦理就緒故。〕十一月。與李文忠公會忠襄公會奏請表揚故員已革兩淮鹽運使洪汝奎。〔汝奎字翠西、涇縣人。砥礪名節。官兩淮時。因案獲譴。時論寃之。十二年八月。以廣東善後防務需才。奏請調用。與浙江按察使陳寶箴分省補用知府桑彬等均奉旨發廣東差委。十一月抵粵。委督辦善後局。視事十日而病卒。江蘇紳士汪士鐸等具呈直隸兩江總督。請爲滴雪。以病故在粵。由粵具奏。有旨毋庸議。〕改定瓊州營制。招商伐木開鑛。奏免出口稅釐三年。〔一人認墾千畝以上者獎。開大路十二道。交會於五指山下。凡三千六百餘里。小路三十二。達於大路。又以雷瓊道向受屬員陋規。展轉剝削。爲害於民。籌給公費。裁陋規以清吏治。〕廣甲廣戊兵船成。二十四日赴黃埔察驗。十二月。巡視欽廉雷瓊潮州各屬海口。閱肇慶圍隄。〔先期戒地方官不得預備行臺。供張支應。初二日。乘廣甲兵船出省。初五日。至瓊州海口港登岸。閱舊礮臺及瓊州府城。周歷府西之西陽金牛嶺水英等處。隨帶測繪員生。測量海口形勢。〕與瓊州鎮道籌撫輯黎客善後招商建築馬頭諸事。令瓊州知府修蘇文忠祠洞酌亭。電屬崖州知州訪李衛公後裔。初七日。西北行。抵藤州府屬之北海鎮。登岸。閱冠頭嶺地角山南瀾等形勢。初八日。抵欽州之白龍尾。泊舟珍珠墩。登岸。閱沿邊沿海諸沙形勢。與鎮道府州等籌設官安汛諸事。江平及嘉隆八莊等紳口來迎。各撫循犒賞。初十日。東甯

行。抵雷州府屬之海安所。登岸。閱博漲白沙各舊臺形勢。十四日。東抵汕頭。連日登岸。閱崎嶇礮臺及馬嶼馬仔澳等口門。至潮州府城。閱民堤有未完密者。撥款助之。以紓民力。府城有金山書院。祇課時文。外知府蒞提牌捐銀二千兩。延名宿課經古之學。嘉應州紳民請於州城建左文襄祠。回省後專摺奏請。得旨允行。自潮州還至汕頭。閱泰安山礮臺。十九日。回舟。過香港。適北洋定遠鐵甲艦南行泊此。管帶劉步蟾迎往閱視。至虎門。大風雨不能行。二十日。易舟由八塘尾出深水灘。過蕉門至橫門。登兵輪還至潭州口。是日封印之期。於船面設香案拜闕封印。二十一日。由潭洲桂洲仰船海至磨刀門。二十二日。由竹洲頭宋帝舅及母太后。祀祀殉國諸臣陸秀夫等。俗所稱國母廟者也。二十三。由竹洲頭上馬口閱大路圍隄。是日抵肇慶。二十四日。閱端溪書院。接見諸生。閱景福圍。二十五日。閱羅秀圍。燦其卑薄。令地方官紳籌款加築石隄。歸途閱甘竹灘三山濬一帶河道礮臺。二十六日旋省。是年。庶母魏太夫人卒於南皮。聞報。白衣冠爲位而祭。魏無子。公以慈已之恩。循禮成服。魏氏。貴州人。其家屬來粵者。以戚誼待之。

光緒十四年戊子公五十二歲

正月。京察考績。內閣奉上諭。張之洞盡心民事。緩輯嚴疆。殫竭盡忱。不辭勞瘁。著交部議敘。建闕(天培)張(國樑)二公祠於海珠。祠成。率官屬致祭。二月。設采訪總局。采訪忠義孝弟之士。節孝貞烈婦女。及品節清純。潛修績學。足以矜式士林者。設省城至潮州電綫。三月。北江水漲。十五日。出省。巡視圍隄。適清遠嶼至白鶴汎。令地方官紳修築各圍墾附者。遣委員分查支河各圍。途經西樵。登陸一覽。至肇慶。遊鼎湖山七星巖羚羊峽諸勝。回舟過西江下游。勸三水高要南海各縣圍隄。兼查河道捕務。歷新會香山順德東莞各縣。羚羊峽產硯石。自嘉慶後停采已久。商人何昆玉以辦買之材。請開采時大西河老坑。許之。二十一日。回省。整頓端溪書院。修葺宿舍。改定課程。時交外兼課經史古文之學。四月。設輪

船馬頭於汕頭。〔汕頭洋商皆有泊船之所。惟招商局無之。上年巡視海口。令局員度地建築。至是咨呈總督核辦。〕廣己兵船成。〔黃埔船廠停工可惜。而海面尚需船巡防。議續造二艘。曰廣金廣玉。易木以鐵。以能出大海爲度。廣金以明年六月興工。其後未詳。〕五月。大雨。西北兩江水溢。十八日。赴各縣巡視災區。二十四日。回省。遣委員辦物料分赴各縣堵築搶護。并發銀米振濟貧民。〔舊疾復發。奏請給假一月。請保護旅美華工。〕中美訂約。限制華工赴美。廣東旅美僑民懇籌保護。公奏請飭總督查覈維持。六月初八日。行廣雅書院開館禮。〔東西兩省肄業生二百名。分經史理學經濟四門。以分教四人分門講授。公餘之暇。間詣書院考業稽疑。時加門勉。先之以嚴辨義利。課之以博約兼資。大旨欲方敦漢學宋學之偏。彌戒有文無行之弊。明年八月奏准預發御書扁額。〕奏陳欽州新界設官分汛事宜。升欽州爲直隸州。改防城司爲防城縣。於白龍尾築砲臺。設白龍營都司。於江平設千總一員。嘉隆板與各設把總一員。〔欽州設請立銅柱。不許。令立石以表界。其文曰。大清國欽州界。大清國防城縣界。〕七月。鄭州河工垂成而潰。十一日。奉上諭吳大澂署理河東河道總督。廣東巡撫耆張之洞兼署。十八日。兼署撫篆。力疾假視事。〔籌銀十萬兩。奏明由新任河督籌赴鄭工應用。〕八月。廣東鄉試。循例入闈監臨。〔兼署撫篆後。即蒞貢院閱視。見其湫隘卑濕。漏夜葺治。放榜後令司道籌議展拓。刻日興工。〕定北海高州兩鎮巡洋會哨章程。〔設省城經南雄至大庾嶺電綫。凡綫路一千里。〕德使請於梧州試行輪船。拒之。〔英商屢有出租小輪行駛行內河者。均按約拒絕。謂外人有請開梧州口岸之議。又電總署力陳阻止。〕女仁會生。〔側室李氏出。〕九月。陸續各屬紳耆的提祠產周濟貧族。并酌提各鄉神佛祠田產業餘款周濟鄰里。籌築省河隄岸。開闢馬路。〔並增設馬頭。〕十月。整頓保甲團防。〔定整頓保甲團防弭盜章程。籌款獎勵。員弁官紳聯爲一氣。分枝稽查。添設望樓卡棚。嚴緝盜家。建棲流所。以棲止閒雜遊民。編查小艇。水陸並舉。使匪無所託足。年終奏報。有未敢率循故事空言塞責之語。〕十一月。與和使議定華民出洋傭工章程。嚴禁虐待。〔和使來汕頭。派洋務委員廖維杰與議章程。咨總署立案。歷年華民至和屬者。皆繞道新嘉坡。定章以後。可逕赴日裏。往者日

多。時英美皆限華工入口。惟和局招工開墾。公飭地方官杜絕拐賣。在海口稽查。民自願出洋者聽。又、是歲巴拿馬招墾工開河。與議保護之法甚具。嗣以地多瘠瘠。乃止。令潮州府修韓文公祠。建金山書院藏書樓。令雷瓊道修蘇文忠公祠。爲別院祀歷代詞壇名賢。〔三處各捐銀一千兩。并撥局存公費各一千兩。〕撥撥雷州府雷陽書院經費。十二月。令西北兩江沿江各縣乘時修護圍基。〔如來年水漲而有衝決者。立即繕任。〕請阻止法國在沿邊接通電綫。〔總署議准中法接綫。公奏言害多利少。請分別補救阻止。〕

光緒十五年己丑公五十三歲

正月。皇帝大婚。〔經費五百萬兩。上年十月。命各省開解款備用。廣東認解二十萬兩。〕裁抵爐餉。〔以粵鐵免稅釐後行銷未暢也。〕查辦連山廳滋事民謠。〔連山界湘粵桂三省。深山重谷。謠人居之。與民爲仇。歷年積案糾紛。民謠皆有不法之處。派員秉公查辦。一律清結。永遠不准再論。選用謠犯總。理處以後事宜。開通內山要路。令不得恃險負固。〕遵旨籌議鐵路事宜。請緩造津通鐵路。改建腹省幹路。〔光緒六年臺灣巡撫劉壯肅公銘傳入覲。疏言鐵路之利。請築路南由清江至山東。由漢口至河南。俱達京師。北由京師東通盛京。西迄甘肅。若未能同時竣舉。可先修清江至京一段。旨下南北洋議奏。臺諫力言不可。乃止。〕十一年。中法和議成。李文忠左文襄先後疏陳善後事宜。請造鐵路與大利。疏下王大臣議。善其言而不繼用。十三年。海軍衙門王大臣又以爲言。始築津沽鐵路。十四年。路成。海署請經營推廣。會粵商陳承德請接造天津至通州鐵路。直督以聞。已如所請矣。翁文恭等交章諫阻。又有言宜於邊地及設於德州濟甯間以避河運者。詔俱下海軍衙門。尋議上。請飭沿江沿海各將軍督撫各抒所見。於是劉壯肅請由津沽造路至京師。護理蘇撫黃方伯彭年請先辦邊防漕路。而試行於津通。公請緩辦津通。改自蘆溝橋起。經河南達於漢口。疏入。交海軍衙門覆奏。二月初三日。皇帝親裁大政。恩詔加一級。籌辦海軍經費。〔海軍衙門初立。急於籌款。粵省賭商遙呈海署。請開白鴿票之禁。願每年報效銀一百萬兩。李文忠函述醇邸意。令廣東臬司王之〕

奉轉送照辦。公復誓力陳其害。乃別籌一百萬兩。分五年解足。備海軍衙門應用。終不弛白鴿票之禁。又致李文忠公電云。海軍備用款。已經海軍奏奉諭旨允准咨行。自應遵照接解。未便再有更張。即如此已甚踴躍。蓋署意尙不止此數也。〔令南韶連三屬建北江書院。三月。籌設槍礮廠。〔官弁紳商前捐船礮專款期滿。勸令續捐三年。合五十萬兩。充購械建廠之用。〕改定粵秀越華兩書院章程。四月。鑄鏡廠成。〔兼鑄銀元。歲可贏三十餘萬兩。鑄成進呈。奏明備漢黔各省擴充銅本。仿製制錢。并請由戶部在天津設局鑄造銀元。頒發通商口岸行用。〕令各屬清理羈囚。開釋拖累。築瓊州海隄。〔長十五里。以三合土爲之。隄牆高一丈。〕二十一日。出省。巡視西北兩江基圍。〔湖北江轉西江。凡沿江及內河小輪可通之處。其重要者登岸步行察看。〕二十六日。回省。五月。修曲江張文獻公祠。〔令曲江縣從文獻裔孫張雲期取遺集送省付刊。〕禁民以山田賭博。令各屬開報攤款陋規浮費。各營開報撥扣款目。通籌裁減。并嚴禁貼差虛伍之弊。定稽查教堂育嬰辦法。〔省城法國教堂育嬰多死者。訛言四起。乃與法領事商定派員稽查辦法。奏明立案。備各省仿行。〕六月。令各屬修監獄設遷善所。〔是年夏。廣州酷暑。派員查南番兩縣監獄。憫其擁擠困苦。遂徧查各縣監獄。命籌款修理。務令寬敞。并設遷善所。於積存公費內撥三萬兩爲監獄經費。〕修潮州鎮平河隄。七月。令惠州府勸民種桑。〔前年飭府試辦。並准免絲繭釐金十年。至是察知種者尙少。令遍諭民間種植。所發桑秧。不分貧富。一律勻發。〕十二日。奉上諭。張之洞調補湖廣總督。卽赴調任。毋庸來京請訓。〔從是日起。籌畫兩廣善後經久諸事。以備交代。〕令肇慶府建八賢四公祠。籌經營榆林港。〔港在崖州東百里。越南之役。法艦十八艘泊此。地方文武不以聞。十三年。道員楊玉書參贊軍事於瓊崖。染瘴而卒。臨終遺電。言上年親勘其地。可容輪船數十艘。與香港埒。而水深過之。如開埠於此。兩岸築礮臺。則東西南三路源頭均活。實富瓊第一要策。越南之役。幸款局定而法艦去。不然。後患未可知也。是月之初。有法船入港測量水道。樹標插幟。開報立命撤之。電總署請詰法使。飭兵船勿得擅進不遘商口岸。因籌開港設守之策。度地築臺。訂購巨礮。李勤恪繼公後。盡舉以贈北洋。港備遂虛。〕奏設紡紗廠。〔閩姓

兩人作弊。罰銀四十萬兩。爲鑄紗機專款。後移設武昌。八月。恩科鄉試。入闈監臨。初六日。上諭。朕欽奉皇太后懿旨。總理海軍衙門奏通籌鐵路全局一摺。據稱張之洞條陳由蘆溝橋直達漢口。先從兩頭試辦。南由漢口至信陽。北由蘆溝橋至正定府。其餘次第接辦。並履陳籌款購地各節。所奏頗爲賅備。業據一再籌議。規畫周詳。即可定計興辦。著派李鴻章張之洞會同海軍衙門將一切應行事宜妥籌開辦。此事造端宏遠。實爲自強要圖。惟創始之際。難免羣疑。著直隸湖北河南各督撫出示曉諭紳民勿得阻撓滋事。奉旨後即日旨達李文忠。言此時路未勘。款未籌。鐵未購。驟然出示。則此事不成矣。宜將失業者籌有安撫之策。再行出示。庶免梗阻。文忠然之。遂緩出示。按此事主持定議。實出於親王。有與軍機大臣函。其文曰。自廬山回淀園。接到貴處鈔交督督議覆鐵路摺件。各將軍督撫覆疏已齊。宜如何恭請慈命之處。諒必公議有成見。第拙見詳駁各疏。似黃摺高於劉。而張摺又居黃右。海署本意。但求風氣之開。非泥津通之蹟。原欲一試其端。再議次籌推廣。張督從衆善天下入手。比海署之趨趨願願。爽明良多。其中論津通各真。曉人亦當如是。誠能慈諭特降。飭令海署照此議籌覆。餘件或擇交閱看。或竟不交。則趨向既定。心志自專。此事當可定局。至於晉鐵造軌。實爲要圖。要在撫藩得人。始可歷久相助。黃署撫所論有張疏未及者。海署亦當採用。以歸至善。嗣諭旨下海軍衙門飭就此意覈議。旨曰。前因籌議鐵路事宜。諭令沿江沿海各督撫各抒所見。以備採擇。嗣據陸續覆奏。詳加披閱。其偏執成見不達時勢及另籌辦法尙未合宜者毋庸議外。張之洞劉銘傳黃彭年所奏各有見地。而張之洞所議尤爲詳盡。此事爲自強要策。必應通籌天下全局。海軍衙門原奏。意在開拓風氣。究宜推行。本不限定津通一路。但冀有益於國。無損於民。定一至當不易之策。即可毅然興辦。毋庸築室道謀。著總理海軍事務衙門即就張之洞所奏各節詳細覈議。奏明請旨。此旨以四月十五日下午海署。而覆奏乃在八月初六日。蓋此中曲折尙多。雖明示宗旨。而羣言未易破也。十月初。李文忠來電。謂廷臣皆不以蘆漢造路爲然。但無敢倡言者。又述海署意。有亟宜定局開辦。免枝節橫生之語。請免造軍需善後各案自光緒九年至十四年報銷細冊。奉上諭。據戶部奏。不特與戶部奏案各

省辦法不符。且事止一省。時僅數年。檔册可稽。何難造報。至該督所稱册籍如山。堂司各官不能閱看。祇供書吏刁難之具。尤不成話。殊屬非是。仍著迅速造具細册報部核銷。所請不准行。 籌定省河沙路設防久計。(外人必欲開已塞河道。乃改爲樹樁設險。訂料開工。俾沙路雖開。省防無慮。) 九月。籌定廣西邊防久計。(因法人擬造鐵路至平而關。定議於此築臺設守。) 覆奏鐵路事宜。(大旨謂備鐵宜急。勘路宜緩。開工宜速。竣工宜速。嗣得海署函。謂事期必成。不求速效。意與公合。) 十月。裁免廣東司道府廳州縣捐攤各款。加給公費。(前此通飭所屬查開捐攤數目。而各屬久不報。及調任命下。卽日分電嚴催。道遠者專弁守候。飭司道通籌裁抵。務令脫然無累。勉爲循良。奏明立案。永遠遵守。又裁各州縣供支學院棚規。由善後局籌給。) 裁免巡緝經費。(勅立中越界牌。(越南遠臣有留居粵境者。安置於羅定州。月給贍養之費。) 建雷瓊昭忠祠。(祀剿黎陣亡將士)。 奏建瓊崖海口礮臺。(聲明此次添配臺礮車礮。係遵照從前奏案辦理。是以未咨商海軍衙門。) 奉上諭。瓊崖防務。張之洞請於巡視海口摺內奏明與辦。惟係統陳大概情形。並未將築臺若干。購礮若干。先行咨商海軍衙門籌定請旨。現在閱時已久。始將購礮築臺各節一一陳奏。均係動用鉅款。率行定議。殊屬不合。張之洞著傳旨申斥。所奏各事。著該衙門議奏。 進呈粵海圖說。(總圖五、分圖九、命幕僚內閣中書楊銳爲圖說一卷。光緒季年。日本謀占西沙島。粵省大吏據圖說駁之而止。) 廣庚輪船成。(此閩廠所造中號四艘之一。廣乙一艘。期以年底工竣。其後餘船皆停造。) 奏保道員朱采總兵董履高等三人。參革劣紳四人。 捐修衍聖公府銀。(曲阜衍聖公府火。內宅七樓悉毀。歷代珍藏之物。蕩然無存。舊例與築歲修皆發園帑。是時公款絀。京官籌募於各省。公捐銀一千兩。) 二十二日。交卸督篆。二十七。交卸撫篆。卽日起程。(赴虎門海口候船。十一月初四日。乘舟赴香港。途中致電廣西馬撫部蘇提督。以考核邊防爲屬。初八日。自香港乘德國公司船啓行。彭剛直公養河衡州。公初意擬自韶州度嶺。視剛直疾。以奏明有過滬商榷之事。不果。) 十一月十一日。行抵上海。讀邸鈔。初七日上諭。張之洞奏隨帶親兵前赴湖北等語。各省標均有額定兵弁。近來總督赴任。輒復添帶親兵。旣多糜費。且與定制不符。所請

添募親兵五十名。著不准行。其原有之二百名。著督帶官吳良儒帶回廣東。不准隨赴湖北。〔遵旨飭令回粵。而親兵本爲准勇。不願復回。即在滬給資遣散。督帶官吳良儒援例奏調起鄂。奉旨允行。〕二十日。乘舟西上。〔在滬留十日。與道員盛宣懷詳籌煤鐵之事。旅次憶崖州李衛公後裔。再電致瓊州文武。屬爲勸導。攜兩人來。許以終身衣食無缺。他日攜歸中原。爲古今忠臣勸。得復終不願行。又致李勤俗書。言交代未盡諸事。〕二十二日。泊舟鎮江。遊金山寺。觀蘇文忠公玉帶。〔有詩〕。遊焦山寺。觀楊忠愍公書卷。〔題云。光緒十五年十一月廿二日。南皮張之洞偕嘉興許景澄番禺梁鼎芬江陰繆荃孫龍溪蔡錫勇黃巖王詠寬定遠凌兆熊恩施樊增祥巴縣潘清蔭綿竹楊銳武進趙鳳昌同游焦山。觀楊忠愍書卷。題記歲月云爾。〕

乙酉三月。致潘文勤書云。到廣之日。卽逢海警。內防外援。應接不暇。兵食兼籌。無一不難。事機則非常之緊急。而人才物力、文法習氣、無不患非常之疲緩。數月以來。寢饋並廢。燭武之精亡矣。

閻文介在樞府日。與公內外同心。有所奏請。輒蒙報可。十四年。文介去位。樞府不愜於公。賴醇賢親王一意扶助。遇事奏請特准。抱冰堂弟子記云。己丑庚寅間。大樞某大司農某立意爲難。事事詰責。不問事理。醇賢親王大爲不平。於議覆所奏各事。皆請特旨施行。且極口稱贊。有粵省報銷用款不爲多。一也。於沙路河道立阻敵船鐵樁。二也。修整廉礮臺。三也。修鎮南關礮臺。四也。購槍礮廠機器。五也。購織布機器。六也。清查沙田、給照繳費。七也。並作手書與樞廷諸公。曰。幸勿藉樞廷勢。恐喝張某。又與大司農言曰。如張某在粵有虧空。可設法爲之彌補。不必駁斥。然初到粵時。藩庫存款不及五十萬。善後局欠債無算。臨去粵時。存現款銀正項銀二百萬兩。書院書局雜款銀五十餘萬兩。面交李筱泉督部。時中外譁言在粵濫用巨腐。李至是愕然大驚服。肅然起立。長揖以謝。按所謂書院書局雜款者。卽粵海關每月例進之公費。公不以入私而發善後局存儲備用者也。書院書局之外。尙提充各項公用。亦成鉅數。交卸時以清單凡發善後局備案。粵海關款至交卸時。積存二十七萬。且並不奏聞。謂我用款省。冰炭敬紙送節門及門生與同年三品以下者。爲數亦微。他人用多。酬應尤繁。倘一委裁。勢必另籌。有礙吏治。貽害地

方。吾不爲也。懲於某公輩立蒿爲難。取張曲江無心與物成鷹隼莫相猜詩意。自號無成居士。

籌解海軍經費事。此卷已志其略。遺囑有光緒十四年十一月十三日致李文忠電文。本集未載。文云。十二月初二日函悉。祝嘏孝養。典禮攸關。薄海臣民。同深慶幸。萬壽山工程。邸敬懇切。誼當稍致微忱。粵事困細。中外共知。然恭逢盛典。不敢以艱難辭。謹當力籌百萬。不動正款。五年分籌。每年四季解津。至如何籌法。實屬不易。現亦不能指定何款。若小閩姓之類。斷難舉行。總竭綿力爲之而已。此文可與前條參看。小閩姓、卽白鶴粟也。

王雲岑廉訪云。廣雅書局既開。有刻皇朝十三經注疏之議。寫目而復改者數四。廉訪錄有擬刻書目。未之見也。光緒十五年。王文敏官編修。奏請以乾隆以來儒臣所撰十三經疏義列於學官。其疏云。自乾隆以來。至於今日。海內經學。各有專家。剖析條流。發起隱蘊。十三經說粲然將備。折衷求是。遠邁漢唐。時則有若湖北安陸儒臣李道平所撰周易集解纂疏。江蘇陽湖儒臣孫星衍所撰尚書今古文注疏。長洲儒臣陳奐所撰毛詩傳疏。安徽績溪儒臣胡培壘所撰儀禮正義。江蘇句容儒臣陳立所撰春秋公羊傳正義。浙江嘉善儒臣鍾文蒸所撰穀梁經傳補注。江蘇寶應儒臣劉寶楠所撰論語正義。儀徵儒臣阮元所撰孝經義疏補注。山東棲霞儒臣郝懿行所撰爾雅義疏。其他經說以博通見長不屬疏義者。不在此列。可否飭下各督撫於各該員原籍徵取定本。咨各書局校刊。彙送國子監頒行。惟大小戴雜四代之文。因事殊制。左邱明綜五方之史。聞見異詞。以較他經、本爲繁重。寶應儒臣劉文淇撰左氏傳正義、行將寫定。至周禮禮記二書疏義、風聞江浙承學之士、方專潛研。尙屬草稿。一俟異日之書詞出。並令各省學臣隨時疏報、由國子監審詳請旨施行。按是時文敏并有續修四庫全書之請、均奉旨俟會典纂輯告成。由翰林院奏明請旨。文敏此摺上於是年六月。卽公議刻經說之時。其言應刻之書。同於勸學篇纂經大義條。所舉者十之六七。其有不同。蓋卽寫目而屢改者也。公有致繆筱珊書云。此間擬刻皇朝十三經注疏。尙闕兩種。開吳縣王樞部頌蔚方撰周禮正義。精博在賈疏之上。不知已有寫定本否。請覓稿見示。當爲刊入。此卽文敏江浙承學之士方專潛研

之說。然王書未成。惟瑞安孫禮部詒讓著周禮正義。公著其目於勸學篇。光緒季年書成。亟索印本觀之。則續出而視爲應刻者。

粵省督撫兩署相鄰。中爲通道。近人筆記言公兼署撫篆時。於兩署間架飛梁。所費甚鉅。同莘詢之當日目覩者。謂東西牆之上爲閣道。長三丈餘。障以竹籬。如守更之棚。所費才數十金。撫署後園。闢畦種菜。築草亭其中。榜一聯云。稼穡艱難君子教。菜根風味士夫知。樸素如是。則傳聞之誣。不待辨已。

## 卷四

十一月二十五日。行抵湖北省城。二十六日。接篆視事。十二月。派員分赴湖北湖南各縣及川黔山陝諸省。查勘煤鐵鑛。〔湖南之寶慶衡州辰州永州。四川之夔州。貴州之清溪縣。陝西之漢中府。山東之澤縣。分派委員履勘。山西則屬冀寧道履勘。其在湖北境內者。先後派員勘查。又令在粵所雇英德鑛師來鄂。司覆勘化驗之事。其達類而及者。湖北鶴峯州長樂縣均有銅鉛鑛。興國州有銀鉛鑛。湖南沅陵縣有金鑛。並先後查勘採樣化驗。行鐵政局文云。邇來查勘有鑛處所。多經前人試采。舊迹猶在。推其所以終於無成者。或因滋事封禁而廢於半途。或因資本不繼而虧於一篑。坐廢地寶。殊屬可惜。蓋意在廣開地利。不專注煤鐵也。銀銅各鑛以苗脈不旺。不能大舉。鐵政局委員知縣鄧端黻就勘鑛文牘州居部別。輯爲詳表一卷。〕定議以廣東訂購煉鐵織布各機器移設湖北。〔李勤恪奏請移煉鐵廠於直鄂。移製械廠於北洋。海署詢鐵機移鄂可否。公商之勤恪。粵已墊付之機價十三萬兩。歸粵認還。另由部奏准籌撥二百萬兩。爲煉鐵造路之用。開辦織布廠經費。原議取之闖姓專款。在粵與勤恪商。以此款隨機移鄂。抵鄂後又申前議。勤恪雖允移機。而捐款有無不能預定。又在粵時議於水陸師學堂附設鑛學化學電學植物學公法學五科。各聘英教習一員。謂之洋務五學。李勤恪抵任。欲以五學移鄂。而鄂力未遑及此。乃調用鑛學化學教習二人及注粵所募之德鑛師二人。勘鑛設廠之事。頗資其力。〕令各屬緝會匪游匪。

### 光緒十六年庚寅公五十四歲

正月。請移設槍礮廠於鄂省。〔勤恪原奏請移北洋。公以湖南多煤鐵。湖北鐵鑛亦不少。設廠湖北。便於分濟各省。電致海署。詢之北洋。議遂定。此與煤鐵事皆醇邸主持。有旁觀疑信由他當局經營在我之語。〕

設鑛務局。〔在省城水陸街、以營務處公所改。後名鐵政局。〕令湖南布政使飭勸邵陽新化安化等縣資本險灘。授案開炸。令各營協練習槍礮。二月。派員履勘洞庭湖之南州。〔南州在洞庭湖中。縱橫二百里。其先皆容水之處。咸豐二年。江堤潰決。江水南入洞庭。挾泥沙以注於西湖一帶。淤地成洲。洲日寬而湖日狹。內水阻遏。濱湖諸縣皆受害。湘人議堵藕池口以出淤漲。疏虎度調弦二口以洩江水。而南洲地沃。土客爭墾。歷三十年。勢難堵扼。議者又請設官分汛以資治理。故派員履勘。便籌久計。十八年。五月。湖南南京張開錦等奏請規復舊堤。廷寄令兩省會同妥議。七月覆奏。以舊堤礙難堵築。惟禁新墾。疏北港、培常德城堤、則湖南有益而湖北無礙。八月。奏准於沿湖之巴陵華容武陵龍陽沅江安鄉等縣劃撥添壤。設官專理。爲南洲直隸廳。〕與湖北北京官電論開鑛事。〔京官左紹佐等聞將於武昌西山樊口開鑛。來書力阻。因電復之。略云。武昌西山。草樹茂盛。氣質宏敞。外江內湖。安得有煤鐵。且古今名勝。卽有之鄙人亦不肯開。若有家墓。更不待言。又云。若慮鑛徒爲奸。尤非所慮。今日大舉。設官開局。自有兵役彈壓。僻壤立成巨鎮。可養數萬工作販運小民。於地方但見其利。未見其害。武昌固所不開。但他縣終須有開采處。〕湖南紳士請行內河輪船。不許。〔既准華商行輪。不能禁洋商覬覦。故不許。〕籌設襄樊湘鄂電線。〔襄樊設線本意。爲剿匪時便於調度。光緒二十年。出使大臣薛福成奏請於長江上游設線以報水勢。乃廣其意。於老河口立水標。令襄河水師營遇水漲時。以急電報江漢關道。傳知船戶。立卽防範。自是無漂沒之害。〕查勘興國州鑛鐵。閏二月。裁減各衙門鹽務公費。〔鹽務公費取之鄂岸川鹽。自川淮分界。川鹽滯銷。鄂麓亦絀。公欲暢川銷以裕鄂釐。自本衙門起。凡省內外大小衙門應支公費津貼等項。概按成裁減。飭鹽道另籌抵補。〕定江夏漢陽兩縣差務章程。〔鄂省督撫司道各署。凡本官到任及署內常年工程役食。悉取給於首縣。公以爲非政體。未到任之先。卽戒兩縣不得預備供應。既蒞任。令籌經久之法。及是議定章程。刪除兩縣浮費。裁提外銷款一萬八千兩。備各衙門供支。督署每年應支二千兩。本任內提存善後局。概不支用。〕籌建鑄礮廠於漢陽大別山下。〔海署議准經費仍照原奏。令廣東將捐款八十餘萬兩分年籌足。其造

廢之費、由戶部於籌定造路經費內劃借銀十五萬兩。俟粵捐收齊撥還。是月、粵省將廠圖等件移鄂。即飭鹽道等布置開辦。并采最新之式。鎗管改小口徑。用無煙藥裝彈。籌建織布局於武昌城外。以粵借借款二十萬兩移鄂。由布局認借付息。十九年山西北路歲餉。此款議分四年歸還。別解賑銀三萬五千兩。海軍衙門議定先造關東鐵路。緩造蘆漢鐵路。令鄂省專意籌辦煤鐵。俄國密圖朝鮮。邊防日亟。而議者言蘆漢鐵路信陽一段施工不易。總署議先造營口至琿春鐵路。購洋軌應用。每年撥款二百萬兩、名曰關東鐵路。皇太后猶以後時爲慮。明年六月。由津沽鐵路接造。先築路自林西至灤河四十餘里。以次延長。招商股四十萬兩。戶部北洋籌二百萬兩。定議采鐵於大冶。鑛師勸大冶鐵山、合鐵質百分之六十四。鑛質露出山面者約二千七百萬噸。在地中者雖歷百年采之不竭。距江邊黃石港僅五十餘里。附近之與國州有錳鐵。爲鍊鋼所必需。遂定議采鐵於此。陸續施工。議采煤於寶慶衡州。海署覆電云。湘煤既佳且多。應照所議舉辦。三月。發題課廣雅寄院諸生。交卸粵任時。定廣雅書院李課章程。自光緒十六年起。每逢四季。命題封寄粵省。諸生課卷彙送武昌。親加評閱。定榜寄回。藉覘諸生學業進退。行之凡三年。十九年兩廣鄉試。廣雅諸生中式者十八人。聞之而喜。二十年。廣雅分校易人。李勤恪猶電詢公意。得復乃定。按廣雅課題。分經學史學理學文學四門。與初議有經濟無理學者異。當是在粵時改定。調用固陵輪船。鄂省無兵輪。并無淺水輪船。英商立德有船行宜昌曰固陵。以虧本傳於北洋。商允撥鄂應用。旋以載客之船不便於運兵裝貨。仍歸招商局承領。而調廣東之廣昌輪船來鄂。重加修理。名曰楚材。十七年冬。又商南洋以測海兵輪撥鄂應用。四月。創建兩湖書院。抵任後、閱經心江漢各書院。經心書院濱都司湖。時承大永之後。牆宇多圯。水痕猶在。監院諸生以重修請。謂二十年來續學好古之士。多出其中。江夏縣紳陳慶溥等願以所有都司湖產指之書院。以資創造。湖南人士亦請附入肄業。遂定議重修。培基址。疏水道。環湖爲齋舍二百間。別設四十間。備商籍諸生肄業。名曰兩湖書院。改湖名曰都士。勸茶商捐輸經費。視茶價千分之一。歲得一萬餘兩。後茶商有頌言。裁捐另籌。別建經心書院於臨脂山麓。課經古之學。江漢書院齋舍素少。仍

譯時文。議招商設公司。運絲茶行銷俄美。與道員盛宣懷商之、不果行。五月初十日上諭。湖北提督著張之洞兼署。六月十三日接署篆務。江水盛漲。二十四日。出省查勘隄工。二十六日。乘園陵輪船至石首縣南岸。閱荆江南入洞庭湖水勢。二十七日抵荊州之郝穴。連日至北岸閱萬城大隄頂銜迎溜各工。二十九日。抵荊州。閱北岸大堤、官民土石各工。三十日。由陸路赴鍾祥安陸各處。六月初三月初四日。勘驗新修工程。由襄河乘民船下駛。六月初六日回省。沿途感受暑濕。回省後、寒熱大作。奏准給假二十日。如期銷假。飭南北各府州考察屬吏。親加考語。密封呈閱。嗣後每年夏冬二季各考核一次。勸諭武漢地方當質各商減息便民。武漢當息皆三分。減為常年二分。公家發營商生息之款減為五釐。并免營商各項捐輸十年。八月。勘定煉鐵廠基於大別山下。大冶無適宜之地、故設廠漢陽。與鎔鐵廠聯為一氣。請戶部先撥經費一百萬兩。於應解京餉內劃抵。整頓土藥稅。川陝土藥運鄂多漏稅者。設法整頓。旋戶部奏准通行各省辦理。鄂省添設隘卡三十餘。派鎮道大員分南北兩路督辦。前此歲收祇七萬餘兩、行之一年。至三十一萬兩。十八年、川省設卡加稅。商販繞越出境、鄂稅頓絀、減收招徠。十月。修襄陽鹿門書院。增齋舍數十間。添調鄖陽土子入院。襄陽紳士劉秉鑑捐錢萬貫。發商生息。為增課經古之費。曉諭兩湖商民自購機器開采煤鐵。勸修峽路。峽路在鄂境者。西接四川巫山縣之青蓮溪。東至東湖縣北門外。凡四百三十里。令宜昌鎮總兵傅廷臣切實勘估。分高低兩路。寬八九尺。可容驍馬並行。巖路高低皆便。須冬夏皆可。兼防山水衝刷。勿稍存省事惜費之念。其費取之川土道鄂入湘而不銷於鄂境者。設局來鳳。曰峽路經費局。十一月。設學治館。令同通州縣入館學習。得良材。斲琴九張。琴腹有手篆。曰天下和平第一。山水清音第二。蘭馨蕙馥第三。窈窕賢才第四。澄懷觀道第五。仙露明珠第六。澹泊明志第七。惠風和暢第八。鶴鳴九皋第九。其旁各記歲月。曰光緒庚寅律中黃鍾之宮無競居士選材。命依法製。琴成。自留第一者。而諸子婦諸女及兄弟之女適人者。各受其一。冢婦劉及適王氏吳氏從女皆善琴。能詩。劉有無邪堂詩集。按其後又於京師得古琴九。存之厥肆以備貢。庚子之亂。失琴所在。十二

月初三日。交卸兼署湖北提督篆務。建彭(玉磨)楊(岳斌)二公祠。開采鶴峯州九臺山銅礦。(委員募丁采運。解送省城。備鑄廠之用。湖北布政使黃彭年卒。(字子壽。貴筑人。於公爲丈人行。既卒。經紀其喪。其子再同編修國瑛奔喪來鄂。一櫛而卒。十八年八月。與李文忠會奏臚陳政績孝行。請付史館列循吏孝友傳。)是年。女仁齋生(側室李氏出)。

### 光緒十七年辛卯公五十五歲

正月初一日。調取兩湖書院肄業生。(湖南北各一百名。商籍四十名。先由學使選取咨送。再分府選調。各屬徧及以示公溥。篤學潛修之士。學使無由周知者。准州縣確訪申送。)京察考績。內閣奉上諭。湖廣總督張之洞實心任事。勞勩不辭。著交部議敘。造織布廠。(期以歲暮竣工)。是月。天雨而雷。飭有隄州縣速修隄防。(正月鳴雷則春漲早。故豫防。十八年冬大雪。又令各州縣於次年正月內督修隄工。防雪消水漲。)二月。與江西安徽合修同仁隄。(隄當三省交界。向章官督民修。而民力不逮。乃分籌官款。洽修隄一千二百三十八丈。)三月。貴州興義府土民爲大僕公請祀名宦。(部章。子孫現任九卿不得題請。公致電貴州王布政口口請先詳撫部批准立案。俟他日合例時具題。)考選兩湖書院肄業生。(不入選者給資遣歸。錄取而不願入院者爲外課。自行投考者爲附課。均無定額。開館日期未詳。課分經學史學理學文學算學經濟學六門。能兼習者聽。延名師分教。不設山長。歲立校規。勤考日記。以驗功修。十九年鄉試。肄業諸生中式者二十三人。)俄國皇太子遊歷來鄂。(先期借調南洋之保民測海兩船。十一日。俄儲入境。派船迎於三十里外。十二日。設宴漢陽晴川閣。用中國酒饌。致頌詞。十三日。俄儲東下。派船送行三十里。洋務委員辜鴻生伴送。湯生。字鴻銘。福建人。諳英俄德法四國語言文字。辭令嫻雅。俄儲甚敬重之。)籌定鑄廠常年經費。(整頓土藥稅可收二十萬兩。部議存儲候撥。又川鹽鄂岸加價可收十萬兩。本解充北洋海防經費。奏准留爲常年專款。十八年九月。又請以淮鹽加抽江防經費六萬兩撥充廠用。按上年十一月。

醇賢親王薨。海署於煤鐵鑛議諸事。不復有所主持。故鄂廠經費益艱。四月。飭南北按察司嚴辦盜案。  
 〔六月。又飭嚴辦會匪章程。〕 武穴匪徒焚毀英國教堂。毆殺教士及洋關鐵手二人。派兵彈壓。飭文武  
 水陸各營嚴防。知照駐漢各領事飭各教堂暫勿收養嬰孩。〔時江寧蕪湖等處。均有焚毀教堂之案。沿江上  
 下。訛言四起。公以訛言起於教堂育嬰。告各領事力任保護緝兇。屬教堂暫勿收養。旋獲犯十餘人。戮首犯  
 二人。餘人分別監禁枷示。撤保證不力之巡檢一人。教堂由官修復。賠教堂損失及教士等家屬恤款共四萬五  
 千餘兩。歷三月而案結。抱冰堂弟子記。交涉之案。必以保全民命為主。往往同一教案。他省誅戮甚多。  
 而湖北較少者。亦有他省誅戮數人而湖北不戮一人者。又有前任擬重辟而平反者。外人服其公平。亦無聞  
 言。〕 五月。澧州民因設電線滋事。〔光緒五年。津沽始設電線。不十年。遍於各省。惟湖南風氣未開。設  
 線不便。十六年。屬電報局試辦。不用洋人。至澧州而鄉民與員工以事生讎。拔桿毀線。遂停工。〕 飭宜  
 昌文武嚴防匪徒。〔時宜昌有毀教堂洋關之語。〕 設方言商務學堂。〔以兩湖書院商籍四十名改撥。廣額為  
 五十名。十八年六月落成。〕 設湖北輿圖總局。〔照會典館奏定格式章程。標經緯線。開方計里。府廳州  
 縣各為分圖。圖各有說。以鄧代鈞為總纂。教授學生測繪。分四路實測。期以三年竣事。〕 六月。飭湖北  
 湖南產茶州縣講求製茶。〔凡二十六縣。道員曹南英條陳採製揀選之法。發各州縣講求。安化一縣。前此行  
 之有效。飭司核獎。〕 七月。宜昌法國美國教堂英人住屋被焚。令地方文武確查嚴防。拏犯懲辦。〔法國教  
 堂誤收被拐幼孩。人民懷疑。入堂滋鬧。并至美國教堂尋衅。兩堂均失火被焚。延燒英醫住宅。聞報立電查  
 問。戒勿一字虛飾。荆州市人雜匪多。飭加意防範。歷五月而案結。獲犯十二人。徒流充軍有差。償銀十  
 六萬餘兩。與法領事議定。以後由官紳每月赴育嬰堂稽查。以釋羣疑。〕 八月。造煉鐵廠。漢口大火。  
 〔延燒幾及千戶。適逢鄉試。省城士子雲集。人情惶恐。荆州沙市訛言尤甚。九月。匪徒擲藥包於省城  
 火藥庫。未及燬而滅。〕 添募勇營一千人。〔湖北通省祇步勇七營。添募三營。水陸兼操。調記名提督熊鐵  
 生統之。日鐵字營。時戶部提各省土藥稅一百萬。充開內鐵路經費。裁減馬步勇營以資抵補。公奏言湖北匪

多勇少。勢難再裁。乃止。」電請總兵告英使飭駐漢兵艦勿啓鋒端。「英水師總兵官備領事來見。云奉國命如地方匪徒滋事危及洋人者。卽用鎗砲擊散。公謂如是必啓弊端。無從保護。電總署止之。又詢之駐英薛叔耘星使、得覆、備益周。自無事。」借調南洋兵艦駐防武漢。「南瑞留駐漢口。測海往來游巡。英領事請借船運兵宜昌。拒之。」九月。止各國水師會操於江上。遵旨籌設通省育嬰堂。「御史恩溥奏言。各省教案。皆緣育嬰而起。請廣設育嬰堂。旨下各省籌辦。湖北各屬。由委員與地方官紳勸導籌款。安定章程。經費多而建堂收養者爲堂養。款絀而給費責其父母撫育者爲助養。十九年。奏報一年期滿。各屬堂養助養者。凡五千六百四十餘名。」子權中式順天鄉試舉人。十月。獲哥老會匪首高德華等。戮之。「是年八月。鎮江關幫辦稅務司英人梅生。代會匪私運軍火。爲江海關查獲。訊知會匪謀奪鎮江以攻金陵。頭目伏於漢口。鄂省先以春夏間獲匪李典等。九月。又獲高德華等。皆哥老會匪首。訊出主謀者曰李洪。李世忠養子也。易名顯謀。報捐道員。將爲父復仇。約十月十五日起事於沙市。沿江同時響應。謀既洩。高德華等皆伏法。十九年。獲匪匡世明、解江寧與李洪質訊。洪畏罪、伏毒而斃。平時沿江各埠。伺輪船上下行竊者。謂之扒手。是年因嚴緝會匪。獲扒手多人。行旅安謐者數年。」遵旨刊勸善要言頒各屬宣講。刻湖北歷代名賢著述。「趙學使尙輔已刊三十一種。舉刻版并未刻元本歸之於公。發崇文書局存儲陸續刊刻。名曰江漢叢書。」十一月。解清甘肅新餉。奉旨賞給頭品頂戴。十二月。以湖北候補人員擁擠。請停分發一年。解貴州協餉。「公於貴州有思舊之情。歲終開財政極細。於例解協餉外。再匯協款一萬兩。」李文忠公明年七十。爲文壽之。「屠敬山易質甫方分教兩湖書院。各擬一首。不滙意。乃自爲之。運典切合而不檢書。文成人覆檢。無誤者。因語人云。功力須積於平日。臨文檢書無益也。」督署偏院火。「督署西偏院前院。有屋三楹。度書籍器物。是月某日夜半。火光忽起。合署之人皆就寢。惟公猶秉燭而坐。捧印匣入文案。委員凌兆熊室、命其典守。復於火光中取祖父影像出。云。要件已在此。其餘不及問矣。從容談論如平時。俄而火滅。次日。檢則例。所焚非正屋。可不入奏。或言僕役竊室中物。故縱火滅跡。」選譯洋務書。「分

十二門。曰疆域、官制、學校、工作、商務、賦稅、國用、軍實、刑律、邦交、教派、禮俗。十五年在粵。已屬長洲王紫詮在滬延西人譯之。至是許文肅方奉使俄都。又屬其擇精要者分門輯譯。」是年納側室秦氏。

### 光緒十八年壬辰公五十六歲

正月。派譯員攜工匠十名赴比國煉鋼廠學習。二月。查禁湖南詆毀洋教歌謠。〔道員寧鄉周漢、素惡西教、以崇正黜邪自任。在籍刻書流播。沿江教案之起。領事謂禍由周漢。請嚴懲。以通商湖南要挾。而湘民方稱許周漢之爲人。急之必生變。及是領事請益堅。乃檄糧道惲祖翼赴湘查辦、寬嚴互用、起出歌謠版片、解鄂銷毀。周漢查傳無著。薄懲刊印之人。奏明結案。〕定產茶州縣勸懲章程。三月。奏請撥借煉鐵廠經費。〔原估二百四十六萬八千餘兩。部撥二百萬。就此發撥節辦理。嗣添購機爐。增三十二萬四千餘兩。會沿江豐稔。釐課加增。借撥十萬。並提糧鹽道庫外銷款二十萬。俟廠成利見。自光緒二十年起、分十年歸還。〕四月。發美國棉子於產棉各州縣。令民試種。〔采棉時織布局遣人收買。將棉子發回再種。是年民間不知種法。收成頗少。明年、再購美棉給之。刊發種棉須知。廣爲曉諭。所收稍豐。又明年、再發試種。令民展轉傳布。〕五月。譯洋務書初稿成。〔此王紫詮與傅爾雅等在上海所譯。寄稿至、延主事楊楷貢生華世芳訓導王錦榮等刪繁補漏、重加編纂。香嚴老人六十壽言、公編纂夷務類要一書。分門列表。成數百卷。將以呈進。備乙覽焉。得失利病、燎若指掌。謂此書也。屢有增損。迄未定稿。〕六月。漢水盛漲。令安陸府縣駐堤嚴防。添設峽江救生船。〔峽江四百餘里。舊有紅船二十九艘。宜昌通商後。行旅日繁。覆溺者亦日衆。船少不及救。添造紅船十五艘。軸版三艘。用銀一千五百兩。〕閏六月。海軍衙門奏報各省解清海軍鉅款。奉上諭張之洞力顧大局。殊堪嘉尙。交部從優議敘。襄陽大疫。民間訛言起。〔謂洋人投毒井中。襄民驚擾、捕形迹可疑者擅殺之。〕嚴檄府縣捕治。保護光化穀城各縣教堂。七月。襄陽穀城教民房

屋被焚。派兵彈壓查辦。止英法各領事勿往湖南。周馥案結。湖南仍有揭帖誣毀。英領事欲乘兵船過長沙詰問。阻之不聽。會新任吳撫部大徵入部。總署屬與英使周旋。七月。撫部抵漢。晤英領事。允不入湘。而法領事又請同往。時長沙歲賦生童二萬餘人。揚言與新撫爲難。因力阻。九月。定嚴懲會匪辦法。哥老會餘黨煽亂不已。由江入漢。勾結益廣。慮其爲他日大患。就部定就地正法章程分別輕重。嚴首要。寬脅從。宥自首。定地方文武官賞罰。以遏亂萌。子仁實生。側室秦氏出。十月。嚴禁各屬佐雜官擅受民詞。十一月。陝甘總督奏各省解清甘肅新餉。奉旨張之洞交部從優議敘。十二月。北路沿邊各屬盜匪猖熾。奏派文武專員辦緝捕事務。奏請截留漕米及運費賑宜施鄰三府災民。是年冬。煉鐵之機器廠鑄鐵廠打鐵廠及大冶運鐵鐵路五十餘里先後工成。時日本築鐵路。購鋼軌於西洋。公屬鐵政局致電駐日汪芝房星使。請商彼國示鄂軌廉於西洋之意。得覆層折尙多。議不諧。

### 光緒十九年癸巳公五十七歲

二月。電詢蘭州上年雨雪情形。漢承陝甘下游。甘肅多雪。下游來年水勢必盛。故電詢預防。四月。得蘭州報。水漲丈餘。立飭襄陽道防守。水不爲害。三月。會奏與辦蠶桑事宜。譚撫部繼洵主稿。節錄於此。湖北向稱澤國。農民終歲勤動。田疇所入。爲利甚微。一遇偏災。立形匱乏。欲廣開利源。惟有興辦蠶桑。補農力所不逮。考之禹貢。荊州厥篚繻組。近時江陵天門穀城各有緞絹。黃州沔陽當陽南漳等處亦各有絲。特以樹藝飼養之法不逮浙人。多自設於絲劣利薄。臣等體察情形。非極力振興。無以廣風氣而灌利源。始以十六年會檄司道籌款設局辦理。屢經派員前赴浙江購運桑苗。分發各州縣栽植。並采購桑子。交江夏漢陽二縣開地播種成苗。飭令各州縣來省請領。由臣等轉刊蠶桑簡編。詳列栽桑養蠶摘繭繻絲諸成法。一併散給。轉發士民。如法種植。不許取民一錢。自十六年起。共發過各屬桑苗已及一千萬株。據報成活分數有十之六七者。有十之八九者。亦有全數成活者。現計已閱三年。應飭各州縣教民蠶織。復委員赴浙江采

甄接本桑株、恆應用器具、並招募匠師來鄂。訓授本省子弟、爲各屬倡。其甫經創辦之偏僻地方、如絲繭織難銷售。暫令州縣墊價收買、解省織綢。其墊發價值。仍由省局撥還。至絲繭暢銷之處、卽毋庸由外縣收買。如此因勢利導。免致觀望遲疑。以期推行益廣。臣繼洵繼著備員肅右。致往還蕪鼓間、竊怪風詩所詠物產。獨桑實猶蕃、而蠶桑之利無聞。因於甘肅司道任內、督民芟鷲粟而樹桑。現在秦州等屬、桑株成林。以彼塞瘠地方、尙不無薄效。湖北本沃壤宜桑之地、但得州縣官實心實力隨時倡導、不至作輟相仍、未有爲其事而無其功者。○四月。內閣奉上諭。前據大理寺卿徐致祥奏湖廣總督張之洞辜恩負職。當諭令劉坤一李瀚章稽查具奏。茲據先後查明覆奏。張之洞在兩廣總督任內、並無懈見倭屬、用人不公、與居無節、苛罰濫用等情。現在湖北辦理鐵廠開鑄、尙無浪費情事。其餘各條。均係傳聞之誤。湖北布政使王之春亦無措克粟斂實據。張之洞王之春均著毋庸置議。候補直隸州知州趙鳳昌不恤入言。罔知自愛。著卽革職。勒令回籍。張之洞向來辦事尙屬認真。嗣後於應辦事宜。務當督率屬員、力求撙節、妥爲經理、用副委任。○附錄原奏。大理寺卿臣徐致祥跪奏、爲疆臣辜恩負職據實糾參恭摺仰祈聖鑒事。竊湖廣總督張之洞、博學多聞、熟習經史、屢司文柄、銜銜稱當。臣昔年與之同任館職、深佩其學問博雅。儕輩亦罕相推重。該督當時與已革翰林院侍講學士張佩綸並稱畿南魁傑。洎光緒五六年間、前軍機大臣李鴻藻接之以進。蒙我皇太后皇上虛衷延覽。不數年、荐擢巡撫。晉授兼圻。寄以嶺南重地。而該督騁秦之心由茲熾矣。司道大員脾期謁見、有候至三五時、候至終日而仍不見者。視爲故常、毫無顧忌。至候補府州縣以下、概不接見、屬員之賢否不問也。公事之勤惰不察也。所喜者一人而兼十數差。不喜者終歲而不獲一面。其賞識之員、率皆浮薄喜事功利誇詐之輩。厚重誠樸者、則鄙爲無能而不用。與居無節。號令不時。卽其幕友亦率苦之。深訪本地富家暨寄籍流寓者。家有厚資、則抵瑕尋隙、借端罰捐、作爲樂輸。或令其認罰。其數竟有至一二十萬兩不等者。已大失政體。所罰之款、恣意揮霍。雖未必入己。而取之盡錙銖。用之如泥沙。名曰辦公。實則耗歸於無何有之鄉。中飽於不肖吏之竈。而該督明知之而隱忍之。屬僚中無一敢諍者。同寅中無一和衷者。藩司

王之春。僉王也。培克聚斂。報復以報。資緣要結。夫人而知。而該督以爲有才。竭力保奏。保舉直隸州知州趙鳳昌、納八也。小有才、奔走伺候、能得其歡心。該督倚爲心腹。終日不離左右。官場中多有詔媚趙鳳昌以鑽營差缺者。聲名甚穢。該督方自以爲能使貪使詐。而不惜甘受其愚。且深諱其失。統帥該督游粵五年。虧耗國家帑項數私自勒捐者。總不下數千萬兩。惟建設廣雅書院書局。培植士林。差強人意。然規模已大侈矣。其餘非虛糜即銷納。光緒十五年。該督創由京師盧溝橋開鐵路至湖北漢口之說。其原奏頗足動聽。迨奉旨移營湖廣。責其辦理。該督聞命即爽然若失。蓋明知其事必不成。而故挾此益勸朝廷、排卻衆議。以示立異。而不料皇太后皇上灼照如神、早窺彼其隱矣。說旣不行、卽又改爲鑄錢之議、以文過遷咎。乞留銀款。輕信人言。今日開鐵鑛、明日開煤鑛。附和者接踵而來。此處耗五萬、彼處耗十萬。主持者日不暇給。浪擲正供。迄無成效。該督又復百計彌縫、多方搜索。一如督粵時故智。他如借電竿以震湖廣。毀通橋以運機器。衆怒莫遏。幾至釀成巨患。貽督肝憂。又如督署被焚而不入告。州縣補缺而勒派捐。凡此之類。指不勝屈。書曰。罔辨百姓以從己之欲。今該督前後所爲。無非哂百姓以從己欲之事。刻削元氣、膜視民生。輾轉相尋。恐滋禍亂。楚北在京人士言及、靡不嘆息。尤痛恨該督被皇太后皇上如此寵濫。而違臆妄行一至於此也。臣統觀該督生平、謀國似忠、任事似勇、秉性似剛。運籌似遠。實則志大而言誇。定方小而任重、色厲而內荏、有初而鮮終。徒博虛名、無裨實際、殆如晉之殷浩。而其堅僻自是、措置紛更、有如宋之王安石。方今中外諸臣章奏之工、議論之妙、無有過於張之洞者。作事之乖、設心之巧、亦無有過於張之洞者。此人外不宜於封疆。內不宜於政地。惟衡文校藝、談經徵典、是其所長。昨歲該督視大學士李鴻章壽文、極意諛頌。末有自述語云、度德量力、地小不足以回旋。夫以兩湖幅員之廣。畢力經營。猶恐不足。而顧疑其地小。夷然不屑爲耶。何其狂誕謬妄若此之甚也。該督之兄張之萬、久居政府。中外臣工或礙於情面、不免存投鼠忌器之見。故無一陳奏於我皇上之前者。臣竊其行事、採諸公評、據實參劾、事理昭彰、諒張之萬亦不能曲爲之庇。至剿陟進退、權操自上、非臣下所敢擅預。伏乞皇上聖鑒。謹奏。兩廣

總督臣李瀚章跪奏、爲查明湖廣督臣張之洞被參在粵各款、均係傳聞失實、恭摺覆陳、仰祈聖鑒事。竊臣承准軍機大臣字寄。光緒十九年正月二十四日、奉上諭。有人奏疆臣辜恩負職。據實糾參一摺。據稱湖廣總督張之洞前在兩廣任內、司道謁見、往往候至終日而不得見、候補州縣、概不接見。其所喜者一人而衆十數焉、率皆浮薄誇詐之輩、與居無節、號令不時、探訪本地富家、借端苛罰、數至鉅萬、恣意揮霍、虧耗帑項甚鉅。藩司王之春措克聚斂、直隸州知州趙鳳昌聲名甚穢、該督俱加信任等語。著李瀚章按照原奏各節確切查明。據實具奏。原摺著鈔給閱看。欽此。遵旨寄信前來。承准此。臣謹閱原奏、所參頗見儆厲、用欠不合、與居無常、苛罰濫用各節。臣昔未至粵、亦有所聞。逮到任後隨專考證、始知非實、大抵不得志於其時、又未深悉其事者、爲此過甚之辭、傳播遠近也。謹爲我皇上陳之。司道皆欽簡去員。與督撫切近共事。若不隨時接見。理固不存、勢亦不行。聞張之洞偶遇手治簿書時、屬員進謁、不無稍待、未嘗候至終日、尙不得見。舊時司道等官亦無言及此者。至於候補之員、人數太多、有事則常見、無事則稀見、此各省所同、不獨張之洞爲然也。犬生才異長短各殊。或兼數事而有餘、或任一事而不足、張之洞任內、聞有二人兼充數項差使者、皆係量才任使、各有成效。如果專尙浮夸、阿其所好。諸務何由而理。又聞張之洞在翰林時、講誦恆至夜分。外任時判牘亦然。及其至粵、正當多事之秋、併力支持。自不暇給。參之則曰夙夜在公、劬勞罔懈。毀之則曰與居無節、號令不時。惟既未誤公、此等小節、無足深論。罰繳之銀不下七八千萬、已造報未造報者、皆有冊案可憑。取之於關盡吏嬰博徒樵匪、以及貧劣各員、而非抑勒於富家。用之以充餉濟賑、利農植士、以及營造各票工、而非銷耗於無益。取資許非分之財、上資軍國、下濟士民、揆之理法、豈待爲苛。且皆竭斷施行、屬員無從迎合。王之春以江蘇候補總督督補廣東糧道。張之洞因其才其尙好、加之任使。該員兩次署理藩司、照章綜理。並未創立名目、多摺進款。謂爲措克聚斂、未免無因。趙鳳昌派充巡捕、僅供奔走、備傳呼而已。而官場陋習、在大吏左右、輒自之爲要人。趨附諂諛。皆由是起。其用舍才奪、司道不得專、督撫不得私、巡捕微員、何能干預。臣見舊冊案中、趙鳳昌曾將洋行例送茶金呈繳充公。似張之洞

約策尙嚴、不致受其賄蔽、張之洞到兩廣總督任時、海防戒嚴、邊事孔棘、黎匪客匪、乘機思逞、雖有彭玉麟力疾坐鎮、而徵發兵餉、整頓地方、翦除伏莽、維持洋務、期可後患、則張之洞經營爲多。用項雖多、委非浪費。軍務甫鬆、即遣撤深調添募之兵、以期撙節。黃江殲賊、潮橋鹽務、皆掃除更張、拔其病本。取中飽糜費之款而歸之公。出入之際。籌畫若此、豈肯恣意揮霍、虛耗帑金。該前督臣任內用款、業已分案造報、均係實用實銷。並無浮冒。所建書院書局、或自捐資、或用罰款、爲數不少、並未動用正項、人所共知。張之洞在粵時、正值海疆有事、政煩費鉅、歷年辛苦經營、時勢亦與今不同。倘非身至其境、留心考核、固無以知其措施之蹟與傳聞之謬也。欽奉上諭。飭臣確查。斷不敢稍有瞻徇。代爲粉飾。謹據實繕摺具陳。伏乞皇上聖鑒。謹奏。兩江總督臣劉坤一跪奏。爲遵旨確查、恭摺覆陳、仰祈聖鑒事、竊臣奉准軍機大臣字寄。光緒十九年正月二十四日。奉上諭、有人奏疆臣辜恩負職、據實糾參一摺。據稱湖廣總督張之洞自移督湖廣以來、改辦鍊鐵、並開煤鐵各礦、乞留鉅款、輕信人言、浪擲正供。又復多方搜索、借電竿、毀通橋、幾釀巨患。督署被焚而不入告、州縣補缺勒捐、逞臆妄行。藩司王之春培克聚斂。直隸州知州趙鳳昌名甚穢。等語、著劉坤一按照所參各節確切查明、據實具奏。原摺著摘抄給閱看。將此諭令知之。欽此。仰見我皇上好問察言、嚴飭官方之至意、跪誦之下、欽悚莫名。伏查原奏所參各節、專隸鄂省、江寧相距較遠、莫知底蘊。因即遴派委員馳往該省、密爲訪查、並詳詢來往官紳、互證參覈、粗知崖略。如原奏稱以鍊鐵並開煤鐵各礦浪擲正供多方搜索各節。查煤鐵兩項、實爲時務所急需。張之洞創辦鍊鐵並開煤鐵各礦一摺專宜、均係隸於鐵政總局。鍊鐵必須開礦、專本相因。原估經費二百萬兩、續請七十萬兩、以爲開鑿鍊鐵之需。所購外洋各項機器。現已運到八九成。各廠房屋色與築過半。有鍊生鐵熟鐵者、有鍊精鋼粗鋼者、分列別類、名目甚多。現正接續興造、安置機器、規模闢木、需費浩繁。大冶鐵礦、開採業已見鐵。煤礦以江夏之馬鞍山大冶之王三石兩處片段較厚。煤質較佳。王三石所採之煤。現已陸續運廠。馬鞍山因井內有石、開採較輕、海鹽未探、出煤尙須時日。由廠屋以至江口、由大冶以至漢黃石港。均設鐵路以通運道。各

處發費用項、因撥款一時難獲濟急、暫爲墊應、事或有之。所謂搜索者殆即指此。大凡草創之事。與立有規者。難易本有不同。省費亦各有別。與作改良。勢難滴瀝歸源。今湖廣當張之洞開礦設廠。置鍊鐵、本係仿效西法。事獨創始。工作既未熟諳。用款不無稍費。前因經營伊始。用人較多。近聞工作稍減。業已核減薪水。裁汰員役。似尚無很擲情事。又原奏設電竿毀通橋幾糜巨惠各節。查前歲湖北創設電線。接至湖南澧州。該處鄉民。因事非經見。不便於民。唐聚多人。將電竿一律焚毀。當經該處地方官出爲彈壓。調賠結案。武昌望山門外白青新橋一座。前歲開辦礦務。因該處橋孔多而道窄。輪船往來有礙。張之洞會令拆毀。議改鐵橋以利暢通。嗣因兵情未洽。即令如舊修整。並未礙成事端。又原奏督署被焚而不入告。至州縣補缺勒捐各節。查兩湖督署內失據。其事在光緒十七年。僅焚側屋數間。頭門大門等處均屬完好。張之洞殆因所焚僅燬開房。官眷父卷。並無損失。是以未經入告。至州縣補缺。均係循照例章。近因各省時有偏災。間勸籌捐濟賑。並無勒派別項捐款情弊。事本善舉。捐出樂輸。原奏所稱勒派捐款。殆係傳聞之誤。此訪查張之洞之梗概也。又原奏藩司王之春措克聚斂直隸州知州趙鳳昌聲名甚穢各節。查王之春由廣東臬司陞任湖北藩司。用入行政。均係稟承督撫巨辦理。實無措克聚斂情事。如何報復恩讐。亦查無其人。臣前承乏兩江。王之春時以道員需次江蘇。勇於任事。其才似足有爲。現任湖北藩司。未聞有所規益。而承流宣化。按部就班。亦無夤緣要結之劣迹。趙鳳昌籍隸江蘇。前以丁憂知縣由身赴鄂。辦理督署筆墨事件。其人江於心計。張之洞頗信用之。該員雖無爲人營謀差缺實據。而與在省寅僚廣爲結納。其門如市。迹近招搖。以致物議騰騰。聲名狼籍。此訪查王之春趙鳳昌之梗概也。臣維張之洞學有體用。識達經權。仰蒙聖主特達之知。畀以折疆重寄。該督臣繁縟時局。力任責難。現在鍊鐵一應事宜。規制雖未大備。而始基既立。竊未可廢於半途。該督臣謀國公忠。勵精圖治。上思朝廷倚畀之重。下念同朝責望之殷。必能張弛合道。終始其專。相應請旨飭下張之洞督奉承辦各員共濟時艱。力求撙節。妥爲經理。以竟全功。湖北布政使王之春。體慎小心。循分供職。既經查無措克等項情事。應請毋庸置議。保舉候補直隸州知州趙鳳昌。不恤人言。罔知

自愛、相應請旨卽予革職。並勒令回籍。以肅官方。所有違旨確查各緣由、理合恭摺覆陳。伏乞皇上聖鑒。謹奏。五月。命荆宜施道修江陵張文忠公墓。墓地低窪、將淪於水。命妥爲培護。麻城縣民毆殺瑞典教士二人。令地方官嚴辦。麻城本無教堂。瑞典教士雇保鏢者以往、阻之不可。既至、鄉民往觀。教士令鏢手撿之。衆怒、毆教士立斃。駐漢各領事合謀爲難。而瑞典領事頗明理。十一月議結。處死罪者二人。餘犯遞減。償銀三萬兩有奇。六月。遵旨籌撥織布局官本。詹事志銳疏請整頓商務。下總署議。嗣奏言、上海已設織布機器局。張之洞亦經奏明設局織布。請逐漸推廣、或撥官本、或招商股、奉旨依議。湖北織布局前已開工。而添購機器。增款三十餘萬。騰挪借支。以資周轉。至是以積存價當捐八萬兩奏撥爲開辦經費、照章生息。八月。奏明設廠鑄造銀元。湖北鼓鑄久停。銅貴錢少。因仿廣東成案。開鑄銀元。購中等機器、合造廠所費凡四萬餘兩。司道庫存舊有質當捐鹽釐外銷公費三萬數千兩、爲彌補銅鉛折耗之用。卽以此款購機設廠。不足者另籌。二十二日。出省後開營伍。查勘煤鐵鑛工程。是日乘兵船沿江至江夏所屬之馬鞍山。查勘煤井。折而東、至黃州。二十四日。調齊黃州與國德安等營弁合操。申明賞罰。事畢。至大冶石灰窯。登岸、抵鐵山舖、閱鐵路工程鐵山鑛石及各種機器。並至王三石地方勘視煤井。旋登舟、至田家鎮。閱礮臺。二十八日。回省。九月初五日。校閱水師於青山。青山距省城三十里。漢岳兩鎮師船、鐵字三營、襄河水師三營皆與。煉鐵全廠工成。凡十廠。曰煉具色麻鋼廠、煉西門士鋼廠、造鋼軌廠、造鐵貨廠、煉熟鐵廠、煉生鐵廠、是爲六大廠。曰機器廠、鑄鐵廠、打鐵廠、造魚片鉤釘廠、是爲四小廠。上年竣工者三。本年自一月至七月、全廠告成。而煉鋼工程未竣。大冶之王三石、江夏之馬鞍山、有鑛煤皆適於煉鐵。王三石井工未成。馬鞍山井成而橫窿尙少。設備亦未周。所采不足於用。乃購外洋焦炭、與湘煤配合用之。十月。設自強學堂。就方言商務學堂改設。分方言格致算學商務四門。每門暫以二十八爲率。方言在堂肄業。餘按月考課。設荆門至安陸電線。二十日。奉旨兼署湖北巡撫。譚撫部赴四川查辦事件。十一月。兼署巡撫篆務。日期未詳、是月感冒時症、未請假。十二月十六日。省城製

造火藥局火。(露斃工匠八人，因傷而死者十三人，先是十七年十二月，以原有藥庫密邇民居，移建於黃土坡。故是日民房獲全。自此以後，藥庫酌仿西法建造。)

### 光緒二十年甲午公五十八歲

正月初十日。煉鐵廠開爐煨鑛。(上年秋工竣後，續有布置。至是開工。) 議設水泥廠。(大治灰石，化驗可製上等水泥，擬設廠試辦，不果。) 二月。蔡洋商在漢口設火油池。(上海德商先在浦東設火油池。地方官欲禁而無及。李文忠議以他處不得援例為限制。漢口設池。洋商甫有此議。豫飭關道阻之。) 整頓漢口茶務。(吳撫部銳意整頓，奏派道員莊履良來鄂籌恤商之策，議定於漢口設茶商公棧。撥借官款三萬兩創辦。) 二十八日。交卸兼署巡撫篆務。 三月。直隸總督以公捐田贍族事上聞。(贈公官貴州時，嘗欲仿范文正遺規，設義莊贍族。公遵遺訓。於南皮失于莊李習莊兩處。以銀一萬五千七百七十五兩，買地一千三百四十五畝。以為合族義莊。族中貧苦之家，老疾孤幼節婦，及喪葬無措，幼學無力，考試無資者，分別款助。詳定章程。存於宗祠。擇族八公正誠賢者經管。閭族公同稽查。永杜後人典質。照鈔紅契呈南皮縣存案。同高祖以下者，別置孝義堂義莊贍之。後改名廣雅堂義莊。其贍合族者曰五福堂義莊。) 四月。內閣奉諭。湖廣總督張之洞。仰承先志。捐田贍族。古誼可風。著賞給御書扁額一方，以示嘉獎。旋奉到御書錫類推恩扁額。請於應城縣建陳國瑞專祠。 試辦官款購茶運俄國行銷。(此吳撫部主辦。公意相同。飭江漢關道選上等紅茶交俄商茶船運往。為茶商倡。以利合本。頗有盈餘。惟俄船不願代運。致分其利。遂停辦。) 五月二十五日。煉鐵廠開爐煨鑛。 六月初一日。閱視煉鐵鑛各廠。初十日。鎔廠火。(煨鐵屋七小排。機器應修整者五分之一。鎔廠梁棟初用木料。時酷暑。以為熱極而火發。後乃知奸細所為。嗣是改用鐵梁鐵柱。明年五月。修理竣工。) 嚴禁各屬審案用非刑。及杖責無辜、久羈人證、凌虐獄囚。朝鮮亂作。日本與中國將失和。江海戒嚴。撥水陸諸軍嚴防。 七月初二日。明旨宣戰。初四日。奉旨數省江

防聯爲一氣。初十日。派按察使陳寶箴赴江寧會商防務。十二日。出省。至田家鎮開礮臺。布置防務。十二日回省。越數日。再往覆勘。〔田家鎮建礮臺十四座。募勇二營駐防。名武勝前營。商兩江撥借礮位雷藥。〕  
〔奏准派提督吳鳳柱帶馬勇三營馳赴天津、聽候調遣。〕〔限十日內兼程前進。到津後移駐山海關。續募四營。湖北供餉。〕  
〔籌給諸軍鎗械。〕〔湖北從前無後膛鎗。自粵移任。借撥二千枝並行營軍礮十八尊。其後續有增益。及是以宣戰過速。購運不及。鎗礮廠布置未備。因向上海洋商及各國多方添購。未到以前。凡北上諸軍過境者。就所存悉索以應。又以粵軍多精鎗。建議請調右江鎮總兵張春發、高州鎮總兵潘瀛率所部北上。〕  
又電粵商撥鎗彈運鄂。公在粵時所購鎗礮。李勤恪亦以之接濟北洋。銀元局盈餘之款。廣雅書局積存之款。并湊撥應用。十九日。奉旨吳大澂奏自請帶兵助戰。奮勇可嘉。照所請行。八月初二日。行抵武昌。爲籌接濟。〔所部止總兵劉樹元四營。及抵天津。奉旨防山海關。公奏准調分防岳州長沙之余虎恩振字三營北上。九月。奉旨調熊鐵生帶五營北上。余虎恩添募二營。開拔需時。令奏調來鄂之副將吳元愷統礮隊四營赴山海關。發餉三月。均歸吳撫部調遣。〕  
九月初十日。奉旨張之洞來京陛見。〔翁文恭日記。初十日。徐世昌摺請召張之洞。諭旨來京陛見。按是時累有電奏。陳軍事機宜。奉旨後值諸軍北上。籌餉籌械籌運。夜以繼日。疲極而病。〕  
十月初四日。奉旨前論張之洞來京陛見。日久未接覆電。著即迅速啓程北上。毋稍延緩。初五日。奉旨。劉坤一來京陛見。兩江總督著張之洞署理。迅赴署任。毋庸來京。奏明鐵礮開煉兩爐。鎗礮廠添設礮架鎗彈三廠。織布局增設紡紗廠。并開設縲絲局。〔此爲料理交卸事宜之一。時煉鐵甫開一爐。而一切規模。原備兩爐之用。僅開一爐。效減而費不能省。前在兩廣。籌有煉鐵專款。至是奏請借款應用。籌設紡紗廠始自上年。初議官辦一廠。繼以上海設紡紗各廠行銷甚廣。又議招商集股。添設一廠。以贏利補鎗廠之不足。縲絲局官督商辦。官本八成。商本二成。縲車二百盆。二十二年。添設一百盆。二十三年。改歸商辦。〕  
奉硃批。快鎗快礮爲現在行軍利器。該督於數年前籌備及此。足徵思慮深長。此摺照所請行。〔先後陳奏煉鐵鎗礮諸事。皆下戶部議奏。惟此摺特旨准行。〕  
又奉旨張之洞

奏鄂省織布官局招集商股增設紡紗並添設機器各摺片。業經批諭照所請行矣。湖北煉鐵織布各局。均經張之洞辦有頭緒。現雖調署甯江總督。所有應辦事宜。仍著該督一手經理。督飭前派各員認真妥辦。〔此旨於抵甯江後奉到。并有續旨。申明經理各局連鑄鐵廠在內。〕皇太后六旬萬壽。頒賞大壽字一張、大綬二匣、帽緯一匣、又因進呈貢品、頒賞壽字一方、蟒袍一件、活計一匣、福壽字各一方、三鑲玉如意一柄、蟒袍一件、八絲綢兩匹。〔萬壽經費、由京外臣工報效廉俸四分之一。慶親王意也。是年正月。奉旨交部從優議敘。〕初八日。交卸篆務。乘楚材輪船起程。是日奉旨。江甯將軍著張之洞兼署。十一日。行抵江甯。十二日。子仁瓚著於吳縣吳氏。〔吳清卿中丞之女。中丞命弟大蘊送女至武昌。在八旗會館成禮。〕

壬辰春致閩文介書云。洞自爲外吏以來。如日行荆棘中、愈入愈深。耗無佳境。總由不自揣量、以至愚弱之才。而所爲者皆任重道遠之事、又益之以不合時宜之性情。雖時時猛省痛砭、終亦不能更改。鐵廠事繁重已極。工大用宏。經費十分支絀。須今年冬始略有規模。鑄局甫加經營。事體亦甚精微浩博。織布局將次工竣。夏秋間可開織矣。數年間蒲柳早衰、益覺朽鈍不堪任事、日思投劾而歸。徒以創辦諸事自縛、遂不能退。揆以出處進退之義、甚無謂也。又云、會匪藁莽長江上下游一帶、幾成鉅患。幸嚴緝賊露、誅渠魁數人、近已解散。然根株已深、終爲江湖五省日後之患。按公在任六年、精力耗於織布鑄鐵廠者強半。而鄂寧棘手。則以辛卯一年爲最。及甲午事起、則痛憤憂焦、有非可形諸楮墨者。癸巳正月。御史李慈銘奏勅軍機大臣孫毓汶。時皇太后雖歸政、猶披覽臣工章奏。得慈銘摺。有舉朝無人

之歎。曰、不得已祇有令張南皮來耳。南皮者。時人以此稱公。而皇太后因之。語爲中官所聞。泄漏於外。不數日而徐摺上。遂有不宜政地之語。其事本末。詳同幸所爲舊館轅道。

廣雅書院兩湖書院皆以造就通才。而教法稍殊。廣雅書院有山長。有分教。月有官師課。分經學史學理學文學四門。聽諸生各占所長。兩湖書院有分教而無山長。分經學史學理學文學算學經濟學六門。其先猶月有官師二課。後改爲經學史學地輿算學四門。諸生皆須兼通。不治詞章、無官師課。而以積分考業。廣雅

之教、蓋承詒經學海之遺。兼用東塾讀書之法。兩湖之教。博約兼資。文行並茂。爲乾嘉以後漢宋學派之結局。斟酌於書院學堂之間。中學爲體。西學爲用。乃後來學校之先聲也。



# 卷五

十月十二日。聞旅順孤危。敵兵分撲金州大連灣。奏陳關內外軍事應急之策。請以彭楚漢署長江水師提督。陳鳳樓留防徐州。調李先義募粵勇六營來江甯。籌購船械。〔購船屢議無成。購械事前後不一。新械運到率在明年。惟湖廣任內訂購較早。運滬後即分解北洋、並供江防之用。其到兩江後訂購者。至二十一年二月止、本息合計凡二百八十餘萬兩。部議責江甯籌還。公請五省分攤、以協餉改撥。嗣部議准以借款撥還。而江南於鹽釐項下認還者、猶七八十萬兩。〕十六日。接署兩江總督辦理南洋通商事務、欽差大臣兩淮鹽政江甯將軍各篆務。奏准向淮商勸捐助餉。〔凡一百萬兩。〕二十四日。請敕馮子材募粵勇十營、來江南辦理吳淞沿海等處防務。調廣東副將林保等續募六營。歸馮子材節制。〔是日、旅順陷。敵與英約、不犯上海租界、不入長江。而屢有擾長江警訊、製造局在租界外、又南匯川沙金山衛一帶皆可登岸。故調募粵勇為沿海游擊之師。馮部仍曰萃軍、李先義所部曰廣義軍。林保所部曰廣保軍。嗣又調黃守忠募足三營來江、曰廣忠軍。〕設北上諸軍轉運局。十一月。敵艦南來。初五日。奉旨著嚴飭吳淞各口加意防守。并分電閩浙臺灣各督撫一律嚴防。〔稽查各砲臺。多不如法。飭各將領切實考究操練。并派員查勘白茅沙任家港浙浦一帶於淺水處設防。〕十四日。奉旨准江南息借商款。〔十月十二日、與劉忠誠會奏籌餉事宜、有此一條。部章息借本國商款。二年半為期。廣東息借六年為期、稅務司簽字給票。江南參用部章粵章凡收借款二百三十一萬兩。〕請以出使大臣許景澄所購槍五千三百枝留南洋應急。奉旨前敵各軍、專待槍到進發。該督輒請截留、實屬不顧大局、著傳旨申飭。布置川沙金山一帶防務。十二月初四日。出省閱視海口沿江各砲臺。〔乘廣甲兵輪往返旬餘。日期未詳。抵上海、將閱製造局。而敵艦南來之警至。即赴吳淞口、密以存英廠之大砲二尊令德商運至江陰砲臺。部署畢。至江口天心沙、欲試口門攔沙之力、命司機

者向暗沙馳行。果開濤，以他艦曳退。又設靶江心，命臺艦同時發砲。則時刻參差，命中亦少。知江防不可恃。抵鎮江。留一日，議以敵艦來時，親駐鎮江督率調度，以金陵在 upstream，指揮不便也。是行帶洋弁及出洋學習敵臺之員一一檢閱。凡不如法者，飭速改正。貴州鎮總兵丁槐諳地營之法。適統軍過金陵。屬至江陰指示。提督楊文彪經劉忠誠奏調北上。時調募粵勇皆未至。江南空虛。以文彪尙知敵臺作法，令將鎮江各臺修改。奏請改派湘軍張桂林五營出關。嚴禁水陸各營剋扣撥派播香吸煙諸積弊。設通海淮揚川沙金山乍浦各電線。自通州至揚州。自海州至清江浦。分路速造，以通軍情。金山乍浦同時設線。時威海戰事方急。敵有攻海州訊。令徐州鎮道督剿頑匪。福匪倡亂於江蘇河南交界。明年二月獲首要各犯。盡法懲治。匪患以平。

### 光緒二十一年乙未公五十九歲

正月。禁英商紡紗機進口。此洋商於口岸機製土貨之始。是時紗布利厚。怡和洋行謀在滬設廠。札花紡紗。上年十二月。總署照會各使。洋商販運機器，有礙華民生計之物，爲稅則所不載者，不准進口。道員盛宣懷請公援案禁止。其後馬關定約，許日本臣民任便於口岸以機器製造土貨。英商利益均沾。滯礙遂撤。廣軍至江南。分駐江陰南北兩岸。以李先義接管砲臺。湖北銀元局成。奏請撥案歸南洋經理。餘利協濟鄂省。奉旨允行。銀元分五種。大者重庫平七錢二分。次爲兩開，重三錢六分。又次五開，重一錢四分四釐。又次十開，重七分二釐。又次二十開，重三分六釐。出示江皖贛鄂等省一體行用。置通海各屬防務。海州青口灌河口二處，口門較深。防敵兵圍入斷清江運道。又海門廳爲入江北岸首衝。均派兵扼守。辦海州泰州通州海門三路民漁鹽竈團練。以清內匪。聞敵兵逼近畿輔，請調廣東陸路提督張春發率師入衛。請借洋款購軍艦，重整海軍。用洋將練重兵於徐州。備中原緩急。奉旨除欽奉皇太后懿旨。張之洞向來辦事實心。近覽迭次電奏，於料敵籌備事宜亦多可采。現在軍事方殷。張之洞務當不分

畛域、通籌大局、將籌款贖械運將籍兵等事設法妥辦。傳戰守有資。用副倭住。○采訪兩江忠義六百六十五人。奏請旌表。○此咸同間軍事殉難者、歷任采訪具奏、至是爲第九十六次。○二月初四日。秦陝觀義臺灣之害。○李文忠以正月二十四日奉旨與日本議和。敵所要求、自朝鮮自主中國賠款茶葉割地其尤甚者。○廿初得報、屢電論奏。時文忠未就道也。○十四日。吳元愷等軍潰於石山站。○電飭嚴罪並攻。○遣軍旋調甘肅剿匪。○事平、率隊回鄂。○二十一日。敵艦游弋海州。○三月初而去。○飭地方文武嚴禁漁船爲敵引水。○三月十二日。海州告警。先移派軍三十餘營分布沿海及清江以上運道。○廿三日。秦軍至洋南。○馮提督即日馳赴海州。飭諸軍悉聽節制調遣。○(漕糧各營。亦由漕督飭歸節制。○)令吳淞江陰各營。○洋船有不懸國旗而入長江者阻止之。○籌濟臺灣餉械。○(馬關議約。停戰三十日。而臺灣不在停戰之內。○)廿二十九日。敵降澎湖。奉旨密籌接濟。撥槍二千六百餘枝。彈二百餘萬。南洋兵輪皆木質。不能趕敵。○廿三日。甲日和約定議。二十六日。聞和約割遼東臺灣。奏請設法補救。四月初一日。和約約有內埔通商及口岸製造等項存款。再陳權宜救急之策。並飭諸將速備戰守。初三日。請飭使臣王之春商法國保全臺灣。○初七日。王之春與法外部切實商辦。遵旨轉達。○(王使奏電云。法即調兵船分布臺灣滬尾等處。○)初七日。聞將以十四日換約。會各督撫奏請由各國居間切商。展期十日。俄約德法將日本還我遼東。十四日。和約互換於煙臺。○十三日。電旨飭李鴻章商日本展期。日使伊東忿而欲行。李文忠奏言後事無把握。奉旨速換。事訖而日廷展緩之訊至。已無及矣。法人聞之。兵亦罷。○十九日。電奏再籌補救。勿備歸遼之費。○二十一日。臺灣民電請代表。留巡撫唐景崧仍理臺事、由各國從公割斷。○(香港老人六十壽言、公案遺失迎唐撫之母夫人來。○)慶養備至。飛電戒之。曰。君爲國盡忠。吾爲君盡孝。勿以老母爲慮。○一停止江蘇各屬軍與捐款。停止各轉運局雇養長車。○(係在途軍械運接。○)即撤局。○(一)停辦近海各屬團練。○(一)覆奏辦理處積商款情形。○(上年十二月。奉旨。有欠奏。息借商款。江甯奉行不善。又有戶捐銷捐捐名目。○)應撥撥吾。○飭查明指參、督飭妥辦。是月。奏言江甯神富捐款至上年十二月止。僅收江甯二千餘兩。借款未清。○蘇州神富借

款三十三萬餘兩。餘為官款及各信借款。上海亦祇二百萬餘兩。戶捐舖捐並無此議。且長捐未辦。如得商務捐與捐借撥累者、當立字嚴參。五月初二日。臺灣民自立為民主之國。推唐景崧為總統。設公選官停協臺灣餉械。基隆血戰六日而陷。十一日遊蕩為變。景崧驅魏尾。十三日率兵千五百人因渡。臺灣得魏尾。魏尾魏福建三船。易德旗而出。十七日。景崧至吳淞。二十九日。至江寧。以江南協辦之餉銀二事帶兩派臺灣勇四萬九千八百兩。已購未到之洋礮千尊。槍一萬一千枝。對界易旗之三船。派員搬運。魏氏奏應否。各派員慰勞。著即休致回籍。是時留守臺灣者。有總兵劉永福、臺灣府知府黎景嵩。黎景嵩募勇劉維祺。黎景嵩以安。年員吳湯與黎義民戰於新竹。力竭而退。永福在臺南苦守三月。餉械俱罄。欲行而黎民固留。黎景嵩致道。易順鼎始在山海關參劉忠誠幕府。和議既定。至臺灣。又至廈門。電公力言臺民忠義。不能應也。留閩督派船接官。兵士內渡。籌練自強軍。日兵以德將教練取勝。公懲前愆。擬仿德國營制。練時步礮五兵。萬萬人。正月間。奏請用洋將練兵於徐州。意在重用漢納根。至是延訪德國將弁曾經戰陣者。練自強軍藉此。十五日。交卸兼署江寧將軍篆務。籌擴充湖北槍礮廠。創建金山衛海州等處礮臺。故修吳淞陰等處礮臺。此與練自強軍合為一議。時江南借洋款。百萬鎊以應軍需。會軍事略定。因請以此新練兵槍械。閏五月。又專摺言之。謂上海製造局軍火。若敵艦封口。轉運立即束手。必於沿江內地設廠。則開戰後能濟用。嗣部議於江南借款內撥二百萬兩。附入鄂廠添造新廠。責成每半年造成快槍。萬八千枝。快礮。而吳尊。並配足無煙藥彈。如造不足數。即將承辦之員。處。公言僅費百萬造廠之成本。必不能成。造價。四百五十萬。餘萬之槍礮藥彈。祇可各歸各省。江南設廠。另籌善法。疏入。報聞。四川民教啓。法團兵艦入長江。公電致沿江各省盡力保護。慮沿江散勇勾結為患。電致皖贛鄂三省盡力保護洋火。奏軍素為保。公願嫉。并戒勿生事端。設下關蘆船港口浮橋。築馬路自江寧城中達於江岸。金陵非通商口岸。洋商不得設。蘆船於此。英領事屢以為言。遂由官設蘆船。許洋商納租停泊。築馬路自城中北達江岸。由五里。築南橋。竟險以遠通濟門。費五萬餘兩。提地方及鹽務捐款應用。不動正項。閏五月。裁勇三千。總兵朱洪章

卒於金山衛。〔洪章、貴州開泰縣人。同治三年金陵之役。論功當第一。而名位居次。以蕭孚泗爲首功。及是追論前勞。請從優賜卹。〕議留北上湘軍精銳者。〔北上援軍陸續撤退。有裁湘留淮之說。公謂淮軍驕悍難馴。湘軍尚多樸勇可用之將。如今時勢。恐內地不久將有變亂。宜湘淮參用。備緩急。維大局。致電劉忠誠翁文恭諭之。又北洋海軍既燬。領艦將吏率南奔。沈鴻英撫部爲文肅之子。時以道員參幕府事。念文肅經始之艱。且海軍爲立國根本。言之於公。分別留置。海軍餘燼。賴以保聚。〕奏請修備儲才。〔凡九事。曰練陸軍、曰治海軍、曰造鐵路、曰各省分設槍礮廠、曰廣開學堂、曰講商務、曰講工政、曰多派遊歷人員、曰預備巡幸之所。〕密陳豫結鄰援要策。奉旨敕諭由京至清江與辦鐵路。又以日本約內改造土貨一節關係最重。敕江浙等省籌於出產處先抽釐金。并招商多設織布織綢等局。廣爲製造。籌款購辦輪船。專在內河運貨。以收利權。六月。覆奏仍主先辦蘆漢鐵路之議。〔遵旨遴保勝任人員。舉前臺灣布政使于蔭霖。前內閣學士陳寶琛以應。〕并請由上海造鐵路通蘇州以達江寧。由蘇州旁達杭州。令紳商陳招商設局行輪內河辦法。子權以蔭生由吏部帶領引見。奉旨外用。薦舉前臺灣布政使于蔭霖等十六人。請申明中法條約正義。限制教堂於內地置產。〔咸豐十年議中法續約。倉卒免譯人不得。以法教士嫻華文者充之。教士於華文約本擅增任法國教士。在各省租賃田地建造自便一語。法文約本無此文。此約明言以法文爲正義。公嘗舉此以折法領事。其氣立沮。〕是年。法使請總署通行各省。凡教堂在內地置產。勿庸先報地方官。公奏請申明約章。示以限制。〔七月。請自築東三省鐵路。〔俄戶部大臣徵德告我駐使。俄築西伯利亞鐵路。將來宜與東三省相接。西文報記其事。且謂中國已允。故電總署言之。得覆謂俄未來商。八月。俄使喀希尼照會總署明言其事。請派入入境查勘。總署欲以自辦阻之。而未與言。明年二月。李文忠奉使賀俄皇加冕。俄皇中前說。謂中國自辦。恐力不足。不如令華俄銀行承辦。四月。立密約。許鐵路入境以達海參崴。七月。遂訂東省鐵路公司合同。〕奏陳補款和約事宜。〔凡十九條。詳見電牘。〕協濟陝甘槍礮。〔陝甘回匪猖獗。甘督電請協濟。凡撥解槍四千枝。前後履各半。車礮二十尊。奉旨有力顧大局之褒。〕續裁勇丁二十五

營。設內河輪船總局。(總局設上海。招股商分路開辦。上海至蘇州爲一路。蘇州至鎮江爲一路。鎮江北至清江浦西至江寧爲一路。上海至杭州湖州爲一路。上海至寧波台州爲一路。吳淞至崇明通州海門爲一路。准載客拖帶貨船。於上船及到岸時收釐。以行船餘利之半報効充餉。奏奉電旨崇明寧波路涉外海。可不必辦。以洋商小輪行駛外海。定章不准拖帶民船舢舨也。)議設商務局。(分設上海蘇州江甯三處就息借商款二百三十一萬兩。許商民領款辦製造土貨各廠。以機器繅絲爲大宗。設廠於無錫。兼開商行。俾鄉民養蠶省工。蠶利日旺。其製洋糖洋瓷洋燭洋火柴洋酒水泥針氈之類。皆設廠上海。每廠領款不得過千萬。年息六釐。分十年歸還。不入官本。商務局但經理將還款轉付。是年。無錫商人集資請開商行者四十餘家。而絲廠及洋糖之類。息借之款。戶數零星。不願合股。且須於領款外自籌資本。力有不逮。訖無成功。)議覆產地抽釐。(就產地并抽釐金一次。經過各卡不再完納。限制洋商祇准在內地租棧存貨。不准開行收買。)議覆籌辦蘆漢鐵路。并分支達陝西山東江西廣東各省。(以上三事。皆電請總署代表。奉旨張之洞近來電奏。辭多繁冗。嗣後如有陳奏非數百字可盡者。具摺以聞。九月。翁文恭以公三句中電奏不至。屬文芸閣學士傳語。務照常電奏。并陳明字數難少之故。)江夏馬鞍山煤井轟炸。(工匠多死者。令從優撫卹。)漢陽槍礮架彈三廠成。修崇寶沙礮臺。金陵獅子山等處礮臺成。(獅子山等處以二月興工。先後奏明有案。嗣部議獅子山等處在長江門戶以內。似可無需添築。是月接部文。已竣工矣。)八月。築上海十六鋪至龍華馬路。(十六鋪在上海縣城與租界之間。華商精華所萃。七月。江海關道黃祖絡言。法擬拓界。日擬租地。皆注意十六鋪。公命先築路以杜其謀。未幾。日本人在此勘丈。開報立飭興工。自十六鋪橋起至先農壇止。凡九百三十八丈。留餘地建輪船碼頭。費八萬兩。借撥出使經費。以所收地租歸還。於是華商設廠泊船。綽有餘地。時美商擬辦電氣街車。亦以籌款自造拒之。)初九日。奉旨有奏湖北鐵政局與大冶產鐵處相距甚遠。且近處並無佳煤煉鐵。犯此二病。卽難收效等語。鐵政局經營數年。未見明效。如快槍一項。至今尙未製成。著張之洞通盤籌畫。勿蹈前失。二十八日覆奏。鐵廠槍礮廠已成。進呈鋼鐵鋼軌及鐵

路應用各件式樣。以快槍藥彈咨送督辦軍務處查驗。〔快礮過重。留於江寧。〕請添撥湖北槍礮廠經費。〔援北洋江南製造局成案。請就戶部存滙借款撥銀六十萬兩。或在江南所借瑞記款內撥用。由鄂廠將所造槍礮分四年作價歸還。〕奏陳於江南籌款撥充湖北鐵礮開煉經費。〔光緒二十年十月。奏准借撥廣東武營報效四成及銀元局餘利五十萬。爲鐵礮開煉之費。而廣東此款已協濟北洋及提撥海防用款。因於江南籌防局借撥應用。勸諭淮南增復皖岸及湘岸平江新引。以復左支襄原議。共繳銀三十五萬。又報効十五萬。遠籌防局借款。〕遵旨將鐵礮招商承辦。截止用款。〔兼署湖廣總督譚撫部以公本任內所撰湖北輿地圖說進呈。〕奏摺略曰。光緒十七年。督臣張之洞會同臣在湖北省城設輿圖總局。招考熟悉測算員紳十餘人。覆選學生四十餘人。教以測量繪圖之法。一面向外洋購置經緯儀度時表以測天。方向儀記里輪鋼線尺以測地。奪林儀風雨表以測山。規筆分角器平行尺以繪圖。迨各稱儀器陸續到齊。各學生亦習練嫻熟。先於首府各縣分途試測。漸有把握。復分派鄒代鈞劉翰藻蔡國楨輪流出境督測。並派熟察天度員紳六人。分爲三路。先測六十八州縣經緯。又派已成學生四十餘人分赴各州縣測量地面。仍在各州縣境內每縣酌選數人。授以成法。相助爲理。於是斯夕考核。課責加嚴。窺星極以分南北。分日影以辨東西。指南之方向無差。記里之遠近自確。犬牙畢出。鳥道可稽。凡歷二年而草圖成。復將草圖縮爲小幅。彙合總圖。或脈絡偶有可疑。或度分間有未合。遣員覆核。不敢憚煩。又歷一年而成省圖一、府圖十、直隸州圖一、州縣圖六十有八。裝爲一函、共八冊。復考四郊之形勝、稽千古之戰爭、成省圖說一。各府沿革、悉本全史、旁及近儒所纂史志、或分置、或更名、歷代相承、聯續不絕。而岐山則舉旁流之水、支幹務分。欽水則詳發源之山、委曲務盡。撮其要以爲之綱。成府圖說十、直隸州圖說一。訂爲二冊。各州縣之沿革、則析自府圖說而加詳焉。輿域仿方志之四至八到。天度如揣籥之經直緯橫。山據伯益之經。水溯道元之註。鄉鎮以大領小。職官因地記員。依格成表六十有八。訂爲二十二冊。合府州圖說爲三函。都爲四函三十有二冊。而鄂省之地圖說表以成。右刻木刻。自開辦至告成。共費銀三萬七千七百二十七兩。又錢二萬三千二百六十二串。〕九月。整頓太湖水師。〔水師統額

續兵季新燕捕務廢弛，奏請革職。選將領廉館舉敢者接充。派洋弁測勘寧滬蘇杭鐵路地勢。擇定蘇州日本租界地段。日領事請在閩門外一帶開埠，而人煙稠密，商情不便。又請在胥門盤門前，則地狹難容。堅持數月。擇定距城六里之密渡橋至燈草橋一段。公與趙撫部商定沿河留官地十丈。捕房工務局依章撥章程。悉由我設。界內道路由我修築管理。先就官地填土與工。以示必收主權。籌議改折南漕。與趙撫部往返籌議。民間完本色折色俱仍其舊。而全行折價解京。歲可省運費八十萬兩。嗣戶部議復，本年冬漕仍運本色。明年或運或折，由江浙督撫會商具奏。清查吳淞灘地。變價升科。上海寶山兩縣先後查出一千餘畝。二十日。子仁頌卒於江寧督署。夜半經園池。墮水而卒。十月。電致總署請改中日通商約案有礙主權釐稅者。調兵船北駐旅順。旅順日兵將退。奉旨以南洋各艦移泊。船坊修理。不能如期北上。請先以閩船調防。十一月初一日。日軍退出。初六日。福靖船自閩北上。初九日。南洋震泰開濟兩船北行。旋又派鏡清南瑞兩船前往。閱沿江礮臺魚雷艇。蒞考水師學堂。俄將沃鷹克來。言鐵路事。擬直達大連灣、公密奏中俄接路則可。讓大連灣必不可。康祖詒來。祖詒在京師倡立強學會。朝士集者百數十人。是月十一日來見。旋赴上海設分會。請列名。公覆電云。羣才齊集。不煩我，請除名。捐費必寄。乃助會款五百兩。撥公款一千兩。續裁募勇十四營一哨。劉忠誠防部回防者，遵回防歸併之旨。裁十一營。又滬防三營駐製造局。多積弊。以冬防期近未裁。另委營官接統。十一月。令江海關道集華洋商化驗湖北銀元。湖北銀元較廢元成色為足。而滬商訛言以為過差。抑價行使。因令外國化學家有名者，集衆比驗。以釋羣疑。行銷漸暢。議試行輪船於金陵清江一帶。奏明創練自強軍。選募鄉民。責成洋將管帶。先練二千八百人為一軍。仿西法分十三營。半年後人數倍之。以增至萬人為止。一軍練成，以華將帶之。移洋將數第二軍。一軍餉需約四十四萬兩。二十二年冬。以洋情日變，洋將不宜帶兵。致電劉忠誠，以漸分派安插。奏陳籌辦江浙鐵路。分段籌辦。吳淞至上海為一段。上海至蘇州為一段。蘇州至鎮江為一段。鎮江至金陵為一段。蘇州至杭州為一段。淞滬一段。宜辦以開其端。其餘籌有的款，再定辦法。請

開辦郵政局。十八日。上諭。劉坤一著回兩江總督本任。張之洞著回湖廣總督本任。文諭。張之洞奏南洋創練新軍。責成洋將操練。並金陵上海與辦鐵路各摺。照所請行。張之洞既經創辦。條理秩然。即交劉坤一康續成之。以為補牢之計。至郵政一節。業經總署籌議。租有頭緒矣。文諭。湖廣地切緊要。鐵廠槍礮廠甫經告成。現當開辦鐵路整頓陸軍之際。需用甚繁。煉鋼軋、製快槍、實為當務之急。銀元鑄成。官能而疏通各省。該督回任後。均當加意舉辦。以立富強之本。擬振興白鹿書院。黃澍蘭通政以九月內開缺來。主講金陵文正書院。公議振興白鹿。電商續撫。請延道政主授。得復三邑。聘他人。不果。是年發築甬甌編修主講鍾山書院。年終。公回任在即。編修力辭。延屠梅君侍御主講。亦不果來。編設礮臺專員。各臺操演漸熟。改定規制。分沿江各臺為四路。臺設專官。合數臺設總臺官。論技藝不諳音階。自選專司測演。不當雜差。不無故更換。隨營騰餉。優給薪糧。奏准立案。江蘇盜風日熾。奏請凡斬決重案就地正法。延聘兩湖總心書院主講分教。公雖在江南。猶注意湖北兩書院。課卷。寄江南誦讀。一月。嚴核滬鎮兩關淮鹽總棧督銷局公費。節省歸公。江海關歲節省銀四萬兩。鎮江關七千兩。儀棧三萬兩。皖岸督銷局三萬餘兩。鄂岸督銷局十萬三千兩。其餘著名關卡。分別節減。創設儲才學堂。分交漢農政工藝商務四門。學生一百二十名。為高等。改金陵同文館為初等。學生一百二十名。於英法文外添譯德文。均延西師教之。年需經費六萬兩。以儀徵淮鹽總棧皖岸督銷局節省商捐局用撥給。創設陸軍學堂。鐵路學堂。陸軍學堂分馬隊步隊礮隊工程隊礮礮各門。學生一百五十人。三年畢業。延德將五人教之。鐵路學堂學生九十人。附入陸軍學堂。延洋教習三人教之。兩學堂年需經費六萬餘兩。以江海鎮江南關加餉經費及商捐充用。復水師學堂原額。光緒十六年。沈文肅設金陵水師學堂。分駕駛管輪兩班。學生二百三十人。十七年。裁四十名。以畢業各生已著成效。奏請規復原額。以洋弁稽察金陵軍械所。著為定章。除道員總辦所務外。派洋弁三人。由總辦督率稽察。移建松江火藥庫。六庫為江南各營礮臺火藥總庫。在城中。奏旨撥地移建。分為三所。一設於松江城外鳳凰山。餘分設於鎮江江陰。采西法建造。督辦散勇

爲匪頭目。〔北上諸軍遣撤南旋。其不法者。到處結匪立會。江寧獲匪首唐子鈞等。在關外結會有據。請明正法。〕議減本年漕費。〔漕折定價。向章於公費一千之外加收五百文。是年饑貴民困。商趙撫部酌減。〕濬隄河。〔隄河上承黃河支流之減水河洪河。經靈璧泗州而注於洪澤。支流紛歧。泛溢爲患。歷三四十餘年。飭地方官勘定疏濬。需工款十萬兩。以查抄衛汝貴典產充用。奏明立案。河經徐州者。是年興工。在皖境者。公回任後皖撫以泗州民不願爲辦。檄州停辦。公致電言其不可。謂民生所關。存款有餘。機會難得。宜竟全功。〕招商設紡紗廠於通州。〔此在鄂時因添廠訂購之紗機也。機運滬而商股無著。機價合運費足銀六十一萬餘兩。時陸祭酒潤澤在籍。囑集股承領。祭酒允而復辭。乃以吳淞灘地變價及湘鄂新增票引指撥機價。並屬在籍張修撰齊集股開辦。修撰嫌機貴本重。作價五十萬兩。與道員盛宣懷各認其半。上海通州各設一廠。設通州者曰大生。是爲南通州工商實業之始。〕覆奏錢幣不宜招商鑄造。〔劉忠誠上年奉旨敕招商開鑄銀元。忠誠以爲不可。公到任。紳商請設局製辦。公謂國法宜統於官。不許。至是奏請敕部通行各省。無論金銀銅何項錢幣。統由官辦。不准商人附股。更不准商人自鑄。〕裁竣調募各營。〔先後裁一百九營又四百人。任內調募各營督裁盡。所裁勇丁。給恩餉分送各原籍妥爲遣散。不留一人。〕奏准飭馮子林回粵。仍督辦欽廉防務。運載兵勇。自官轄外。兼雇招商局輪船。先是光緒十一年向旗昌洋行贖回招商局。以無款可籌。將全局產業抵押於匯豐銀行。船牌地契均過戶。在英領事署註冊。是年以商局並無損失。本息一并清還。產業復本局戶名。全爲華商所有。〕議復裁減制兵。〔江皖贛三省分別裁減三成。歲省銀二十萬兩。〕議限制上海租界。〔已議辦者。開鐵路於洋場東北。築馬路於洋場西南。籌議而入奏者。洋人不得於界外築路。已築者不得再展。我於其地築馬路一段以截之。華民以界外之地私賣與洋人者治罪。地方官知而不問者。照溺職例懲處。抱冰堂弟子記。各國每於租界外廣開馬路。設巡警。路之所至。即隱然畫爲租界。奏請於租界外各國所修馬路盡處各接修馬路一段。以扼其鋒。總署竟寢其議。自此租界愈開愈廣。〕撥補衍聖公府徐州祀田。〔元至元間。以沛縣地六十頃。陽里三千六畝爲衍聖公府祀田。歷年久遠。田沒於水。

會文正督兩江。撥補八頃。王文敏於上年奏請補足。奉旨查明撥補。衍聖公太夫人親至江寧面陳。然徐州別無閒田。因就他項充公之地。歲撥租錢一千四百二十串。以符原額。保薦俞廉三等十八。

### 光緒二十二年丙申公六十歲

正月。鑒定蘇滬鐵路官本、官商合辦。〔趙撫部盧公行後築路無成。公故會奏立案。指定瑞記借款二百萬兩爲官本。兩年後可於兩淮鹽務再籌一百萬兩。餘招商股。〕定自強軍的餉。〔裁減制兵省銀二十萬。蘇湖新增米釐十二萬。蘇滬米釐停撥洋款騰出三十八萬。以充新軍的餉。回任後劉忠誠欲以自強軍歸湖北訓練。而湖北無的餉。遂止。〕請加鄂湘兩岸引票。以課釐湊解洋款、并統籌歸還之法。〔以上三事同時並舉、爲江南立富強之基。〕特參不職知縣三人。選派學生四十人分赴英法德三國肄業。〔仿會文正督兩江成案而選已通西文者。期以六年畢業。於瑞記洋款項下撥二十萬兩存儲備用。〕覆奏改折南漕辦法。〔上年有旨飭與江浙兩省及漕督會籌具奏。往返電商、意見不一。戶部亦慮近畿荒歉、采辦價昂。至是交卸在即。單銜具奏。〕請於江西興辦內河輪船、仿製洋式瓷器、創辦蠶桑學堂。〔自吉安至吳城、自吳城至九江、自九江至饒州、分三路行駛淺水深水各輪船。仿製瓷器、請免稅釐十五年。江西素不產蠶、請於高安縣設學堂講求種桑育蠶之法。〕議定通海棉花布匹貨出境統捐。〔行銷寧滬淮三屬棉花、行銷寧屬布匹、行銷通海百貨、其釐捐均於產地統收、由商人包認、共二十六萬串。較平時減二十分之一。飭司局州縣籌議至再、以交卸在即、令地方官來省面商。已定議矣。而商民猶有不懌。爲之長歎。〕十五日。劉忠誠公行抵江寧。十六日。電商趙撫部速辦蘇州租界馬路捕房等工程。〔是時交涉未決、公議先登以折之。既而交涉中變。二十三年、定租界章程。界內道路橋樑以及巡捕之權均歸領事管理。沿河十丈之地作爲懸案。〕十七日。交卸篆務。即日啓程。是夕至牛渚。有詩。江行登采石磯太白樓。過蕪湖。留一日。〔袁忠節張謙於官廨。縱談竟日。〕西上登小孤山石鐘山。過廬山之下。〔江行登廬山詩自注、先約陳伯潛同遊。陳不到。遊亦輟。〕

至黃州。游九曲亭寒溪寺。所至皆有詩。二十二日。至田家鎮。閱礮臺。二十三日。至大冶。觀鐵山。二十五日。至江夏馬鞍山。觀煤井挂綫路。二十六日。至漢陽。觀鐵廠。二十八日。過江至武昌。

公初署兩江。凡一年又四閱月。自籌防迄於善後。其間無一日休息。始至之日。未受篆即奏陳軍事、籌購軍械、及奉旨仍回本任、於兩江吏治民生、力謀整飭神補。同莘之母舅張望吧先生嘗言。乙未除夕三鼓、猶在幕府治事。丙申元旦。亦在署竟日。今集中載此數日發摺凡十餘件。其一證也。於商務壹意振興。維持尤力。滬商葉成忠何瑞榮聲譽素著。御史張仲忻言其運糧濟寇。密旨嚴拏懲辦。公疏言兩人素有身家、且或爲各路軍營或爲臺灣後路糧臺委以采辦軍米重任。則其平日爲人必當爲各該軍營等所深信。似不致悖謬若此。臣遴委司道大員三次詳查密訪、不能得其影射私售之實證。此等違禁濟寇重情、既無確據、礙難以展轉流傳之詞、率與大獄。株累商民。應請毋庸置議。此事保全甚衆。滬商不知也。於官邪吏蠹、則釐剔必嚴。查覆文武大員各參案、據事直陳、無所迴護。道員劉麒祥總辦上海製造局。言路劾其任意揮霍、虧空鉅萬。是時製造局以整頓軍械故、直隸於督辦軍務王大臣。廷寄敕公督飭劉麒祥認真規畫。毋庸王大臣督辦。並飭查有無虧短。公奉命即飭劉麒祥交卸候查。不以有督飭規畫之旨稍存瞻顧。論才以廉樸爲先。宜昌鎮總兵劉鶴齡、甲午冬奏調至江辦理防務。年老矣。以不營私財故而用之。欲激厲諸軍。挽回風氣。鶴齡既卒。奏請優卹、稱爲廉將。乙未冬、舉行計典。致趙中丞電云。黃道開張。馬道樸素、鄙意擬先儘樸素者。黃、謂上海道黃祖絡。馬、謂江安糧道馬祖培也。湖北副將劉恩榮因公虧累。公致譚敬帥電云。劉副將操守最好。不缺額。不扣餉。因公受累。似可不必參辦。此皆見之奏疏電牘者。本集不能備載。附記於此。

乙未八月。疏陳以湖北鐵廠招商承辦。九月。函致翁叔平尙書言及鐵廠用款。一疏一函均見本集。吳縣汪荃臺先生（鳳源）附跋語於函後。今錄存之。常熟極修邊幅。與文襄行徑本不甚同。然作京官時。雖蹤跡較疏。而同在清流。未嘗不互相引重。迨文襄開府粵楚。興作繁多。規模宏大。常熟局量較隘。視文襄舉

動不無揮霍之疑。漢陽鐵廠開端。中國創舉。事事借重客卿。糜費所不能免。常熟時筦度支。文襄請款。動遭駁詰。賴醇賢親王壹意維持。廠事得不中輟。卒以預估之數一再追加。用至六百餘萬。仍不足用。始奉旨招商接辦。非文襄本意。此函詞意雖極推崇。實望其維持到底。筱山傳述之言。蓋以掙節爲規。故篇末云云。卽申明無可掙節之意耳。此事始末。文襄親爲余言之。要之事皆因公。初無私怨。則可一言決也。

光緒十七年。王可莊太守官鎮江。議興復文宗閣。十八年。太守移知蘇州。爲溥玉岑學使陳集鈔書之法。學使奏請於朝。已邀允矣。時縉而舉羸。未能也。公至兩江。議躍而成之。香嚴老人六十壽言。公議復建金山文宗閣。借校寫四庫書爲名。招集四方賢士爲強學會。以追復曾文正開府兩江書局采訪局賓賢之盛。會離任。事中止。以建閣校書之名。爲講學圖強之實。需以歲時。此閣之成。固意中事。此與興復白鹿一條皆有志而未逮者。



## 卷六

二十八日。回湖廣總督本任。二月。設護軍營。練習洋操。(在兩江交卸時。奏調護軍前營來鄂。回任募足兩營。曰護軍前營護軍後營。以都司張彪參將岳嗣儀管帶。募德將爲總教習。選津粵武備學生爲分教習。兼練馬步礮工各隊。仿武毅軍餉章。裁營抵餉。隨時親臨考校。)四月。設官錢局。行用錢票銀元票。(錢票每張一千元。銀元票每張一元。每元準制錢一千元。)以鐵廠招商承辦。(鐵廠自籌辦迄竣工開煉。所費已五百數十萬兩。翁文恭在戶部。議招商接辦。道員盛宣懷初擬承領。公謂路經礮械非鐵不成。正須官方擴充。招商非計。既而官款益絀。盛亦辭。二十一年六月。奉旨招商承辦。盛意猶豫。乃詢之洋商。則英法鉅商願繳款合辦者甚衆。然慮其多後患。是時盛官津海關道。招之來鄂。強而後可。議定以後廠本商籌。自鐵路公司訂購鋼軌日起。每出生鐵一噸抽銀一兩。以還官本。還清後永按此數照抽。漢陽鐵廠馬鞍山煤礦皆爲官本。以前欠款。官局認還。如鐵路一氣呵成。用軌悉由廠造。則商於預付軌價內先提還官本一百萬。於應繳每噸一兩內扣除。惟馬鞍山煤礦礦重。不合化煉之用。由商另覓開采。凡鋼鐵煤運銷各處。均請免稅十年。鐵廠收支清帳。按年送湖廣總督查核。以是年四月十一日爲商辦之始。二十三年五月。盧保淞滬鐵路皆已開工。訂購鋼軌。繳一百萬。還官借槍礮廠織布局經費。)議陝江試行輪船。(日商請行輪川江。而川江之險。不在川而在鄂。川省請先於鄂省試辦。公謂利害川鄂相同。若不達重慶。祇往來歸州巴東一帶。是無形中添一通商口岸。飭關道妥議辦法。)定漢口俄國租界條款。(二十一年。德國請添漢口租界。德有勸我歸遼之力。總署允之。俄國亦以租界請。是月。議定條款起自英租界以下至法租界止。)五月。勘萍鄉煤礦。(萍鄉煤礦輕灰少。鐵廠請委員偕鑛師往勘。定議大舉。)六月。改定自強學堂章程。(以算學歸兩湖書院另課。停格致商務兩門。改課方言。分英法俄德四齋。爲一切西學階梯。選已通中文者入堂肄業。

學額每門三十名。鐵路局原有化學一堂。併入別爲一門。附譯西書。以商務鐵路等法律爲主。補同文館製造局譯書所不及。二十三年。添日本文一齋。籌解部派應還俄法英德借款本息。二十一年九月。戶部九撥請。借俄法銀行款四萬萬佛郎。合銀一萬萬兩。以還日本第一次賠款。是年三月。又借英德商款一千六百萬鎊。合銀一萬萬兩。付第二次賠款及威海軍費。擬派各省認還。湖北每年應解一百二十萬兩。部議除京餉協餉旗餉備荒經費內務府經費出使經費等項照常分解外。無論何款。俱准酌量盡提。司道關局皆束手。公謂不可令戶部失信遠人。先擬還第一期款。別籌膠鄒整頓之法。請直隸代造湖北漕船。〔本年湖北應承造運米剝船一百五十艘。戶部限秋間解津。而木價錢價並貴。且時已季夏。必誤漕運。因援同治五年成案。請在津代造。二十四年。湖南承造漕船。援案辦理。省費無算。按察江先生以造船事被累。公最所痛心。故力籌節省省事之法。〕江漢盛漲。各處告災。籌款平糶賑撫。奏請撥地丁鹽課銀接濟。留漕運運費以充工賑。〔於漢口設局專司賑務。是年沿江各省皆苦雨。下游運米不至。湘米亦不出境。商湖撫給照准民運米入鄂。〕七月。繪刻承華事略補圖成。〔內府藏王惲承華事略鈔本。元圖久佚。公在兩江。南書房奉旨發交靈刻。吳清卿中丞方家居。公舉以相屬。延吳中善畫者依說爲圖。并請費祀懷編修督率其事。考究歷代衣冠器物制度。審度事情。配合景物。圖成。以精刻不易。議用石印。南齋謂此欽定第一部畫。必宜刻木。乃選良工刻之。成而復改者數四。別以石印法縮印。凡費一萬餘兩。是月進呈。當時善畫人物者。推沈塘吳友如。皆與於茲役。〕會北洋大臣覆奏蘆漢鐵路商辦難成。請設鐵路公司。招商集股。暫借洋債墊用。以蘇寧鐵路並歸修築。保道員盛宣懷總理其事。〔上年十月。督辦軍務王大臣奏言。臣等面奉諭旨。以鐵路工程兩宜舉辦。飭廣西臬司胡燏棻先將津蘆一帶勘估。竊以提綱挈領。自以蘆漢幹路爲樞紐。淮地段綿長。必須南北分舉。而一切材料。由津至蘆溝。轉運艱阻。故擬先將此路造成。以固始基而省運費。且冀各省殷富紳商聞風興起。集股較易。奉上諭。津蘆一路。即派該臬司督率興修。蘆漢一路。道路較長。經費亦鉅。如各省富商有能集資在千萬兩以上者。准設公司興辦。是年春。國子監司業瑞洵奏言。鐵路商辦難成。請提款官

辦。會粵商許應鏞等先後呈稱集股有著。各願承辦。請派大員督理。詔以瑞洵原摺交督辦軍務王大臣奏議。嗣議復、官辦不如商辦。奉旨、提款官辦、萬不能行。惟有商人承辦。官爲督率。著王文韶張之洞會同辦理。許應鏞等分辦地段。准其自行承認。不得有洋商入股。公與文勤察知許應鏞等股分皆有洋商在內。而道員盛宣懷以承辦鐵廠至鄂。與言鐵路事。議論透關。擬舉其經辦。並參酌瑞司業原奏、請在英德借款內提款、發交公司、作爲官股。俟商股招定。陸續收回。既定議。會銜入奏。創設武備學堂。〔取文武生員賈監候補員弁及官紳世家子弟入堂肄業。不限省分。調江南所延德國教習二人來鄂教授。十月。又招考舉人五貢廩增附生或在本省各書院肄業者。定額一百二十名。其取材於此者。以本有階資。可備將領之選也。〕八月。與北洋大臣電致總署、請以粵漢鐵路歸鐵路總公司兼辦。〔蘆漢鐵路貨少利微。盛議必兼辦粵漢而設銀行。商本方能運用。入奏時嫌於籠蓋利權、故不之及。至是盛已入京。乃以兼辦粵漢之說爲發其端。而銀行事爲盛計終非萬全。故不入告。盛召對。退而陳自強大計。請設達成館。開銀行。特旨允准。後上海蘇杭沙淪四處同日開關。公奏准以荆宜施道監督沙市關稅務。〕九月。奏請仍免鐵廠稅釐十年。〔五月、總署奏准、凡機器製造貨物、不論華商洋商。每值百兩徵銀十兩。此後無論運往何處、概免稅釐。七月、戶部議鐵廠既歸商辦。應照案值百抽十。公言煉鐵與製造土貨不同。請仍照原奏優免稅釐十年、或俟官本繳後照收、以維鐵政。〕十月。奉上諭、前據王文韶張之洞會奏、蘆漢鐵路另籌辦法一摺。當交總理各國事務衙門王大臣查閱。旋據奏稱、遵旨諮詢盛宣懷條陳一切辦法。均確有見地。請准設鐵路總公司。令盛宣懷督辦。從蘆漢辦起。蘇滬粵漢。次第擴充。卽由公司招商股七百萬兩。借洋款二千萬兩。商借商還。並提撥借款一千萬兩。南北洋存款三百萬兩。以期官商維繫。速成鉅工。並稱蘆漢既爲幹路。非雙軌不足爲各路之倡等語。並將盛宣懷所遞說帖抄錄呈覽。昨召見盛宣懷、奏對具有條理。已責成實力舉辦、以一專權。仍著王文韶張之洞督率興作。作事謀始。務策萬全。著再逐細考校、電商妥洽。盛宣懷開缺以四品京堂候補。

此後摺件、著一體列銜具奏。〔鐵路所經之地、光緒十六年派洋員錫樂巴逐段測繪。鄂境自漢口經黃陂孝感以達信陽。又派員繞道襄樊、入豫境新野、以達鄧州。查勘比較。信陽工艱而路近。襄樊工易而路長。至是定議經信陽一路。蘆溝漢口兩端同時興築。〕日本設郵局於租界。請總署阻之。〔新開四口同時設局、以各國在上海設局爲詞。謂中國所辦得法。當與各國同撤。總署不能拒。〕十一月。改甯湖書院月課爲日課。〔分經史輿地時務四門。諸生按日纂校。分教按旬校閱。按日查齋。〕議沙市租界略定。〔新開四口租界。公初擬併案議定。是年三月、道員黃遵憲與日本領事會議於上海。日本固爭蘇州租界管理之權。捕房路政皆屬之。公屬勿言沙市開埠事。旣而蘇界議定簽字。日本外部猶有不滿。其駐使與總署另議。卒如所請。及沙市議界、日本欲其商民與華民雜居。公不許。許以沿江新灘。日本索灘地八百丈。且援蘇杭例。官築路而日本管理之。潁江低窪處、官爲築隄。公堅持不可。至是議租地寬一百二十丈、長三百八十丈、爲築土隄以障之。而管理之權、總署謂應如蘇杭例、竟不能改。〕十二月。請停分發湖北候補人員一年。〔湖北自道府至佐雜官額設三百餘員。而是時候補者至一千二百人、故有此請。〕請展緩查閱營伍。〔是年爲查閱湖北營伍之期、奏言湖北除洋操護軍兩營操練已熟外、其餘裁併移調、到防未久、操練日淺。本年秋季間。宜昌荊州漢陽安陸荊門各府州隄皖漫潰。災區甚廣。而出省閱伍、適在此數府州之境。勞費不便。請俟明年災象稍紓。各營操練有規模、再出省簡閱。〕是年有憶蜀游憶嶺南草木諸詩連珠詩。〔是年回任、以鐵廠招商承辦、官力稍紓。而憂時感事。往往託之吟詠。樊增祥廣雅堂詩集跋。公自光緒丙子冬由蜀還京、作詩甚少。自己卯至壬午、殫心國事、更無餘力爲詩。壬午出撫晉疆、明年移督兩廣、荏苒八年、吟事都廢。在粵時僅有賀子青宮相子入學詩二首。督鄂十八年、自庚寅至癸巳、中間惟贈俄太子希臘世子二首。然係幕僚擬作、公稍潤飾之。直奎乙未、自兩江還鄂、始壹意爲詩。如憶蜀游十首、憶嶺南草木詩十四首、皆督楚時作。卽輓彭剛直詩亦在鄂補作也。按光緒辛卯、課廣雅書院諸生、以憶嶺南草木詩命題。其後又自作之。丁酉春、有舊吏自上海來。公示以近詩一冊、問識連珠詩命意否、答。詩意暗合時事、當有所指。公爲莞爾。同辛於丁酉戊

戊閏、見憶嶺南草木詩刻本。證以樊山跋語、知以上諸詩皆是年所作。故繫於此。

### 光緒二十二年丁酉公六十一歲

正月。鑄設錢局。〔湖北錢銀昂。上年購銅附粵局鼓鑄。運費折耗。乃設局購機鑄造。并以銀元局機器。所用。所費五萬餘兩。嗣銅值益昂。機器亦不合用。鼓鑄遂停。〕請緩行製造土貨徵稅章程。酌改存儲關稅章程。〔馬關定約以後。日商於口岸製造土貨。議定納稅與華商同。總稅務司建議值百抽十。總署從之。新章既行。華商多虧折。公謂邊華商生機而無礙洋貨進口。且洋商設廠能否照納不可知。加稅宜緩。電商蘇浙意見相同。浙撫先電奏。總署議暫緩辦。此疏既上。總署議准華商造貨仍照從前完一正稅之章辦理。又華商製造之貨。新章須存關棧候撥。商情不便。公奏請酌改。亦下總署議行。〕奉旨兼署湖北巡撫。〔譚撫部入京陛見。〕二月。籌辦宜施鄖三府災賑。〔上年秋冬間災象始見。施鄖距省遠。文報臨月方至。運糧尤艱。民多餓死。其後遂設施鄖電線。是月、四川流民入境者數萬人、飭屬撫恤。并堵築各隄潰口。奏請推廣捐輸以充工賑。先移別款應用。俟收款歸還。并奉頒內帑五萬兩核實散放。是年秋大熟。總辦土藥稅局道員趙瀆彥等請建倉積穀。命速舉行。〕十六日。兼署巡撫篆務。三月。禁武漢質當用錢店雜票。〔以推行官票也。〕圈購鐵路用地。〔北路蘆保一段購地就緒。南路亦分段估工。先一月、出示嚴禁官商於沿路圍地居奇。並飭各縣停止印契。三月、派員會同洋工程師勘地釘樁。地價照前三年時值酌中核定。〕會奏蘆漢鐵路借用比款。請先撥部款開造。〔盛京堂先與英德議借。二月、比領事來見。述其國主之意。願借款而不預他事。公要以取益防損者數端。比領事多允從。盛以英德議借在先。頗難轉圜。三月、比國富商來鄂。盛京堂亦至。知英商於蘆漢路外兼攬造粵漢一路。公謂東路歸俄。南路歸英。貽害必鉅。而比商所開條款。無牽涉權利推廣辦法之處。惟須先用中國自有之款。再用借款。由中國國家作保。乃會北洋電奏請借款於比商。先發部款開造。略成一段。抵借一段。中旨慮國家為商人作保之不便。覆奏力陳無害。謂事機易失、

不可再遲。比使欲取決於公一言。告以書擔保不如書批准。比使無異言。六月、立革合同。盡押會奏。四月。奉上諭、前據盛宣懷條陳自強大計、請開設銀行、業經諭令招商集股合力舉辦。茲據御史管廷獻奏銀行官設流弊宜防一摺、流弊固宜防範。然中國不自舉辦、一任外人攘我利權、亦非長策。著王文韶張之洞會同盛宣懷悉心覈議。究竟官設銀行利弊若何。澈始澈終詳細具奏。另片奏盧漢鐵路息借洋款國家不宜代商作保等語、并著就現在籌辦情形、權衡輕重、悉心妥議具奏。漢水盛漲。唐心口隄潰。京山漢川天門諸縣均告災。飭屬防匪辦賑。速修隄工。薦舉循良之吏四人。節錄原奏、沔陽知州丁國楨、操守清廉、盡心民事。而才具甚長、足以濟愛民之政、嚴於治盜、明於聽斷、所到之處、百廢俱舉。襄陽知縣李九江、廉樸耿直、不染時趨、政事精勤、周悉民隱、所至皆有循聲。江陵知縣張集慶、樸實勤明、才具穩練、去秋大水、籌辦平糶、盡心擘畫、地方賴以安輯。宜都知縣陳長樞、守潔才優、政事勤敏、宜都去年被災、賑糶兼施、小民饑而不害。按本集此摺未載。故存其略、後仿此。參劾州縣不職者五人。奏請緩解鐵路海軍等費、湊還四國洋款。部派認還俄法英德借款、原議無論何款均准盡提。嗣加限制、凡不敷八十萬兩。無以為計。故有此奏。整頓釐金。責成所在道府州縣、稽察弊端、扶同徇隱者、撤任參處。預杜洋商壟斷湖南水口山鑛砂。湖南鑛務委員陳季同、與洋商載瑪德訂立合同。不論鑛砂多寡、概歸承買、每石價銀一兩二錢。公致函湘撫具言其害。合同旋廢。按湖北辦鑛不許洋商入股。湖南無成案。故有此事。鑛砂原文作黑白鉛砂。即錳鑛也。改鐵政局為鐵政洋務局。兼管鐵路鑛務事宜。二十六日。交卸兼署湖北巡撫篆務。讀撫部回任。湘鄂電線成。致陳撫部電云、湘鄂線通、公之功也。風氣既開。要政遽舉。湘中富強之基始於此矣。五月。籌補土藥稅。定章土藥每百斤徵銀六十兩。各省歲收祇一百數十萬。總稅務司言土藥每年約產三十萬擔、當收銀二千萬兩。部議仿洋藥稅釐并徵之法、於出產繁盛各處設總局收稅。無論運往何處、概不重徵。提一成開支局用、六成留本省備還洋款、餘三成解部、供奉宸苑頤和園等處工程。湖北不產土藥、宜昌關歲收土藥稅四十萬兩、各局卡歲收二三十萬兩、皆來自四川雲貴等省、此議行則

京餉洋款槍礮廠經費皆無所出。行司籌議，謂惟有由四川撥補，而允否不可知。縱目前應允，日後必欠。迄無善策。是時鹿文端督四川。公以三策電商。一無論川省如何徵收，湖北奏請仍照舊章。一湖北派員赴川，附川局收鄂稅。一如司道議。嗣文端覆奏，土藥稅礙難重徵。貴州亦請仍照舊章。九月，覆奏言湖北就地無可徵收。所收外省土稅，仍請照舊辦理。其議遂寢。六月，紡紗局成。此卽二十年奏設之紡紗廠。原議官商各占股本三十萬兩。以權限不均，商情不便。籌款撥還商本。由官試辦。會奏議覆官設銀行利弊。原奏盛京堂主稿。公自以未悉銀行利弊。擬不列銜。王文勤來電云。杏孫才足濟時，我等既因鐵路提倡之。似宜始終護惜。俾底於成。若稍有參差，外人乘隙而入，有妨大局，公允列銜，於摺內補入數語。一銀行出票不得過資本九成。一不得兼作他項買賣。一每半年由南北洋大臣派員稽察一次。奏入。下所司知之。七月。選防綠各營兵勇練習洋操。每營挑選樸實強壯年在二十五歲以下者十分之一。訓練半年遣歸。更番調省。槍礮局添設鑪鋼廠。新式槍礮皆用精煉之罐頭鋼。鐵廠所煉者已不合用。是月，訂購德國製鑄鋼機全分。每日能煉二三噸。價十三萬五千馬克。擴充經心書院課程。分設講堂。兼課時務。糾正湖學報文字。有電文致江建霞學使陳右銘撫部。本集失載。原文錄後。批准湘鄂紳商試辦內河輪船。時洋商猶不准在內河行船。故華商自辦，祇作爲善堂官局所用。以防藉口。明年春，總署定章。華洋商均准於內河行輪。不復限制。選旨薦舉人才。八月。六十生辰。蒙賞御書宣猷篤慶扁額一面。福壽字各一方。無量壽佛一尊。嵌玉如意一柄。蟒袍面一件。小卷吉綢八匹。湯綢八匹。皇太后頒賞御書綏疆錫祐扁額一面。啟歷宜勤嘉茂續靖共介題錫蕃釐對聯一副。福壽字各一方。長壽字一幅。御筆蟠桃圖一軸。雲蝠團扇一柄。蓮花摺扇一柄。無量壽佛一尊。嵌玉如意一柄。蟒袍面一件。大卷江綢十二匹。分別具摺謝恩。裁減綠營兵額。部議驟減七成。湖北擬裁五成。湖南除苗疆外。如湖北例。期以五年裁竣。留將弁額。爲練軍升階。湖南裁兵事，以明年三月會銜入奏。修巴東長陽施南來鳳驛路。初議修土路，嗣爲經久計，改修石路。或土石相間。務期堅實寬平。沿路多建灰棚以便行旅。凡用錢三萬貫。奉頒賞平定陝甘新疆回

方略一部。平定靈南回匪方略一部。貴州苗匪紀略一部。委員勘粵漢鐵路所經地段在湘境者。六湖蕪風氣未開、勘路不用洋人。九月。籌設農務學堂。延美國教習。委同知汪鳳瀾偕赴近省各縣察看。海美國購新式農具果穀佳種。十月初七日。暨臨武開鄉試。德國公使海靖來。優禮款待。其來乘兵艦。隨員登岸。頑民鄉石生事。德使照會至。立飭嚴擊。獲八人杖責枷示。命關道代致歉忱。德使無辭而去。是月。山東曹州民殺德國教士二人。德兵占膠州灣。蘆漢鐵路借款定議。六月入奏後。猶未允行。至是時局驟變。遂定議以部款一千萬兩官股三百萬兩爲基。借比款四百萬鎊。國家批准而不擔保。令江漢關稅務司穆和德籌與茶務。穆和德忠於職務。願謀補救華茶之術。故委以此事。許集股購機製造、購地種植。惟不得招附洋股。嗣各屬官商謂機製者行銷不廣、又手札曉諭之。如商本不足。許撥官款以助。十一月。重定漢口俄國租界條款。漢口地貴。上年議訂條款每方價十兩。業主不願。至是俄領事催促甚急。定期交價、仍每方十兩。先租江岸一段。日本索租漢口沿江之地。自德租界以下、沿江迤北一千丈、橫一百五十丈、畫定爲鐵路發端之地。已丈量釘鐵。築石隄二十餘里。日本於此索開租界三百丈。公電總署籌商。十七日。出省勘京山縣唐心口隄工。乘船上駛。二十四日抵工次、周歷履勘。二十八日。回省。日將神尾光臣來。公方出省。令關道及知府錢恂接待。光臣密示修好之意。是時俄謀占大連灣旅順。英欲擅長江之利。各國兵艦雲集海口。公回省。光臣已行。約之重來。光臣令其參謀部員宇宮都太郎來見。密告此來係奉國旨勸中國結好於英日。派學生赴日本學習陸軍。公密電奏明。覆陳應付德占膠澳辦法。詳見電牘。上年春、德外部告我駐使、欲借中國一海口以備屯兵。十二月。德使海靖明言借膠州灣。總署議自建船塢以抵制之。是年十月。適德教士在鉅野爲匪所害。德廷遞調水師登岸、逐總兵章高元。東撫請戰。廷旨戒勿孟浪從事。我駐使向德外部理論。則諉爲國主之意、提督之權、外部無可商。十一月、德使與總署議結。於建堂賠款外。索租膠澳及山東築路開鑿之權。此案德蓄謀甚早。赴機甚速。而總署辦理甚密。公初不悉其詳。及是密旨詢問、故有此奏。十二月。奏請設立粵漢鐵路總公司。粵漢鐵路先議借

美款創辦。是年春、英商屢請承造。至是謀益亟。以中國已允法路達龍州、俄路貫吉黑、而德國且謀築山東全省鐵路、故英國必欲專粵漢之利。湘紳熊希齡等請設公司自辦。公謂路經三省、宜合辦分任、先招股數百萬、遞招遞墊、遞修遞押、遞借遞招、展轉相生、則輕而易舉、湘撫陳右銘中丞意同。公與盛京堂電致王文勤會商具奏、謂時局頓變。惟有占定自辦、補救萬一。仍與美商籌議借款。請旨核定。奉旨諭現在時局日亟。粵漢一路、雖經總署王大臣奏明次第舉辦、尙未定有切實規模。自應預爭先著。若由湘鄂粵三省紳商自行承辦、仍歸總公司總其綱領、實於大局有益。著王文韶張之洞盛宣懷譚鍾麟譚繼洵陳寶箴許振樟隨時會商。盛宣懷、妥議招股借款各節、並選舉各省紳商、設立分局、購地鳩工、認真辦理。各國如有以承辦此路爲請者、卽告以三省紳商自行承辦、已有成議。或可杜其要求。此路貫湖南腹地、銜接武昌、不特取徑直捷、練兵開礦、諸凡有益。該大臣等當安速開辦。請緩付日本賠款。明年五月、又屆應付賠款之期。英人願借款於我。公言借款有抵押、有折扣、種種貽害。按約賠款本可分期交付。祇須認息。此時威海撤兵、遼早無聞。不如認息緩付。奉旨電奏頗有可采。現英議借款、俄欲借灣、正在未定。已飭總理衙門從長計議。除夕又電陳借英款之害。嗣總署商日本未允。明年二月。遂借德華匯豐銀行一千六百萬鎊。合銀一萬萬兩。以蘇浙贛貨釐鄂皖鹽釐指抵。派總稅務司代徵。旋改由總局代收、解交稅司。親隨武備學堂考試。以爲常、後不備載。是年議編歷史邦交錄。張森楷合川縣志、光緒二十三年、富順宋育仁受張文襄公之命、作歷史邦交錄、屬森楷發凡起例。而專屬以晉魏南北朝事。分甲乙二編。甲編禮交。立和議、朝聘、驛理、使材、文辭、禮俗、物品七門。而奏疏、議論、入朝、請命、封拜、興繼、納立、和親、建置、僑徙、懷拓、界畫、預儲、推擇、使命、應變、國書、辭令、儀節、風俗、贈賄、貢獻、交際、二十三目隸焉。乙編兵交。立戰議、兵制、謀略、攻戰、資儲、器械、善後七門。而奏議、議論、邊軍、衛戍、法制、任將、練兵、料敵、撫馭、善選、用間、伐謀、設備、示形、用銳、用奇、夾攻、詐敗、詐和、乘虛、圍攻、受降、屯守、火攻、水攻、芻粟、飛輓、徵集、兵器、船馬、礮火、研兵、修守、撤防、三十四目隸焉。書

成以付育仁，既而全書不就。森楷、公督學時所取士也。】

### 光緒二十四年戊戌公六十二歲

正月初二日。電陳俄借大連德修東路英借款抵押長江之害。〔俄必欲租旅順大連灣屯兵。又請准東省鐵路公司自鴨綠江至牛莊一帶水口擇宜連接。德使開條款。如嗣後山東開辦鐵路及鐵路附近鐵路。先令德人估辦。設德華公司，造路通山東省城，並遼省及鐵路附近之鎮。總署允其造膠濟一段。造成再商，與中國自辦幹路相接。英借款見前。原議英人因借款要我五事，謂開三處口岸。造鐵路由緬甸達長江，於各處行小輪船，免租界外釐金，及長江不讓別國也。〕初五日。電奏諭密閱請造津鎮鐵路之害。〔上年十二月。江蘇候補道容闈至總署言，由天津經德州至鎮江，爲南北孔道。必宜專築一路。現值德人藉口教案。欲修軌道直達濟南。倘我先造南北幹路，使不能再加展拓，最爲要著。公謂如此則德兵長驅一日而至永定門，且蘆漢鐵路比國允借之款必將翻悔，蘆漢或因此而廢，總署則謂此路可與蘆漢相輔而行，且杜外人覬覦之漸，奏准飭容闈妥籌開辦，既而德使有異言，乃止。〕日將神尾光臣再至武昌。〔力勸中國練兵。公意擬湘鄂合練一軍，爲各省倡。延日人爲教習。又商緩付賠款。神尾不可。〕派知州姚錫光等赴日本考察學校。〔注重武備。〕請開岳州爲通商口岸。〔英人請開湘潭商埠。爲所索三口岸之一。公商陳撫部奏請自開岳州口岸，以占先著。〕三月。總署奏准與福建三都澳同時開辦。〔二月。議粵漢寧鄂鐵路借款事。〕寧鄂一路，即後來浦信鐵路之發端。是時盛京堂議由江寧展築以達漢口。公亦言不如罷津鎮而議寧鄂。粵漢一路，三省紳商雖呈請自辦，而集款不易。盛京堂議借美款。公然其言。時有四路並舉之說。謂蘆漢粵漢寧滬寧漢，分頭興修，分段速造，四年工成。鐵廠添爐造軌。不敷。則以洋軌濟之。日將神尾語公，俄國西伯利亞鐵路，五年可達海參崴。中國應辦之要政，若五年辦成，尙可支持。俄路成則無及矣。時論亦謂俄路成必有席卷東方之勢。故公意欲借款造路并力經營。寧滬借英款。粵漢借美款。盛在滬先後定議。其後粵漢一路，公主廢約自辦。

則外交局勢又變。固未逆料也。〕 創建農務學堂。〔在武昌東門外卓刀泉、其附近爲樹藝畜牧之所。〕 開辦工藝學堂。〔延日本教習二人。一教理化學。一教機器學。募製造工師二人。講求製造各事。暫設於鐵政洋務局。〕 籌抵鹽釐。〔戶部以宜昌鹽釐、鄂岸鹽釐、抵償英德借款。每年一百萬兩。平時宜昌歲收川鹽課釐一百數十萬串。淮鹽廣銷鄂岸收釐二十餘萬兩。湖北所解京協各餉四國洋款及本省水陸防練各營月餉槍礮廠常年經費、皆取給於此。及是款皆無著。戶部指本省外省虛懸之款抵補。諸事束手。〕 子仁樂生。〔側室秦氏出。〕 三月。創設漢口商務公所。〔陳列本省物產工藝制作之物、標明出產地價值運本、許民縱觀、講求精進。其購製運銷諸事、由商自辦。官不預聞。有關涉本省外省地方如彈壓保護詢訪外洋情形之類、則稟官主持。〕 創設製麻局。〔與德商蘭格議、自製造乾麻以至織成網布、由蘭格承辦。而令華員學習。先購織機四十張。撥官款助之。隨時聽官收回。餘利八成歸官、二成歸蘭格。用漢英文記帳。隨時派員稽查。〕 子權應會試、中式第一百八十六名貢士。 撰勸學篇成。〔分內外篇。大意在正人心開風氣兩義。日撰一首。率以鑑下爲之。黎明而就。次日復改。易稿至於六七。書成鏤版、風行海內。五月。袁忠節重刻於蕪湖。公續有改正、此爲定本。本集有正學報敘例。亦是時所作也。〕 開辦萍鄉煤礦。〔用機器開采。築鐵路自涿州達萍鄉。借禮和洋行四百萬馬克。以招商局洋涇濱房產作保。分十二年歸還。是月。盛京堂會公入奏。二十五年。有人奏請查禁、以保招商局產業。敕公查覆。公覆奏作保與抵押不同。無礙局產。〕 購三月初四日。奉旨張之洞著即來京陛見。有面詢事件。 槍礮局添設無煙藥廠、添購快礮架彈等機器。奏請加撥常年專款。〔上年十二月、兵部尚書榮祿奏請於山西河南四川湖南設製造局。其已設局廠省分。尤宜擴充。自煉鋼以迄造無煙藥彈各項機器。均須講求速辦。延寄抄奏行知。湖北槍礮局先已設罐鋼廠。旋、訂購無煙藥機。又以礮廠僅能製行營快礮、因訂購十二生新式快礮并架彈等機以備江防之用。各廠需費甚鉅。而款無所出。奏請援上海製造局成案、於江漢關歲撥十萬兩。另在洋稅暢旺之海關歲撥三十萬兩。旨下所司。〕 以煉鐵廠槍礮局歷年用款細數咨部立案。〔鐵廠用款總數見前、槍礮局自開辦至二十三年止。凡用款

三百六十七萬兩。均已奏明。戶工兵三部咨催開列細數。而各項款目皆定章成案所未有。飭所司分就鉤稽。咨部聲明立案。」奏解京營槍礮。定各省及各路軍營用械給價辦法。〔督辦軍務處飭撥槍礮。先後解神機營練兵處甘軍快槍三千支。快礮三十六尊。配足子彈。皆鄂廠所造。奏請嗣後惟督辦軍務處撥兵處神機營隨時飭取。其各省及各路軍營取用者。照外洋時價減二成收費。〕奏明兩湖經心各書院改定章程。〔時法奉上諭。整頓書院。變通章程。兩湖書院時務一門改為算學。經心書院分外交天文格致製造四門。各設分教。在院諸生於四門皆須兼通。分日輪習。月終以積分爲進退。其省外各書院在漢陽德安兩府者。亦先後停課時文。講求算學時務。〕遵旨廣設學堂。以減徵丁漕平餘捐永充學堂經費。〔二十一年十二月。御史陳其璋奏請推廣學堂。總署議准通行沿江沿海各省。已設者量爲展拓。未設者擇要做行。聽官紳集資奏明辦理。及是奉旨增設學堂。在籍翰林院檢討陳曾佑等以爲就地籌款無非取之於民。湖北全省丁漕減徵平餘一項。歲計七八萬串。請由州縣隨正供解交藩庫。正名曰學堂捐。十府一直隸州。各設一學堂。省城書院學堂分其半。十一屬學堂勻攤其半。公會鄂撫院奏明立案。永不得挪作他項公用。〕籌集昭信股票。奉旨提倡。〔二月。右中允黃思永奏陳籌款之策。請造股票借華款。戶部議定章程。奏准舉辦。奉旨在京自王公以下。在外自將軍督撫以下。無論大小文武現任候補候選官員。均繳銀領票。爲商民倡。商民願借者。剴切曉諭。不准稍有勒索。公與鄂撫率通省文武倡繳十萬兩。奏言此項股票行息有定數。還款有定期。於商民本無虧損。但湖北數年以來。水旱交乘。元氣未復。商民生計遠不如前。惟有體察勸導。明年。部款支絀。應還本息無著。會御史黃桂馨等奏言山東四川等省苛派擾民。部議收數無多。奏准停辦。大學士榮祿直隸文武官自請報効。湖北各官已繳銀八萬兩。援案請免領票。紳商認繳者。仍照章發息。〕請緩辦鋪戶等捐。〔黑龍江副都統景祺奏請專設鋪稅藥牙。戶部議准通行試辦。湖北先於二十年冬。援同治二年成案。辦漢口鋪戶捐。至是勸辦昭信股票。商民詭言不免勒派。有冒挂洋行牌記。改習西教冀免派捐者。因請將鋪戶等捐緩辦。并飭印委各員勸認股票時。不得稍存取盈之見。〕遵旨保舉人才。〔於所屬各員中就才品兼優者舉三

人。曰湖北試用道世襲騎都尉趙濟彥。奏調差委廣東候補道王秉恩。湖北候補道陳重慶。稱其才具各有所長。而要歸於實事求是。至其清廉無欺、不避嫌疑、則三員之所同。請卽已故道員蔡錫勇。錫勇、字毅若、龍溪人。在粵鄂兩省辦洋務交涉二十餘年。爲最得力之員。事略見奏摺。派員查勘粵漢鐵路經行湘鄂地段。飭各營協練習快槍。委武備畢業學生充副營官。先就省城各防營責成教練。正營官不得掣肘。停發湘學報於各屬。湘學報上年創辦。見其議論不妥。適新任徐學使仁鑄過鄂。皆以宜杜流弊。學使謂到任後必加匡正。請代爲傳播。乃飭善後局稟購發各屬閱看。自第十冊起。持論益偏。卽令暫存。至是刊行至三十三冊。以其議論悖謬。飭局停發。致電陳撫部徐學使。謂關繫學術人心。遠近傳播。將爲亂階。必宜救正。十七日。交卸篆務。上年冬、患咳嗽不寐。有類怔忡。入春不愈。以時事方艱。不敢請假。自奉陛見之旨、清理經手事件、晝夜不息。交卸後籌補辦未了事。二十一日。乘舟起程。二十四日過下關。劉忠誠公來晤。二十五日。行抵上海。奉二十四日電旨。現在湖北存沙市焚燒洋房之案。恐湘鄂匪徒勾結滋事。長江一帶、呼吸相連。上游情形、最爲喫重。著張之洞卽日折回本任。俟辦理此案完竣。地方一律安靜、再行來京。在上海、與盛京堂籌商事件。并與各國領事約期會晤。二十七日。發電慰問沙市日本領事。時鄂省已調兵駐防沙市。獲犯四人。訊明正法。有言地方已靖、宜奏請俟入覲後回鄂者。公曰。行止不可不遵旨。遂行。四月初一日。自上海啓行。初三日。經焦山下。以所題竹坡侍郎留帶詩卷歸之寺僧。(題詩見本集、附跋語云。吾友竹坡侍郎、留黃帶於焦山。節庵翰林攜以見示。俯仰江山。傷懷故舊。愴然題句。時光緒二十年正月也。此卷題後、藏之篋中。未送還山。光緒二十年冬、自楚移江。二十二年、自江還楚。時東寧方棘、以治軍兩過焦山、未暇及此。二十四年閏三月、奉召入覲。到上海後、奉電旨回楚料理沙市亂民燬日本領事公署事。舟行復經焦山下。因檢出此卷歸之主僧。今年竹坡長子壽富伯符成進士。附書於此。)初八日。至武昌。

丁酉戊戌之間、外侮迭至、東南士大夫痛心國難。文辭偏激。多方以補救之。丁酉五月。電致袁忠節云。

湯大令壽潛聞擬就太平府書院講席。湯君志遠學博。究心時務。洵爲當世有用之才。擬延來武昌。或纂書。或著論。總期有益今日世道人心。八月。大令來鄂。旋赴滬上。屬每數日爲文一首。載之時務報。取其議論正大。兼敘新奇之做。汪穉卿爲時務報主筆。撰必至之勢論。稱其精確樸切。有功世道人心。自有報館以來第一篇文字。陳石道爲求是報撰文。公閱報稱其才識傑出。文章俊偉。約來鄂一談。此丁酉十二月事。石道來鄂。旋入幕府。如此之類。皆欲就士習人心挽回一二。其明年春遂有勸學篇之作。

丁酉六月。長沙刊湘學報。揭素王改制之義。七月。電致江建儀學使云。湘學報闕通切實。擬發通省書院閱看。以廣大君子教澤。惟有一事奉商。湘學報卷首。即有素王改制云云。嗣後又復兩見。此說乃近日公羊家新說。創始於四川廖平。而大盛於廣東康有爲。其說遇奇。甚駭人聽。竊思孔子新周王魯。爲漢制作。乃漢代經生附會增出之說。傳文並無此語。先儒已多譏之。然猶僅就春秋本經言。近日廖康之說。乃竟謂六經皆孔子所自造。唐虞夏商周一切制度事實。皆孔子所定治世之法。託名於二帝三王。此所謂素王改制也。是聖人僭妄而又作僞。似不近理。湘學報所謂改制。或未必如廖康之怪。特議論與之相涉。恐有流弊。且湘報係閣下主持刊播。宗師立教。爲學校準的。與私家著述不同。竊恐或爲世人指摘。不無過慮。方今時局多艱。橫議漸作。似尤以發明爲下不倍之義爲亟。不揣冒昧奉商。可否以後於湘報中勿陳此義。如報館主筆之人。有精思與義易致駭俗者。似可藏之篋衍。存諸私集。勿入報章。則此報更易風行矣。同時以此文電達陳中丞。并云、此節於世道學術甚有關繫。伏望婉商建儀學使。如能俯采芻蕘。當爲廣播。以助成其嘉惠士林之美意。如能作一條、辨正此語尤好。二電皆具苦心。勸學篇宗經一首。意亦在此。

丙申夏秋間。高陽李文正患病甚劇。公屬陳蓮舫入都治之。資以厚贖。云、高陽今世正人。若能醫好。爲功不細。蓮舫未行而文正已銷假入直。乃止。才酉五月。張文達卒。六月。李文正卒。九月。鹿文端以爭騰對事罷職。十月。于次棠布政在皖乞病。公屬李鑑堂中丞切勸之。云、次棠請去。君子日少。正氣日孤。大局不可爲矣。真辭危苦。匪交誼之私也。

戊戌丙召之事、見翁文恭日記。其文云、三月廿九日、徐桐封奏保張之洞、閏月初二日、電旨令湖督來京陛見、從徐桐請也。蓋呈慈覽後聖意如此。按文恭日記、於是年正二月間、具言英俄德各使要索橫暴狀。三月朔日記云。入見、衡量時局、諸臣皆揮涕。退時慶李張邀談、大約除允行外別無法。至英日同時將起更無法也。十九日記云。覆法稿、一中越邊界不讓人、一雲南鐵路廣州灣租界、一郵政俟派大臣管理時用法人。此議公與法使呂班所定。稿則呂班代定。不准動一字。又閏月初二日記云。日本索福建沿海不讓別國云云。蓋當日樞廷譯署束手無策。其景象有如此者。徐摺所言未詳、以意度之。當是從外交著眼。翁記言慈意如此、則非爲變法事可知。



# 卷七

十二日。回任視事。子權賜同進士出身。改建省城監獄。築省城賓陽門至洪山馬路。奉二十六日上諭。翰林侍讀學士徐致靖奏保薦通達時務人才一摺。工部主事康有爲、刑部主事張元濟、著於二十八日、預備召見。湖南鹽法長寶道黃遵憲、江蘇補用知府譚嗣同、著該督撫送部引見。〔有爲入見。陳變法事。移時而退。旋召元濟入對、遵憲由公轉知、以疾不行。嗣同在武昌。遵旨傳知。由江南給咨就道。〕五月。議定蘆漢鐵路比國借款續訂合同。〔比款定後、德美諸國借款造路、所許利益視蘆漢爲優。比商相形見絀。債票無人肯受。請續訂條款、要素甚多。盛京堂與公駁改至再。至欲廢約而後轉圜。法正又出而干預。防其別生枝節。初七日、續訂合同簽字。是時蘆溝至保定一段、以部款開辦、土工已竣。漢口至孝感一段、墊土造橋。俟比款第一期交到。南端由楚入豫。節節前進。北段自保定以南、俟明年續付借款、接續釐辦。〕奏請妥議科舉新章。〔上年十一月、貴州學政嚴修奏請設經濟特科。下所司議奏。是年正月。總理衙門禮部議覆、請分特科歲舉兩途。特科如博學鴻詞例。試以策論。或十年或二十年一舉。歲舉就鄉會試之制而變通之。試時務題四書文。閏二月。公與湘鄂兩撫會商。擬請改科舉之法。如勸學篇所議。未卽入奏。四月。御史楊深秀奏請釐定文體。五月初五日。奉上諭於下科爲始、鄉會歲科各試向用四書文者。改試策論。陳撫部謂朝政方新、議當速上。十六日會奏言、四書五經道大義精。今廢時文、非廢四書五經。若不爲定式。日久必至不讀四書五經原文。背道忘本。請鄉會試第一場試中國史事國朝政治論五道。第二場試時務策五道。第三場試四書義兩篇、五經義一篇。首場按中額十倍錄取。二場三倍錄取。每場發榜。三場完畢。如額取中。歲科兩考以此類推。先試經古一場。以史論時務策命題。正場試四書義五經義各一篇。并請酌改考試詩賦小楷之法。〕奉上諭、所奏剴切周詳、頗中肯綮。著照所擬禮部通行遵照。議覆變通武科新章。〔上年

十二月。兵部尙書榮祿、奏請設武備特科。給事中高燮曾順天府尹胡燏棻亦先後條奏。下王大臣會議。是年二月議覆。奉旨武鄉試會試童試一律改試槍礮。又廣西巡撫黃槐森奏、武場改試洋槍。兵部咨行各省。各就見聞所及詳細具奏。公奏言、槍礮精利。若概准演習、收藏之家良莠不齊。武生武舉強梁生事。一有意外。頃刻亂作。擬請合營伍學堂武科爲一。惟兵勇准應武童試。取進後仍在營充伍者、准應武鄉試。中舉後仍在營充伍者、准應武會試。已拔實缺外委把總候補千總者、作爲武生。准考武鄉試。已補實缺千總守備者、作爲武舉。准應武會試。其從前取進取中之武生武舉現未入營者、准入本省防營或學堂學習。考試頭場試槍礮準頭及裝卸運用之法。二場試體操馬槍擊刺之技。三場試測繪工程臺壘鐵路地雷水雷與地戰法等學。使其非由行伍不能得科舉。非由科舉不能得將官。則豪傑爭趨。廉恥自立。旨下兵部總理衙門議奏。子權以新進士引見。奉旨分部學習。議結沙市焚燒洋房案。〔沙市之案。起於客民與招商局覓夫滋事。焚毀關局。延燒英商存貨及日本領事所租住宅。日使要求五款。因此案索開岳州福州三都澳租界。駐滬日本總領事小田切萬壽之助明於東方大勢。公請總署約以來鄂面商。日外部允諾。小田切未卽至。而公與總署合力辯論。日外部願和平減讓。償款自十萬兩減至一萬兩。地方官造屋租於領事。江岸築石隄爲障。所費兩國分認。懲辦罪犯。處分地方官、一如成例。開埠事聲明與本案無關。彼此不議。六月。與英領事議定償英商一萬兩。英使索開長沙衡州常德三埠。旋亦作罷。〕定漢口日本租界條款。〔沙案既結。小田切來議漢口租界事。時已議於德租界下給地一百文。漢口英法租界向不准華民居住。以防拒捕抗捐。蘇杭議援此例而不得。漢口德租界援天津例。日又援德例。其禁遂弛。惟聲明如有不安本分不奉章程者。領事不得縱容包庇而已。〕裁沙防營。〔以沙案彈壓不力故。〕六月。遵旨奏保使才。飭湖南北各屬書院改試策論預防流弊。〔策論每課中不得全無四書五經題。時移題及課卷中不得以狂悖怪謬顯背經書之言闖入。如出題有此、及獎拔此等課卷、或士民倡爲此說而地方官不禁阻稟聞者、嚴參。〕翰林院侍講黃紹箕以勸學篇進呈。〔六月初一日。紹箕入對。奉面諭、近來議論。於中西各有偏見。紹箕奏言湖廣督臣張之洞纂有勸學篇、持論近實平

允、尙無流弊。容進呈、如蒙許可、擬請飭發各省刊刻、似與學術人心不無裨益。奉旨將原書進呈。」奉  
上諭。原書內外各篇、朕詳加披覽。持論平正通達。於學術人心大有裨益。著將所備副本四十部由軍機處頒  
發各省督撫學政各一部。廣爲刊布。實力勸導。以重名教而杜危言。設通省各屬學堂。〔各省奉旨開辦學  
堂。限兩月覆奏。湖北十府一直隸州已各設一學堂。以書院改。惟師資難得。每學堂先設教習二員。一教  
經史。一教算學洋文。〕電致蘇松太道拒法人案上海南市之地。〔法人因上海有四明公所案。乘機謀拓租  
界。一自南市新馬路十六鋪至董家渡。一自西門外至徐家匯。并索浦東之地。十六鋪馬路。屬法。則縣城無  
出路。前功盡棄。故屬滬道力拒。〕請以荆宜施道江陵縣知縣移駐沙市。〔原駐荊州府城。距沙市十餘  
里。〕撥福州船廠經費。〔德宗銳意自強。欲造兵艦。添海軍。福州將軍裕祿入對、言船廠工匠機器足資興  
造。惟須的款。戶部遵旨撥各省款移緩就急。湖北撥十五萬兩。廷寄限奉旨十日電奏。然無款可籌。不  
得已於應解甘淮軍餉內移解七萬兩。〕大理寺少卿盛宣懷覆奏籌辦蘆漢粵漢寧滬各鐵路情形。奉旨著會同  
榮祿等之洞迅速籌辦。三路合爲一氣。早日觀成。七月。定沙市日本租界漢口德國展寬租界條款。〔日  
本租界專。與沙市焚毀洋房案并議。已見上條。漢口德租界以二十一年定議。是年五月。商定於已劃界內讓  
出江邊寬四丈深十丈之地爲中國稅關。以傍城寬十餘丈深一百二十丈之地抵換。至是畫押。〕奉上諭裁  
汰京外冗濫各官。湖北督撫同城。裁撤巡撫。以總督兼管巡撫事。定漢口英國新增租界條款。〔俄法既開  
漢口租界。英人亦請推廣。達於城牆。凡三百三十七畝。如中國鐵路需地。仍允讓還。是月。合同簽  
字。〕設漢口商務局。〔漢口先已設勸工勸商局。是月奉旨試辦商務局。從上海漢口一帶所出物產設廠製  
造。設商學商報商會。切實講求。乃歸併其中。七月。電奏遴員開辦。八月。奏陳要義八條。曰啓發、曰倡  
導、曰合力、曰塞漏、曰祛習、曰保護、曰體恤、曰獎勵、奉皇太后懿旨。著督率在事各員加意講求、與  
上海局聯絡一氣。〕勸陳閣學應詔北上。〔公奏保使才。陳右銘撫部亦以人才薦。有旨宣召。閣學函商  
出處。公謂錄賢求治、理無遲疑。請先過鄂面談。是時。廣開言路。禮部主事王照條陳時務。格不得達。詔

盡罷禮部滿漢侍。王文勤奏請緩停實官捐。上怒，擲摺於地。廷臣皆端備。又降旨令各省道府藩臬均得上書言事。其州縣條陳事件由督撫將原封代遞。士民有上書言事者。由本省道府隨時代奏。均不准稍有抑格。如敢翫違。嚴行懲處。未幾，朝政復舊。閣學不出。邊旨議裁冗員。湖北糧道已裁未卸任。同通佐雜議裁無善法。擬先裁衛守備千總，以屯田糧餉歸所在州縣管轄徵收。八月初二日。兼管湖北巡撫事。初四日。皇太后臨朝。初四日。自頤和園還宮。初六日。明旨臨朝訓政。初七日。陳右銘撫部電奏言、變法事體重大。必得通識老成重望更事多而慮患密者、始足參決機要、宏濟艱難。竊見湖廣總督張之洞忠勤識略、久為聖上所洞見。其於中外古今利病得失、講求至為精審。似宜特旨迅召入都、贊助新政。與軍機總理衙門王大臣及北洋大臣遇事熟籌。期自強之實效。湘省發電時、電傳訓政之旨猶未到也。十三日。湖北按察使瞿廷韶陛見。有電來云、慈聖獎鈞座為國勤勞。詢湖北情形甚為詳細。時日本伊藤博文游歷至京。言於總署曰。變法不從遠大始。內亂外患將至。中國辦事大臣、惟張香帥一人耳。四川大足縣匪余蠻子仇教起事。飭宜昌文武官嚴防。湖南巴陵縣亦有攻洋謀亂揭帖。月餘始定。奉旨裁撤湖南南學會保衛局。膠澳事起。湘民仇洋益甚。湘撫設南學會宣講以開風氣。又仿租界法。設巡捕。名曰保衛局。言者謂其植黨。明旨飭裁。陳撫部覆公電云。南學會宣講已停。保衛局用意精深。創行新政、非此始基不立。不行於湘。猶冀得行鄂漢間。公覆電稱其變保甲之名而行保甲之實。應將局章斟酌妥善、減收捐款、認真巡緝。仍用保甲局之名。是月。撫部以濫保楊銳劉光第諸人革職。而岳州方開埠。湖南素多教案。慮其枝節叢生。旋有旨擢湖南布政使俞廉三為湖南巡撫。陳俞皆舊屬。先後撫湘。故督撫無隔閡。裁撫標兩營。撫標相承一百餘年。視口糧為世業。驕悍難制。盡裁之必激變。因裁兵而挑選其子弟親戚為防勇。漢口大火。延燒五千一百七十三戶。焚溺而死者三百餘人。撥款撫恤。九月。日本侯爵伊藤博文來。攜其國首相松方之子來見。云所辦神戶船廠能煉焦炭。擬運煤來鄂。而回船代銷大冶鐵礦。答以當選與盛京堂商之。留二日、赴宜昌。奉旨復設湖北巡撫。派學生游學日本。此議始於去年。初請

費省。議湘鄂各派一百人。本年七月、旨飭各督撫選學生游學日本、酌定人數。電咨總署核辦。繼知八月需三十團。擬各派五十人。以裁缺巡撫糧道兩署經費撥用。及復舊餉。費無所出。湖北祇派二十人學習武備。命長孫厚琨同往。派道員張斯耑赴日照料諸生。既東渡、聞飲食不習。命開日送食物一次。英國下議院議長水師提督貝思福來。貝思福先在京建議。請薦大員助中國練兵。自南省始。嗣英船八艘載兵三千人分泊各口。其在吳淞者、值康有爲亡命、截之以去。內意知英將練兵非計。而不能拒。九月初七日。奉旨著祥亨張之洞早爲預備。於駐防練兵各營各挑選一千名。俟所薦洋將到鄂、派員會同督練。公覆奏言一年以來、江漢關稅務司屢以此相勸。以人數權力限之。必不得已、則兵不可多。官不可大。權不可專。貝思福過滬、語滬道曰。英欲助中國自強、而中國當道皆不省。惟恃俄以爲重。若南方再無人體會、英惟有力取長江耳。及見公、首言各國謀華之急、英國助練之誠。公曰、英行之於南、俄效之於北、將奈何。貝語塞。越二日復來。謂必先在京設軍務處。聘英將爲參謀乃可。公謝以職分不當議此。貝去、至江寧、與劉忠誠言如初。并允代籌軍餉、加關稅一倍。忠誠亦卻之。至日本、日以交誼諷緩辦。是月。英俄德三國之兵入京師。大學士榮祿方統武衛軍。添兵萬人、以董福祥甘軍爲前鋒、駐南苑。總署商三國撤兵。各使答以撤甘軍再議。汰武愷武防營。騰餉以練撫標裁兵子弟。令習洋操。裁武勝新營右營沙防營。汰漢口緝捕營。〔外事日深、迭次奉旨練兵。裁營騰餉。故專意於此。以裁營之餉爲武愷武防營未裁者精練洋操之用。隨時親赴各營考校。是時文武兩途並加整飭。八月、通飭各屬刀行儉約、一切服用宴會、概從減省。去不急之務、省城蠶桑局所織綢不能與江浙比、民間種桑育蠶亦不如法。命以蠶桑事併入農務學堂。織綢事併入工藝學堂。惟留草帽織工人、附於工藝學堂之內。又飭釐金局剔除中飽、嚴禁侵蝕。十月。定整頓米穀釐金章程。嚴比較以定功過。〕奉懿旨籌辦保甲團練。十一月又奉旨救催。並諭沿江沿海各將軍督撫籌辦漁圍。利川縣匪焚教堂害嬰堂。派兵剿辦。匪衆數百。與余懋德應。旋獲七人懲辦。餘匪擊散。長樂縣匪殺教士毀民。焚掠教堂。派文武官入山攻剿。匪衆數千。建渡洋旗號。入縣城擄知縣典史。

分擾長陽巴東兩縣。入湖南。焚石門縣教堂。自言余豈分股。將渡江撲宜昌。沿江驚擾。公派兵繞出巴東野三關一帶。截其入川之路。扼下游宜都縣至家河一帶。遏其下窺荊州之路。宜昌施南分路入山攻剿。令巴東長陽縣督團截擊。商湖南出兵會剿。委正途出身人員充武備自強學堂教習。學生有犯規者。乃改革每日必有六刻工夫講習中學。減其名額。凡文理淺近。不能立志向學。及不守禮法。不聽教訓者皆除名。明年七月。又定章。須本省生員年在十八以下者。方准錄取。請降旨勘修粵漢鐵路。七月。盛京堂入覲。上催辦粵漢鐵路。與蘆漢同時工竣。八月以後。時論驟變。湘撫亦言民情不便。十月。美國工程師到鄂。催勘路基。公與盛京堂電奏。請降旨曉諭三省紳民尅期開工。嗣總署來電。謂此案係奉旨派駐美使臣畫押。既難中止。亦難改道。屬出示曉諭。如百姓阻撓。惟地方官是問。十一月。總署奏言。鐵路可以利國便民。然不得不分緩急。蘆漢粵漢為最要之大幹。津鎮次之。而山海關外奉天營口等處。亦扼要必爭之地。餘皆為枝路。蘆漢粵漢及寧滬蘇浙浦信廣九等近幹要枝。均由總公司盛宣懷承辦。津鎮及山海關內外。亦奉旨責成胡燏棻等辦理。太原至柳林。已由山西商務局承辦。廣西龍州。已由提督蘇元春承辦。應請旨飭下該大臣等認真督飭。先儘此各要路安速辦竣。如果敷遺借款本息。及養路之費綽有餘裕。再議推廣。凡華洋各商請辦各枝路。概不推行。奉旨依議。飭宜昌文武官防護教堂。遏匪亂蔓延。聞法人將藉口鄂省教案啓衅故也。時上海四明公所案已結復翻。案展租界。劉忠誠不許。致公電云。若至無可如何。祇合用辨字訣。即有朝命。當守便宜。是月。法兵占廣州灣。村民與戰。死八人。傷二十餘人。下關亦有法船來泊。英船繼至。聲言助華防守。十一月。議裁屯衛官。戶部議覆侍讀學士瑞洵奏。請裁屯田衛弁。改由地方官徵租。各省仍遵七月二十九日諭旨辦理。湖廣額設十一衛。會商具奏。將田糧徵收各事歸各縣就近清查。按民田科則印契升科。無契者充公。按此新政未罷者。原摺稿佚。故全集不載。奉上諭。沿海沿江通商省分。交涉事繁。內地各省。時有教案。嗣後各直省將軍督撫均著彙總理各國事務衙門大臣。仍隨時與總理衙門王大臣和衷商辦。十二月。奏請於漢口設夏口廳治。改漢口同知為夏口廳撫民同

知。〔轄境北至澗口。西至澗口。南至漢水。東至大江。仍屬漢陽府。交涉要事由江漢關道督率辦理。附近應治及鐵路左右三里之內。凡地畝有買賣租典抵押者。由關道設局查驗核准。不得售於洋人。〕 籌岳州開埠事。〔岳州開埠無定期。沙市案起。英索長沙等處開埠通商。總署未允。乃催岳州約期開辦。總署允以明年二月。惟聲明與沙案無涉。俞撫部詢辦法於公。舉大要四事以告。詳見電牘。并派遣員張預赴湘秉承辦理。〕 議延日本武官譯書。〔日本有薦武官練兵之意。公擬止聘譯書。并多延數人。便將弁請益。〕 長樂匪平。〔副將吳元愷冒雪入山破賊巢。知府朱滋澤清查會黨。戮吏役團乘附賊劫官者。各路文武獲巨匪數人。長樂平。清查餘黨。妥籌善後。余蠻亦在蜀就撫。〕 拒比人請漢口租界。〔比以工程師無住所為詞。由鐵路公司造屋處之。〕 是年、延通經之士纂經學明例。〔十二月。梁編修致廣州楊惇甫戶部電云。湖北現辦纂書事。經學書依勸學篇守約卷內明例等七條。詩儀禮已有。廣雅公最重公品學。請擇一二經先編明例一卷寄來。按經學明例之作。始於甲午以前。門人廖平為左傳經例長編。先撰數條以發其凡。而合川張森楷助之。先為史徵篇、略采史記本紀年表世家各篇所用左氏之文及其解經之說。以折劉逢祿左氏春秋考證之妄。其有乖遠。特申長義。必不可通、亦從蓋闕。意在申左而以史證之。見森楷所為合川縣志。易例長編則屬之門人宋育仁。育仁在京、又屬乙酉拔貢王繩生黃秉湘會鑑分纂。凡四十門。繩生編十八門。曰當名、交位、往來、中交、變化、治平、圖書、會通、興作、知來、時義、典禮、修德、卜筮、始終、性理、精義、古易、其書兼采漢唐宋諸儒及近代經學家之說。約以書成寄鄂。其稿未見、黃會二人所纂、不詳。〕

### 光緒二十五年己亥公六十三歲

正月。委員勸勸粵漢鐵路經湖南地勢。〔分兩路查勘。東路由湘潭東經醴陵攸縣茶陵安仁以至永興。西路經湘潭南下、沿湘水東岸、經衡山衡陽耒陽以至永興、并查勘長沙至萍鄉運煤鐵路。〕 改南湖經心江漢三書院課程。〔分經學史學天文輿地兵法算學六門。別立行檢一門。按月考核。三書院盡一辦理。明年。又令諸

生勤習槍操。」令洋務局分所辦事。「洋務日繁。分局務爲鐵路交涉學堂製造各所。」籌撥宜昌施南鄖陽三府公費。「年各三千五百兩。由各稅局代解。此外有餽送收受者嚴參。」覆奏裁汰候補人員。「凡奉差不銷、久假不歸、潛行離省、私自回籍者、咨明吏部、不准再來候補。其病故未報者除名。都一百二十員。候補得缺而與例不合者、暫停補署差委。凡五十餘員。」奉上諭、候補人員過多、奔競鑽營、最爲吏治之累。該督所奏、甚得綜核名實之要。著各督撫一體查照辦理。推行練兵新章。「先是參考北洋新建軍南洋自強軍及外洋練兵章程、體察本省情形、定爲湖北練兵新章。護軍營行之有年。至是令練習洋操各營武漢各標營防營一體仿照操練。」修省城南北江隄。「北自望山門外鮎魚套至金口龍船磯五十餘里。南自武勝門外紅關至青山蘭木廟二十餘里。道光間、督部周文忠公天爵創築南隄。年久殘缺。江水浸灌。乃勘估重修。期以四月竣工。舊隄距江岸遠。改就沿江修築。隄外留地六丈、種植葦柳。」覆奏籌辦保甲團練、取益防禦。「其略曰、團練一事、以寓兵於農之道、收衆志成城之功。果能辦理妥善、最爲有益。然就湖北情形言之、則有二難二弊。蘇粵等省、鄉鎮繁富。山陝等省、村堡團練。湖北水陸錯雜。大村巨鎮、一縣之內不能甚多。亦鄉則湖濱港汊逐散處、隨水遷移。山鄉則高嶺荒谷、零星數家、不成村落、相距遙遠。不特團練非易、即保甲亦難於責成。此一難也。練丁製械、需費繁多、湖北近年每一議及團練、紳士即以請官籌款爲辭。夫團練之舉、乃是令民間自衛身家。自應民籌民辦。恭讀懿旨、紳耆百姓、自必能不惜財力、亟圖保衛鄉閭之計。等因。實已剴切詳明。若由官發款、何不以之養兵勇而以之辦團練耶。但湖北省民力彫敝。屢年災歉。集費亦實不易。此又一難也。團首必用紳衿。而地棍土豪、不免憑藉團衆、滋生事端。小則魚肉鄉里。大則抗官違法。近邊地方。往往充當團戶。包庇私販。讐視官鹽、糾集村民、傷兵鬪勇。近水地方。往往各顧私產、妄作隄堰。此則聯村硬築、彼則糾衆創毀、械鬪釀命、互爭不休。數十年來、此兩類之案不可勝數。雖叠經拏辦、終難止息。團練若成、更將無從彈壓。此一弊也。湖北民風向不甚靜。近十年來。每藉攻擊異教爲名。煽惑糾邀、釀成巨衅、前年湖南卽有團丁擠毀教堂之案。上年長樂等縣匪徒開教、禍延數

縣、入城劫官，外人責言，萬分棘手。其匪首向策安及他匪目，即多係團總。前事可鑒。若各縣皆有團練，則設案更將紛起，教堂恐無一存。此又一弊也。至保甲之與團練，本係相爲表裏。現擬團保並行，酌籌有益無弊辦法。大要約有八條。一曰保甲爲本。二曰官督紳團。三曰量力練丁。四曰自籌經費。五曰清查會匪。六曰消弭教案。七曰團保相輔。八曰酌定勸懲。總之團練一事，其力只能戢內匪，不足以捍強敵。若責以械猛藝精、折衝禦侮。則巨賈不敢爲此鋪張欺誑之辭。若團保相輔，責以清會匪、弭教案，則尙是力所能爲。當飭令各就本地情形，分別迅速舉辦。縱未能周密盡善，亦必須辦有規模。保甲勒限兩個月稟報。團練勒限四個月稟報。果能內匪不作，外疇不生。其益處已非淺鮮。至漁團一節，湖北外江內湖，雖有漁利，散換畸零，擇便覓食，來往無定。每一划或一兩人或四五人，老弱婦女卽在其中，與沿海漁船之大幫巨艇者不同。礙難練成漁團，致涉紛擾。惟有責成水師及團保隨時酌量妥爲稽察，以杜盜匪潛匿之弊。按二十三年十一月，刑部尚書剛毅奏請練兵籌餉，大學士徐桐奏請飭沿江沿海各督撫激厲忠義、聯絡鄉團、奉旨迅速籌辦。上年七月，道員惲祖祁入覲，上詢湖北練兵情形，祖祁退而具疏，陳籌辦鑛團農團嶺團隄團客團六事。謂能於辦團之內兼謀興利之方。有試練民兵之效。奉旨著各省斟酌情形試辦。九月，奉皇太后懿旨，以鄉團更番訓練，久之民盡知兵，足爲緩急之恃。飭下各省與保甲積穀二事認真興辦。本年夏，剛毅赴東南各省查閱團練。明年，遂有義和團之禍。畿輔辦團獨爲認真。故旬日而蔓延遍地。公此奏明言取益防損，不足以捍強敵，不敢爲鋪張欺誑之詞，意實有所指屬。本集初輯本此摺失載，故節錄原文於此。辦法八條見東華續錄。覆奏籌議積穀辦法。〔各州縣常平倉多設於城內。遇有災歉，窮鄉僻壤，不能因升合之米，來城守候。而州縣官轉發鄉村，挽運既勞，稽查難周，實惠仍未多徧。故飭各州縣就地籌捐。於四鄉及城內分設社倉。大縣積穀五萬石。中縣三萬石。小縣一萬石。凡地方歲收中稔者。分三年將穀數捐足。災歉免捐。其籌捐收穀存倉等事，遴選正紳，就本地情形妥籌興辦。舊有憑藉者，力加擴充。章程未善者，量爲更定。倉穀存諸殷實紳富共見共聞之所。地方官但隨時考核。其典守不歸衙門。出納不經胥吏。鄭宜施三府不產稻。〕

勸儲雜糧。每年出陳換新。一人指穀至一千石以上。奏請給獎。五百石以上官給扁額。每社擇殷實端正者二三人爲正副董事、不支薪水。其平日看守出納曝晾借還糴糶各項搬運人夫及修補倉廩等雜費、統由地方自籌。常年准其春借秋還。荒歲或查戶散放、或減價平糶、或豐年歸還、視災情輕重貧戶等差、稟官批准辦理。社長三年屆滿另選。如公平可靠蟬聯經營者。俟屆六年、地方官詳給扁額、並請奏給虛銜封典。二月。設宜都長陽電線。派知府錢恂爲游學日本學生監督。德國親王亨利來游。德領事援俄備例、請備黃轎、御之。登舟往拜。德潛渡江答禮。宴於署內。邀閱陸軍營武備學堂、至漢陽觀鐵廠槍礮、均乘馬車。旋乘舟東下、觀大冶鐵山。三月。辦結宜施教案。償餉各款凡五萬四千五百兩。官代造教室一所。交卸兼管湖北巡撫事。于撫部蔭霖到任。原有撫標員弁、仍回撫標候補。已裁標兵兩營、就督標撥一百名充用。創辦商務報。覆奏清理獄訟。章程十三條、大指在禁欺飾、重命盜、省擾累、懲刁誣、並參劾積案記過較多之大冶縣知縣林佐等、摘去頂戴、以示儆惕。四月。設施南利川電線。覆奏湖北漕糧仍請改解折色。湖北漕米、自咸豐七年胡文忠奏定改解折色、歲省銀四十萬兩、行之四十餘年。是年三月、戶部奏言、糧價日昂、旗兵困苦太甚、各省自應規復本色、以備加放。奉旨各省自本年冬漕爲始、全數改徵本色。公與撫部會奏言、如復本色、無論於民不便、即指撥各款先已一無所出。惟旗民困苦。諭旨飭令中外兼籌。遷於本年冬循案買米三萬石接濟。此後能否照運、未敢預料。得旨如所請行。勸諭漢口茶商以機器製茶。籌辦鹽斤加價。添練新軍。正月、奉廷寄、令各省就本省餉力妥定章程。某省實能籌餉若干、練兵幾營、限一月內覆奏。並挑選駐防精壯之士、教練成營。所需餉銀、督撫審司協撥。湖北歷年籌餉、多就鹽價設法。光緒十年、每斤加二文。二十年、又加二文。是時別無可籌之款。不得已議再加二文。歲得十六萬兩。以十二萬兩練新兵一千人。四萬兩充荊州提練旗兵新餉。湖南挑練新軍辦法亦同。請另撥的款抵補鹽釐。宜昌鹽釐一百萬、既已抵還洋款、戶部撥補無著者七十餘萬。湖北丁漕貨釐因災減徵、進款愈少。除以昭信股票銀十萬作抵外、奏請飭部另撥六十萬兩、免誤餉需。六月、接部咨、四國洋款

因鑄費遺款不敷、再指撥各省分還。湖北又增二十四萬五千兩。九月、得部電、又令每月添鑄四萬。擬將江南在鄂所收萬戶池淮鹽加價十五萬指爲鄂款。覆電改撥更正。〔義大利索浙江三門灣。〔義兵艦游弋浙海。〕奉旨、儘量登陸強占、卽營奮力合擊。〔湖北撥槍一千枝應用。〕五月。奉旨、長江江面遼闊、港汊紛歧、現值多事之秋、亟宜加意嚴防。著劉坤一張之洞鄧華熙松壽于蔭霖俞廉三會同妥商嚴密設防。庶幾緩急可恃。〔義國先與英接洽。總署請英勿干預。其勢遂孤。按是年正月。俄兵入金州。徵糧丈地。德藩亨利率艦泊煙臺、欲借煙囪島及西海灘演操。莫拓威海租界至榮成。又擬占廣東之九龍。日本亦請開鼓浪嶼租界。內廷以時事日非、立意備戰。不再遷就。〕覆奏道員郝祖祁條陳鑛團農團嶺團灘團圍團六事湖北窒礙難行。請毋庸議。〔是月、山東嘉祥汶上諸縣義和團滋事。德使請總署嚴辦、不宥。〕約黃激爾通政來游。〔公與通政交最篤、通政在籍多病、公致電仲韜學士云。擬請閣下奉尊大人攜全眷來鄂。于梁沈舊好皆在此。藉可快聚忘憂。是月、通政卒於里第。公電唁學士有云、尊公仙遊、舊友盡矣、仲韜學士。公從女之婿也。〕停鑄制錢。〔正月奉旨。京師制錢缺乏。著沿江沿海各省於應解部款內搭解制錢一成。湖北開局之初、銅鉛價已倍增。及是價益昂。虧耗益鉅。不得已命停工。十二月、奏請准免搭解。〕議改日本在大冶通易煤鐵合同。〔盛京堂與日本議立合同。以日煤易冶鐵。試辦十五年。每年運鑛鐵五萬噸。每噸作價四口。公謂期太久、價太廉、請酌改。二十六年五月、又申前言、按鐵廠自歸商辦後、煤不敷用。至是年終、先後共煉生鐵八萬四百七十一噸。賠累甚鉅。故盛有以鐵易煤之舉。鑛價據二十六年合同。頭等者每噸日金三元。二等二元二角。〕六月。奉旨諭飭查開稅釐金鹽課積弊。〔此通案也。凡各省現在收數、無論爲公爲私、一律澈查。奏報、候特簡大員覆查。時中旨銳意練兵。欽差大臣剛毅赴江南籌餉得一百二十萬。赴廣東得一百六十萬。湖北稅釐鹽課積弊、迭經澈查杜絕奏明有案。十一月。又奉旨、令將裁去陋規酌提數目覆覆。〕七月。奉辦川鄂交界放蠶匪徒。〔利川匪首稱教民、放蠶入井。飭縣嚴拏懲辦。并電川省查拏。〕工藝局開工。八月。飭防綠各營員弁聽講兵學。〔洋教習日講兵法於省城六營公所。各員弁聽講

者。月稜功課分數。視其優劣、給獎扣薪。後改為防營將弁學堂。〔英國議員威利敦來。〔比商售蘆漢鐵路股票於法人。威利敦力言其害。時盛京堂以手握利權為忌者所攻。旨令剛毅澈查。而粵漢鐵路美商又有要索。盛入京。請辭粵漢之命。公謂美約不成必為法踞。無粵漢則蘆漢利薄、華商無人入股。法國必自為之。南北幹路俱為法占。人必謂蘆漢作俑引寇矣。力勸勿辭。〕 飭襄陽文武嚴辦股匪。 九月。請總署禁法德商人設漢口火油池。 定清釐契稅章程。〔由司印發三聯契紙。新舊契一律更換。納稅仍照舊章。惟嚴禁隱匿減價。〕 各縣置籌餉局。試辦加收菸酒糖出產落地各稅。〔戶部撥補無著之款。奏請另撥。部議不准。而武衛軍虎神營及董福祥甘軍荆州旗兵諸餉。部章嚴急。遂就菸酒糖三項推廣收稅。〕 議於宜昌關加征土藥稅。〔嗣戶部奏准籌款六條、亦有以上三項。公奏言湖北開辦在前、請免解部。〕 十月。義大利窺三門灣益急。奉旨諭救吳淞鎮江長門三處及沿江一帶各墩臺布置預防。又奉諭、現在各國虎視眈眈。爭先入我堂與。以目下中國財力兵力而論。斷斷無覺自我開之理。惟事變之來、實逼處此。萬一肴我以萬不能允之事。惟有理直氣壯、敵愾同仇。各省督撫必須同心協力、督飭將士殺敵致果。和之一字。不但不可出諸口。並且不可存諸心。以中國地大物博、幅員數萬里、人丁數百萬、苟能各矢忠君愛國之忱。又何強敵之可懼。正不必專恃折衝尊俎也。〔湖北惟田家鎮為下游門戶。調礮臺營來省學習。十一月。海防解嚴。以田家鎮礮臺陳舊。暫裁營勇、留解礮法者守之。挑弁目數十人入學堂學習。〕 十一月。設農務局辦農學報。 覆軍機處戶部論銀圓輕重出入之數。〔二十二年。盛京堂條陳請設銀行。鑄一兩重銀幣、每圓用銀九成、凡出款俱用銀幣、收款仍照銀十成計算。九成銀每百兩加色十兩。至是建議如前。奉旨京師創設銀圓局、樞府詢公應否改鑄一兩、公言利之所在視乎權。權之所行存乎輕重。若收發一律、是國家視九成為十成。天下寶之。若收須補一成之水、是國家視之為九成。天下賤之。外省一時難改。京師銀圓宜鑄一兩。而收發必須一律。俟京鑄暢行、商民深信、然後各省一體改鑄。按林文忠督兩廣、曾試鑄一兩銀幣、以鼓鑄不精而止。光緒二年、赫德亦請鑄一兩銀元以完關稅。盛議蓋有所本。二十七年六月、政務處電詢江鄂間銀元一兩與七錢二分

執宜。江鄂會電主用七錢二分。從商民便也。」十二月。宜施匪造謠仇教。飭地方官持平辦理。官昌鎮派勇巡防。十七日。校閱各營練軍各防營弁勇。「上年奉旨查閱營伍。以事繁未能出省。奏准展緩。至是調集近省各營。連日校閱各官弁騎射打靶。」二十一日。校閱行軍隊。「令洋教習布置。隨營察看。自帶食物乾糧。與將士同。防線各營無成效。予限一月學習。再行校閱。是日勉強乘馬。遂得腹疾。然以後猶歲歲行之。二十七年四月。直隸知府吳永道湖北赴行在入對。皇太后問曰。開張之洞辦公每至達旦。鬚髮皆白。確否。永以實對。又曰。張之洞開操。乘馬磨食。領事觀者皆免冠致敬。皇太后曰。威望懾外人。真大臣也。」會于撫部電奏湖北稅釐鹽課無陋規可提。請由督撫司道府歲捐銀七千七百兩助餉。是歲女仁華適儀徵卞氏。「婿壽昌。閩浙總督額臣督部之子。」

### 光緒二十六年庚子公六十四歲

正月初二日。內閣奉上諭。張之洞于蔭霖電奏稅釐陋規無可裁提。請每年捐銀七千七百兩等語。張之洞久任封疆。創辦各捐。開支國家經費。奚止鉅萬。湖北一省豈竟弊絕風清。毫無陋規中飽。乃以區區之數託名捐助。實屬不知大體。張之洞于蔭霖著傳旨嚴行申飭。所捐之項著不准收。遵旨嚴查川鹽土稅各局弊端。派武備學堂優等學生教習各營。兼充哨官。「軍營向例。哨官帶兵而無教練之責。教習教練而無統帶之權。至是合而爲一。」京察考績。奉上諭。湖廣總督張之洞。久膺疆寄。任事實心。著交部議敘。二月。誅悖逆惑衆之匪楊國麟。「上年十月。蘄州獲犯自稱楊國麟。語言狂悖。解省供辭益誕。自稱天下一人。信函自稱諭旨。武漢訛言繁興。十二月。適有立溥備爲大阿哥及元旦停止升殿之旨。人情惶惑。公親提訊鞫。據供名李成龍。山西平遙人。業商。游蕩破家。前此所供皆會匪頭目洪春圃教唆。以其悖逆狡詐。搖惑人心。卽正法梟示。」欽差巡閱長江大臣李秉衡至。三月。奉旨敕議洋貨進口加稅免釐利害。「此盛京堂條議。公覆奏言有利無害。機不可失。望斷然行之。會奏禍作不果。」究辦鹽利縣鬧教匪徒。二

十七日。校閱武漢練軍防營於洪山。(分甲乙二隊、互爲勝負。兩湖書院武備自強工藝各學生隨同操練。)

四月。剿當陽利川匪。(匪徒倡亂甚速。慮釀巨患、令地方文武迅速撲滅。)

派護軍營分防鐵路。(凡兩哨。名鐵路護軍營。歸總辦鐵路漢局道員鄭孝胥調遣。旋以時局不靖、洋工程師意欲停工、電致盛京堂阻止。又派練軍五十名保護。五月。添派兩哨。其後鐵路延長。又添兩哨。凡四營。)

義和拳匪起於北方。(義和拳本自蓮教餘孽。匪首朱紅燈、上年倡亂山東、以扶清滅教爲名。巡撫毓賢令知府盧昌詒按問。匪擊殺官軍數十人。自稱義和拳。毓賢不之諗。更名曰義和團。旗幟皆揭毓字。教士請保護。不省。匪勢浸熾。德使詰問。乃調毓賢撫山西。以袁世凱代之。匪不得逞。乃跳而北。發難於良鄉。旬日間、定興至蘆溝鐵路盡毀。分其衆入山西境。)

五月初四日。電致總署請調兵速剿。(又電致武衛軍總統榮中堂言之。得覆、先已有旨派提督聶士成保護蘆保津蘆兩路。未言剿辦。十一日。聞京師時論欲恃拳匪攻逐洋人。又電致許文肅力言其誤。屬商樊雲門達於榮相。十五日。詔以端郡王載漪管總理衙門。禮部尙書啓秀在總理衙門大臣上行走。是日。日本使館書記官杉山彬被戕。洋兵自大沽北進。十九日。劉忠誠會公電奏請剿。公電致總署、請旨嚴戡董軍生事。是日、李文忠內召。二十二日。大沽失守。)

天門縣匪焚教堂醫院。飭地方官嚴辦。二十一日。出示曉諭商民。並飭荊州道府緝匪保教。二十二日。飭各屬嚴禁匪徒造謠生事。飭江漢關道照會各國領事力任保護。(英領事言英願助長江防守。故以力任保護卻之。告以英艦勿入長江。洋人入內地者暫回漢口。劉忠誠晤駐英領事。所言亦同。公又電請駐英羅欽使達此意於英相。二十五日。電湘撫飭屬一體保護。)

請直隸山西山東河南各省保護電線。(京津電線已斷。二十二日。津沽鐵路亦斷。)

調中書黃忠浩率湘軍駐防漢口。(忠浩、湖南黔陽人。講求兵事。臺歲在籍辦團練有聲。光緒乙未。率師防田家鎮。丁酉。帶武靖營駐洪山。俞撫部求將才於公。命募勇駐岳州、固湘鄂門戶。曰威字三旂。公奏保人才。言湘中宿將多衰老。後起堪任軍旅者惟忠浩一人。至是調防漢口。謂鄂安則湘安。當年曾駱東征。意正如此。宣統三年。殉國死。)

二十三日。諷日本維持大局。(電屬駐日李欽使商之。二十四日、又請日本外部

會商各國停戰。俟李相到，妥商辦法。二十七日。電致駐英美日本各欽使。二十九日。致駐俄法德各欽使。其文略同。李文忠劉忠誠山東安徽湖南各巡撫均列銜。二十五日。請美國轉商各國勿派兵艦入長江。六太沽之戰。美艦未開砲。知基仗義。故請駐美欽使以此意商之。會沿江各省請力剿邪匪。嚴禁募軍。安慰各使館。致電各國道歉。請美國調停。明諭各省保護洋商教士。日本外部言必剿匪方有轉機。故有此奏。由李鎰堂欽使領銜。然未電商也。時欽使方赴江陰。督廠臺籌戰守。劉忠誠電致守將。密授機宜。手次棠撫部謂不難辦之勳王。曾有旨宣召。忠誠亦以為請。遂北行。忠誠派張春發陳澤霖兩軍從。奉旨。賊充之變。事機難出。非朝廷意料所及。大局安危正難逆料。沿江沿海各督撫惟當相機審勢。極力辦理。又奉旨。各督撫勿再遲疑觀望。迅速籌兵籌餉。力保疆土。天津自十九日後。兵與匪合。有小勝。戰九晝夜不息。東南營阻外民房焚毀略盡。洋兵到津者逾二十七日。凡三四萬人。京師自十八日後。焚教堂及正陽門外鋪居三十餘家。南宮備西符。二十六日。嚴禁襄陽習拳勇者。出示各屬。有造謠鬧教者。正法示懲。二十七。奉旨匪徒燒搶。京城擾亂已極。各省就兵力餉力所及。速派營星夜赴京。又奉旨。拳民則撫兩難。變端已成。收拾難料。各省保守疆土。接濟京師。聯絡一氣。共挽危局。電致豫陝川湘皖贛各省合力嚴辦造謠鬧教之人。略云。匪徒已起則難滅。民心已搖則難靜。旬月之間。便成燎原。若亂萌初見。誅戮數人。便可無事。二十八日。請以鄖陽鎮總兵鄧正峯署理湖北提督。本任提督張春發統軍駐江北。簽務由總督兼署。以襄陽近豫邊。多伏莽。宜有大員坐鎮。故請以總兵升署。募勇千人巡防。駐襄陽新營。陸陸續募勇分防各處。駐漢陽者曰漢靖營。駐襄陽者曰襄防馬隊右營。駐宜昌者曰宜勝營。駐麻城羅田者曰武勝新營。駐利川者曰利防營。駐田家鎮者曰礮臺營。駐老灘口者曰武襄營。駐沙市者曰沙防營。巡緝沿江一帶者曰江安營。會劉忠誠公與駐滬各領事議訂保護長江及蘇杭內地辦法。趙鳳昌借陰堂筆記。自五月初。良鄉車站拳匪發難。京津響應。各省人心浮動。或停以爲謠。民衆有神徽。各國兵艦運糧滿江。亦感沿江海各口岸。英水師提督西摩擬入長江。倘地方有衝突。大局瓦解。立石砥柱之禍。憂思至再訪傳。

梅生商之。予意欲與西靡商各國兵艦分入長江內地。在各省各埠之僑商教士立由徵撫聯合立約。負責保護。上海租界。外人任之。華界保護。華官任之。總以租界內無一華兵。租界外無一外兵。於此衝突。梅生極諫。可。惟須有任樞紐之人。盛杏生地位最宜。謂即往言之。並云。此公必須有外人先與言。更易取信。當約一美國人同去。杏生尙慮端剛用事。已無中樞。余謂可由各督撫派候補道員來滬。隨滬道與各國駐滬領事訂約。簽字。公不過誓爲樞紐。非負責之人。即定議由其分電沿江海各督撫。最要在劉張兩督。劉未復。余約沈蕙芬起寧再爲陳說。旋得各省覆電。派員來滬。盛擬五條。予爲酌改。加護租界及各口岸兩條。並迅定會議之日。議時美國總領事因五月二十五日上諭飭全國與外人啓衅。開口即云。奉日訂約。倘貴國大皇帝又有旨來救洋人。遵辦否。盛告滬道。答以今日訂約。係表明辦理。美領謂已荷俞允。即簽約。三十日。劉忠誠會公奏陳招拳禦侮之害。已商各領事。各國兵艦勿入長江。暫與周旋。請勿召使臣回國。六月九日。奉二十五日電旨。飭沿江海各省招義民成團禦侮。次日覆奏。長江止有會匪。並無可恃義民。惟有遵保守疆土之旨辦理。按招會禦侮之旨。四川陝西均未宣布。福州將軍善聯所見亦同。自是凡有會奏皆列衛浙江奉旨通行。遂有衛州之變。召使回國。別非強旨。六月初一日。有旨宣示啓衅之由。飭各駐使照常辦事。略云。先是直東兩省。有一種亂民。各就村落練習拳棒。雜以神怪。地方官失於覺察。遂致相煽成風。每月之間。幾於遍地皆是。甚至延至京城。亦皆視若神奇。翕然附和。遂有架點之徒。倡爲仇教之說。五月中旬。猝然發難。焚燒教堂。戕殺教民。闔城洶洶。勢不可遏。當風聲初起之時。各國請調洋兵到京保護使館。朝廷以時勢艱迫。慨然破格許之。各國通計到京洋兵不下五百人。此中國慎重邦交之明證也。各國在京使館。平日與地方官尙屬無怨無德。而自洋兵入城以後。未能專事護館。或有時上城放槍。或有時四出巡街。以致屢有放槍傷人之事。甚或任意游行。護欲闖入東華門。被阻始止。於是兵民交憤。異口同聲。匪徒乘隙橫行。燒殺教民。益無忌憚。各國遂添調洋兵。中途爲亂黨所殺。迄未能前。蓋此時直東兩省之亂黨。已鎔成一片矣。朝廷非不欲將此種亂民下令痛剿。而肘腋之間。操之太促。深恐各國使館保護不及。對激

以大禍。亦恐直東兩省同時舉事、兩省教士教民便無遺類。所以不能不躊躇審顧者以此。爾時不得已、乃有令參使臣暫避至津之事。正在彼此商議間、突有德使克林德晨赴總署、途中被亂民傷害之案。德使蓋先日函約赴署、該署因中途擾亂未克如期候晤者也。自出此案。亂民益挾騎虎之勢、並護送使臣赴津之舉、亦不便捷率從事矣。惟有飭保護使館之兵、嚴益加嚴、以防倉猝。不料五月二十日、即有大沽海口洋真、面見守臺提督羅榮光、索讓砲臺之事。謂如不允、便當於明日兩點鐘用力占據。羅榮光職守所在、豈肯允讓。乃次日果先開砲擊臺、相持竟日、遂至不守。自此兵端已啓。本非釁自我開。且中國即不自量、亦何至與各國同時開釁。並何至恃亂民以與各國開釁。此意當爲各國所深諒。該大臣等各將此旨詳細向各外部切實聲明。中國現仍保護使館。此種亂民、設法相機自行懲辦。各該大臣在各國遇有交涉事件、仍照常辦理。不得稍涉觀望。云云。此旨頒發之時、江鄂電奏由山東轉遞、尚未得達、蓋前此召回使臣之旨、出於禍首諸人矯擲、非內意也。嗣總署屬各駐使行止、相機酌辦。公致電云。如無促歸之旨、萬望安酌、勿遽回。又會劉忠誠電請暫留、爲日後轉圜地步。議簽字粵漢鐵路續約。駐美伍欽使以外侮急、恐美公司藉端要索、且續約經總署閱過、請先畫押。一可成功、二可望美助。公意亦同。保護長江及蘇杭內地辦法定議。凡九條、見本集電牘。各領事達其外部均無異詞、惟德國以戕使故謂權歸統將。外部礙難遷允。六月初四日。以遵旨保守疆土之意出示通省。嚴禁造謠聚衆、擾租界教堂。錄示稿電達沿江各省。并出示湖南各屬。十七日。再飭遵旨保護。請李文忠公阻東三省與兵戰路。初五日。奏請展緩本年鄉試。劉忠誠會公及沿江各省電奏。改明年春間舉行。閏八月。又奏請改於明年秋間恩正併科舉行。二十七年三月。奉旨允准。各省皆再展一年。七月。奉旨武科鄉會試一律永遠停止。派湖南布政使錫良統湖北湖南軍入衛。湖南派勤字五營。錫布政率之。湖北挑練軍隸湘籍者二千五百人、爲武功五營。方友升率之。歸錫布政總統。道信陽北上。初八日。聞雲南有教案。電請嚴辦速了。電請河南保護洋人出境。湖北派人於襄陽迎護。初十日。聞浙江

有匪案。請劉忠誠電勸妥辦。〔二十五日。衢州匪殺西安知縣吳瀟及英美教士男女十餘人。九月二十五日。聞洋兵將入浙剿匪。巡電浙撫請速辦衢州案。〕奉寄諭停解洋款。籌議挽回。〔會商各省。謂停解則各國必據海關。分擾沿海沿江沿邊各省。二十日。會奏請仍照舊案解還。奉旨照解。〕十五日。趙朝廷保護使館之意於德國。〔德皇來電。各洋人被困在京。能生救一人者予千金。公不便逕覆。電致德親王亨利代達。〕十六日。會各省奏請飭各省保護洋商教士。降旨。惋惜被戕德使。致國書於德美法諸國。〔教順天府尹直隸總督查明被害洋人教士請旨撫卹。敕直隸境內督撫統將剿亂匪亂兵。〔兵請於旨中敘奉皇太后懿旨字樣。是日。電致慶邸祭相。請力任剿辦京城內外亂匪。十七日。天津城陷。總督裕祿退守北倉。諸軍大潰。拳匪亦散。二十一日。明發諭旨。如所奏施行。〕衢州匪殺義國教士。十八日。電致湘撫嚴擊董懋。保護電線。〔二十五日。電致駐法裕欽使告義外部。此案必懲辦撫卹。嚴參失職各官。嗣查明此案毀英法教堂各一。斃教士三人。後議結賠英教堂一萬六千兩。法教堂三十餘萬兩。疏防之道府防營奏參降革。法教堂賜額建坊。〕十九日。會各省奏請敕四川提督宋慶以兵護各使出京。〔初七日。江鄂電致祭相。請設法護送各使赴津。而臺軍攻使館不已。公謂救使一人減患一分。恭職則禍且不測。故會各省電奏。推李文忠領銜。二十一日。文忠自粵啓行。〕二十四日。籌款運米接濟京師。〔籌款十二萬兩。於江南購米。由清江轉運局接解。未起運而京城失守。改由漢口解赴行在。〕二十五日。劉忠誠會公電奏。遵旨相機奮勢。保守疆土。〔時論有不滿於保護東南辦法者。五月三十日會奏。措辭渾涵。未明言會訂辦法之事。故具陳原委。〕奉上諭。朝廷本意原不欲輕開邊衅。故會致書各國。並電諭各疆臣。及屢次明降諭旨。總以保護使臣及各口商民爲盡其在我之責。與該督等意見正復相同。如各國恃其兵力進犯。各省自應保守疆土。竭力抵禦。即使目前相安無事。亦應嚴密籌備。以防意外之變。惟總不欲兵衅自我而開。一面將坦懷相與之意。宣示各國。備事。共籌補救。以維大局。又奉寄諭。沿海沿江各口商務照常如約保護。仍應照議施行。以昭大信。〔前旨判刻曉諭。節去各國恃其兵力至不欲兵衅自我而開一段。後旨通行遵辦。〕二十六日。查辦電局委員

廖壽熙。〔常州人孫保維，以江鄂有保護東南之約，撰文登報。言上書鄂督、陳舉足輕重之意。江寧電局委員廖壽熙通電各省。請酌采其說。公閱報見其議論狂悖。電請劉忠誠盛京堂嚴查撤參。並電達各省請共斥之。時報紙屢有流言、隨時禁遏。〕七月初一日。會各省奏請救大學士李鴻章與各國電商。緩其進兵。〔北方霖雨。京津道絕。我軍得以堅持。李文忠以六月二十五日行抵上海。公電商各省會奏、請授以全權、商各國緩兵。初四日。文忠會江鄂電奏、請降旨護送各使赴津。如各使不欲冒險。應先撤圍館之兵。專派護館之兵。准其通信本國。並飭各省認真保護洋商教士。不得縱容土匪亂兵藉端焚殺。有焚殺劫掠者、相機剿辦。示各國以無欺。又以畿輔荒旱、請派大員廣籌賑濟。初八日。奉旨派兵護各使出京。各使恐有疏虞、皆不願。〕初三日。端郡王載漪矯旨殺吏部左侍郎許景澄太常寺卿袁昶。〔許袁皆門人。聞訊駭悼、西人以此慮江鄂督將不安於位。深以為憂。〕初五日。奏請救各省保護電線。直隸山西陝西已毀者立即修復。〔此奏與劉忠誠會銜、有旨施行。〕初十日。派提督謝得龍巡緝沿江會匪。十三日。上諭李鴻章授爲全權大臣。商各國停戰。〔十二日、各國聯軍自天津北進。楊村陷。裕祿陣亡。文忠慮各國兵勢方銳、無從會商。公請從分電各國入手。〕十四日。飭方友升軍速進。〔湘鄂入衛之師尙未渡河。令輕裝兼程北上。〕大通匪徒起事。〔湘鄂各處均嚴防。鄂省募勇千人。扼要分駐。〕商各國阻英艦入長江。〔英兵戰敗於楊村。英提督西摩欲立功長江以雪恥。兵艦至者日多。劉忠誠督公及李文忠電達駐各國欽使、商外部勸阻。又劉永福奉旨入衛。道經入豫。英人謀於九江發難。乃改道由湖達漢。公屬取道襄樊。嗣李文忠北上、飭全隊回粵。〕解北路諸軍槍彈。〔上年以來。神機虎神武衛諸軍陸續提撥槍礮。鄂廠能造彈而不能造無煙藥。所用藥率購自外國。費絀不能多儲。迨北方啓衅。各國禁售軍火。日本允通融而無成議。僅就滬局所存備價分用。先後奉旨催撥。又慮外艦入江藉口生事。設法密運至清江北上。〕設德安電線。〔湖北各屬惟德安無電線。而鐵路電線經三家口、距德安僅數十里。過期接通。〕二十一日。各國聯軍入京師。兩宮西狩。〔十九日、聯軍至通州。二十一日、洋兵守使館及教堂者、開聯軍至、率教民內應。東便門守兵開城迎敵。〕

城遂陷。李文忠以十九日議聯銜諫阻西幸。公謂事近孤注，不列名。」二十二日。公與劉忠誠電達駐上海各領事詢敵不驚兩宮實據。〔得覆，各國無侵犯意。〕二十六日。請李文忠自任議約。阻各國勿進兵追襲。〔文忠已於二十一日電屬各駐使商外部停戰。派全權議善後事。〕二十七日。於漢口獲黨人唐才常等。〔定二十八日武漢同時起事。先期發覺。獲二十餘人。分別處治。江防益嚴。令各關卡嚴查軍火。〕二十八日。沔陽新隄富有票匪起事。蒲圻臨湘紅教會匪皆蠢動。分派諸軍剿辦。〔乘匪勢未熾，立即撲滅。宜昌沙市匪約同日起事。嚴防未遂。長樂長陽巴東諸縣匪徒滋事，殺巴東教民數十，派知府黃邦俊帶勇剿撫。〕是月。國子監祭酒王懿榮殉節於京師。〔一門投井者三人。聞無人殞歿，致書寄款於徐頌開尙書，託其料理。又伯符翰林壽富兄弟，闔門殉難。亦寄款爲之殮葬。〕八月初一日。李文忠電奏行在。請旨派奕劻榮祿劉坤一張之洞同爲全權大臣。便宜行事。即與各國開議。奉旨派劉坤一張之洞函電會商。日本水師入廈門。〔英兵亦至。〕初四日。李文忠會兩江湖廣閩浙總督福州將軍電商日本撤退。〔駐日李欽使以此電商外部。未幾撤兵。駐廈門美領事建議，開鼓浪嶼爲公共租界。各國共管。〕李文忠奉旨調補直隸總督。初五日。公致電請自任地主。飭所屬文武各官盡心職守，不准擅離。諭居民聯合防匪，勿自驚擾。嚴禁各營搶掠焚殺逃潰。飭各軍統領司道府州縣剿匪。凡聚衆抗官焚殺者，軍民格殺勿論。〔德國新使抵滬。駐漢德領事往迎。公屬達意請與李相開議。時聯軍在天津設官安民。北塘以東至榆關皆不戰而下。西例，戰敗而國君播遷留大臣請和者，便可開議。故請文忠以地主自任。得覆一如來電施行。英外部電致其駐滬總領事云，英夙重江鄂兩督，專恃二人主議。請詢意見若何。初八日，公電致英領事，請英邀各國速派全權大臣與李中堂開議。劉忠誠覆電亦同。〕初九日。李文忠會公及劉忠誠具奏，陳明自任地主，飭諸軍守法剿匪。請救奕劻榮祿回京實議，將縱匪毀路之黑龍江將軍壽山，奉天副都統晉昌治罪，明諭各省將軍督撫照常交涉，保疆安民。奉旨，該大學士等與國同休戚，力圖挽救，宗社有靈，實深鑑之。所陳各節，悉係目前最要機宜。當照請施行。〔二十日，慶親王電致各省。請嚴飭各屬竭力保護洋人。及教堂教民。如匪徒

滋擾、立即盡法懲治。」十七日。兩宮至太原。四川巫山匪仇教生事。調兵扼守巴東。川匪旋散。派兵會巡境上。」二十日。奉旨慶親王奕劻授爲全權大臣。會同妥商應議事宜。劉坤一、張之洞仍遵前旨會同辦理。並准便宜行事。務賞折衷一是。勿得內外兩歧。二十一日。李文忠北上。是日。會公及劉忠誠、袁撫部電奏。請旨將統率拳匪之莊親王載勳、協辦大學士剛毅、右翼總兵載瀾、左翼總兵英奎、及庇縱拳匪之端郡王載漪、查辦不實之刑部尚書趙舒、趙等。革職撤差懲辦。〔各國意須懲辦首禍王大臣。方能開議。文忠臨發、手草入奏。未商江鄂也。公於此疏及上文劾壽山等疏。以爲論分際。惟全權可言。他九不靈言。然會電已發。不便立異。又是時議劾董福祥、以甘軍在肝腹、劾之恐激變、誓不入奏。〕二十七日。劉忠誠會公電請各國、勸德軍勿攻保定。并電致全權大臣請旨優卹被戕德使。速懲禍首。二十七日。奏請調武功營扈蹕。〔鄂軍北上、各路撤調奏調、駐紮無定所。公請調赴行在。奉旨。錫良已授山西巡撫、湘鄂兩軍仍歸統帶。布置後路防務。〕是月。撰文勸戒上海國會黨人及出洋學生。〔唐才常之獄。黨與多文人、在上海立會曰國會。出洋學生亦有列名黨籍者。不忍株連窮治。爲文曉之。刊本送各省各駐使廣爲勸戒。〕閏八月初八日。兩宮自太原啓蹕。〔八月二十一日。會奏至行在。剛毅方乞假、即日入對。請移蹕長安。飭董福祥添兵備禦。王文勤來電云。會奏深契聖衷。已照行。惟慈聖決計西行。求止不能。求緩不得。東撫謂陝西多回民、董軍多回籍。拳回相答。將進退維谷。初五日。請江鄂會商諒阻。議未定而幸陝之旨下。是日慶邸至京。十一日。開議於廣慧寺。傳聞各國有歸政之請。赫德言俟李相到、居間調停。〕十二日。會奏言任將不宜再誤、衛軍宜加慎選。請罷董福祥兵柄。〔分所部爲四軍、分別撤留。〕馬安良一事。不再徵調。十七日。會奏言偏安必不可成、京師必不可棄。請明降諭旨、事定回京。簡派王大臣致祭宗廟。恭謁諸陵。〔前奏江鄂東撫會銜。後奏各省列銜者十五人。附片言。陝西隕區不可恃。黃河灌關之險不可守。二十日。奉上諭。但使各國與中國真心和好、不奪我自主之權。不強我以必不能行之事。一有成議。自當即日降旨、定期回鑾。必不能行、請歸政也。二十四日。駐蹕侯馬鎮。剛毅以病死。〕十九日。會湖北巡

撥派督糧道譚啓宇、詹摺馳赴行在恭請聖安。呈進方物。〔此梁編修建議。時各省皆進方物。山東最多。以車一百七十兩載之。粵海關監督莊山備貢品二百五十三箱。四川進銀十萬兩。綉段十二事。湖北所進者藥料食物藥品而已。又各省解餉行在。至九月終。凡四百餘萬兩。〕二十三日。美使柔克義來。〔旨開議非簽黨難若側不可。詢以姓名。允告各國開單。嗣開各國以榮祿與剛董並論。劉忠誠會公電致全權剖白。謂素不相識。非有私。宜明是非。乃爲公允。按十八日京師開議。二十五日。全權奏請將王大臣首禍者自行治罪。盛京堂言。江鄂宜會劾以示衆同。公擬俟全權疏入。如留中。再執奏。惟毓賢爲全權論劾所未及。而是時俄兵已占東三省。聯軍在保定者近萬人。逼定州而西。乃具草陳報軍情。請勿令毓賢守固關。并嚴予處分。會有報毓賢吞金自盡者。乃止。然毓賢未死。〕二十八日。會江南山東接濟京官旅費。赴行在供職。是月。奉旨兼署湖北巡撫。〔豫撫裕長與鄂撫對調。各國有煩言。旋開缺以景星調補。〕子仁蠶生。〔側室辛氏出。〕商日本嚴禁匪人來華謀亂。九月初四日。兩宮至西安。初六日。奏陳借款充餉。〔關稅釐金皆短絀。籌防籌運需款無著。向匯豐銀行借七萬五千鎊。合銀五十萬七千餘兩。以川鹽江防加價作抵。分十年歸還。〕初七日。兼署湖北巡撫篆務。初八日。解京城急款八萬兩。〔京城需款急。慶邸奏准於各省應解京餉內湊解一百萬。湖北解八萬。二十七年正月。戶部奏查明庫銀被竊者四千三百五十萬。實存五十九萬一千二百五十兩。〕十九日。劉忠誠會公奏請速懲首禍諸臣。〔各國請治死罪者十人。全權大臣具奏。旨令秉公覆核。忠誠議陳利害。爲全權助。并以各國擬斷接濟上聞。請兩宮獨斷。公謂惟榮相爲能補救。二十日。致電言各國宗旨漸變。拖延愈久。條款愈恨。望朝廷息怒忍氣。是日。榮相抵行在。婉切上陳。有旨分別懲辦。然罪至革職圈禁遣戍而止。〕二十日。請美外部勸各國勿再遣兵激憤。〔洋兵四出。南至正定。北至張家口。所過剝掠。在保定殺直隸布政使廷雍等六人。全權詰問。各使認爲統帥之事。十一月。聯軍統帥尤德西至保定。嚴禁擄掠。戮教民滋事者。商民稍安。又德軍以閏八月自天津南行。公擬與劉忠誠電致駐滬各領事。勸勿入山東境。會德軍至唐官屯折回。東撫於德州立界牌以爲表識。派軍出境會剿。〕

二十三日。駐漢口德總領事來見。述其駐使語云。聞長江兩側臺有更動說。會議和局之人如更動。各國必不允。已告全權大臣轉奏。如需水師相助。德國當派船候調。意謂如有急難可保護也。德水師提督見劉忠誠。則直云劉若行。當派兵船阻截。英德兩使在京晤全權。謂聞劉張將撤任。蓋皆誤信報紙訛言。各國於京師擬開議和條款。〔初議十條。一、為被狀德使立碑派親王使德謝過。二、改總署為外部。三、懲首禍王大臣。四、撤大沽砲臺。五、禁軍火進口。六、蕩亂地方停試五年。七、改覲見禮節。八、留兵保護使館。九、京沽沿路防駐外兵。十、償款。續增三條。一、教案罷斥人員不得任用。二、重訂現行條約。三、監理中國財政。備抵償款。二十八日。公電致劉忠誠。擬請全權大臣隨時會商。忠誠謂全權答復恐有迫不及待者。〕是月。直隸知府吳永自行在來。〔永、字漁川。吳興人。是年七月。以懷來知縣迎駕於境上。扈蹕西巡。至宣化。擢知府。奉派赴東南各省催解糧餉。至武昌。入謁。公謂之曰。禍變至此。皆以大阿哥故。而猶居儲位。何以服人。且禍根不除。不能無意外之慮。和議亦多窒礙。宜速遣之出宮。不然。外人開口。更矣國體。君聖眷方隆。若覆命日造膝陳之。宗社之福也。吳歸。密以公言面奏。皇太后曰。汝勿言。我到汴自有區處。〕十月初二日。劉忠誠會公奏請速治毓賢董福祥首禍之罪。〔毓賢在山西。殺教士一百餘人。教民六千餘人。毀教堂九十餘所。董福祥在京攻使館最力。九月二十二日。明旨懲首禍諸臣。毓賢遣戍。董福祥不預。先是各省解行在餉銀賑米。皆自漢口轉運。各國疑為接濟董軍。示意阻截。又謂非置毓董於大辟。不能開議。將以哀的美敦書與條款並送。事機甚急。故有此奏。袁撫亦痛切言之。初三日。奉旨。禍首以太原殘殺為重。若置之重典。便可撤兵款。自當照辦。十一日。又奏言。若和議再延。必至斷我接濟。上海各領事已禁洋行出售製造軍火物料。以後滬漢兩局製造吏手。十二日。詔革董福祥職。裁所部甘軍五千五百人。仍留本任。帶親軍數營。剋日回甘肅設防。〕初三日。電致全權大臣論議和條款。〔請先商各國勿以絕幣并送。初四日。請添一條。議民教相安辦法。二十八日。電致駐各國欽使。請詢外部以議和條款。俾可豫籌。得復。各國僉謂已見報端。不能詳告。惟知其較初議和平而已。〕初四日。英水師提督

西摩來。〔欲派船入襄河探水。答以水淺無益。又言接濟董軍事。公力辯其非。並告以懲董難速之故。西摩意解。及言衢州案。謂英將派兵自辦。告以必礙東南大局。遂允止兵。〕聯軍進逼山西。初六日。與劉忠誠請全權大臣力阻。〔并電請駐法裕欽使與外部言之。〕初七日。請自開武昌城北十里外濱江之地爲通商口岸。〔各國預擬條款。有內地任便通商一條。省城北十里外沿江之地。爲粵漢鐵路他日發端之處。其隔岸卽蘆漢鐵路馬頭。故自開口岸以占先著。奉旨照議辦理。卽飭江夏縣丈地。自紅關至青山武豐閣隄外止。江邊收歸官用。隄內向東一千丈爲通商場界。給價收買。洋商租地者。赴江岸局拍租。不得向民間租認。定開辦章程五條。知照各國領事。〕十三日。再請嚴懲首禍諸臣。以毓賢董福祥立正典刑。發國書請各國速和平開議。聯軍陷滄州南皮鹽山慶雲諸縣。十八日。請李文忠速阻勿入山東。二十七日。交卸兼署巡撫篆務。是月。令武備學生隨營練習。請改應題案件爲奏咨。〔九月。軍機處奏准。各省陳報案件向用題本者。量其緩急。尋常者暫緩。緊急者用奏本。公推關其例。分爲六類。本應具奏又應具題者。請暫免題。重要者改專奏。重要而冊籍繁者。開簡明清單具奏。次要者改彙奏。非重要而須達部者改咨。其次改彙咨。凡六十六事。奉旨允行。遂爲成例。〕十一月初三日。全權大臣電奏十一國使臣交到議和條款。〔凡十二款。詳見電牘。無絕書。美幹旋力也。〕初六日。公請改利害所關尤鉅者。〔一、禁軍火進口宜限定幾年。製造軍火之機器物料勿禁。一、籌賠款。如加關稅、通郵政、行印花稅、加釐稅等。宜於約內添入數語。爲他日張本。一、修改通商行船章程。應不礙中國商民生計稅課款項。并請乘此商限制教士教堂辦法。全權議各國修改商約爲有益彼國起見。此時教士氣餒方張、宜緩訂。〕上諭。獎勵李鴻章江電悉。覽所奏各條曷勝感慨。敬念宗廟社稷關繫至重、不得不委曲求全。所有十二條大綱、應卽照允。惟其中利害輕重、詳細節目、仍照昨日蔡祿等電信各節設法婉商磋磨。尙冀稍資補救。該王大臣力爲其難。惟力是視可耳。初九日。電奏京津各國駐兵宜商善法。十一日。電奏條款宜刪遵奉內廷諭旨圍攻使館語。〔旨下全權大臣。嗣覆奏、遵奉內廷諭旨一語、各使藉空文洩憤、當面並未挑過。若於字句間求之、未免自生枝節。按此奏朝旨

許爲周密。而李文忠不以爲然。謂書生之見。盛京堂有電來。勸公勿輕奏。」十三日。請全權大臣畫押勿  
遞。(電文云、大綱必不能改。細目必當妥商。十五日、鹿尙書來電。大綱不得不允。細目甚費磋商。上意  
若能移至滬議。則江鄂均可親往。邊旨電詢是否可行。公覆電云。總綱各國僅覆、不能久延。若商移滬、各  
國難允、且於全權有礙。江鄂兩督不能同離省城。詳約不甚迫促、函電可商。劉忠誠意亦同。云、宜催鄂相  
速商速定。總以大綱內留細目補救地步爲要。)二十五日。全權大臣邊旨畫押。二十八日。籌議修改商  
約。(修改通商行船條約、定於和議大綱。全權大臣奏調大員隨辦。奉旨派盛宣懷充會議商務大臣。嗣有  
人奏言、東南各省。會與各國立約、通商行船一切照常。此次議改約章。自應責成原議。各督撫婉商免改。  
奉旨著劉坤一張之洞盛宣懷悉心籌議。因會奏言、當日保護東南大局。原係交明邊旨辦理。今日議約、  
未便另起波瀾。至補救之方、謹當詳思熟籌。僅能於和局定後、即宣示整頓內政切實辦法。使各國知我發憤  
自強、力除積弊。則議約時尙可容我置詞。擬飭各關道、並分咨各省轉飭各關道商局、將關緊通商行船事宜  
各具說帖、以備參酌。按此爲籌議變法之發端。先是四川奎督部言、今日補救必須變法。盼江鄂諸省合力  
上陳。袁撫部亦致書樞廷。請旨飭內外臣工各陳富強之策。公深鑒之。盛京堂因於此奏內添整頓內政數  
語。)是月。以湖北防務未靖、請將盜劫等案情節較重各犯暫照舊章就地懲辦。(二十四年九月、奉懿  
旨、尋常盜案、規復舊制辦理。至是請仍照光緒九年就地正法章程懲辦。)采運雜糧濟陝西災賑。(邊旨  
籌款濟賑。於襄陽南陽一帶設局轉運。先後凡八萬石。知縣華懋祺積勞病故、奏請從優議卹。)十二月初  
七日。催結衡州教案。(浙江衢州案。英使請嚴懲肇禍官紳、牽連甚衆。湖南衡州案積未議結。因催湘撫速  
辦。得覆辦此事必使民教永敦和睦。現已結案。明年二月。全權大臣奏陳各使所開懲處清單。巡撫俞廉三衡  
州府知府裕慶清泉知縣鄧炳炳均應革職、永不敘用。衡州道隆文革職斬監候。駐漢法領事代爲剖白。公電  
奏俞撫廉公明練。調和民教、保護周密。請籌與處分。仍留原任。英使亦言革職留任即可。六月、全權大臣  
議結具奏。隆文遣戍極邊。餘人不入單內。)初十日。奉上諭、近數十年。積敝相仍、因循粉飾。以致

釀成大釁。欲求振作、當譴更張。著軍機大臣大學士六部九卿出使各國大臣各省督撫各就現在情形、參酌中西政治、舉凡朝章國政、吏治民生、學校科舉、軍政財政、當因當革、當省當併。各抒所見。條議以聞。十六日。奉旨兼署湖北巡撫。旨以于蔭霖調任湖北巡撫。英使謂其嫉視西人。前任鄂撫時。辦理不善、礙難允從。全權大臣入奏。樞廷覆以鄂省交涉皆總督主政、何從辦理不善。英使干預用人之權。請詳細辨明。嗣內意擬以錫良調任、而英法不願。公電致樞廷、言護理陝撫端方、定亂安民。如令來鄂。各國必極意、有旨于蔭霖開缺另補。授端方湖北巡撫。二十四日。遵旨商寬首禍王大臣罪。二十七日、全權大臣電奏、各使議懲禍首。續經查出啓秀徐承煜二人。應與端郡王載漪莊親王載勳、輔國公載瀾、董福祥、英年、剛毅、趙舒翹、及案外之毓賢、均處死罪。奉旨迭仿辨論。全權大臣覆奏、僅端瀾二人彼允減死。二十六日。奉旨、載勳賜自盡。載漪載瀾革去爵職、發往新疆、永遠監禁。毓賢正法。剛毅追奪原官。董福祥革職。英年趙舒翹革職斬監候。啓秀徐承煜革職查辦。徐桐李秉衡撤銷卹典。是日、樞廷電致江鄂。屬爲啓徐英趙四人分電各國外部公使力辨。公先託英德總領事轉電公使。得覆、措詞決絕。知無可商。然猶冀爲趙一人解救。三十日。分電各駐使轉達外部。美許可。日本僅云可閱而已。他國皆不復。二十九日、全權大臣電奏、謂各國不能更改。及德西將帶隊出京。出京、謂西行也。明年正月初三日。奉旨。載漪載瀾定斬監候罪名後、往新疆極邊永遠監禁。剛毅定爲斬立決罪名。業經病故、免其置議。英年趙舒翹賜令自盡。啓秀徐承煜正法。徐桐李秉衡定爲斬監候。惟臨難自盡。應免再議。是日、載勳自盡於蒲州。正月初四日。毓賢伏法於蘭州。初六日。英年自盡。初七日。趙舒翹自盡。初八日。啓秀徐承煜正法。各國以兵監視。按趙尚書之死、行在京外官累電請江鄂營救。李鏗帥撤卹典。公亦謂敵國兵爭之際、斷不可動戰死之人。一事皆所極意挽回而不得者。袁撫電云、時勢危迫、但知保宗社、安兩宮、諸人卽有冤抑、亦不眠願。此電最有力。然呂欽使晤德外部、爲趙力辨。外部猶允致電穆使。惜明旨已發。不及救矣。

光緒二十七年辛丑公六十五歲

正月初六日。電奏論與俄定東三省條約之害。〔聯軍入京。俄先撤兵不專。而東三省進兵不已。上年十一月。奉天將軍增祺派革員周冕赴旅順。與俄提督訂約九條。主權盡失。全權大臣奏准派駐使楊儒與俄商議挽救。十二月。改訂十二款。略有刪節。而添滿蒙新疆鐵路不讓別國。及築路向京直達長城。又中國北境水陸師不用他國人訓練諸條。駐漢英領事力言其害。日本外部言已勸各國阻止。爲中國計。宜請各國公議。公謂各國效尤。必成瓜分之局。請與各國從長密議。〕初九日。奉旨。交遼東三省條約十二款。各國皆不以爲然。而俄以此事與各國無涉。中國應置不理。若各國效尤。何堪設想。除電諭奕劻李鴻章楊儒辯駁務須妥協外。劉坤一張之洞即勸各國幫助辦理。〔是日。先已電致日德英美各駐使。勸外部逕電俄廷。日本謂應將東三省併入公約辦理。德國謂中國不應先與別國立土地利權之約。英謂未見明文。俟接到當商各國。美謂宜先與諸國商明。方可定約。公先後奏聞。仍託各領事催其外部速出排解。〕初十日。兼署湖北巡撫篆務。十九日。請以俄約明告各國排解。〔此據英領事述其外部之言。〕二十八日。奉旨俄約更改各條。著劉坤一張之洞會同盛宣懷悉心籌畫利害輕重。總期俄國不致決裂。而各國亦不致藉口效尤。〔二十三日。駐俄楊欽使電奏俄約刪中國北境水陸師不用他國人訓練一條。改築路向京爲築路至滿州直隸交界之長城止。餘款刪改字句。限二月初七日畫押。全權大臣奏請速斷。公自初六日以後。屢電論奏。及奉旨會商。又奏言所改皆無關緊要。請敕駐各國使臣懇外部商俄展限。許各國於東三省任便通商。公享利益。劉忠誠覆奏略同。二月初二日。旨敕李盛鐸羅豐祿伍廷芳呂海寰以江鄂所請商日英美德外部。初三日。公與劉忠誠電致上海英日領事。轉外部代商展限。聲明當奏請朝廷許各國於東三省任便通商。初四日。電致駐四國欽使。請外部秉公判斷。與公約同時畫押。嗣駐滬英領事言駐京各使意見不一。德法不甚關切。似與俄近。英祇阻畫押。不肯出面。日本領事則言公享利益一節似難商辦。各國不可以利相爭。〕二月初六日。請宣布中俄草

約、由各國公斷。〔兩江兩廣山東安徽督撫皆列銜。旨飭楊儒告俄、中國迫於各國公議、此約非改妥不敢遵定。初七日、期滿、未盡押。〕初九日。奉旨。俄約關係甚重。朝廷已堅持非改妥不肯公約不允盡押。今李鴻章電奏謂不盡押俄必決裂。永不遼東三省。各國亦必效尤。楊儒又跌傷不能辦事。限期已滿。決裂在即。目前且必致公約不定、聯軍不撤、各國又增索兵費。該督撫等務妥籌辦法、勿貽專後之悔。十二日。電奏已商英日德美勸解。令俄國得以轉圜。〔嗣俄國宣言、俄與中國訂約、原為遼東三省、保中國疆土。本既有謠言。俄不再強。日後再商。李文忠電覆俄國王爵吳克托。言公約定後再簽俄約。三十日、公與劉忠誠請救更正此說。樞廷覆云、合肥復電並非奉旨允准。暫可不提。〕二十五日。商各國請減賠款。製造軍火之機器物料進口者勿禁。〔英美答覆、機器物料可不禁。美允減輕賠款。英謂所索必少於他國。〕二、是月。漢陽無煙藥廠轟炸。〔藥廠所雇洋匠未至。軍需方亟。總辦道員徐建寅精思仿造。成黑色無煙藥。試驗可用。十二日。機器磨熱火發。建寅及委員戴振麟楊蔭桓等皆炸死。建寅、字仲虎。無錫人、父壽。講求格致化學。創黃鵠輪船。建寅承家學、周歷各國、與傅蘭雅等譯西書刊行。上年五月奉調來鄂。總辦銅藥廠。某日公方出城校閱軍隊。聞報痛惜。三月。奏准照軍營陣亡例從優賜卹。〕三月初一日。上諭獎勵李鴻章。和約各條關係重大。如議賠款及禁運軍火等事。節目繁多。俱宜內外和商。詳晰磋商。劉坤一、張之洞本係派令會議之大臣。著該王大臣將應行籌議事宜隨時電知、互相參酌。以期妥慎。〔三月三十日。因論俄約事附奏言、江鄂皆係奉旨會商和議。數月以來。全權從無相商之事。或於電奏後始得聞知。以後遇俄事及現議賠款與有關全局重要事件、請敕全權電知江鄂、或可稍效愚慮。似有此旨。〕聯軍入關西境。公飭方友升軍遵旨撤退。〔岑雲階撫部赴任。津報傳言以兵從。〕二月二十九日。總法給兵西進。初五日。方軍退娘子關。初五日。聯軍入關探望。方軍退平定州。全權大臣詰問孫使。初七日。聯軍退保定。十一、初三日。上諭、變通政治、事體重大。著設立督辦政務處。派慶親王奕劻大學士李鴻章榮祿崑岡王文韶戶部尚書鹿傳霖為督辦政務大臣。劉坤一張之洞亦著為參預。務當和衷商榷。悉心詳議。次第奏開。俟回鑾後切實

頒行。〔護獲變法事宜、公議合各省會奏。劉忠誠推公主稿。屬張季直沈子培湯塾仙各爲條議寄鄂備采。公亦命所屬條陳。及是袁撫部得行在電、云、上意盼疆臣各行所見。勿驗銜入告。袁疏先成。乃單銜具奏。劉忠誠謂江鄂不宜聯銜。公奮筆衆說。斷以己意。日撰一條。月餘始就。是時京外官條陳變法者、皆交會議政務處、區爲科舉兵專財政雜務四類。俟回京合議。惟粵督請裁奄宦一條留中不下。〕傳旨頒賞日本商人。〔漢口東肥洋行備具貢品。呈請代奏、奉旨著該督從優酌備賞件。傳旨頒賜嘉獎。〕初八日。電奏論和約賠款本息。〔各國索銀四百五十兆兩。四釐計息。分三十年歸還。每年三千萬兩。公初議請各國免息。全權謂各國必不允。然合本息至九百兆因奏請敕全權力商。時德德詢公意見。德外部魯呂欽使云、如鄂督有實在辦法、不妨密告。若可行。必格外遷就。並勸各國照允。蓋赫德謀操縱其間。非德意也。公覆以地丁不能加征。不如將關稅鹽課釐金概加一倍。如賠款總數能減至四百兆以內。則可十年清償。初九十三兩日、以此意電奏。按各國賠款細數。俄一萬三千二百萬。德九千一百萬。法七千五百萬。英五千一百六十萬。日本三千五百五十萬。美三千四百萬。義二千五百九十萬。比八百三十萬。奧四百萬。荷八十萬。葡三十八萬。此據當時探報。如速懲禍首、洋兵早撤半年。可省十之二三。〕十六日。奉旨賠款必籌定有著款項。劉坤一張之洞有會商之責。著悉心籌畫具奏。十九日。電奏宜另籌新款。切商減數。〔全權十四日電奏云、美擬向各國勸減。但須現銀。日本以洋貨加稅爲是。英則謂中國莫妙於全免釐金出口稅。專徵進口洋稅。赫德言中國斷不可以抵款難籌推託。恐各國占地自籌。爲害尤大。莫如先指的款、辦撤兵。自用另籌。所言極有理。樞廷議以鹽課鹽釐漕項各關常稅全數備抵、歲可得銀二千萬兩。公曰、如此則百事俱廢。兵械全無。而京餉協餉不能緩。必致大亂四起。總宜另籌新款。東撫以爲籌新款莫如行丁捐。劉忠誠則謂空款作抵、恐各國不允。意與全權相同。惟鹽課斷不可抵。此事往返電商訖無善策。按是時戶部歲入八千餘萬。舊借應還者歲二千四百萬。加新案賠款二千萬。則所餘不足四千萬矣。〕二十五日。遵旨保薦人才。〔奏保翰林院編修銜梁鼎芬等九人。七月。電致鹿文端、請以梁編修補武昌府遺缺。八月、奉旨梁鼎

芬補授漢陽府知府。編修意不欲來。公敦勸者再。約以寬禮數、省繁文、是年冬到任。署理武昌府知府。是月。拒英國水師入襄河探水。〔襄河水漲。英艦欲踐上年探水之議、以大局未定拒之。法德船踵至。聞英船見拒、亦不往。〕委前官州知州蔣楷前遂溪知縣李鍾珪稽察武備學堂。〔就課程行檢切實稽查。蔣楷、字則先、荆門人。官山東知州、署平原縣事。拳匪初起、以請禁請剿忤毓賢指、奏參革職。李鍾珪、字平書、上海人。知遂溪時。有廣州灣之役。率民團抗法。事定落職。先後致之幕下。二十八年五月。奏請開復蔣楷原官。〕四月初七日。英國參贊傑爾遜來。〔商賠款加稅事、洋貨進口可值百抽十。按鈔價核計。全免釐金。洋人自用之物、有數種亦允抽稅。公謂有益國計、電奏分晰言之。惟常關歸稅司兼管以爲不可。是日。英領事霍必瀾亦來。言直隸山西會試應全停。并停會試廷試。力駁之。〕初八日。請速剿捕畿輔盜匪。飭諭蒙旗勿仇教生事。〔德領事來。述其公使語。若中國能保拳匪不再起、并保兵力足以平匪、則德兵可撤。因言蒙古四子部落有仇教之說。公向德領事擔承解釋。遂有此奏。時長江會匪謀起事。飭屬嚴防。又楚豫交界有頑童習拳術符呪。并查拏禁遏。〕十七日。請降旨宣諭議改科舉、講求實學。〔時議有言鄉試不宜展期者。劉忠誠議變法事、先請降旨、言科舉必須改革、揭明宗旨。令士子及時講習。公會電具奏。大指本戊戌奏准變通成案。〕和議漸定。二十一日。上諭擇七月十九日由河南直隸一帶回京。〔回鑾事正月中內意已定。命大學士崑岡預備。至是宣示行期。六月、天暑多雨。豫陝兩撫奏言秋熟方盛。六飛在道。實非所宜。陝西紳民籲懇秋涼啓蹕。七月初一日。有旨改八月二十四日啓蹕。〕二十二日。請調入衛之武功營回防節餉。〔六月。湖南勁字營亦撤隊回防。〕是月。日本子爵長岡護美來。〔攜其公簡近衛篤磨條陳東三省開門通商辦法一冊。并以此冊分致劉忠誠。護美嫻漢文、賦詩贈之。其隨員求公墨迹。命接屬代筆以應。嗣是日員來游鮮不求書者。護美在上海設同文學校。是月行開校禮。贈以唐石經御纂七經各一部。〕五月。電奏論賠款年限。〔賠款本息之數既不能改。以次議及年限。全權擬四十年五十年辦法兩端。德使開送年表爲四十四年。前四年不還本而息多。後十四年最重。合計本息一千零七十五兆。赫德言此法最

善。公請定爲三十六年。每年還本。合計八百六十六兆。不得已則聲明將來如能多籌。提前歸還。利隨本減。最後全權議定。前五年付息帶還本不及百萬。以後按年遞加。至三十九年止。共九百八十二兆二十三萬八千一百五十兩。電奏論各國使臣覬覦見禮節。各使覬覦見乘黃轎。乾清宮前降輿。江鄂會奏以爲不可。全權亦堅持。嗣議定綠轎黃轎。乾清門前降輿。劉忠誠奏請救全權大臣照會領袖公使詢俄國撤東三省兵日期。全權覆奏言。江鄂爲日本所愚。斥爲謬論。因會奏申辨。謂全權爲俄所愚。公另電申開門通商之說。奉旨。李鴻章誤以畫押爲劉坤一張之洞所阻。劉坤一張之洞又以李鴻章爲偏執已見。負氣爭論。於事何補。要之俄約終當設法改訂。必須乘公約既定之際。向俄使磋磨。並照會各使公議。便詢撤兵日期。若許各國通商。互相牽制。應如何辦理。著責成奕劻李鴻章趕緊籌商。劉坤一張之洞有會辦之責。亦不得置身事外。進呈一統志天文與地球圖。上年冬。進經史各書及彙部有裨治道者。行在寬一統志不得。命湖北求之。於揚州得殿本一部。具摺進呈。附以石印本及輿地圖赤道南北極星圖地球圖。派兵防洋鄉鐵路。匪徒揭帖。揚言毀鐵路機房馬頭。江鄂各派兵嚴防。與劉忠誠會奏籌議變法專宜。凡二十七條。分三摺。第一摺言學堂科舉。曰設文武學堂。曰酌改文科。曰停罷武科。曰獎勵游學。第二摺言整頓中法。曰崇節儉。曰破常格。曰停捐納。曰課官軍祿。曰去書吏。曰去差役。曰恤刑獄。曰改選法。曰籌八旗生計。曰裁屯衛。曰裁綠營。曰簡文法。第三摺言采用西法。曰廣派游歷。曰練外國操。曰廣軍實。曰修農政。曰勸工藝。曰定鑛律路律商律交涉刑律。曰用銀元。曰行印花稅。曰推行郵政。曰官收洋藥。曰多譯東西各國書。附片言新政用款必多。此時應省之事必須省。應辦之事必須辦。應用之財必須用。請於賠款外專籌巨款。備舉行要政。屬稿既竟。寄劉忠誠商酌。於去書吏收洋藥裁屯衛三條。略有討論。時盛京堂建議請籌一兩銀元。以江兩湖北廣東所籌小元爲圖利。因於摺內酌增數語以破其說。摺由江甯繕發。湖北印送樞廷分閱。奉上諭。朕欽奉皇太后懿旨。數月以來。興革各事。業已降旨飭行。昨據劉坤一張之洞會奏整頓中法以行西法各條。其中可行者。卽按照所陳。臨時設法擇要舉辦。榮相語人云。劉張奏。慈聖稱

好，我對、法是好。祇是無人辦。」解京城教案賠款及建克林德石坊。行在戶部奏撥各省關二百萬兩。湖北應解十七萬、提京餉十萬。十六日。聯軍交還京城地面。即日撤退。留護使館兵二十人。賠款亦於是日截止。十七日。瓦德西出京。七月。議定各使館所占民房、中國賠償三十五萬兩。由各省應解京餉內撥付。湖北三萬兩。湖南二萬兩。」防護省城隍工。」江水盛漲。督員弁防守。用麻袋十萬八千、盛鐵渣護武泰閘。」六月。率湖北文職各官報效踣路經費。」李文忠電云。回鑾大差、實難措手。懇各大省各籌撥十萬兩。分十年由直隸歸還。嗣各省共認六十八萬兩。湖北十萬兩。文忠奏聞。奉旨張之洞等著戶部核給銜鈔。」初九日。交卸發署巡撫篆務。設學務處。」學務日繁。於督署設學務處。專司其事。」河南唐縣民聚衆抗官。派兵赴棗陽防守。解直隸教案賠款。」凡十五萬兩。又於京餉內抵解十二萬兩。」七月。請敕全權大臣議直隸山西不滋事州縣准借開鄉試。一籌湖北應解和約賠款。」和約賠款期近。籌無善策。擬擇各省辦法可行者仿之。」日本少將福島安正來。」福島預於聯軍之役。保文廟、安商民、衛宮闕、其功居多。優禮款之。」二十五日。和約成。江南自強軍奉旨調紮山東。歸袁世凱訓練。」聞而異之。電致劉忠誠、詢其故。按六月初。廷寄兩江調自強軍赴東。忠誠奏言、自強軍二千六百餘人、係江南提督李占椿統帶。駐紮江陰、勢難遠離。且新募各營次第裁遣、無可抽撥。第武衛右軍既奉調赴京、可否將張春發所部武衛後鋒左軍調往東省、加以訓練。必可得力。奉旨、自強軍調紮山東、原因該軍向習洋操。就近歸袁世凱訓練。以期一律精熟。該督既稱江防軍薄、著將張春發所部調紮江陰。其自強一軍仍遵前旨調赴山東。九月。袁撫部擢任直隸總督。又調自強軍赴北洋。十月回鑾。以自強軍任蹕路警備。」是月。公病。」旋愈。劉忠誠亦病。勺水不入口者五日。李文忠自盡押日即病、方疾治事。」特參長江水師員弁難期振作者四人。八月。奏請赴開封迎鑾。奉旨毋庸前來。奏准推廣銀元。江南湖北廣東三省鑄造。」七月、奉旨、銀元與制錢相輔而行。廣東湖北兩省成色較佳。應籌款源源鑄造。即應解京餉亦准酌量撥作成本。此外各省並可附鑄。不必另行設局。江南銀元局自光緒二十三年開鑄後、行銷甚廣。盈餘亦多。公奏言

鄂粵機器均小。所出不多。江南機器甚大。以三局並造爲宜。若慮製造未精、可嚴飭認真化驗。務令三局一律。劉忠誠亦奏請照舊辦理。奉旨江鄂粵通籌具奏。忠誠致電稱謝。謂「一言而爲甯局吐氣。」更定防營將弁學堂章程。〔前此分班聽講、猶無大益。因改革考送一百人入堂肄業。〕裁撤添募各營。留武建營。并整頓武防營。〔奉旨〕、各省兵勇、除素稱得力及練習洋操著有成效者、酌量裁撤、武建八營爲上年新募之軍。張彪原統護軍營。以武建軍撤令兼統。吳元愷所統武防四營、操練未熟。以武建軍監操管道員鄭孝胥兼武防營監操官。講求整頓。裁黃忠浩咸字三旂。挑留兩底營。仍駐岳州。此外新募之漢靖營宜勝營利防營襄防新營武勝新營田家鎮礮臺營均裁。江安營留五十名。改爲沿江督捕營。另募五十名爲沿江下游緝捕營。武襄四營挑留兩哨。改爲襄防右營。沙防營仍留兩底營。於武備學堂設教練隊。〔七月。奉旨停武科。敕各省辦武備學堂。湖北武備學堂辦有規模。責成擴充訓練。因添設教練隊一營、先募正勇一百名、用防營規制。采東西洋步兵操典。另訂專書札發訓練。〕會湖北巡撫奏派安襄鄖荆道朱其煊赴開封迎鑾。會劉忠誠奏陳俄約要盟貽害。以日本公尊近衛爲齋開門通商條議進呈。〔六月二十七日、俄使以三事要全權大臣。一有議論東三省之權。二畫押之先不使俄國預知。三不聽他國指使。全權具奏。奉旨令婉切商辦、使各國不致訾議。公與劉忠誠議奏請朝廷主持。另圖補救。會李文忠癡疾。途未入奏。迫公約簽字。英人不歸我天津之地。而歸州巴東兩處英人購地圍煤、以便川江行船。雖經拒絕。然其事可疑。恐啓效尤之漸、因以篤磨條議進呈。〕奉旨上諭、所陳辦法、具見苦心。但俄人尙未交還、遽請各國公議。必致決裂。各國即能發公論、必不肯爲我以兵力向阻。又將何以爲計。該督等再妥籌善策、迅速密奏。〔陶勤肅電云、一國獨占則爲公論。偏地開放則爲非洲。此事屢商無善策。僅覆奏俄約請從緩議。明年俄約定。此議亦罷。〕全權大臣奏請派六臣議辦商約。奉旨派盛宣懷爲辦理商稅事務大臣。議辦通商行船各條約及改定進口稅則一切事宜。就近會商劉坤一張之洞妥爲定議。〔明年正月、奉旨派呂海寰會同盛宣懷悉心籌議。以盛宣懷爲工部右侍郎。〕派遣員朱滋澤等赴日本觀操。考察學校工廠。〔凡十一人〕。九月。籌辦鹽釐加價土藥加稅、

奏解賠款。〔川淮鹽行銷鄂境者，照部議每斤加價四文。時兩江議於起運時加抽四文。劉忠誠慮江鄂並加，銷疲商困。請鄂省不再加。不能應也。土藥稅上年已加三成。至是又加二成。宜昌關及各卡均自十月初一日起徵。按是時各省籌款之法不一。四川按糧捐輸至一百三十萬。廣東畝捐按糧倍徵。山東提州縣盈餘五十萬。鄂省皆不可行。不得已仍從鹽價土稅著手。湖南尤重。每鹽一斤加價十文。〕請預防各國派兵入境。〔英領事言開法兵入滇護路。電詢知無其事。然後應宜防。故有此表。〕德國公使穆默來。〔李文忠病亟，德使密言北洋遺缺非袁撫不可。爲之轉達程廷。是月十九日，文忠自俄使館議事歸，歐血盈許。二十七日卒。旨以袁世凱署直隸總督。王文韶爲全權大臣，議俄約。〕十月初一日。會劉忠誠覆奏科舉改革，請分場發榜、刪除謄錄、學堂畢業者、分別作爲進士舉貢生員。〔七月，詔改科舉法。略如江鄂所奏。而未及分場發榜、刪除謄錄二事。恐部議覆奏太遲。故電奏陳請。會是日政務處議奏考試事宜、僅廢謄錄、未及分場錄取之法。遂不及改。其出身一途。是月政務處奏准，凡小學堂畢業考取合格者升中學堂。中學堂畢業合格者爲優等學生，送京師大學堂覆試。候旨定爲舉人貢生。舉人積有成數，特派大臣考試。候旨定爲進士、一體殿試。〕初二日。兩宮駐蹕開封。〔慶親王自京至。力請回鑾。皇太后猶以使館駐兵爲慮。榮相具陳無害。駐京各使密議，如過萬壽節無行期，即當赴汴。〕初十日。皇太后萬壽。頒賞福壽字各方。蟒袍料一件。是日延宴各國領事等官。二十日。奉上諭。朕欽奉皇太后懿旨，溥儀著撤去大阿哥名號。即日出宮。至承嗣穆宗毅皇帝一節。俟慎選元良，再降懿旨。〔兩宮至開封，逾旬日而處置大阿哥無明文。十四日，公電致鹿文瑞、述德使語，詢大阿哥究竟。及明旨廢黜。又電致文瑞，言此時祇可暫虛此位。萬不宜又生枝節。〕請行在戶部折解南漕。〔五月，倉場侍郎那桐奏變通運京辦法。請由火車轉運，於京津鐵路築枝路直達朝陽門外太平倉。七月奉旨，自本年始，直省河運海運一律改徵折色。局費運費等項悉數提存，候戶部撥用。八月，慶親王奕劻等奏言，都市米價昂於居奇。宜寬儲備。請飭江浙於應辦白糧外，每年務須采辦漕糧一百萬石。並除去折耗。亦不得率請截留。江浙兩省擬遵照采運。劉忠誠仍責州縣折

解。除運京外、江浙兩省每年須湊足賠款七十萬。張安圃漕帥覆奏、請折放九十餘萬石。僅令江浙購五十萬石、解運儲倉。足備緩急、年可省運費百餘萬。時鹿文瀾長戶部。公電請極力主持、廓清積弊。嗣奉旨、運米百萬係暫辦辦法。自明年起、仍全數改折。會各省奏請減派賠款三成。〔賠款第一年二千二百萬兩。部庫裁減可省之款得三百餘萬。其一千八百餘萬分派各省。勻十二月解江海關存撥。湖北應認一百二十萬。公謂進口稅加足值百抽五、稅司估計可增三百萬。即以九成核計、亦可增二百七十萬。免稅之貨納稅、年增三十二萬。常關稅由稅司代徵、增一百五十萬。折漕可省一百餘萬。共得五百五十萬。可抵賠款三成。會摘各省電奏、請減三成攤款。奉旨照准。十一月、全權奏仍應按約每月籌足、不能核減。奉旨仍照原數核月彙解。俟年終計洋常關漕折確數、再行核減。〕請仍以俄約付各國公斷。〔全權重議俄約、俄欲專東三省開鑽之利。並禁華軍用礮。吉黑兩省撤兵無確期。日本勸中國勿允。英使蔭托來鄂言、如中國自議不諧、可請英美日德法五國公斷。遂以其言入奏。〕二十五日。奉上諭、大局漸定。回京有期。劉坤一、張之洞、袁世凱、其保、東南疆土。盡心籌畫、均屬卓著勳勞。劉坤一賞加太子太保銜。張之洞、袁世凱均賞加太子少保銜。派訓導劉洪烈、光祿寺署正羅振玉等赴日本考察學校。購譯教科書。〔江鄂開辦中小各學堂。議選購日本教科書、參酌編纂。并派自強學堂教習陳毅、胡鈞、左全、孝田、吳昭等同往。〕蔡遠章購地開鑽。〔大冶與國武昌等處、痞徒購地開鑽、不經呈准、或賄令洋股。乃以大冶知縣蕭端澍為績務提調。責成稽查封禁。并令武昌縣仿大冶辦法、凡鑽山與田園廢墓無礙者、發款圍購。蔡民擅自賣買。三十三年。以大冶鑽山容有履勘未周之處。委員覆勘圍購。〕設火車貨捐局。〔鐵路由漢口達信陽。商貨走集。水路釐收頗減。因於漢口設火車貨捐局。請外務部飭赫德襄助。并由海關定章。凡由火車運貨者、無論華洋商人、按海關稅則納半稅一次。鄂豫皆不重徵。明年。鐵路展至蘄山、貨源日旺。鄂豫會商、設駐馬店、漢陽、河、鄖城諸分卡。兩省各委稽徵之員。鄂員專辦。豫員會辦。收數兩省劃分。華洋商民樂統捐之簡易。均無異辭。又明年。鐵路至蔡澤。設許州、鄭州分卡。黃河以北。在豫枋而行之。各省議修鐵路、亦有調取章程者。〕英國商稅專使馬凱來華。十

一月。至武昌。〔公議先就免釐加稅揭大綱十八條。大意在免釐以後。洋商不得在內地運銷土貨。妨商民生計。不得侵財政之權。加稅之數須與免釐之數相抵。而釐金之數。則須將外銷及報部之經費不名爲釐金者并計。其內地往來非出口者。及地方所用紳董所抽者不免。土貨出口。除釐產應加稅外。餘貨不加。絲茶出口。則須減稅。及馬凱來。言免釐事。則土貨內地往來及產地之釐皆免。又詢洋商在內地能否開礦雜居。而加稅之數未明言。〕初四日。兩宮自開封啓蹕。公會湖北巡撫派道員黃紹第赴保定迎鑾。二十八日。兩宮還京師。是月。孫厚琨卒。〔游學日本。在學習院肄業。上年秋。避人言。令歸。是年八月。赴日本觀操。歸至武昌。乘馬入武昌門。馬驚而墮。越日卒。〕設漢口電話。〔由電報局兼辦。〕試辦籤捐票。〔江南順直廣東各省彩票。行銷武漢者甚廣。因自辦以塞漏卮。兼湊賠款。名籤捐票。先在武漢開辦。推廣於繁盛州縣。黃岡知縣寶豐首先試行。光化知縣張國關力陳其害。他縣亦銷不足額。明年四月。各縣均停辦。飭就地籌款抵補。名曰賠款捐。惟漢口行銷如故。國關。字湘谷。桐城人。作令有聲。張文端七世孫也。〕創辦湖北官報。〔附設商報館內。〕十二月。薦舉才守俱優者十二人。開議中英商約。〔馬凱自鄂回滬。與商約大臣開議。先後列應議者二十四條。凡郵政、電報、圓法、商律、路律、鑛律、添開口岸、修改關章、米穀出洋、洋鹽進口、川江行輪、絲茶減稅、土藥加稅等項。皆入其中。每條各有細目。每七日會議三次。盛京堂隨時與江鄂往返電商。並致外務部錄送軍機處進呈。〕試鑄銅元。〔仿廣東福建成式。鑄當十當五銅元。與制錢並行。先就銀元局試辦。〕十一月。奉旨。朕欽奉皇太后懿旨。劉坤一著於明年開河時來京陛見。張之洞著俟劉坤一面任後來京陛見。該督等即將應辦事宜早爲料理。以便屆期就道。十五日。奉旨。朕欽奉皇太后懿旨。劉坤一張之洞著俟商約定議後再行來京。〔初旨意在慰勞前事。嗣英使謂東南未可離。故有後命。〕

光緒二十八年壬寅公六十六歲

正月。兩江湖廣會設江楚編譯局於江甯。〔延黃學士紹箕繆翰林荃蓀爲總纂。羅光祿振玉副之。湖北延分纂七人。書成。彼此互送覆閱。〕復丁漕減徵錢。加提州縣平餘銀。酌收稅契捐。以供賠款。辦房捐鋪捐土膏捐。以湊賠款。辦自強要政。〔新案賠款多方湊集。取之中飽。取之有力之家。取之於民生無益有損之物。復減徵加稅契兩條。先由電奏准。以二月開辦。房捐鋪捐於通省繁盛城鎮勸辦。膏捐就土藥徵收。以三月開辦。〕議以約束教士教民等款入於商約。〔盛侍郎擬於通約加數條。皆中外有益者。一、約束教士教民。一、中國編纂律例。於口岸特設公堂。審理華英人詞訟。一、英人欲同沾中國所許他國之利益。須遵守中國與他國所訂之專章。一、管理行船。保衛水道。及防疫等章程。由中國頒行。洋商遵守。一、華船不准懸英旗。一、中國可派領事官駐英國及英國屬地。公又擬添數條。一、教士不准誘孔教。報館不准冒洋商。一、英人與華人交易單據。須貼中國印花稅票。一、訂約束水手及孳犯章程。一、華僑在英地者一律優待。以上各條。有擬議而未開送者。〕英日聯盟成。公與劉忠誠再請緩定俄約。〔英日聯盟文清韓並列。駐日蔡欽使謂宜致賀。公不謂然。〕二月。蔡水陸各營將領違例擅殺。〔所管兵勇犯重大情事者。交地方官審訊。〕奉上諭。律例因時制宜。著袁世凱劉坤一張之洞慎選熟悉中西律例者。酌保數員。聽候簡派。開館編纂。請旨審定。〔嗣會奏保薦伍廷芳沈家本沈曾植三人。并請延訪日本法學博士講刑法民法者各一人。〕飭各屬遵旨與辦農務工藝。〔升補提署以此爲殿長。與劉忠誠袁督部會奏請於京師設仕學院。并請酌定外務部司員使館參隨各官任用章程。〕袁督部電江鄂云。近來在上銳意求治。在下築室道謀。自強無望。各省條陳冗長。當軸不暇再閱。擬請兩帥先擇新政最要者。每次舉一專聯銜入告。文意須簡當。每月兩三次。節節設法。由淺入深。必可有濟。公與忠誠趨之。是月。以兩事奏陳。皆北洋主稿。其一擬於京師設仕學院。請敕下管學大臣張百熙妥訂章程先行開辦。令軍機處政務處外務部各司員及四品以下京堂翰詹科道部曹與在京外官均得身入其中。附立講學會。訪求外國通儒作爲講友。分門講論。各遇有改革政令或須採用西法者。均可逗返派司員以己意赴院討論。該洋員爲教習之事。初不必任教習之職。受顧問之實。並不居顧問之

名。其一、請嗣後外務部司員各缺。由出使各國大臣所屬參贊隨譯各員中精選久在外洋者保送外務部考察充補。如慮不敷、暫准由沿江沿海各督撫精選曾經出洋之員或游學生一體保選。額缺之外。作為候補。其使館參隨各員缺、由外務部精選品端學優能通洋文之司員前往充補。如慮不敷、暫准由翰林部屬府廳州縣通洋文願出洋者考察選派。概不准以洋務隔膜之人濫與其選。至使館參隨等員、宜改實缺、久於其任。概不准出使大臣隨意攜帶並無故調換。使臣受代、所屬各員仍照舊供職。仿各國通例立限給假休息。假滿復充、依次遞升。〔河南泌陽匪徒鬧教、派兵出境防蹙。三月。中俄會訂交收東三省條約成。〔前所力爭者皆測。未盡押之先、密送英日兩使閱看。亦無異說。七月、商定交還山海關鐵路條款。自山海關至新兵營營口鐵路一律交還。〕拒法德商人請包辦中國煙膏。〔法德商人請不論洋藥土藥、概由商人熬膏發賣。獲利均分。謂每年中國可得兩千餘萬。足敷賠款。慮其深入腹地擾民滋事。不許。〕聘日本鑄方德藏為幕僚。〔不令人署辦事。備顧問而已。時湖北議設仕學院。擬聘丁曉良為講友。又擬聘傅蘭雅為學堂總教習。傅蘭雅所望奢。未用。用丁曉良。設濟美學堂以教官員子弟。令兼總教習。〕日本駐上海總領事小田切萬壽之助來。〔建議官熬煙膏、可籌巨餉。東三省官滿漢兼用。中日合辦銀行。又請合辦招商局。勸中國許米穀出洋。〕商約大臣奏准減茶葉出口稅。〔向章每百斤徵二兩五錢。是時出口銳減。每百斤價最低者不及二十兩。商約大臣奏請按時價值百抽五減為八錢。外戶兩部議覆奏准。江漢關稅收驟減七十萬。公請戶部撥補、得覆核明再議。〕遵旨裁屯衛官。〔令司道籌議、久不復、因商漕帥、飭湘鄂兩省十一衛即日交卸、以地畝錢糧移交坐落之地方官清辦。〕四月。行用銀元票。〔在日本印刷。發官錢局行用。各屬有於票面鈐印者禁止之。〕議商約加稅免釐各款。〔商約開議數月。所討論者皆小節、至此乃及免釐加稅。商約大臣擬開條款、凡進口洋貨、按值百抽五及子口半稅概加一倍。為值百抽十五、納稅後無論運赴何處、一切稅釐捐款、概不徵收。其出口土貨完值百抽五及子口半稅後、無論經過何處、亦概不徵收。惟土貨行銷內地者、裁免釐捐、在銷場處徵稅。公謂產地稅地方稅營業稅印花稅均未言明准收、不可不慮。進口稅不必過爭、加至

十二五即可。惟估價宜確實可信。又、嗎啡宜抽極重之稅。凡稅款宜於進口及銷售兩處各半交納、以防偏重。土貨出口稅不可加、釐自不能留、惟土貨不銷外洋者、無論產地銷場、均應收稅。又常關不宜裁、并應添設。鐵路日多、如何徵稅、亦應預議。劉忠誠所見略有異同。英使執初意甚堅。惟允營業鋪戶印花菸酒各稅及別項理財之法、聽中國自辦。但離開貨字而已。議商約內地雜居事。英使請准英人無論何處均可買地租地、居住貿易、安機製造。以中國已准洋人築路開鑿為詞。江鄂及商約大臣均力駁之。拒法比兩國索租毗連鐵路之地。〔比人於漢口購鐵路兩旁之地、請闢為租界。告以須距路三十丈、距站六十丈、方可通融。法領事亦屢請展界、許其距鐵路六十丈而止、法比兩使向外務部要案、請勿許。〕改兩湖書院為兩湖大學堂。自強學堂為文普通中學堂。〔西湖經心江漢三書院肄業生合校等差、分入大學中學。〕武備學堂防營將弁學堂為武高等學堂。設武普通中學堂。〔暫就江漢書院開辦。〕創建師範學堂。〔暫借安徽會館開辦。〕高等普通小學堂。〔凡五所、分中東西南北五路。為各州縣設小學之標準。〕移農務學堂於武勝門外。〔令與試驗場相近。〕於工藝學堂添設工廠。復設方言學堂。〔以自強學堂學生移入。重定章程、分別去留。〕改經心書院為勤成學堂。〔以教文優年長之生員不能入他校者。〕設仕學院。〔令各官講求中西政治。〕設全省學務處。〔專設辦公之所。〕奉頒賞平定粵匪擒匪回匪方略各一部。五月。創辦湖北省城警察。〔先練警軍五百八十人。雇清道夫二百二人。以上海捕頭英人珀薩斯為總目。酌采外國章程試辦。俟有成效、推廣於口岸繁盛之區。經費取之房租。衙署學堂皆繳捐為商民倡。〕論和約賠款宜照約用銀。〔辛丑和約載賠款計算之數、有用金用銀兩種。是時金價漲。各國必欲用金。公令爛洋文者研求文義、不能得用金不用銀之確解。因電致樞部南北洋商約大臣反覆申論。并會電駐各國欽使切商外部。美允用銀。英擬勸各國允前八年還銀、不須補足。日本以政府為難謝。六月、與劉忠誠電致伍欽使再請美外部商勸各國全款還銀。公電致駐京德使、請勿讓英美獨專義舉。〕派師範學生三十人警察弁自二十人赴日本學習。拒德商在漢口華界安設炮船。在漢提督劉維楨報効與學鉅款。奏請特獎。〔維楨、黃岡人。累捐鉅款、前

後凡數十萬、爲辦理要政善舉之需。及是又捐十萬兩。六月。商約大臣及英使馬凱來。議商約久不決。馬凱以主議加稅爲洋商所詆。欲罷議歸國。商約大臣邀赴江鄂籌商。奉旨、加稅止倍半、僅留銷場稅一項、與所免釐捐大宗、究竟能否抵補。財政出入關繫太鉅、切勿輕於定議。不得以馬凱回國之言爲所搖奪。著該督等會同詳慎妥議。五月杪。商約大臣及馬凱至江甯。馬凱欲盡裁鹽卡土卡。留常關祇徵一稅。最後議定查驗鹽務之所而避鹽卡之名。會忠誠疾作。餘事不及議。六月初四日。抵武昌、會議累日。所駁正爭回者九條。其尤要者、常關照舊。並允酌添。仍留土藥稅卡。華商銷場稅無論口岸內地、但係租界之外皆可抽收。洋商祇在通商口岸用機器製造。新開長沙等口岸不設租界。洋人居此者、須守中國章程。添改者三條。一、禁嗎啡進口。一、中國整頓律例及審斷一切事宜皆臻妥善、英國即允棄其治外法權。一、派員會議民教永遠相安辦法。馬凱固請而議定權操自我者一條。曰中國自訂鑛務章程、招致外洋賞財辦理。馬凱語人曰。非本國素仰劉張聲望、必不敢事事相讓若此。議既定。會奏請速核准。以防中變。奉旨恐尙有侵我利權之處、流弊不可不防。著悉心籌慮、倘有後患、惟該大臣等是問。十八日。商約大臣及英使再赴江甯。旋至上海。二十二日。奉旨兼充督辦商務大臣。二十三日。奉旨嗣後續議商約即赴湖北省會議。樞廷初意欲公赴滬。公電覆云、各國議員來鄂。則彼急我閒。操縱較易。若赴滬則彼閒我急。不得勢矣。故有此旨。時美國日本已派使、請仍在上海會議。他國所派議員均在上海、亦不願赴武昌。嗣外務部奏准仍在滬議。如關係緊要、或定議時再赴武昌。二十六日。恭逢皇帝萬壽。筵燕駐漢各國領事官員。席間奏曲、自撰樂章。後聞人言、曾惠敏使英時、擬國樂數章、可協西樂音律、咨送總署南北洋有案。因請南北洋錄寄。七月初六日、英王加冕、公電致駐英張欽使代賀。七月。議修改內港行船章程。此商約之附約、在鄂議而未決。其大旨以光緒二十四年總署定章允准有案、又各舊約有城邑城口城鎮等字樣、英使就此推廣解釋。公與議限界址、限租期。又告以船章應由總稅務司酌定。及電達劉忠誠、得覆逐層辯析。謂定章祇準由口岸至內地。由內地至口岸。並非由此內地至彼內地。外務部與英使辯論。亦釋城邑作通商口岸。遂議定

章程、凡內地尚未行輪而欲行輪者。須先由商務大臣會同督撫體察情形、迅速批准、方可漸次行駛。非奉中國允准、不得由此不通商口岸之內地、至彼不通商口岸之內地專行往來。並不准自建棧房。拖船拖戶應歸華民充當。及不得妨礙中國管轄之權。華商設公司。准洋商附股。惟不得挂洋旗。按馬凱自鄂回滬、所議華洋合股稅銀平包等事、節目不一。而內港行船最要。江鄂討論亦最詳。非獨限制英商、兼防他國於內港行船到處通商。故預爲之地。總稅務司議添內港行船須免費代運郵件一條。馬凱不允。又馬凱在鄂時、公與議定洋人在租界外須守中國章程。華人在租界內須納中國稅捐。及抵滬、爲英工部局力阻而罷。馬凱自以不容於英商。定期啓程、我恐英易人再議、所損尤多。遂定議。會奏中英商約定議。奉旨既據該督等稱歷經妥酌定議。即著呂海寰儘宣懷就近畫押。仍將各條與劉坤一張之洞詳核辦理。一切務臻妥善。儻有後患。惟該督等是問。〔約文定議後、又及附件、一、聲明納稅可用國幣銀元。仍按市價折算開平銀。一、聲明所加之稅以之抵補裁釐及現已抵押洋債之本息。不得移作別用、抵押新債。此款即留存海關抵解。不由戶部轉撥。奉旨、撥補係我內政、何以要求及此。飭再妥酌。公與劉忠誠奏言、當時因加稅遲就。業已奏明、似難翻異。及畫押、馬凱又請閣撥補釐金諭旨。此亦奏請在前。二十六日。奉上諭、各省局卡一律裁撤。不再抽收釐金。至各省應解應留經費、將來免釐之後。應將加稅進款如何撥補之處。著戶部咨行各省預先籌畫、俟開辦後即奏請遵辦。馬凱見旨、嫌字義不足。不肯畫押。二十九日、奉旨仍著責成劉坤一張之洞妥酌。如果別無用意。確無流弊。即照所請。〕八月。設銅幣局。〔銅元行銷漸廣。乃別設一局。以原有鑄錢局改。知府高松如辦官錢局有效。委兼銅幣局提調。〕奏請明旨處分辰州教案保護不力之文武各官。〔是年夏、湖南辰州匪毀英國教堂。斃教士二人。湘撫奏參保護不力之知縣陳禧年都司劉良儒等、未奉明旨。英諸重懲巡撫。公奏言非巡撫咎。請速處分營縣。免起波瀾。有旨照行。嗣德國因此案疑中英有密約。令其駐使來電知會。願與英法日本等國同撤上海庚子駐軍。惟中國應聲明不以長江一帶政治軍事海防之權或他項權利專與一國。公允後答覆、聲明無論何地權利、皆不讓人。外務部答覆亦同。〕初四日。中英續訂通

商行船條約成。〔未盡押之前、俄使在外務部指撻洋員監察常關鹽土卡一條有妨中國主權。旨令通籌妥酌、作速商辦。公奏言洋員僅查弊、其抽收增減之權仍在華官。惟海關專用洋員。實不公平。請乘此飭總稅務司選中國人學習、便將來參用。〕開議中日商約。〔日本以日置益小田切萬壽之助爲議約專使。五月中即開送約款、以專意莫約、未及詳譯、至是擬以英約爲主、凡英約所有者均應照辦。不能絲毫有異。英索而我未允者、不稍遷就。而日本所開條款、如添開京師爲通商口岸、保護版權、畫一度量權衡等、皆英約所未有。我亦開數款抵制、一、華人在日本應享受相待最優國利益。一、擊交重罪入犯。一、查禁書報在日本出版而有礙邦交感民助匪者。〕開議中美商約。〔英約定後、美使康格古訥希孟等開送約款四十條。前二十七條均舊約所有。僅改字句。後二條爲立約應有之款。惟第二十八條至三十八條爲新增、而不及加稅免釐。聲明隨後再議。因先就新增者往返電商。各條之中、先議約束教民保護版權二事。原文案洋文版權華人不准翻印。與日約原文同。時議皆謂與中國興學有礙。公亦謂不可許。〕建鐘樓於黃鶴樓舊址。〔附設占驗風雨之所。此鄂撫創議。公任內未及興工。〕九月。劉忠誠公卒。〔聞耗驚痛、電唁其後人、他日碑銘墓志、願任其一。〕初六日。奉上諭、兩江總督著張之洞署理、迅速赴任。十七日。查勘鐵路自漢口至信陽。十八日回省。〔漢口至信陽、以夏間通車。至是親往查勘。山鄉瘠壤、氣象頓旺。回車至漢口。查勘法德新拓租界及比日兩國現議未定之界。〕今日商遷移漢口龍王廟舊船。〔龍王廟在租界之上、爲江漢二水交匯之所。日本租界未定時。暫准設躉船於此。及界定而船不移。促之不應。公隨任在卽。又飭關道促之。〕二十一日。校閱各勇營操練行軍。〔調集護軍、武建、武愷、武防、工防各營。於東瀨門外操練。各學堂學生從。先一日查閱各軍隊伍器械衣裝。冒雨行視。武備學堂有荊州駐防旗兵七十二人、以春間來省學習礮法。至是親往校閱。造回轉相傳習。時荊州將軍已選練新軍五百人。撥礮十二尊以戍一隊。〕薦舉州縣賢才四人。〔羅田知縣陳樹屏、襄陽知縣李祖蔭、署理大冶知縣蕭端澍、署理黃岡知縣寶璽。〕勸漢口各商創設商務學堂商會公所。創辦省城勸業場。建議以出使大臣伍廷芳充商約大臣。添派北洋大臣袁世凱會商商約。

〔有旨照行、時盛侍郎丁憂、伍欽使回國需時。袁督部亦請假回籍。公交卸事繁。因請呂欽使知照各國專使暫停會議。〕奏報修築省城江隄工程。〔江隄竣工已數年。有未堅者。屢經翻築。卓者益之。衝刷者補之。建開以洩內湖之水。每於出險時親往督率搶護。至是全工穩固。凡費十餘萬兩。取之賑務餘款。附郭江岸、加修石壩。設江岸局。清理隄內官民田地。凡洩出數十萬畝。在通商場以內者三萬餘畝。借華洋商款收買、凡地價銀二十三萬餘兩。定議俟粵漢鐵路開通。許華洋商備價承領、以贏利通商場各項工程。〕奏保者儒萬斛泉前御史吳兆泰。奏保經濟特科人才。〔選湖北人士、得已服官者六人、以訓導楊守敬爲首。肄業學堂者十八。以舉人劉邦驥爲首。〕十月。奏明籌定湖北文武實業各學堂規模。次第興辦。〔曰師範學、曰小學、曰文武普通中學、曰文武高等學、曰方言學、曰農學、曰工學、曰勤成學堂、曰仕學院、曰省外中小學、曰蒙學、曰學務處、曰學堂經費、以上爲學堂辦法。曰小學爲急、曰日課專加讀經溫經時刻、曰教科書宜懷、曰學堂規則必宜合法、曰文武相資、曰教員不遷就、曰求實效、曰防流弊、以上爲學堂要指。〕奏陳湖北常備續備軍營制節章。並擬籌將來量力增減辦法。〔是時省城有護軍左右兩旗、步隊八營、馬隊一營、砲隊一營、工程隊一營、武建軍左右兩旗、步隊八營、武愷軍武防軍護軍鐵路營步隊各四營、共員弁兵夫九千五百餘員名。月餉五萬七千二百五十餘兩。除護軍左旗調赴江南及護軍鐵路營擇要分駐外。皆駐武昌、編作常備軍左右兩翼。酌仿日本陸軍師團兵制。可以量力增減。此外漢防漢靖工防沙防宜防戡防岳防等營、分駐省外、巡緝彈壓、爲續備軍。其練兵要義、曰兵須有一半識字。曰人人皆習體操、曰人人操砲、曰馬隊不設馬夫、曰營房力求整潔、曰器械資裝隨身具備、曰待兵以禮、曰統帶營哨官親自教操、不用教習、曰不許穿長衣、曰閱操時不許坐看、以上爲現行之法。曰以後募兵寓徵兵之法、曰鼓勵更番退伍之兵、以上爲將來擬辦之事。〕奏陳湖北分年裁減營制法。以節餉充警察軍經費。〔迭次奉旨裁撤綠營、而各省自湖北山東外、均裁未及半。公奏言此兵非戰守不足恃、即巡警亦不可用。請自光緒二十九年、分十年裁盡。其已經挑練之軍、分二十年裁盡。各營營缺將弁、官著戰功者、優予升銜。量給恩俸終身。年

力尙強者、留省委派他項差使。文理通順者、降補文職。」初一日。交卸篆務。初二日。乘楚材輪船啓行。

易順鼎送抱冰師入覲詩序。光緒己亥冬十一月二十三日、鼎以道員召見、奏言皇太后春秋高矣。皇上聖學無人輔導、聖躬無人調護、敬舉吾師鄂督張公、學問幹濟公忠並當代第一、謚召入備顧問。於聖學聖躬皆有益。將來皇太后亦可放心、語畢、天顏均甚和、聞慈聖稱公人極正派、但恐事繁不能離鄂耳。比樞臣入對。慈聖卽述鼎奏、將召公、樞臣或尼之、不果。甫半月、遂有立儲之舉。至次年五月、遂有拳匪之變矣。

戊戌入覲、以沙市有交涉之案、中道折回。知其事者。謂翁文恭實尼之。然當時朝局、措手正自匪易。而江湖伏莽、隨時竊發。非重臣坐鎮其間。一旦有事。且潰決而不可收拾。故戊戌以後。中外交推。謂宜入參樞密、而公以爲不可。戊戌七月。袁忠節入覲。聞其將以入對時請旨內召。亟電止之。謂才具不勝、性情不宜、精神不支。庚子六月、李文忠自粵抵滬、有到京後引入要地之說。公致電自述病狀、請罷此言。旣而日本亦有此語、公電致李木齋欽使、言長江大局所關、無益有損。及鹿文瑞入樞府、又致電言之。謂此時一離鄂、兩湖必亂。乃實在情形也。

戊戌十二月得京訊、十六十七兩日、皇太后召見薄字輩幼童十餘人。此立儲以前事也。立儲事蓋醞釀一年而始決。此一年間、惟責各省以練兵籌餉、辦團禦侮、未嘗以密事問鄂。惜陰堂筆記言此事甚詳。附錄於後。戊戌以後。太后欲行廢立甚急。己亥、合肥在大學士任、一日法使往訪、詢果有此事否。外國視一國君主無端廢立。決難承認。午後榮祿往訪、傳太后意旨、欲探外使口氣。合肥卽以是農法使言述之。合肥知都下不可居。謀出外。旋督兩廣。同時榮祿密電江督、探新甯口氣。劉覆電謂君臣之義已定。中外之口難防。李旣不能助、劉又有違言。事卽難舉。不得已而先立大阿哥。榮祿祇探兩人者、因湘淮軍僅存之碩果、不無顧慮。而先探其意。此外驛吏。蓋可置之、榮祿早年爲清流彈劾混職。妾者卽係候官。榮祿

容日、雖經薦薦、終未起用。南皮清流領袖、榮素不與通函電、亦在可證之列。傳言同有電詢。非悉當年情事者也。按戊戌七月、盛京堂自京來電、述榮語、謂素來佩服、擬先通函。公未即答。至庚子四月、始有寄問往還。見於本集。語似推重而實凌虛。廢立大事。豈有素未謀面、并未通函而密詢及此者。惜陰之言可信。

庚子黨人之獄。深惜諸人有絕特之才、而見解涉於偏宕、繩之以法、終濟之以寬。唐才常之弟幽禁獄中、將處死矣。公謂兄弟駢誅、實有不忍。王慕陶牽連被逮、其弟爲之陳情、立命省釋。田吳焯虛靜遠吳祿貞諸人游學日本、初聞其議論激烈、商之日本、欲除學籍。及畢業歸國、乃深器之、吳焯以經濟特科薦。靜遠置諸幕下、祿貞且駿發大用。其委曲成就如是。



# 卷八

初六日。行抵江寧。(以鍾山書院爲行館。書院方改修學堂。未竣工。命遷治之。不嫌簡素。)弔劉忠誠公之喪。初九日。接署兩江總督事務。循例兼署兩淮鹽政欽差通商大臣事務。初十日。恭逢皇太后萬壽。譚各國領事等宮於水師學堂。(湖北循上年例舉行。江南不可缺。先期命滬道派人來省備辦。)奏進改修兩淮鹽法志。(兩淮鹽法志。自嘉慶十四年後。久未纂修。光緒十五年。曾忠襄督兩江。設局編輯。十八年書成。十九年。劉忠誠以書進呈。下戶部詳細覆勘。分訂正補輯覈簽商四類)逐條指出。凡一千三百餘條。而原纂之員物故星散。忠誠發交運使江人鏡照改。是秋蒞事。仍分一百六十卷。公到任。具摺進呈。請留南漕十萬石於明年春北運。(是夏。江南旱。劉忠誠撥蘇漕十五萬石平糶。秋收米貴。辦漕州縣督賠累。故有此奏。十一月。電致鹿文端及倉場劉侍郎論南漕之害。請全解折色。)日本撤上海之師。(庚子駐軍也。英法德兵亦退。)直隸總督袁督都來。(督都回籍營葬。事畢。由汴過漢。赴滬北上。二十八日。道出下關。登岸。公請稍留。不得。設筵款待。不終席而行。至江干挽留不及。)十一月。延江蘇士紳會議學務。(未至而回任之命下。遂罷。)論江北不宜添設巡撫。(時有議裁漕運總督設江北巡撫者。公電致鹿文端論別設一省之不可。)初九日。奉旨回湖廣總督本任。裁南洋舊式兵船運船蚊子船。造長江淺水兵船。(南洋兵船五。曰寰泰、鏡清、南瑞、南琛、保民。運船三。曰威靖、登瀛洲、鈞和。蚊子船四。曰龍蟻、虎威、飛蓬、策電。皆陳舊不適於用。除寰泰鏡清威靖登瀛洲四船外。皆裁停。并裁統領一員。節存薪餉。修理諸費。以造新式淺水快船四艘。聞漢口英兵船專用於長江。令魏瀚登舟考察。派遣員黎錦棠辦水師學堂。并命先赴日本考察海軍各學校。嗣向閩廠及英德諸國考詢價值。并屬日本川崎造船廠派人來商。聲明與兩國外交無涉。十二月。先以造船事奏明立案。明年三月。英川崎訂合同入奏。旨下魏士瀛覆核妥辦。嗣覆奏實於江防有益。先訂造第一期船。俟船成按驗無訛。

再照議特造三船。按造船摺原稿已佚。故本集不載。又長江水師需用舊式槍礮。命全發後膛槍。籌自濬黃浦江。辛丑和約。北河黃浦水路均應改善。中國國家撥款補助。北河即天津海河。各國先派員與工。天津收回後。派員會辦庚子之事。滬異於津。劉心誠議自認濬浦經費。杜各國干預。公抵任以事出英人主議。法德忌災。就此設法挽救。明年正月。外務部奏准。照約與工。公中自認全費自設濬浦之議。奉旨所陳不為無見。著外務部切實妥商。三十一年八月。外務部與各使改訂濬浦條款。如公所議。奉諭。電務商辦窒礙。著袁世凱張之洞迅將中國所有電線核實估計。奏請籌撥款項。發還商股。即將各電局悉數收回。聽候另派大員認真經理。此袁意也。過寧時言之。公意如防官報遲延。不如附挂官線。袁過滬。以公意語盛。有難色。請逕由官收回。詢其值。二百四十五萬。袁入都。遽請降旨。并請會同估計。公未知原委。電商變通之法。得覆。已籌訂的款。浮議無足聽。十二月。有旨改歸官辦。派袁世凱為督辦大臣。直隸布政使吳重熹開缺為駐滬會辦大臣。其原有商股不願領回者。准照舊合股。奉諭。北洋湖北訓練新軍。頗具規模。自應逐漸推廣。河南山東山西各省。著選派將弁頭目赴湖北學習操練。練成後發回各原省。令其管帶新兵。認真訓練。其詳細章程。著袁世凱張之洞妥議會奏。與北洋往返電商。由北洋擬定訓練將弁章程會奏。其略曰。伏維練兵之道。設將為先。教將之方。勸學為重。方今外洋各國。講求兵事。月異日新。水師陸師學堂林立。自將領以逮隊目。無不出於學。自內堂功課以逮外場技藝。無事而不受諸學。而又因時損益。擇善而從。雖以歐亞異洲。東西異域。往往互相師法。棄短用長。故其營制操軌。大率不相上下。卒得以鈞均方敵。競勝稱雄。中國非無可用之兵也。患在無將。亦非無忠勇之將也。患在不學。近年以來。創痛屢膺。情勢大絀。疊奉詔書。撥餉武備。然其效不著者。良由各省兵制不一。軍律不齊。餉械則此省與彼省不同。操法則此軍與彼軍又不同。故外國當無事之時。可以調全國之軍隊聚集一處而合操之。而攻伐軍式悉泯參差。中國不能也。有事之時。可以聯數國之師徒。任舉一人以統率之。而操縱指麾。無不如志。中國不能也。平居而聲息不相通。應調而指臂不相使。臨敵而勝敗不相顧。如此雖歲糜鉅餉。廣募勁卒。將安用

之。今者恭奉諭旨，飭令各省挑選將員赴北洋湖北學習操練。並諄諄焉以分岐爲戒，以一律相期。此誠經武之要圖，整軍之計也。惟是兵事精深，各國視爲身心性命之學。斷非中國一蹴可幾。如欲與之並駕齊驅，必須層累遞進，非十數年不能奏效。然而時艱方殷，勢難久待。今爲速成將才起見，宜先求武備切實學問。俾各省將目人人易於通曉，易於傳習。庶平日操法可期畫一。卽一旦遇有徵調，亦不難互相援助，共赴機宜。現由臣等擬定訓練簡易章程。敬繕清單，祇呈御覽。俟命下之日，卽當咨行各省切實遵行。所有應須建造學堂堂房經費，及延用教習薪餉等項，由臣等隨時察看，分別估計。咨商各省協款興辦。至於武備精深學問，另有專門。仍由臣等一面認真整頓武備學堂，依次推行各省，以期廣儲國家子城之選。疏入，旨如所請。按章程凡十七條，其大指分設學堂學營，將弁入學堂，教以戰法擊法軍制軍器圖算等項，並隨時演習。兵目編營操練，教以步馬礮工各操及淺近兵學圖算諸法。務在課程簡易，期於速成。各省選送學額，大省將弁四十名，兵目二百名。中省四之三，小省半之。第一期一年畢業，送回本省，續選遣送。第二期兩年畢業，北洋湖北應互相討論，參合中外，另訂畫一操法，名曰中國操典。先是上年四月，北洋來電云，我輩訂兵制，宜由全國一律入手。我輩實力照辦。立以準則。數年後都中設部，再求畫一云云。然北洋餉裕而才多。湖北反是。故警制詭難一律。此事未實行。請安定東三省稅門任用俄員章程。俄人議撤兵事，要求收回俄人，不受總稅務司節制。公電奏請乘此與議定或中國與各國人兼用。或中俄兼用。安定章程。爲將來收回總稅務司職權之地。考驗製造局快礮。礮十二尊，解省備運廣西。公親蒞考。製不如法，發回改造。籌辦京師正陽門工程經費。庚子之役。正陽門城濬被焚。至是奉旨命袁世凱陳慶修，需銀五十萬兩。分派各省。寧蘇合解八萬兩。二十五日。考試水師練熟畢業學生。江蘇各學堂學生畢業。大吏向不蒞考。是日新任江蘇將軍抵下關，公率文武出迎。因登舟考試。以功課生疏，不准畢業。明年二月，奉參管帶震泰兵船之奏將何心用，請旨革職。設兩江學新處。十二月。議定滬寧鐵路借款合同。盛侍郎丁憂後，公奏請仍責成滬甯鐵路總公司。十一月，奉旨各處開辦鐵路，開辦五大。盛宣懷如與他國公司

議立各項合同條款。著先由各督撫核定、始可簽押。寧滬築路借英國銀公司款。議訂合同在前。侍郎遵旨屬英公司經理人璧利南來商。公增改九條。其尤要者、中國國家有款、可撥交總公司、將借款扣減、中國人民願購借票者、應照數留與華人、輪船所存借款未用者、一律生息。南洋大臣可派員稽查帳目。總工程司當尊敬地方大憲及督辦大臣。鐵路所用洋人應尊敬地方官。不准干預地方之事。有滋事或損害華人者開除。中國國家所設之商稅捐、鐵路亦一律征收。鐵路巡捕專用華人。不得干預路外之事。全路限五年竣工。逾期罰罰應得餘利。定議後侍郎具摺會奏。其略曰、光緒二十四年閏三月初四日。承准總理衙門來電、英使述其政府之意、自滬至寧鐵路。必欲令怡和承辦。勢難竣拒。飭由總公司相機籌辦。臣宣懷遂與怡和兼代匯豐之英國銀公司磋商草約二十五條。聲明設與地方窒礙、隨時改正。仍俟簽定正約、會同督撫具奏、電經總理衙門核准。於是年閏三月二十三日先將草約簽印。即派員伴護英公司瑪利孫等測勘軌道。估計工費。適英以特戰、吾以拳亂、彼此遷延、未議正約。上年七月、銀公司公舉上海領事官璧理南來議詳細合同。開議以來、磋商五六旬。易稿六七次。間有爭持未允者、臣宣懷復屬璧理南籌稿來寧、經臣之洞覆加考核。派員與之按款磋商。分別駁改增刪。幸皆妥商就範。計訂詳細合同二十五條。以粵漢美款辦法為基址。其自保權利之處。實較已定各路為尤多。璧理南電致英京。一切俱已允協。理合繕具清單。恭呈御覽。俟奉旨批准、再行簽印。疏入。下外務部議。奏准施行。委員擇勘製造局新廠地址。製造局設上海、淺露非宜。言者屢請移設內地。旨下江督籌辦。公抵署任。總辦道員毛慶番即申此議。公命道員劉錫庚潘學祖攜測繪生赴太平府一帶覓勘廠基。以遠江近河高堅平廣為主。議分年認解高麗輪船賠款。申午之役。北洋租英商高麗輪船運兵赴芳山。為日本浪速兵輪擊沈。事後英外部索償。總署謂未宣戰而開砲。責在日本。相持數年。議請駐英美使公斷。先擬章程、其先詢明浪速所為是否合理。英外部欲刪此條、而增入擊沈之故、由於華官行為所致。我力拒之。是年、英使索賠四十餘萬。危詞恫喝。外務部顧全陸誼。允以三萬三千餘鎊結案。奏由江蘇全省稅釐節省盈餘清賦等項專候部撥之款撥解二十八萬兩。公商蘇撫。謂成案無可再說。會電覆部、

分兩年認解。〕奏陳分鑄安徽鹽斤加價恤商益餉辦法。〔劉忠誠任內、奏准淮鹽加價四文。以二文歸產鹽之省。二文歸銷鹽之省。不再加價。如銷鹽省分有加於此數之外者、則此數全歸江用。忠誠卒。皖省邊接湖南例、奏請將行銷安徽之淮浙東各鹽每斤加價二文。江省原撥二文、暫免收回。湊償賠款。運使程祖洛言其失信商民。恐淮網益壞。而公道出安慶時、弼撫部已言其萬不得已。抵任後又來函言之。議改革者四事。公以兼轄省分、不能漠視。而運商銷皖岸者、皖北尤困。議北岸不加、嚴飭海州分司每年網課向紙解四分之三者、務須按年解足。則皖省可得的款四萬兩。南岸暫加兩年。由大通督銷局代收、而皖省整頓蕪湖鳳陽常關、兩年以後必有餘款。屆時或豁免二文、或收回二文、再行酌解。〕奏保經濟特科人才。〔舉大江南北人才、并平日所知者、共三十人。〕整頓淮鹽積弊。〔淮網疲弊、與程運司詳籌整頓。並親赴儀徵鹽棧考察。以登瀛洲輪船及所裁蚊船三號交運司統轄。巡緝私梟。造新式帆船十二號。配以精槍利礮。歸運司及儀棧總辦節制調遣。運司自備小輪船兩艘上下梭巡。酌裁緝私舢板以抵帆船經費。裁大通武穴湖口三卡。不派大員掣驗。責成各岸督銷局、剔積弊、嚴比較。罷總辦一年改派之例。功過歸運司考核。有效者留差奏獎。無效者停委奏參。以道員蒯光典辦儀棧緝私。方碩輔為正陽關督銷。趙有倫為下關掣驗。嗣程運司升任粵臬、奏准留任一年。前辦五河鹽釐之道員倪文英。營私舞弊。奏參降補。綱領既舉、鹽課頓旺。第一年增課釐五十萬。第二年增一百餘萬。〕蒞考江南格致書院。〔書院即公初署兩江所設之儲才學堂。劉忠誠改為江南高等學堂。己亥剛毅南來、議停辦節費。忠誠惜之。改名格致書院。仍循學堂規制。是時年終考試。公親臨閱卷。後改高等實業學堂。〕蒞考江南陸師學堂畢業學生。〔擇造詣較深者八人調赴湖北防營練習。〕委員輯譯各國礦務章程。〔中英商約既定。公會劉忠誠電請採取各國礦章、詳加參酌、妥訂章程。奉旨著悉心採譯、妥議章程、奏明請旨。至是購取歐美各國礦章、屬洋員福開森在上海輯譯。〕年終奉頒賞御書福字。皇太后御齋福字壽字松壽字。

光緒二十九年癸卯公六十七歲

正月初一日。命製造局停造雜槍小砲。〔北洋設銀行、詞毛慶春赴津、公奏派遣員鄒孝晉接辦製造局。命節費備款、備設新廠。是月。奉旨鄒孝晉發往四川辦理商務礦務。二月、派遣員趙演彥接辦。〕初八日。奏請於交卸後入京陛見。奉旨著來見。奏設三江師範學堂。〔到任之初、議大興學校。嗣以交卸在即、籌設師範學堂以立之基。仿北洋例。延日本教習十二人。選舉貢廩增出身之中國教員五十人互相講習。先練教員。預定學額九百名。江蘇省蘇蘇兩屬各二百五十名。安徽江西兩省各二百名。勘定地址於北極閣下。指銅元盈餘爲專款。蘇屬歲撥銀四萬兩。安徽江西按學額每名協助一百元。暫借公所地方開辦。是月行開學禮。名三江師範學堂。嗣改兩江師範學堂。〕十五日。赴江陰閱礮臺。十七日十八日。校閱水陸行軍操法。〔調鎮江常備三營湖北工程營二百五十八合操。北洋兵船避凍南來。商之統領薩鎮冰。與南洋兵輪會集操演。以吳淞盛字旂勇九百人供薩統領調遣。十七日、水陸遠戰。十八日、水陸決戰。以鑄方德嚴判其優劣。南洋操水陸行軍始此。江陰各礮臺自此始有電話。〕十九日。回省。〔江北隄工局於子嬰開一帶築壩挑河。工程不實。已派遣員李光瑜往查。迴舟過瓜洲口。擬親往、不果。〕籌設銅元局。〔銅元行銷甚暢。金陵銀元局鑄銅元、不敷行用。因籌款添機設廠加鑄。〕京察考績。奉上諭。湖廣總督張之洞盡心規畫。勞怨不辭。著交部議敘。二月。覆奏查明故督臣劉坤一戰功政績。請宣付史館立傳。初三日。校閱工程礮廠。〔即湖北調來者。〕袁督部會公奏請變通科舉、分科遞減。〔此議發於北洋。擬摺稿電商。公覆電云。請詳盡透達、添佩宏裁。請電商各省、有同志者附入。總須多有數省爲佳。即由尊處掣銜繕發。按此摺川督鄂督東撫皆列銜。文見東華彙錄。其大旨謂仿乾隆時裁減中額之法。俟萬壽恩科舉行後。將考試取中之額按年遞減。學政歲科試分兩科減盡。鄉會試分三科減盡。即以科場遞減之額移作學堂、取中之額。至舊日舉貢生員三十歲以下者、令入學堂。三十至五十可入仕學師範速成兩途。其五十至六十、與三十以上不

能入速成科者。寬籌出路。如再科大挑、或揀發一次、或歲買倍培其額。或多挑陰錄、令其入館可得議敘。或舉人比照孝廉方正、生員比照已滿吏、准其考職。三年一次。六十以上者酌給職銜。疏入、下政務處會同禮部妥議具奏。〔行官錢票。設裕寧裕蘇官銀錢局。蘇州銅元局。〕江寧藩司議設官銀錢局。在日本精印銀元票官錢票。每票銀一元錢一千文。准納丁漕釐課。隨時兌現。公謂大利須寧蘇共之。商之蘇撫、各設一局。並創設銅元局於蘇州。以資蘇局改。寧蘇互相兌用。會摺入奏。時部章限制各省添設銀元局、不限制銅元、疏入允行。〔派水陸師學生分赴英德肄業。〕水師學生八人、赴英國分習管輪駕駛。經費於通州紗廠官本生息項下支撥。陸師學生八人、赴德國分習步騎礮工。經費由藩庫支撥。〔薦舉廉能任事之員。〕光緒等八人。奏請移江南製造局於內地。分設新廠。預籌辦法。〔製造局創自同治之初。歷年擴充槍機、新舊雜用。日祇出槍七枝。礮機亦去備。其經費合之造船造藥譯書等項、歲須一百四十餘萬。自常年專款二十萬兩外、餘皆資之江海關二成洋稅。公議將各項械彈停造減造。裁冗員雜費。歲省一百萬。擇定宣城縣濶泚鎮之啓發山籌建新廠。預計購新式槍彈機器、日能造槍一百七十枝、彈十萬顆者、需銀二百四五十萬。礮機造藥器就可有著添配。歲能造七生半快礮二百尊。十五生十二生礮礮共十尊。彈藥足用、需五六十萬。此外附屬之機器及一切工程地價遷移等費、約一百五十萬。期以五年工成。罐鋼用鄂廠所製。不設新廠。煤取之宣城煤礦。改滬局爲商廠。造船煉鋼。製各項機器以供銷售。餘屋賃與華商。工匠於五年之內派赴外洋學習。新廠既成以後。快槍口徑全省改歸一律。〕奏定招商局承運漕米新章。〔江蘇漕米向由商人代州縣包辦。囤積屏奇、招商局員與之結合。於州縣自辦者、收充挑剔。州縣因之賠累。言路劾奏及於盛宣懷江海關道。公奉旨澈查。禁設包辦公司。懲辦圖利之人。以後責成糧道收漕驗米。招商局祇准承運、不預驗收。〕奏定運米出口封禁開禁辦法。〔米價日貴。詔禁出洋。公推究原因。既禁奸商囤積。又奏定章程。改出口米照六月之限爲二十一日、逾限作廢。改江海道運米紅函爲三聯印照、鈐管撫關防。視米價貴賤以爲禁否。定出口之數、上海年限一百萬石。鎮江限二百萬石。鹽城阜寧共限一百萬石。於吳淞及江北各海口設局

稽查。革紅匯願規。凡運米出口者，每石就米行收捐一錢爲備荒經費。二十二日。交卸案務。二十三日。乘楚材輪船啓行。〔海道春令多風。故由漢口北上。江行連日風雨。二十六日至九江。輪柁柯巽屨中丞來晤。二十九日至黃州。稍憩。〕三月初一日。至武昌。〔在江寧時。手足患濕瘡。抵武昌。休息醫治。並料理一切。〕二十七日。渡江。二十八日。由鐵路北上。是日。宿信陽。四月初一日。至確山之駐馬店。〔鐵路南段工程止此。〕初二日。易驛車行。初三日。至郟城。初七日。至滎澤。初八日。渡河。〔濕疾少瘳。〕初十日。至衛輝。十三日。至彰德。〔是日會試榜發。屬電局報新貢士姓名。〕十五日。至順德。〔初擬自衛輝之道口乘舟至天津。以水淺行遲。雇長車自確山至順德。凡十八站一千二百二十里。〕十七日。乘火車行。〔保定。十八日。觀兵操。十九日。觀學堂。〕袁督部所約也。爲備行館。供張甚具。二十日。行抵京師。〔自登程後。途中得津滬電報。言東三省與美國商約事。隨時覆之。渡河而北。聞津省徵銀州縣改革徵錢。孟密溫三縣民困之生事。電詢張岑兩撫部措置情形。備入對時垂問。至京。寓居下斜街謙輔先賢祠。〕二十二日。頤和園宮門請安。召見。〔入對恭紀詩自注。慈聖面諭之言。損損誠懇。過於禹湯。聞者慚惶無地。〕二十三日。奉旨。在紫禁城內騎馬。二十四日。請恩。召見。皇太后賜御筆青松紫芝畫扇。二十五日。召見。奉旨。各國賠款。或應還金。或應還銀。與外務部妥商辦法。又奉旨。在兩池門內騎馬。〔連日拜內饌之賜。〕二十六日。請恩。與外務部商賠款還債事。〔此事自上年五月內外合力辯論。十二月。屆第一年未次付款之期。我以銀覈算。各使聯銜照會外務部。謂中國違背責任。各國銀行按磅價索補銀三百六十萬兩。公請外務部堅持。部意允還金而就關稅設策。照定約時磅價。一兩合三先令。關稅按金鎊時價繳納。然事未易商。接約中國應將賠款全數出具保票。以後分保票之數爲零票。由中國特派之官員簽押。時各國索票甚急。公遣委員梁敦彥辜鴻銘生詢之各使。意見不一。公謂至不得已時。宜付荷蘭公會評斷。以關稅用金抵制之。〕五月十三日。召見。〔是日。外務部遞封奏二件。其一議覆滬寧鐵路借款合同。〕十七日。奉旨。各國商約著即在京會議。送盛侍郎於豐臺。〔侍郎初以鐵路事。留保定。在

京議約之旨下、侍郎來京、與日使約、議有日矣。忽以疾告。即日南行。公以一人智慮難周。留之同議。不可。自至車站挽留、又不可。乃同車至豐臺。於車中商榷大概。約旬餘即北來、既而不果。」電致商約大臣續談中美商約。〔美約停議者四閱月。三月初、美使撤回前案。別開送十七款。公於北上途中、電滬逐條辯論。有必爭者、有不必入約者、有慮補救抵制者。而滬議大體已定。公所慮者多及之。美使不允再議。更不允移京會議。京滬往反電商、所議者惟酌留常關限制專利牌照諸條而已。萬壽山無電線、外務部以公言始設電報分機、以便議事。〕閏五月。管學大臣張百熙等奏請添派重臣會商學務。〔原奏略曰。今日因乏才而謀興學。因興學而防流弊。操縱之間、倍難措手。上年因編輯課本。經臣百熙於開辦譯書局摺內聲明、與湖廣督臣張之洞商定會辦之法。學堂為當今第一要務。張之洞為當今第一通曉學務之人。此中利弊、閱歷最深。臣等竊願今日多一分考求、即將來學術人才多一分裨益。在前函電往還、商榷多次。近日該督臣展觀入都、臣等復請其來堂考察。該督指示繁要、竟日不倦。教習生徒同深悅服。臣等猶恐該督或以事非專責、容有稍存謙抑、言之不盡之處。聞商約詳改均有旨飭該督商辦。學堂尤政務中之大端、所關更重。伏懇特派該督會同商辦京師大學堂事宜。一切章程、詳加釐定。嗣後有應行修改之處。由臣等隨時咨行該督會商具奏。〕奉旨京師大學堂為學術人心根本、關係重要。即派張之洞會同張百熙榮慶將現辦大學堂章程一切事宜再行切實商訂。並將各省學堂章程一律釐定、詳悉具奏。務期推行無弊。造就通才。〔以長椿寺為辦公之所。延致通才。分門擬訂。其學務綱要經學各門、及各學堂中國文學課程。則公手定。〕續議中日商約。〔是年春、在滬會議。日使言關稅決不能加至十二五。並欲將進口之煤炭棉紗及一切棉貨概不加稅、索開口岸九處。口岸城鎮任便居住。我皆拒之。會議數月。僅商妥川江設纜、內港行輪。中日商民合股經營、保護商牌、版權諸款。日使請就此簽押定議、商約大臣不允。及尋旨在京會議、日本駐使內田康哉請祇議北京開埠加稅免釐米穀出口三條、餘在滬議。外務部以不能兩處分議答之。日使訂晤、商此三事。公案加稅、拒運米、以撤護館兵抵制北京開埠。〕十五日。禮部奏請欽派經濟特科閣卷大臣。奉旨、派裕德張英麟

徐會灃、張之洞、張仁黼、戴鴻慈、熙瑛、李昭煒。〔中外臣工保薦者三百七十餘人。報到者一百二十二。是月，新進士試畢，軍機大臣奏請就現在人數傳集考試。第一場試論一篇，策一道。第二場同，正場錄取者，再行覆試。〕十六日。保和殿考試經濟特科保薦人員。十九日。閱卷大臣覆命。召公入見。〔入對者惟公一人，賜宴御前，內監行酒，宴畢，賜乘轎游山。〕二十日。上諭。考試經濟特科取列一等梁士詒等四十八名。二等桂培等七十九名。〔一等梁士詒、楊度、李熙、張一塵、宋育仁、陳會壽、陸懋勳、李筠齋、張通謨、秦樹聲、王季烈、馮巽占、尹彥猷、魏家驊、熊元鐸、趙錄績、連文激、孫傲、劉邦驥、楊道霖、胡玉緝、華世芳、吳烈、陳問咸、吳廷錫、羅懋燾、陳驥、顧祖彭、楊毓輝、許寶衡、俞陞雲、方燕庚、何寶濬、徐沅、陶炯照、成本瑛、丁昌燕、羅良鑑、張祖廉、蔡鎮藩、許岳鍾、鄧邦述、章鈺、張孝謙、單鎮、王鏞、趙寬、陳宗彝。二等桂培、端緒、劉炳堃、沈瑞麟、饒叔光、胡鈞、袁嘉穀、朱孫蕪、饒麟書、曾文玉、李鍾豫、劉璣、劉敦謹、陳兆奎、蕭應椿、饒寶書、蔡寶善、張佑賢、邵啓賢、梁煥奎、麥鴻鈞、田應璜、蔡宣、張士瀛、祝廷華、秦錫鎮、江峯青、陳于夏、陸長儁、成沂、王清穆、趙長鑑、李振鵬、劉鍾琳、丁禧瀚、吳會祺、陳若耀、蔡瑞平、馮善徵、周學淵、姚炳奎、張百城、楊模、陸蕙、李廷槐、胡其敬、方履中、劉映葵、歐陽中鵠、鄧承鼎、施世杰、周蕙良、劉體藩、黎經誥、林炳華、王宗基、鄭重、劉體智、丁保樹、吳鍾善、黃運藩、聶其昌、武曾任、毛昌傑、彭毅孫、姚庭斨、吳庚、程先甲、錢鏐、李金甌、賈西山、朱士煥、蔣寶誠、袁勵華、唐文治、易抱一、顧錫爵、楊體仁、崔朝慶。〕二十六日。欽派經濟特科覆試閱卷大臣梁慶葛寶華、張之洞、張英、麟陳邦瑞、戴鴻慈、李昭煒、郭曾忻。二十七日。保和殿覆試經濟特科錄取人員。二十九日。召見。六月初二日。奉上諭。經濟特科覆試。取列一等袁嘉穀、張一塵、方履中、陶燭照、徐沅、胡玉緝、秦錫鎮、俞陞雲、袁勵華、二等馮善徵、羅良鑑、秦樹聲、魏家驊、吳鍾善、錢鏐、蕭應椿、梁煥奎、蔡寶善、張孝謙、端緒、麥鴻鈞、許岳鍾、張通謨、楊道霖、張祖廉、吳烈、陳會壽。〔初十日引見。各予升敘有差。陳會壽讀廣雅堂詩隨筆、文襄癸卯入都紀恩詩、有派兩次閱特科卷一首。〕

先是內外大臣所保過濫，已有責言。然太后求賢意切，視之甚重。另旨特派公閱卷。閱卷以外臣領首，曠典也。閱卷之日，慶親王奕劻謂諸閱卷大臣曰：「香翁是先輩。諸公一切請教可也。甲乙皆公所定。第一梁士詒、第二楊度、人言嘖嘖。彈劾紛起，指梁士詒爲新會族人、有梁頭康尾之語。樊山適入都，召對時力諍保薦之濫。善化在樞府，嫉之尤甚。孝欽爲所動。至覆試時，遂改派榮中堂慶爲閱卷領銜。公雖亦在內，非前比矣。榮相極賞識袁嘉穀卷。公謂此卷不過開暢，嫌其空疏，榮相大不以爲然，竟置第一。閱卷後送軍機處覆核，善化又加淘汰。僅取二十七人而已。且擢用極薄，不及鴻詞科遠甚。故詩用鄭澥事。按本集讀史詩詠張天覺張孝祥二首，寓意蓋亦在此。考卷用彌封之法。正場名次，出公意外，觀本集六月初四日致梁太守電可見。」

初六日。御史張元奇奏各省學堂宜嚴選師範。本科進士入堂肄業，可否酌爲變通。奉旨：著張之洞會同管學大臣妥議具奏。議訂約束游學生鼓勵畢業生章程。四月中、面奉諭旨，以出洋游學多流弊，飭籌防範之法。公奏學生在外國，須與外國商之，事始有濟。閏五月。商之日使，其意中國如開獎勵之途。則日本或可約束之力，因議自定章程，再商日使。七月，遂有王璟芳賞給舉人之旨。七月。拓畿輔先哲祠。祠東買地八九畝，築圍牆，祠後作層樓，便遠眺，屬以游廊，捐千金，提鄉祠存款千金、商之同鄉京官、印結費每百兩收捐二兩。八月。幫辦廣西軍務雲南提督馮子材卒。公電致兩廣岑督部云：「萃萃軍門戰績甚多，鎮南關諒山轉敗爲勝。以軍門爲首功。尤光史乘。其人忠貞無私。清廉正直。無愧古來名將。度必奏請優恤。務望乘請予諡建祠。得覆云：萃萃得公論定。足千古矣。俟牘到具奏。嗣奏准予祭葬建祠。謚勇毅。事蹟交國史館立傳。孫承祥以郎中用。」與日使議遷漢口日商蘆船。累月不決。是月初十日、辯論利害，幾至決裂。」十五日。御賞衣料食物。時恩賞重疊。連日有內膳月餅蘋果之賜。一日賜內饌瓜果。皇太后閱之，謂瓜不美，更命健步入城，買三白瓜四石以賜。十六日。奏定約束出洋游學生章程獎勵游學生章程。是日召見。章程先由日使轉達其政府，與各學校校長會議允洽。其祇須中國自辦與日本無涉者，別定辦法七款。是日具奏。奉旨著照所請。九月，以日使言，已刪而仍增入者三條，皆於學

務有益、請外部奏明立案。」十八日。中美續議通商行船條約成。〔是日在上海畫押。〕中日通商行船條約成。〔凡十三條。各款率連並議。歷三月餘、告以允則俱允、否則俱翻。每議一條、即與外務部接洽。加稅事聲明照各國一律。我於英約外索允者二事。一中國人民在日本者極力優待。二查禁違礙書報。駭匪者三事。一運米出口。二口岸城鎮任便居住。三添開常德府等九處口岸。以索允為抵制者一事。各國護館護路兵全撤後、北京方能開埠。附以照會、聲明北京為自開通商場、各國商民居住者、須遵守定章。與華民無異。以全約電達商約大臣、袁督部於文字續有討論。日使請與美約同日簽押。十六日、公赴頤和園面陳樞府代奏。奉旨電滬畫押。及期、譯洋文未竣、與日使約先簽漢文。其日本文英文譯本於九月十一日補押。仍畫八月十八日。以內港行船章程為附件、與英約同。惟附以照會、聲明往來煙臺東三省輪船亦照內港章程辦理。〕九月初九日。御賞糕饅羊菜。十四日。召見。〔因東三省交涉事、三月間、俄以七事要外務部。欲盡占東三省權利。中國不知照俄政府、不得開新埠口。中國若用外國人、其權限不能干預中國北方各事。外務部拒之。日本已有備戰之意。慶邸慶商美使調停。美使謝不能。是月、東事益亟。傳聞奉天將軍被逐。公與袁督部同日召對。〕十月。咨呈外務部譯送各國鑛務章程。〔英約聲明自簽押日起、於一年內中國自將鑛務章程改修妥訂。是年秋、期滿。英使催問。公以洋員選譯之泰西各國章程咨呈外務部、請交商部伍秩庸侍郎審擇、參以原章及各省華洋合同。妥酌訂定。寄鄂覆加校核。〕糾正大冶鑛鑄借款合同。〔鐵廠祇開一爐。歲出二萬噸。以鋼鐵料抵官本。出售之數無幾。而電報改歸官辦。北洋設國家銀行、奪通商銀行之利。鐵廠窮於挹注。盛侍郎請以通商銀行部款一百萬兩商股三百五十萬兩撥歸鐵廠。是月、又與日本議借款三百萬元。年息六釐。以三十年為期。日本每年至少收買鑛石六萬噸。每噸價日金三元。又訂明不能還銀。公以鑛價僅敷還息。永無償清之期。宜本息併還、多售噸數。務令三十年後毫無遺累。又告日使至少年須買七萬噸。至多十萬噸。〕孫厚城生。十一月。與戶部論撥派練兵經費之害。〔十月、有旨以各省軍制操法器械未能一律、於京師特設總匯之處、考查督練。派慶親王奕劻總理練兵事務。袁世凱充會辦練兵大臣。鐵良襄

同辦理。是月。練兵處奏准、飭各省抽收菸酒稅、確查淨收款目歸公。整頓田房稅契。以此數項作練兵經費、預定年收九百九十六萬兩。分派各省。湖北派五十萬。又請指撥海關加稅舉辦印花稅。中旨以此二條下部議。御史姚舒密杜本崇給事中熙麟先後抗疏力爭。熙疏有云、莽卓之禍、復見今日。又云、練兵章程九條行後、都人傳言慶王加九錫。慶邸覽之動容、請旨飭戶部就固有之款整頓。時鹿文端長戶部。公爲具言利害。嗣戶部奏、海關加稅、以之彌補鈔虧、實無多餘。印花稅祇可先從通商大埠已有警察之處試辦。另奏就公家固有之利除弊節流、妥擬十條。請飭各省切實辦理。奉旨如議行。袁請開去會辦練兵差使。奉旨該督當任勞任怨、挽回積習、認真整頓。毋稍推諉。所請毋庸議。二十五日。會管學大臣奏進重訂學堂章程。章程以七月中脫稿。斟酌遼難盡善。十月。皇太后飭催速奏。因先以稿本及摺片稿送政務處軍機大臣覆閱、而意見參差。於遞減科舉事尤甚。至是商定入奏。自蒙養院初等小學堂層遞而上、至大學堂、就原章增補。師範學堂譯學館進士館農工商實業學堂藝徒學堂實業教員講習所則原章所無。別爲編訂。益以任用教員章程學堂管理通則實業學堂管理通則各學堂考試獎勵章程學務綱要、凡二十種。并請專設學務大臣。獎勵職官游歷游學。酌定新進士入館辦法。試辦遞減科舉。是日、召見。奉上諭學堂章程、條分縷晰、立法尙屬周備。著即次第推行。其有應行斟酌損益之處。仍著該管學大臣會同張之洞隨時詳擬議奏。至所稱遞減科舉及將來畢業學生由督撫學政並簡放考官考試一節、使學堂科舉合爲一科。係爲士皆實學、皆實用起見。著自丙午科爲始。將鄉會試中額及各省學額按照所陳逐科遞減。俟各省學堂一律辦齊、確著成效。再將科舉學額分別停止。以後均歸學堂考取。屆時候旨遵行。即著各該督撫趕緊飭各府廳州縣建設學堂。並善爲勸導地方、逐漸推廣。無論官立民立、當當格遵列聖訓士之規。謹守範圍。端正趨向。不准沾染習氣。誤入奇袤。一切課程。尤在認真講求。毋得徒事皮毛。有名無實。務期體用兼賅。以備國家任用。二十六日。陛辭請訓。抱冰堂弟子記、陛辭時面奏數百言。力請化去滿漢畛域、以彰聖德、遠亂端。如將軍都統等可兼用漢人。駐防旗人犯罪用法與漢人同、不加區別。其大端也。慈聖鑒顏納之。曰、朝廷本無畛域

之見。乃無知者妄加揣測耳。次年、遂定陸軍官制用部統奏領等名目、及定旗民軍律用刑新章。十一月。日俄之師開戰於遼東。公奉旨商英使調停。〔英使以爲無益。祇能約各國聲明中國之爲局外。隨平鐵煤不令俄人取用而已。日使告慶邸云、中國若守中立、必須禁沿海沿江匪徒勿令生事。樞廷傳旨云、長江之事。責成張之洞一人。嗣明旨宣布中立。飭各省及沿邊地方等加意嚴防。〕初九日。皇太后賞銀五千兩。活計一匣。路榮十六種。〔軍機大臣傳懿旨、毋庸具摺謝恩。二十日立春、又賜內饌。〕與德使議定不設漢口龍王廟江岸蘆船。〔德商援日本例、將設蘆船於招商局碼頭之上。公固阻之。德使不允。會德使詢行期。告之曰、德設蘆船於此、我何顏見湖北百姓。祇可不回任耳。德使懼然。因議定在日商蘆船未撤以前、中國補償德商損失每年一萬九千兩、互換照會立案。〕請練兵處免盡調湖北陸軍畢業生。〔練兵處初建、羅致人才。湖北游學生是年畢業者千人、盡調用之。公電致梁太守云、好學生總不爲鄂用、湖北何以立於南北之衝乎。商之練兵處。允調其半。〕二十二日。出京。〔入覲時謂留京祇月餘、旣而議商約、訂學章、謂八月中可以竣事。及學章草定而當道商權至再。入奏後陸辭又受熱而病、并以德商蘆船事留滯旬餘。〕至天津。〔日本請禁開平煤礦接濟俄人。公陸辭時、奉懿旨過天津與袁世凱商辦。嗣以英使已允禁斷、不復會商。而袁督部欲集將領議畫一營制。公以直鄂異宜。且歲暮事繁。先期約同隸委員來談。及抵津、祇留一日。〕二十三日。奉到御賞江綢四卷。貂皮八箇。是日行。二十五日。至滄州。奉到御筆福字。皇太后御筆融和二字福字壽字。二十六日。至南皮。祭家祠。〔張氏祠在南皮縣城者爲宗祠。在畢家塘者爲家祠。家祠舊祀公高祖孝義公以下、并追祀以上兩世。公嘗樓以安兩世神主、而奉孝義公主居祠之正位。其次依昭穆爲東西位。致祭時供席十五卓。五簋八碟。除日設祭亦如之。〕袁入京所作詩、爲朝天集一卷。

光緒二十年甲辰公六十八歲

正月。燕族人。〔歸里之初。疲極而病、入新年、病愈、族人畢至。治具款接。并致餽贈。行輩居長者拜

之。公篤於根本之誼。族孫元翰以知縣官河南。光緒辛丑署澠池。縣當孔道、蹕路所經。元翰不忍累民。在任六月、負官逋六千餘兩。公聞之、匯千金於汴撫。發藩司代償。元翰初不知也。後知寧陵、罷官歸、居母喪以戰卒。泮撫臚陳事蹟。宣付史館入孝友傳。此事無可附麗。并記於此。以皇太后賜金及歷年廉俸所餘建合族小學堂。〔廉俸所餘一萬二千兩、併賜金購地十七頃有餘。以租息爲常年經費。名曰慈恩學堂。定額高等初等各三十名。學科一切照奏定章程辦理。嗣改爲中學堂高等小學堂各一所。中學三十名。高等小學六十名。本姓外姓各半。度地興工。命孫厚環回籍經理其事。呈南皮縣轉詳請奏。續捐銀一萬兩生息備用。並選學生赴湖北學習。按公回籍時。屬族人辦工藝局、教鄉民織草帽辦、以款貧之。俾遞相傳習。未幾停辦。〕祭墓。〔分日祭掃。至十二日而畢。太僕公墓神道碑未立、度地營造。〕十三日。謁宗祠。〔祠舊有世系表、文達公書、同治七年燬於兵燹。至是命從子榛補書、裝爲六軸。祭則懸之饗堂。〕二十日。啓行。〔運河冰泮。乘民船、以官輪船曳之。〕二十三日。至滄州。二十五日。至天津。〔瘡證復劇。留七日。〕二月初二日行。〔乘京津火車至豐臺。轉長辛店由鐵路南下。〕初四日。至彰德。〔易羈車行。〕初六日。至衡輝。游蘇門山。登嘯臺。拜孫夏峯祠。〔皆有詩。〕初八日。渡河。初九日。至新鄭。〔易火車行。〕十一日。至信陽。宿。十二日。至漢口。十三日。渡江。〔途中求書者麇集。幕僚代筆以應。〕公再蒞署任。時論謂真除征卽。乃以別弊之嚴、圖治之銳。湘軍將領狃於故常。遂有謂不宜此席者。甫逾月而新命至。既不及有所施爲。則擇其尤病民害國者而去之。致程運司電云。此時與利則不能。除害或可。岳撫部調任將行、公致電云。鳳陽關大可整頓。望移節以前辦成。洞雖五日京兆、亦願助公分任此怨。有道員某與英商敦和洋行私訂合同。擬辦九江至南昌又至浙江鐵路。又請開蕪州鑛、願報效公費二十萬。公震怒、奏參革職。行知海州立案。江北隄工局道員某浮報工程。將嚴辦、漕帥爲之請。乃免。是時北方拳匪絕跡、而江寧頑童猶有誦咒習拳者、問官擬以大辟、幕僚施知縣燻言其不可。公命將年長者游街示衆、交其父母管束、又、江寧各衙署相距輒數里外、命設德律風十五處、此皆軼事之可述者。身在江

而不忘鄂事。端思敏以費繼議停辦工藝學堂。公言此時實最要。不可停。湖北派學生東渡。公言宜注重農工商。開游學生編輯月報。請忠敏止之。謂其務外荒已。果有餘暇。儘可譯有用之書餉道宗國。何得爲此。兩湖輪船公司定案由紳商自辦。聞其招日商入股。電請忠敏禁阻。英商亨達利洋行承辦湖南鑛。鑛購武昌道商場地址。以虧折將轉售禮和洋行。公慮德人占內地鑛利。電囑湘鄂收回。及交卸入京、道出武昌憩兩旬餘。隨事規畫、不能悉記。

癸卯在京釐訂學堂章程、以全力注之。大指在端正趨向。造就通才。以忠孝爲敦教之本。以禮法爲訓俗之方。以練習技能爲致用治生之具。尤重在考核品行。不得廢棄中國文辭。戒襲用外國無謂名詞。各學堂皆有進步、能發明新理以著厥書、能製造新器以利民用爲成效。各學堂課程中讀經講經中國文字諸科。每條約舉要義。各爲之說。言經學於身則漢宋並重、不廢經書。於春秋則講公羊者必三傳並習。名雖學章。實公晚年學案也。公歿後門人馬貞總祭文有云、公既裕本原、施於有政。其大者以爲強生於力。力生於知。知生於學。其學堂堂程、名似取法泰西、實則復三代以前教士之法、文武合一之道、不徒有益於今日、而並有益於後世。若其創始之難、有所未備、則在平繼起之後賢。而可謝外間之譏議者也。

癸卯入京、得詩最多。讀廣雅堂詩隨筆云。文襄再入都、老證凋零。風雅歇絕。守舊者率鄙陋閉塞。言新者又多復進踐躐之流。可與言者殆少。感憤之餘、屢屢形諸吟詠。一日無聊甚、約賓客數人往看慈仁寺雙松。寺毀於庚子之亂。乃支布棚藉草而坐。郡人士聚觀、途爲之塞。看松七古一首起句云。千步廊前車如織。歸來中滿不能食。無聊欲共草木語。城南雙松上胸臆。又云。遺此區區老禿樹。豈足增壯帝京色。可謂微歎發色矣。又西山一首云。西山佳氣自葱蔥。聞見心情百不同。花院無從尋道士。都人何用看衰翁。抱負感觸、更非前度剡郎之比。宜乎不勝葵麥之悲也。

# 卷九

二月十四日。回任視事。美國會議銀價專員精琪來。〔精琪來華。將議定金銀價值。約期晤談。所言不合情勢。駭之。〕禁德商不得在粵國州房縣等處與華商合辦鑛務。〔華商天官公司。與禮和亨達利洋行私訂合同。在與國州龍角山房縣保康南漳竹山等處合辦鑛務。德領事請立案。公以鑛地不得私相授受。且天官公司並未注冊。飭地方官查盜名訂立合同之人從嚴懲辦。札江漢門道照會領事。飭德商勿受誑騙。五月。又以法商嘉三禮空鄧陽探鑛期滿。撤銷原案。〕三月。拒比人請造常辰鐵路。〔比人請造路自常德至辰州。英人聞之。以其駐漢總領事來。云。俄法合謀。比聽於法。俄方請築張庫鐵路以達西伯利亞。又囑比承攬粵漢。今比又請築常辰。是與中國而入俄法掌握也。外務部據比使言詢之湘撫。適湘人請辦此路。公屬以自辦拒之。是月。湘撫奏請設湖南鐵道技路總公司。擬由紳商募股辦理。一自長沙常德辰州入川。一自衡州資慶出武岡臨陽晃州入黔。下商部議准立案。〕美商粵粵鐵路股東於比人。公議廢合同。杜後患。〔合興公司原主物故。家財分散。路股鬻於比者過半。原訂合同息重而期久。并許以開鑛之權。公電致盛侍郎議乘此聲明作廢。又電致湖南官紳言之。原文已佚。此據奏稿。〕解駐防通州軍餉。〔日俄戰起。俄廷電致鄂省。調入營備用。吳元愷率之以行。駐通州。餉由鄂給。〕十三日。赴江南會商製造局移建新廠事宜。〔上午陸辭時。奉懿旨飭赴江南。會同劉光燾將移建新廠事宜籌辦理。是日。乘官輪東下。〕十五日。至蕪湖。〔經督部自江寧來會。〕勘灣沚鎮廠地。〔鎮距江口七十里。距中江三里。小輪船可達。〕十七日。至江寧。〔總察院行臺。〕是日。子仁侃娶於福山王氏。〔四川知府王太守懿榮之女。文敏之從女。是日在武昌成禮。〕議移建製造新廠於萍鄉。〔端忠敏譚榮兩江湖廣四川六省之力。就萍鄉合辦一廠。盛侍郎來電云。午帥言萍鄉設廠地勢極合。江防難恃。鄧蘇詭譎及燕寧應築礮臺以禦劫掠。濬內河以利轉運。合參兩議。與

其江口多礙經費、不及湖內足避兵險。至煤鐵相連、商鑛多一銷場、官廠買價較省。戰時免如開平煤封禁、小焉者也。其大者在比較堂與深淺險阻難易而已。又電云、李維格議在湘東設化鐵爐以就煤鐵。其地已通鐵路、濱臨湘河、屬萍鄉縣、距城三十里。距醴陵六十里。醴陵至株洲自造鐵路、來年通車、軌未通前、極大機件發水時、亦可由河道直運湖東云云。移廠萍鄉之議本此。六省合辦、則魏督部不以爲然。四川亦不便。其議遂寢。漢水漲。潛江隄潰。雷致湖北司道飭屬防護。開議中荷商約。葡使白郎毅總領事博第業至滬。先送約稿六款。一遵守舊約、二承認新定稅則、三、四協助稽查洋藥稅釐、五土產由各埠運澳門免出口稅、每年免稅運米入澳門六十萬石、六無論何船、可任便往來澳門西江各口。公謂第五款最認。第六款亦宜駁。外務部意同。四月。阻英德艦隊入長江。英提督率兵船十艘至滬、將入長江。德艦隊擬入洞庭鄱陽游巡衝礙。飭江海關道勸阻之。英艦一艘至江寧而止。德艦入鄱陽事、前護江督李藩司許各國兵船在鄱陽湖游弋有案、滬道不能拒。會魏督部委道員魏允恭方碩麟充江南製造局總辦會辦。留江寧一月、諸事定議、其詳見會委劄中。節錄於此。江南製造局移建新廠一案。現經會商定議。新局應移江西萍鄉縣之湘東地方。開辦。經費、五年之內、由滬局節裁經費項下每歲提撥七十萬兩、江西每歲協撥十萬兩、蘇州安徽兩省每歲各協撥五萬兩、江南司庫鹽釐款內湊撥十萬兩。共一百萬兩。不敷之款。令滬局查照光緒十九年部咨試辦籌餞成案、添配機器、廣製銅元、行銷市面、所獲盈餘、新舊兩局各半分撥。其滬局各廠、應分別有用無用、酌量停造減造。俟新局告成、即將滬局槍礮彈藥等廠一律停辦。改造各種農工需用之機件、仿造有益民生實用之洋貨、以廣行銷而資抵制。其煉鋼廠、造船廠、修理機器廠、均仍舊辦理。並應相機量力擴充。除將銅元一半盈餘擴充廠本外、所有滬關二成洋稅、奏定各關局籌撥常年經費二十萬兩、暨銅元一半盈餘、即盡數撥充新局常年製造經費。新局務於第一年内將馬頭青紅軋廠火軋廠先行造成。以便製軋供用。第二三年將鋼廠、藥廠、槍廠、槍彈廠等所工程建造完固。機器安設齊全。開工製造。第四年將礮廠礮彈廠礮架廠等所工程建造完固。機器安設齊全。開工製造。總期五年內槍礮藥彈一律製造成器、足以實用。其各廠機

器、已另飭空郎中維格親赴德國著名機廠分別考校訂購。擬與洋廠商明、儘三年內陸續運送到廠安裝。機價分五年勻攤付清。各廠工程圖樣、限合同簽訂後三個月內繪成、寄交滬局、呈候轉發華局依式估工建造。在事各員、果能殫心籌畫、竭力經營、工程堅固核實、經費涓滴歸公。五年之內、全廠完工出械。即奏請照異常勞績從優獎勵。如能提早一年、儘四年內完工出械。獎勵格外加優。倘有浮冒遲誤、亦即從嚴參處。魏道駐劄上海。方道駐劄萍鄉。務須協力同心、將新局迅速籌布、舊局加意整頓。魏道每屆三個月必須親赴萍鄉考察一次。奉札後先借方道前往湘東地方、周歷履勘、審擇所宜、繪圖貼說、呈候察奪。所有一切籌辦事宜、隨時稟核本部堂等會核飭遵。會奏江南製冰局移建新廠辦法。辦法見上。惟摺內多購機核用、定槍礮式、備備廠才、整頓當局諸條。疏入、下政務處練兵處議奏。游金陵諸名勝。有游覽詩一卷。抱冰堂弟子記。性喜山水草木。登臨嘯詠。與眾獨往。於各省程途所經、遇有名勝、雖冒雨雪必往游覽。甲午乙未權江篆時、因海防有事、在江年餘、未登一山、未入一寺、惟數登覽破臺而已。甲辰春、奉使金陵。公事多暇。乃遍游諸名勝。按壬寅權篆時、度地建師範學堂。至雞鳴寺、下瞰臺城。發其幽蹟。以金施寺僧、開寺後經堂爲樓。蓋伐牆外雜樹。賣花農布政願任斯舉。及是樓成。請題勝。取杜詩憂來豁蒙蔽句意、題曰豁蒙樓。十九日。發自江寧。過蕪湖、有市哀瀉謠詩。二十二日。至漢口。接見各國領事。回任後各領事請見者多以疾辭。至是一一延見、時患口瘡、已一月矣。渡江至武昌。奉旨兼署湖北巡撫。端方調鄂江蘇巡撫。是月。兼署湖北巡撫篆務。五月。皇太后賜御筆蒲桃齋扇一柄。紗袍桂料各一件。開辦鄂湘皖贛四省土膏統稅。發端於忠欽兼署時。上年冬。湘鄂合辦有效。乃推廣於皖贛、是月二十五日。定章開辦。土藥百斤、統稅收捐銀一百十四兩。四省畫分。設總局於宜昌湘皖贛三省。各於入境處設局查驗。其不經宜昌者。湘贛統捐。湘併徽之。贛皖統捐。贛併徽之。六月。籌備粵漢鐵路捐款。四月中、電請外務部撥合同股票不准轉售他國之文。責成盛侍郎廢約。五月。湘紳席匯湘赴滬與盛議、由華商加價兩英轉售之票。不廢約而華美合辦。請備款應付。公電致湘撫。請撥賑糧指六十萬兩購二千股。鄂亦籌

贖一千二百股。此外購回鐵路地基、收買金元小票、籌款候撥。」建兩湖勸業場。「在省城蘭陵街。羅列兩湖地方所有天產自然之物、人工製造之品、以資傳播廣行推銷。其迤北擬建益智場。專儲各省各國有益民生日用之物、精巧鑿捷工作機器等件、以資啓發。備仿倣。七月、改益智場爲學堂應用圖書館。」改兩湖高等學堂爲兩湖師範學堂。「兩湖高等學堂、卽兩湖大學堂。以教員缺乏、師範學堂未建。就高等學堂改作。以能容師範生千人爲度。分設級初級兩等、別建兩湖高等學堂。以備升階。」設敬節學堂育嬰學堂蒙養院。「奏定學堂章程、蒙養院就育嬰敬節兩堂擴充講習。武昌已設幼稚園。與定章不合。因以舊有敬節分堂爲敬節學堂。選祖通文理之節婦一百八人傳婦科。延日本女教習講女子師範家庭教育。以備女師之選。於附近設育嬰學堂、選略能識字之乳媪一百名、入保育科。附設蒙養院。延日本女教習講保育幼兒教導幼兒之事。以備乳媪之用。凡未嫁之女不得入此兩堂。其舊有之敬節育嬰堂、循舊辦理。」議設存古學堂。「以各學堂經史文所講太略。特設此學。以保國粹。存寄種。三十二年二月、宜昌知府王仁俊就學院行臺設存古學堂。月刊學報。批示嘉獎。」施南耶穌教民殺天主教士。「以細故構釁。殺法教士三人。教民四人。」派兵協緝分防。孫厚環入南皮縣學。飭各屬清獄省刑。設遷善習藝所。廣西匪旣平復起。奏留提督劉光才募八營往全州防剿。撥武忠營二營歸湖南調遣。「劉軍由鄂籌餉給械。武忠改隸黃忠浩部下。按劉光才一軍、歲需餉銀三十萬兩、湖北協解廣西餉銀八萬兩。又光緒二十九年粵督奏調武建軍防桂邊。鄭孝胥統之。鄂省協餉三萬兩。合計總數在五十萬以外。」益定營務處職掌。「分參謀、執法、督操、經理四所。與北洋營務處略同。以瀋泉兩司緝鹽兩道分領之。舊屋狹隘。購地別建。嗣改督練公所。」會奏黃河橋工無害河防。「上年七月。汴撫奏言、蘆漢鐵路橋工局設廣武壩前。由此建橋跨河而過。沙鬆土深。立根不牢。地勢南高北下。拖溜旁趨。黃沁交匯頂托側漑。凌汎漫漲。水能漫橋。皆可慮之大者。因有建造浮橋之議。奉旨袁世凱張之洞盛宣懷妥議具奏。是年二月。盛侍郎據沙多言、詳勘無礙。草奏會商。公開橋柱有下陷者。屢再妥籌補救。委員覈勘。據報橋墩穩固。亦無洪水阻凌之患。遂定稿覆奏。」設宜昌洋務委

員。(會同宜施等屬地方官辦理商務交涉案件)。發還紡紗織布纏絲各局商本。(凡六十四萬兩。并發還歷年官息。)添撥製麻局官本、購織麻機。(本議官商合辦。已購機器。僅能製麻爲絲。是陸銅幣贏利甚豐。故各局商本悉數發還。)七月。覆奏籌撥練兵經費。(練兵處奏派各省練兵專款。部議雖主就固有之款整頓。練術隨意不謂然。五月。旨飭各省實心籌措。每年勻出的款。爲練兵之用。六月。侍郎鐵良奉旨南下。查勘打鳥製造局移建地方是否合宜。并查各省出入款項、局所利弊、兵額虛實、密遣良駒先發、微服訪問。期於必得鉅款。部議整頓十條。湖北有已辦者。有不便者。公謂苟可足國而不擾民、不必限定名目。湖北自試鑄銅元以後。銷暢利贏。四省合辦土膏統捐。預計溢收亦鉅。遂照練兵處原奏解足五十萬。又遵旨就冗員糜費盡力裁節。認解三萬兩。又奉旨道府應州縣報效五萬兩。聽候部撥。按報效之款。以本年十月皇太后七旬萬壽。故循甲午例爲之。此慶邸於上年七月奉內外王公百官合詞陳請者。)奏陳暫編湖北常備軍制。(練兵處畫一章程未定。先就湖北新軍營制。參以北洋辦法、按之物力人才、民風、地勢、設常備軍兩鎮。每鎮步兵兩協、礮兵三營、騎兵兩營、工兵一營、鑾重兵一營。每年正餉五十五萬四千三百三十八兩。募兵先取之本省。每一營一隊、均選募一府或一縣之人。三年發照退伍。詳見原摺。此爲暫定章程。每鎮暫虛步兵一協、酌減礮騎工輜各營隊、餘俟擴充。以總兵張彪統鎮第一鎮。兼攝協統事。都司黎元洪爲第二鎮協統。兼設統領事。)併將弁學堂入武高等學堂。免各屬撥解時款捐。留辦學堂。(以土膏捐銅幣盈餘抵補。自八月起。盡免湖北各屬應撥賠款。留於地方。爲興學之用。正名爲賠款改學堂捐。由地方官督正紳經管。)免省城小戶房捐。選幾輔學生二百人就學湖北各學堂。(兩皮縣一百人。天津府各屬一百人。各學堂願不收學費。答公興學之勞。公援東脩之義。捐半費二千五百兩。明年三月。又以兼管巡撫衙門公費一萬四千八百兩補充學費。先後於就學各生中選派四十一人游學日本。)八月。添建火藥庫。(上年新建六所。以製造日多、於省城外添建兩所。)改鐵政洋務局爲洋務局。(分交涉編譯鐵路鐵路實業商稅六科。附設之槍礮局。改名駐省兵工總局。)奉皇太后賜袍褂料表裏各一匹。覆奏總稅務司條陳籌餉室礙難

行。〔總稅務司赫德建議，請整頓地丁錢糧，按里計畝，按畝計賦，可得四百兆兩。廷寄各省核議。公覆奏以爲天下大勢，山水占地之數多，平原可耕之地少。縱使全國清查。每一縣不能增地一畝。益少費多。得不償失。而使舉國騷動。其禍將一發而不可遏。今日籌餉，斷不宜專就田賦重加剝削。理財召亂，從古有之。伏望拒之勿聽。按直督覆奏，駁赫議而主清丈。公意清丈不易行。今日人心不靖。更不可行。此與下文駁精琪虛定金價摺。皆爲當時傳誦。〕覆奏美員精琪建議虛定金價，改用金幣，不合中國情勢。〔精琪條議圍法。定中國金銀比率。官發款以銀三十二兩準金一兩。民納稅以銀四十兩準金一兩。中允匯兌則視時價。設銀行於外國以售金匯票。另洋員總理圍法。其措置以賠款國多數滿意爲準。公謂其括民財以入於政府。又括政府之財以傾瀉於外洋。使全國窮民怨。并以財政屬人。必不可行。中國參用金幣。當俟二十年以後。此時祇可廣興實業，多儲幣本。爲異日用金之備。〕改槍礮廠爲湖北兵工廠。奏留膏捐餘款添製軍械。〔上年冬，端忠敏奏請湘鄂合建槍礮廠於湖南。以土膏統捐溢收之款濟用。嗣政務處練兵處議覆，應擴充礮廠。緩辦湘廠。公請將此款應歸湖北者。除大宗湊解賠款外，餘數撥歸鄂廠，添機擴充。奉旨允准。〕築漢口後湖長隄。〔後湖傍鐵路，近租界，光緒二十七年，即議築隄。款絀不果。是年，德商噸承攬隄工，以自辦御之。舊原有城垣，以甌石濟用。隄外開引河。上通漢水，下達海口。即以開河之土築隄。凡涸出十餘萬畝。〕議結施南教案。〔魏正兒十人。地方官分別懲處。法人初索賠款六十萬兩。以十四萬五千兩議結。〕九月。簽定學務處職掌。〔照京師學務處章程，分審訂普通專門實業游學會計六科。〕奏請裁湖北督糧道糧道軍大佐。改設施鶴道缺。升鶴峯州爲直隸廳。〔五月，明旨裁冗員浮費。先裁粵海關淮安關監督江寧織造防務之風聲。公言佐雜教職，雖職簡而爲京官，裁取騰餘議餉出身之路。裁之所省有限。而使下僚失所，寒峻絕望。非政體所宜。惟漕折改折。屯衛已裁。糧道及庫大使皆可裁。歲節銀四萬兩。施南及鶴峯州地本苗疆。山深匪衆。宜設道缺，升直隸廳，疏人。如所請行。〕覆奏籌畫東三省事宜。〔日俄開戰後。日兵水陸皆勝。奉旨，事變難知。飭疆臣各抒所見。公奏陳大勢。注重酬款收地。抱承堂弟子記。甲辰春。南

洋大臣倡議合數省督撫致書北洋、欲合詞上疏、勸阻日戰。適過津、項城以爲問。力阻之。是年冬、俄雖獲敗。未肯退出東三省境。新任南洋大臣欲邀合北洋及鄂省勸和。勿苦戰。復書痛駁之而止。十月。試鑄兩銀幣。分庫平一兩及五錢二錢一錢四種。十二月。以鑄成一兩者進呈。出示湖北境內。許完納錢糧賦稅。蔡州縣補平。補色。原奏出入皆作爲十成紋銀。嗣戶部議。如搭解部庫。應照部庫平色補足兌收。三十一年冬。財政處奏言、國幣之制、似可即照庫平一兩、精其鑄造。足其成色。尤要在戶部京餉首先收受。部庫收則各省公款自無不收。張之洞袁世凱謀議僉同。擬請鑄一兩銀幣以垂定制。奉旨依議。中葡會議通商條約稅則章程成。約文二十條。葡未預辛丑和約。故補入和約加稅葡國照辦一款。惟葡國酒無執照者不在此例。運米限三十萬。西江各口及廣州府屬各埠行輪照英約推廣。惟須遵守章程。澳門洋藥緝私、於約內訂專章三條。稽查限制。其加稅裁釐、禁止嗎啡、保護牌照等款。與他國同。是月初三日。會奏。奉旨畫押。初十日。皇太后七旬萬壽。頒賜御書大福壽字兩幅。玉如意一柄。蟒袍料一件。綢緞凶卷。是日。譙各國領事等官遊歷人員稅司鐵路工師等。併代奏頌壽之忱。籌補賠款還金鎊虧。美允還銀。英允十年後還銀。而日俄籌兵需餉。德增兵需款。皆不允。領銜公使按期催索。數逾千萬。六月。各使聯銜照會外務部言。金價按月漲落。嗣後可按片定率。並展緩時限。所屬之數與賠款之本一例出利。倘至三十九年終、還款總數尙有不敷。仍應按月續還。至本利全清而止。外務部以三事磋商。一、按月折中定價。二、鎊虧無利。三、銀行存款扣息。議定應補一百二十萬鎊、合八百萬兩。江督李勤恪公與銳累電抗爭。公與北洋知無可挽回。議籌抵補之法。洋常關增稅五百萬以歸他用。不得已議各省按成分攤。而湖北奉派獨多。鄂人咎公認解練兵經費太易。公電部言鄂力祇能認六十萬。部覆照准。御史黃昌年奏請挽回路政。奉旨粵漢鐵路關係緊要。現在合與公司正議廢約。應即另籌接辦。著張之洞悉心核議妥籌辦理。此股收回不易。公主嶺約自辦。伍侍郎亦向政府開陳利害。美人柏士願借鉅款興華。設華豐公司承辦。以美接美。公堅持不可。九月。粵紳自議築股。與盛侍郎商廢約事。是月。三省紳民呈請外務部代表。黃侍御又據三省公意奏開。公擬

奉旨。與盛侍郎電致駐美梁大臣照會外部。以三省公議爲詞。十一月。奏請停道府人員分發湖北五年。〔時湖北候補道員多至四十三人。知府五十人。〕奉旨飭財政處戶部舉辦八省土膏統捐。〔湖北道員孫廷林建議於欽差大臣鐵良。謂四省合辦土膏統捐、溢收甚鉅。南廣蘇閩亦雲貴川土行銷之地。若合八省爲一。數更可觀。鐵使入奏。仍設總局於宜昌。章程不改。以二十九年收數爲各省定額。合收分解。溢收之數。存儲候撥。旨如議行。以溢數專作練兵經費。戶部派孫廷林爲總辦。湖北入款因此歲減六七十萬兩。明年三月。戶部奏請特派大員管理。奉旨派柯逢時管理八省土膏統捐事宜。撥還各省之款。以三十年收數爲定額。一年期滿、溢收三百七十萬兩。〕請以已故荊州府知府陳夢蘭入祀名宦祠。〔同治九年。夢蘭知荊州府。江水盛漲。隄工幾危。夢蘭督工防護。植立最衝最險處二十餘晝夜。盡以廉俸用之。捨險。隄防獲安。旋疾卒。公據紳民呈詞入奏。下禮部議。准其入祠。〕請旌孝子方炳垣。〔炳垣、閩人。湖北典史。寓宅失火。炳垣負母出。梁柱摧墮。母子皆焚死。旌表如例。〕欽差大臣鐵良至。〔在江南清查款項。道員劉光典勸勿爲剛毅續。十月、奉旨、他省款項不必查。二十二日、至武昌。二十五日、赴湖南勘湘東製造新廠地址。十二月中旬、再至武昌。閱兵觀學堂局廠、留數日北返。〕十二月。宜城軍戶滋事。飭文武官分別處置。〔軍戶抗稅。痞匪乘之。揭扶清滅洋旗號。派兵彈壓解散。保護教堂。非拒捕者不得殺戮。委員澈查稅捐辦法。安定章程。擊辦匪徒及爲首滋事者。旬日而定。〕頒發學堂歌軍歌於各學堂各營。〔自撰歌詞。發各學堂學生各營兵勇熟讀歌唱。〕查省城民立學堂。〔民立中小各學學科門目辦事章程。是否與新章符合。飭學務處確查。以後未經批准者。畢業不准請獎。〕減省城各學堂附學生學費。〔本省學生不收費。各省學生及湘生附設川漢鐵路公司。自築鐵路。至是電商辦法。以先從宜萬下手覆之。時公在京師。適清弼督部入覲。公爲言鐵路宜專招華股。起漢口、達成都而訖川邊。以枝路爲輔。以煤鐵各鑛爲用。〕美人柏士來商粵漢鐵路事。奉旨著商部張之洞妥籌辦理。〔公電致鄂相云。參以商部。必多枝節。如無掣肘。庶可有成。於是商部

不問學漢事。柏士來見。重申承借路款之請。嚴詞拒之。十二月。飭湖南鐵務局禁商民私售鐵礦於洋商。〔蘆和洋行承亨達利買錫之約。擬收回而不得。武昌城外設廠洗砂。阻之亦不聽。及是聞湘紳有與約包售十年者。力阻之。湘撫曾覆云。新章已不准私與洋商訂立合同。明年二月。又聞蘆和與豫人訂購此種鐵砂。電豫撫阻止。〕奉諭。雲南湖北巡撫兩缺即行裁撤。湖廣總督雲貴總督均著兼管巡撫事。十九日。遵旨兼管巡撫事。〔改撫署爲賢良祠。後復爲十賢祠。祀諸葛武侯亮、杜成侯預、劉元公宏、陶桓公侃、柳元公綽、張文獻公九齡、岳武穆王飛、孟忠襄公珙、盧忠肅公象昇、胡文忠公林翼。〕

### 光緒三十一年乙巳公六十九歲

正月。奉御賜福壽字各一方。皇太后賜御筆福壽字各一方。介壽字一幅。綢緞四卷。貂皮八個。奉諭。鐵良奏遵旨抽閱江蘇等省營伍情形一摺。湖廣總督張之洞、夙抱公忠。所練各軍。獨能出色。深堪嘉獎。設漢口馬路工程局。〔築馬路自大智門至玉帶門。以洋商設火油池報效之款撥用。招商租地填土建屋。估地價按千分之五分等徵租。時宜昌亦築壩岸九十八丈。建馬頭、備華洋輪船停泊。〕〔浚省城湖港。〕〔省城大小郭鄭湖沙湖、出江之路淤塞不暢。分段挑濬。別由湖西北面開引港一道。導水入江。〕二月。委員勘川漢鐵路由襄陽至信陽地勢。奉諭。粵漢鐵路尙無成議。著該督責成盛宣懷趕緊設法挽回。〔柏士既不得請。美富商摩根以重價收比股。美政府謂專權仍屬美人。盛侍郎亦言約不易廢。衆論咸望公主持。乃逕電梁欽使向美股真代表人密商。始允開價由華贖回。京僚言公事權不屬。請專贖成。故有此旨。〕改武高等學堂爲武師範學堂。〔練兵處奏定陸軍學堂堂程、各省准設陸軍小學堂。南北洋湖北廣東准設中學堂。其兵官學堂大學堂皆設京師。惟各省可設速成陸軍學堂。速成師範學堂。故照章改設。先辦速成科。一年畢業。武高等班學生改習測繪專科。其由將弁學堂併入者。改爲學習哨官。〕直隸總督以公捐建本籍學堂奏聞。奉頒賞御書慈恩學堂匾額。皇太后頒賞御書振民育德匾額。三月。盧漢鐵路成。〔凡二千四百餘

里。黃河橋長九百九十餘丈。橋門一百有二。鋼柱長七丈餘。深入沙土三丈至五丈不等。北岸於下流築石壩二十五里。自鄧州築枝路東達開封。西至洛陽。二十九年八月，盛侍郎與比公司議定合同。借款一百萬磅。由比人承辦。悉照盧漢章程。外務部補入一條，自洛以通秦隴。如中國自行籌款或招集華股，比公司不能爭執。是年，關外鐵路亦於收回以後興修工竣。〔定仕學院章程。〔原設仕學院章程未備，飭兩司擬訂詳細節目。手定大綱五條。附設賢良祠內。〕 申自費出洋游學。生考驗給咨之令。〔照奏定章程辦理〕。 改訂清理衛田簡易章程。〔酌減契稅、寬限徵收。并奏准暫免州縣官經征計考。〕 二十四日，奉旨、聞張之洞現在患病。該督係屬重臣。著即妥為調攝、并將患病情形據實電奏。〔口瘡久不愈。延日醫治之稍效。即日覆奏。〕 四月。招商承辦造紙廠、製大呢氈毯廠、製皮革廠、製水泥廠。〔以中國之銀、易外國之土。公所痛心。到鄂之初、即訪外洋製泥之法、謀設廠自造。光緒二十年。與洋商定合同。以洋員回國而止。皮革廠是年已購機建屋。餘二廠亦已於近水處購地。估計開辦四廠需二百萬兩。出示招商承辦。不論何省之人、有負聲望而能集鉅股者、皆許呈請、准專利十五年。前五年獲利不足五厘者。官撥款補助。五年後獲利漸豐、酌提紅利報效。許以官中所需、但能合用、必向公司定購。〕 飭湖南農工商務局火柴行銷湘鄂不得區分界限。〔漢口燮昌火柴公司、自光緒二十二年開辦。行銷各埠。湖南和豐公司、製火柴牌式相類。兩公司爭執於官。湖商商務局判以分界行銷。燮昌不准上溢湖南。和豐不得下灌湖北。公以商貨宜流通。湘商當自立牌號。講求精進。不宜創立限制。飭更正銷案。〕 定議盡收粵漢鐵路股票。〔合與公司延律師路提等出而爭論。我亦延福士邊等與之駁辯。合與初祇允改訂合同、繼乃議售讓辦法、而比國股東不可。相持數月。比亦允售。梁欽使慮鉅款難措、議與摩根商、指款作押、分年攤付。公謂不如另借他國之款、悉數清還。〕 五月。裁併百貨釐卡。改徵統捐。〔裁釐局二十九。留二十局。貨自外省來者。徵之於入境第一卡。產自本省者、徵之於由產地運出內河第一卡。計與指運之地、沿途各卡所徵之數。合併徵收。本省銷售落地之貨。徵之於最大市鎮。以後輕運他處。其落地捐概不重徵、行之一年。增十萬緡。又以省城為四方表率、政原有落地釐金歸各商聽

織。奉皇太后頒賞御筆山水畫扇一柄、紗袍鞋料各一匹。設路礦學堂於日本。〔招集游學日本之湖北學生、延日師教之。并於湖北洋務局附設路礦學堂。〕六月。奉旨督辦粵漢鐵路。覆奏因應日俄和議及東三省善後事宜。〔日俄議和。旨詢因應及善後事。覆奏因應之要、以日本宣布許我主權完全爲定鑿鐵。以東三省鐵路中國酌分權利爲實際。以俄日在東三省情形爲比較、以結近援禦遠患爲歸宿。善後之法、一、循地開放。二、改東三省官制政治。三、中日兵合力駐守。四、就地籌餉。五、以後防俄之策。〕分籌大員出洋考察政治經費。〔奉旨特簡戴澤等分赴各國考求政治。嗣後再行選派分班前往。部議屬各省分籌經費。湖北按年認解十萬兩。〕練兵處奏准設南北兵工廠。北廠以江南製造局節存經費開辦。〔上年八月、聞北洋主議移廠河南。即電致端忠敏言、移滬局者所以備沿江海諸省之用。北洋籌款易、此舉非計。及鐵使來、言及於此。又婉勸之。是年三月、鐵使覆奏、陳南北中三廠辦法。公致電言南廠宜取給原鑄各款。北廠宜以新鑄膏捐充用。至是練兵處議復前奏。奉旨允設南北兩廠。南在萍鄉。北在直隸晉境內。南廠以江皖贛協濟三十萬及銅元餘利開辦。不足由蘇浙川鄂湘粵桂分籌。北廠以滬局節存七十萬撥辦。不足由直隸晉晉秦吉分籌。公喟然長歎。自此不復再移廠事。〕免各州縣加提錢領平餘。〔銅元日多、錢價低落、鑄平餘可資賠款。遂通行裁免。以鑄捐撥補。〕七月。電奏粵漢鐵路籌議贖約情形。請飭外務部以朝廷崇獎之情之照會美使。〔五月初、梁使與路提等議定贖路自辦。注銷合同。備節略經兩造律師簽字。美外使欲翻案而議已定。駐京美使告其政府、謂中國政府無贖約意。事幾中變。及外務部遵旨照會美使。美政府始無異言。〕謹借英商款贖與鐵路。贖路籌款無着。粵督議三省合借洋款。按年分認撥還、奏請派文僕寺卿張振勳出洋招股。湖紳燕吳言。奉旨此路贖回自辦、實於全局有益。招集華股、能否不至暗中攪雜。粵會同張之洞妥籌辦理。然招股非急切可得、漢口英領事來言香港有存款可借、取息輕、不須折扣。惟英人方承築廣九路、請居間接洽、告以借款可商。廣九事固未便與聞。如必欲并議、則借款作罷。〕子仁侃以一品廕生引見。奉旨內用。〔吏部照例以員外郎籤分刑部行走。〕粵漢鐵路贖約成。〔訂售際合同、價美金六百七十五萬元。聲明將已成鐵

路、鐵路材料、測量圖表、開鑽特權，以及在中國所有應得權利。無論明指暗包。一概全行收管。七月二十九日簽字。立索於七日內交第一期款美金二百九萬八千六百六十元。時籌款未集。借款未定。愆期一日。此局全翻。集司道會商。由官錢局擔保。先向匯豐銀行息借三百萬兩。官錢局湊二十萬兩。如期匯到。英領事見我能如期應付。不復言廣九事。而要於此路如借洋款。須先向英國詢商。因議定如利息抵押等款較他處相宜。先儘英國承辦。用料除華產外。先儘英商開價。擇便宜者訂辦。借款既定。官錢局擔保之款如數撥還。以贖約事。奏。奉旨准其畫押。八月。袁督部會公奏請立停科舉。推廣學校。并籌新舊遞嬗辦法。是年春京師要人有議修復貢院者。公電致鹿文端張文達言鄉會中額明旨四科減盡。不過十年。科舉必停。舊舉舉貢生員另籌出路則可。修復貢院則不可。七月。端忠敏在京。與袁督部俱有電來。議立停科舉。公電復之。文甚長。今此稿已佚。蓋此議發於北洋而忠敏促成之。其奏摺則北洋主稿。節錄於此。科舉之弊。古今人言之甚詳。而科舉之阻礙學堂、妨誤人才、臣世凱臣之洞等亦迭經奏陳。前奉諭旨遞減中額。期以三科減盡。十年之後。取士概歸學堂。固已明示天下以作新之基。而臣等默觀大局。覺現在危迫情形更甚。科舉一日不停。士人皆有傲倖得第之心。以分其砥礪實修之志。民間更相率觀望。私立學堂者絕少。非公家財力所能普及。學堂決無大興之望。就目前而論。縱使科舉立停。學堂徧設。亦必需十數年後人才始盛。如再遲至十年。甫停科舉。學堂有遞延之勢。人才非急切可求。又必須二十餘年後。始得多士之用。科舉夙為外人詬病。學堂最為新政大端。一旦毅然決然。捨其舊而新是謀。則風聲所樹。羣且刮目相看。推誠相與。而中國士子之留學於外洋者。亦知進身之路。歸重學堂一途。益將勵志潛修。不為邪說浮言所惑。顯收有用之才俊。隱戢不虞之詭謀。所關甚宏。收效甚鉅。且設立學堂者。並非專為儲才。乃以開通民智。使人人獲有普及之教育。具有普通之智能。上知效忠於國。下得自謀其生也。其才高者固足以佐治理。次者亦不失為合格之國民。兵農工商。各完其義務而分任其事業。婦人孺子。亦不使閒處而與教於家庭。無地無學。無人不學。以此致富奚不富。以此圖強奚不強。故欲補救時艱。必自推廣學校始。而欲推廣學校。必自先停科舉

始。擬請宸衷獨斷、雷厲風行。立沛繪旨、停罷科舉。庶幾廣學育仁、化民成俗、皆基於此。雖然、科舉停矣。尙有切要辦法發端、乃可相維於不敝。一在於首經學也。或慮科舉一停、將至荒經。不知習舉業者、未必皆湛深經術、皆因科場題目所在、不得不記誦經文。又因詞章敷佐之需、不得不掇拾經典。故自四書五經而外、他經多棄置不觀。卽五經亦不全讀、讀者亦不能盡解。是何與於傳經。今學堂奏定章程、首以經學根底爲重。小學中學均限定讀經講經溫誦時刻、不准減少。計中學畢業、共需讀過十經、能通大義。而大學堂通儒院均設有經學專科。餘如史學文學理學諸門、凡獲學所有者、皆包括無遺、且較爲詳備。蓋於保存國粹尤爲兢兢。所慮辦學之人、喜新厭故、不知學經。則雖諸生備讀各種科學、亦僅造成一汎濫無本之人才。何濟於用。應請飭下各省將撫學政、責成辦理學務人員、注意經學暨國文國史。則舊學非但不廢荒廢、抑且日見昌明。一在於重品行也。查科場試士、但憑文字之短長、不問人品之賢否。是以暗中摸索、最足爲世詬譏。今學堂定章、於各科學外另立品行一門、亦用積分法、與各門科學一體考核同視。其分數、分言語容止行禮作事交際出游六項、隨處稽察、第其等差、至考試時亦以該生平日品行分數併計合算。亟應聲明定章。請飭各省認真遵辦。則人人可期達材成德、自不至於越矩逾規。一節範宜速造就也。各省學堂之不多、患不在無款無地而在無師。應請旨切飭各省。多派中學已通之士出洋就學。分習速成節範及完全師範兩種、尤以多派舉貢生員爲善。並於各省會多設師範傳習所。師資既富、學自以興。此爲辦學入手第一要義。一未畢業之學生暫勿率取也。各省設立學堂、遲早不一、程度不齊。或學業尙期、或畢業尙早。若不待畢業、驟加考試、則苟且速成、弊將日滋。若不待全行畢業、則各省之辦學被遲者、必將至缺其選舉。士林又將莫寧。今籌一酒融辦法。既不同科學之敷衍故事、亦不向以堂面遞就濫登。要使取士仍歸學堂之中。學堂不蹈科舉之弊。擬請此數年內、除學堂實係畢業者、屆時奏請考試外。其餘則專取已經畢業之簡易科師範生、予以舉人進士之出身。既可以勸教育之員廣教育之基、並隱以勵績學而杜倖進。外國無速成中小高等各學、而有速成師範專。具有深意。至五年以後、完全師範生畢業者已多。更足以應選舉而有餘。此等師範生、類皆國文已

優、學術純謹。斷無流弊。且多係舉貢生員爲之、本可以得科第之人、亦非僥倖。迨十年以後、各省學堂逐漸畢業。人才濟濟。更可不窮於用。一舊學應舉之寒儒、宜籌出路也。文士失館、生計頓蹙。除年壯才敏者入師範學堂外、其不能爲師範生者、賢而安分、則困窮可憫。不肖而無賴、或至爲非生事、亦甚可憂。擬請十年三科之內、各省優貢、照舊舉行。已酉科拔貢亦照舊辦理。皆仍於舊學生員中考取。其已入學堂者。照章不准應考。惟優貢之額過少、擬請按省分之大小。酌量增加。分別錄取。朝考後用爲京官知縣等項。三科後再行請旨。其中已中舉人五貢者、此三科中、擬請令各督撫學政每三年一次保送優貢若干名。略照會試中額、加兩三倍、送京考試。凡算學地理財政兵事交涉鐵路鑛務警察外國法政等事、但有一長。皆可保送。俟考試時分別去取。試以經義史論一場。專門學一場。共兩場。其取定者。酌量用爲主事中書知縣等官。如此則鄉試雖停而生員可以得優拔貢。會試雖停而舉貢可以考官職。正科舉之名、專歸於急需之學堂。廣登進之途、藉恤夫舊學之寒士。庶乎平允易行、各得其所。少長同業於有用。新舊遞嬗於無形矣。」奉 上諭、所陳不爲無見。著卽自丙午科爲始。鄉會試一律停止。各省歲科考試亦卽停止。其以前之舉貢生員、分別量與出路、及其餘各條、均著照所請辦理。設支郡師範學堂。〔上年九月、議於省城設師範傳習所、以數各屬選送之師範生。而所送人數參差。傳習所課程較淺。十二月、停辦各府中學堂。先設師範講習所。省外師範教員難得、就省城設支郡師範學堂。分府錄取。課程與武昌道府師範學堂同。先設六堂。賃屋開辦。〕奉 皇太后額賜綢緞各二匹。中秋大熱。月夜與客乘舟至金口。登大軍山。有詩。〔生日有答柯遜庵詩。九日有登寶通寺塔詩。又送沈乙齋梁節庵詩、武學西園四首、食河鯉聯句、亦是時所作。〕開議中德商約。〔德領事開約稿十四款。皆益彼損我之事。〕奏派道府四人隨同考察政治大臣分赴各國考察。〔道員亨源、知府鄭葆琛隨赴日本英法比。知府金鼎察琦隨赴美德意奧俄。〕九月。限制銅元出境。〔各省鑄造、歲可出一萬六千四百餘兆枚。銀貴錢賤。物價騰踊。江督商准外務部禁運出省。湖北各關卡。自九月初一日起。禁本省銅元出境。十月。戶部奏准、大省鑄造每日不得逾百萬。中省六十萬。小

省三十萬。部頗阻礙，未到以前。暫停鑄造。十一月，奏言湖北已自行限制。鑄少不敷周轉。請勿限定部章。旨下財政處議奏。嗣議准併湖北湖南爲一廠，歸財政處戶部統轄，調劑盈虛，彼此勻撥，各省共設工廠。酌定學堂冠服式。嚴禁奇裝服飾。區別等差。禮服講堂嚴整。列出行服各爲一式。是年冬，咨送學部大臣詳酌施行。三十三年四月，又奏請飭部核議。接收粵漢已成鐵路。是月十二日，第二期贖款付訖。即日派員於滬粵兩處接收產業文卷。選外務部論粵漢川漢鐵路借款自辦無礙利權。外務部來電云，兩路應扼定自辦宗旨。若向一國借款，必致紛起藉口。難於收拾。公以爲贖路而不造路。歲還重債，毫無利益。川漢一路，外務部曾允借英美款，若用人擇地管路行車及開鑿利權，借款國之工程師毫不干涉。似無流弊。外務部復云，路已贖回。無論如何爲難，斷不可借洋款，貽後患。川漢未經奏准自辦以前，英美以借款請。本部先聲明自辦。惟屆時需款，亦可向各國商議。迨奏准後，兩使復請，法使亦爭此利。本部以概不借款爲詞。如商借英款，不獨美國續專要求。法國亦必干涉。川省自行募款。鄂省切不可自墜其防。公重覆決計籌款自辦，不借外款。議定陝鄂兩省合辦洵陽白河礦務。洵陽白河兩縣，五金礦苗甚旺。地連鄂界。往返電商定議兩省合辦。委員會勘，指鑛督回鄂化驗。事見陝撫曹中丞奏疏，本集不詳。設粵漢鐵路總局。選妥籌辦理之旨，設局籌辦。并選集三省官紳討論。概不支薪。十月，設川漢鐵路總局。選集官紳，不支薪水，與粵漢同。兩局均設武昌籌洋務局。中德商約停廢。商約大臣與德領事開議一月。大致商定。告以須俟外務部及袁張電復。其尤要者，德要求長江商輪可用拖船。以抵我所索禁嗎啡限教士收回治外法權三款。我不之允。德政府謂此約與德無益。意在延緩。京江鄂河電既到，德領事允再商。定期回國。第請以議定者會核簽字。是月初四日，停議其已商妥及案改者各錄一分存案。奉皇太后頒賞綢緞廿二匹。初十日，出省驗視蘆漢鐵路。十七日，欽派驗收大臣唐紹怡會同行落成典禮於黃河之濱。袁督部比法駐使比國公司總董皆主。以是日爲全路行車第一日。奏請命名京漢鐵路。唐紹怡爲辦理京漢鐵路大臣。三十二年冬，設郵傳部。以鐵路歸郵傳部管理。一年期滿。共收七百二十餘萬元。贏利一

百六十餘萬元。借撥正太鐵路應用。三十四年十二月。鄂債籌款還債。收回管理之權。十一月。集湖北湖南廣東官紳會議修路公共條款。湘粵公推紳員來鄂。議定修路公共條款十四條。一、分認贖款。湘粵各認三分。鄂認一分。二、公聘勘路工程師一人。三、分聘修路工程師。四、分辦路工。三省同時並舉。幹路未成以前。皆不得另修支路。五、三省路成按本分攤贏利。六、粵省代湘修路。自宜章以下至永興。限二十五年贖回。七、三省比較鐵路工遲速。少修者認多修省分工本之利息。八、已成之省佛支路贏利。專充贖路款。九、贖回幹路存料。估價歸三省分領。十、粵境已購地基。核價歸三省分領。十一、三省派員互相稽查。十二、鋼軌鐵料專用漢廠所造。十三、招股不相侵占。不暗招洋股。十四、路成得利。提款報效國家。又、豫鐵路成後條款四條。集湖北官紳議定湖北境內川漢鐵路接修辦法。鐵路在鄂境者。預計自巴東達應山長一千七百里。鄂力不足任此。川省能集款而築路不能自川境發端。仿粵款代修湘路例。宜昌以上。由川代修。奏陳改編湘北常備軍兩鎮營制。酌定餉章。上年九月。練兵處兵部奏定陸軍營制餉章。湖北照章編練兩鎮。第一鎮按第三年全數編練。第二鎮照新章之第一年編練。員弁正兵。一無增改。雜項委員人夫車馬及餉數。則量為撙節。年需一百零一萬一千六百八十八兩。游學日本諸生爭文部約束學校規則罷課。委員前往撫慰勸戒。是月。韓亡。適日本文部省頒規則整飭學校。限制濫收中國學生。時游學生在京者八千餘人。倡議力爭。各學堂學生皆罷課。歸國者四百餘人。公送電鄂生勸戒。委知府龔壽壽等東渡。勸令上課。學生亦有出而維持者。匝月始定。十二月。籌解翰林院研求實學經費。七月。翰林院奏請籌酌經費。與辦實學。奉旨著各督撫照數逐年籌解。九月。山西學政寶熙編修尹銘綬先後疏請裁翰林院。設學部。十一月。學務大臣奏請專設學部。以國子監歸併。其翰林院毋庸議裁。是月。公奏言翰林院為國家講古學儲人才之地。所關甚鉅。原奏所議大省一千。其次數百。漸不敷用。自應寬籌餉款。且冀各省一律多籌。經飭據司道籌議。由藩司鹽道江漢關道善後局每年共籌一萬兩。擬訂續籌章程成。伍侍郎擬訂續章寄鄂。網領具備。而近於簡略。屬上海英鐵師市虛特增訂。又參以日本續章。委員參校。覆加審核。於中國情形稍

有不宜者，必再三詳酌。冀免流弊。凡正章七十四款。附章七十三條。是月進呈。下外務部商部議奏。內有外人合股開辦一條。外務部以事關交涉。審慎未定。三十三年五月。奏請救催。八月、兩部會奏核定頒行。電致學部論學政應辦事宜。并請永留優拔貢考試。十一月。設學部。詢公以學政權限。公電覆云。通省文學堂應均歸學政考察。省城學堂會同督撫考核。各郡縣以時巡歷。如課程有應斟酌增損、教員有應甄別舉劾、隨時咨明督撫覆核施行。各種科學、學政未必皆能貫通、准延聘幕友、取明習學務通曉科學者。學政擬請專用翰林院衙門官員。近時惡習、無論官私何種文字、率喜襲用外國名詞。文體大乖、文既不存、道將安附。惟翰林官於舊日文學較有根柢。識解純正者居多。遇各學堂監督教員學生有宗旨悖亂文體謬劣附和亂黨邪說者。必能隨時咨明督撫懲罰糾正、以端學風。此次奏停科學、聲明優拔貢考試三科後即行停止。思慮尙未周密。應請奏明請優拔貢考試永遠留存。專取經明行修文學優長之寒賤。則中國文學於學堂外留此一線生機。實保存國粹之一道。按本集電牘佚此篇、今補。奏陳收回粵漢鐵路辦理情形。覆陳借款贖路原委。十一月、御史黃昌年奏論借款贖路之失策。奉旨、著張之洞據實覆奏。又、編修尹銘綬等條陳漢鐵路籌款用人購料事宜。著重不招洋股。部議由鄂督會商粵督湘撫、妥籌辦理。公分別具陳請以工程責之各本堂督撫。仍隨時會商咨部。奉頒賜欽定習經圖說一部。又奉頒賜福壽字各一方。皇太后賜御書福壽字各一方。眉壽字、幅。綢緞四卷。貂皮八張。是年。立太僕公墓神道碑。碑書二十九年十二月立、子培鹿傳霖撰、孫培黃紹箕書、按此碑年月、據公回籍之日書之、碑成在其後、黃學士書而未刻、其上石者、湖北知府無錫張望祀先生會疇所書。先生居公墓下垂二十年。掌機宜文字。書法得公指授。壬辰癸巳以後、凡屏聯匾額署公名者。皆先生代筆。書神道碑成。公肅衣冠具束帛踵謝。先生不敢當。公曰、禮應爾。勿辭也。宣統三年十一月。先生殉國難於黃州。所藏勸學篇原稿及公聯語手迹皆燬於火。同莘集先生書公奏議一冊印行。曰潛園墨迹。潛園、先生別號也。幕府工書而在事最久者。所知有會稽朱承均、鄧齋、番禺楊鐸少塗、上元王家槐植三、程鼈冠山、錢塘許寶芬、蒲清、吳縣吳大濂、溧陽、湘潭朱士宜少莪。諸人多

官州縣。惟少莪後補學部書記官。光緒之季、公與端忠敏公梁節庵先生書法皆爲鄂中仿倣。時稱三體。而潛圖得唐人神髓。參以蘇黃。少莪書宗北海。皆公所激賞。」

光緒三十一年丙午公七十歲

正月。奉陳議定粵漢川漢鐵路條款大綱。〔上年十二月、廣東官紳因籌款意見不合。粵紳黎國慶被禁。致電轉圜。故三省議定辦法。遲至是時入奏。〕京察考績。奉上諭、湖廣總督張之洞、誤慮精詳、力任艱鉅、著交部議敘。會奏川漢鐵路辦法已定、毋庸特派督辦。〔上年秋、廷寄、有人奏、川漢鐵路宜一事權、請特派大臣督辦、奉旨、著張之洞錫良議奏、公謂籌款購地、保護彈壓、皆需地方官出力、特派大員、有損無益、屬清弼制軍主稿會奏。原文略云、鉅工創舉。臣等同心籌策、斷無畛域之見。蘆漢借款而修。故以一人總其成。川漢則爲自辦。無論官款必須官集、卽民款亦須疆吏督察董勸。如另派專員、竊恐民情未悉、衆信未孚、措置立形扞格。公用官不過數員。紳則倍之。復設研究所、每事集紳討論。省內外更有總董分董。說者皆以上下情通、未有如今日者。總會辦既無薪水。公司出入、每月榜示。紳民曉然。何嘗有耗廢數十萬之事。原奏於情事均未得實。持論隔膜。應請毋庸置議。〕二月。聘日本工程師原口要等三人測勘川漢鐵路。〔限於勘路、不預他事。期一年、薪由鄂給。〕南昌法教士王安之逼知縣江召棠致死。〔民憤致變、焚教堂四、殺王安之及英法教士等八人。〕三月。奉旨飭查。派湖北按察司梁鼎芬前往查訪。飭官錢局停鑄銅元。〔河南西平遂平諸縣匪起。派兵出境、保護鐵路及附近教堂。〕湖北均州湖南平江皆不靖。飭地方官彈壓保護。并派兵一隊入湘。〔添撥湖南鎮守鎮營學息款。〕鎮守多材武忠勇之士。屢著戰功。故募營兵雖裁、而鎮守綏靖兩鎮奏改勇營、鎮守就營設學堂。教標兵子弟。聞其款絀。撥款六千兩資之。令生息充用。〔建羅忠節公祠。彭剛直公祠楊勇德公祠。修復岳鄂王祠。〕四月。駐通州湖北常備軍回防。〔上年九月。日俄和約成、外務部解中立條規禁令。十一月。中日東三省新約成。是月。撤畿輔備調之師。〕

奏旨、設各省提學使。閏四月、飭江漢兩縣夏口廳出示展寬街道。撥銀二十萬兩賑湖南水災。〔以十萬兩贖無湖米運湘賑糶。並免湖北境內米穀釐金。以來商運。委員赴河南購雜糧以濟湖北之缺。〕覆奏查明南昌教案情形。改設駐東鐵路學堂。〔就路鐵學堂改設。湖北學額六十名。外省一十名。三年畢業。畢業後概歸鄂用。〕五月、開辦印刷局。〔銀幣局新廠停鑄銅元。初議改設麵粉廠。以印刷需設專局。以防詐偽。塞漏卮。即就廠屋改用。〕建陳案庫。〔儲督撫兩署成豐以來案卷。在督署前。〕開議中義商約。〔義領事在滬送約稿十一條。一請開紹興無錫口岸。一助中國考求養蠶之法。設學堂局所代為經理。一推廣義商辦繭稅單期限。餘條為英美各約所有、而略變其詞。我亦開送國幣法權兩條。〕奉皇太后頒賞御筆菊花畫扇一柄。紗袍袷料各一匹。大雨。潯江漢川隄潰。〔麻城宜恩諸縣山水驟發。災區甚廣。撥款賑撫。撥案奏請開辦七項常捐。一年為率。〕刊布粵漢川漢鐵路招股章程。〔官督商辦。以華股為限。〕六月、建省城武泰崗。〔工程重要。分處三孔。每十日親往查工一次。每五日南司武昌府親往查工一次。〕批准商辦漢口水電公司。〔洋商前此請承辦及華商而附洋股者皆不許。至是職商宋輝臣等承辦。集資三百萬元。漢口商民占其半。管線經各國租界。派大員管理彈壓保護稽查諸事。撥官股三十萬元為股本。明年工竣。名曰沈成公司。〕委員分勘粵漢川漢鐵路地勢。〔襄陽至廣水路線略有變動。十月。委員測勘由沙市至漢口路線。十一月。委員僱工程師測勘宜昌至萬縣路線。如江北險窄。即棄勘江南自奉節至長陽一路。備跨江建橋。〕七月。以製麻局已著成效。奏請暫免稅釐。并飭各省仿辦。十一日。明旨仿行憲政。先將官制次第更張。并將各項法律詳慎釐訂。廣興教育。清釐財政。整頓武備。普設巡警。以預備立憲基礎。十二月。奉上諭、更定官制、事關重要。著張之洞選派司道大員來京隨同參議。〔派荆宜施道陳夔麟赴京。〕令兩湖新建新補州縣官出洋游歷考察。〔自備資斧。願久留入學者聽。年老曾任實缺者酌免。〕八月。七十生辰。蒙恩賞御筆寶星者質匾額。福壽字各一方。無量壽佛一尊。嵌玉如意一柄。蟒袍面一件。各色紗十六匹。皇太后恩賞御筆福壽字各一方。宏額上法堂。並贈寶新治重者英對聯一副。長壽字一軸。福壽字各一方。

畫牡丹直幅一軸。畫梅花挂屏四幅。無量壽佛一尊。嵌玉如意一柄。蟒袍面一件。各色綢緞紗十二匹。〔遠近咸欲知公勳績。時有抱冰堂弟子記一冊刊行。〕 中秋節。皇太后頒賞綢緞四匹。 九月。請鑄一文銅幣。〔上年冬。試鑄一文銅幣。以維銅元本位。子母相權。每一枚重三分二釐。以爲成本所虧有限。而銅元確有當十之價。官民交益。奏請飭所司籌議。務與銅元一式。各省仿製通行。〕 湖北常備軍一鎮與豫軍會操於湯陰。〔自春間即飭所司籌備。迄於事竣。凡費八十餘萬元。〕 中義商約停議。〔案湖口埠助辦程君諸款。商約大臣皆拒之。法權一款。義領事欲我參酌羅馬律。公謂於義修律有礙。外務部亦主駁開拒。義領事請停議。許之。〕 委道員高松如赴日本考察財政。〔湖北財政支絀。官錢局多方維持。又聞日本鐵路有官股商股之別。故委專員考察。札文有云。務須事事明其要旨。得其精義。詳加記錄。以備考鏡。〕 委知府鄺國華赴日本試驗礮艦魚雷艇。〔第一期造礮艦三艘。雷艇二艘。工竣先派員赴船廠試驗。十月。試驗事竣。委道員李瑞等前往驗收。歷日舟駕駛來華。名礮艦曰楚謙楚同楚泰。雷艇曰楚有楚口。三十四年。第二期船亦成。各船專備長江巡防之用。有摺入奏。本集失載。〕 十月。奉皇太后頒賞綢緞四匹。專設湖北鑛務總局。〔設洋務局鑛務科。以銀幣新局改設鑛務局。〕 飭江漢南縣勘買沿江鐵路所經地段。〔江西萍鄉匪起。派參將王得勝等率兵會剿。匪占萍鄉之上粟市。竄入瀏陽。先後派步隊六營。礮隊三隊。星夜馳往。致湘撫電云。萍嶺緊要。設有擾毀。無從補救。不比他處一戰利鈍也。又因岳州空虛。派一營填紮。十一月。湘軍剿匪平。撤鄂軍。留步隊一營礮隊一隊保護萍嶺。〕 奏定常德商埠地址。〔三十一年六月。湖南巡撫端方奏言。常德東門外皇經閣一帶。堪以建設商場。惟地勢卑下。尙須填築。方能合用。又對河之善卷村。形勢略高。或可預備擴充。作爲租界。部議照准。嗣有人奏言。前岳常澧道韓慶雲辦理常關。有准掛洋旗仿上海會審章程兩條。並不顧城隍。以善卷村爲商埠。恐貽後患。公先已據紳民稟詞。飭另擇地址。至是奉廷寄飭查。委員查復如所言。覆奏勘定距城十二里之楊泗宮至社木鋪。長七里餘。爲自開商埠。〕 十一月。覆釐定官制大臣論改各省官制利害。〔釐定官制大臣載澤等陸續起草。送軍機大臣核定。九月。奉旨改巡警部

爲民政部。戶部爲度支部。兵部爲陸軍部。刑部爲法部。商部爲農工商部。理藩院爲理藩部。以財政處稅務處併入度支部。太常光祿鴻臚三寺併入禮部。練兵處併入兵部。工部併入農工商部。設郵傳部大理院。大理院以大理寺改。以次設立資政院審計院。同時草訂各省官制。以大綱詢各督撫。公電覆數千言。極論其更張太多。有害無利。謂立憲本意在救專制之偏。果能好惡同民。雖仍舊無害。否則仍無解於上下之睽隔。似宜慎重。又言司法獨立不合中國情形。必致縱匪不辦。州縣法令不行。無從措手。皇太后聞之。謂樞臣曰。張之洞老成之見。何以其電未進呈。王大臣唯唯。明年五月。王大臣奏准改各省按察使爲提法使。增設巡警勸業道。裁分守分巡各道。酌留兵備道。分設審判廳。增易佐治員。次第施行。從東三省入手。其餘各省如實有情形不同者。准該督撫酌量變通奏明請旨。限十五年一律通行。○整頓湖南學堂。〔七月、學部以湖南士風日變、蕩佚範圍。奏請整頓。公奉旨隨時詳查學堂利弊切實整頓。即行布政使學務處籌議。嗣議復、慎擇師範、遴選敕令。研求德育體育知育三事。有踰越規矩者、斥退。飭照此實行。吳學司慶抵到任。又飭擇要探源、認真整理。并以學司兼充學務公所議長。〕奉諭、孔子萬世師長。宜升大祀。〔從刑部主事姚大榮請也。〕又奉諭、湖北按察使梁鼎芬奏、請建曲阜學堂各摺片。著張之洞督同湖北提學使、紹箕等悉心籌畫辦理。所需經費。即著該督籌辦。並頒發帑銀十萬兩。由山東藩庫發給。覆奏湘路商辦窒礙。仍應定爲官督商辦。并請明定章程。凡鐵路商辦者、三十年後由官收回一半。十二月、奉上諭、御史趙炳燾奏請定教育宗旨一摺。學術人心。關係至大。疊經降旨宣示。學堂以中學爲主、西學爲輔。培養人才、首重德育。並以忠君尊孔尙公尙武尙實諸端定其趨嚮。茲據該御史奏稱、曲阜學堂開辦伊始。請以明人偷重躬行爲要義等語。曲阜學堂應如何慎選師儒、注重行誼、著學部會同張之洞悉心妥議。詳訂規則。奏明辦理。設憲兵。〔吳元愷所部回防。選二百名爲憲兵。令統率之。稽察各軍。以餘勇爲備補兵。明年二月。設憲兵學堂。選鎮兵三十名入堂教練。〕再請暫免機器製麻稅釐。〔稅務處議覆前奏、撥製造土貨例、應仍完出口正稅一道。公奏言製麻藝術較精。與織布紡紗不同。仍請免稅。嗣議覆、物有精粗。即價有貴

賤。所請毋庸議。」改并黃防營武勝防緝營爲黃州巡防隊。（武勝防緝營五百名、黃防營二百五十名、分紮麻城一帶。營制參差。改編巡防隊三營。與施防宜防荆防漢靖等營一律。）訂漢口日本展拓租界合同。（日本原索沿江二百丈。外務部駁減爲一百五十丈。界內有雙昌火柴公司。公約以不得勒遷。其文云。界內雙昌火柴公司可照常開設。不致勒令遷移。雙昌公司亦應遵守租界章程。完納各捐。與日本商民一律無異。嗣有人奏、據日文譯本各捐作賦稅。商民作巨民。詆爲勒賈。奉旨查明具奏。公覆奏辨原摺之誤。詳見本集。又、龍王廟龜船一案。數年不決。至是議明限年收回、備文存案。）設武漢電話六線。奉御賜福壽字各一方。皇太后賜福壽字各一方。曼壽字一幅。衣料四卷。貂皮八張。是年夏。孫厚瓊奏於貴筑黃氏。子壽先生女孫。收回漢口比國租地。（京漢鐵路之始。比人於劉家廟一帶購地三萬六千餘方。索訂租界。公堅持不許。二十八年。外務部咨行統籌兼顧。許以濱江之地一萬六千餘方。比使意猶未足。催索不已。公議給價收回。凡費銀八十一萬八千餘兩。磋商經年而定。）

### 光緒三十三年丁未公七十一歲

正月。招商運米濟民。（以湘贛禁米出境也。招川商販運。免稅釐五月。）二月。遵旨委商津鎮鐵路事宜。（光緒二十五年。督辦鐵路大臣與英德銀行訂草合同。德人築路自天津至嶧縣爲北段。英人築路自嶧縣至鎮江爲南段。借款七百四十萬鎊。期五十年。款未還前。一切由銀行調度。二十八年。奉旨派袁世凱爲督辦大臣。議合同未定。至是。三省官紳請收回自辦。奉旨著袁世凱張之洞妥商辦理。公與北洋電商。知原訂合同所以補救膠州條約。路約廢則膠約行。爲慮更鉅。然不能不籌辦法。合詞請派新簡使英大臣梁敦彥會籌。與英德商論。並屬道員高凌霨赴京津接洽。）三月。停鑿公山外人建築工程。（外國人在豫鄂兩省者。於鑿公山建屋避暑。由教會向居民購地。轉售於人。築馬路、設公所。儼成租界。山當兩省之交。豫撫命所屬飭工人停工以待交涉。鄂亦照行。三十四年。議定收回山地九百三十三畝。作爲兩省官地。別訂租屋避暑章程。

程。許外人居住。其雜屬教堂者仍之。凡三百四十七畝。〔議先築武昌至涪州鐵路。〔鄂作武昌至岳州一段。湘修岳州至長沙一段。萍鄉鎮局築長沙至涪州一段。每段又分數小段。同時並舉。期以一年半竣工。盛侍郎允設法闡成。〕四月。團購蒲圻鑄鏡。〔杜洋商影射私購也。〕與義士民建太僕公祠成。〔定制、應祀名宦而子孫現任九卿者、不得請。與義士民爲私祠以祀太僕公。祠成。寄團象至。公寄千金置祭田。兼爲葺修用。并寄千金助興義學堂經費。招生十人來鄂肄業。〕五月。添闢武昌城門。〔粵漢鐵路繞城三面、而馬頭距城北十餘里。乃於城之東南隅闢門曰通湖。城內開馬路建市房以資之。〕奉皇太后頒賞御筆畫紅蝠靈芝並題三秀延齡扇一柄。紗袍鞋料各一匹。十一日。奉旨以湖廣總督協辦大學士。議津鎮鐵路借款自辦大綱。〔廢約寧無可商。改議借款自辦。郵傳部亦以借款造路爲各國通例。德華銀行總辦柯達士來商。手書十五條示之。告以不能踰此範圍。詳見電牘。〕安徽有戕害巡撫之變。委文武大員率兵赴安慶彈壓地方。〔安徽巡撫恩銘。爲逆員徐錫麟行刺出候。公立派第八鎮統制張彪道員李福率兵乘軍艦往。方事之起。安徽司道倉卒請兵。旋以人心已定、請中止。公謂安危相聞。即不請、亦當派兵鎮衛。嗣江南軍至、即撤回。〕奏設存古學堂。〔學堂籌備已久。手定章程。經史詞章爲主課。博覽子部學算學輿地學外國史政治法律理財農工商實業博物理化諸學爲通習課。人人須習體操。七年畢業。就經心書院故址改延。學額二百四十名。附近設外國語文學堂。准自行兼習。畢業後照高等學堂例請獎。補充各學堂文學專門之師。〕造省城模範監獄成。〔經始於三十一年十月。是月竣工。仿日本東京與鴨監獄之式。分內外監病監女監。容五百八。定約束齊恤勸善習藝諸章程。籌撥經費。奏明立案。〕六月十四日。奉旨授爲大學士。仍留湖廣總督之任。十八日。奉旨充體仁閣大學士。二十九日。因病奏請給假二十日。〔原奏略曰、臣近數年來。時多疾病。精力已衰。特以受恩深重、地方緊要。湖北爲南北鐵路交匯之區。關繫大局。不敢不勉力圖維。且以臣受任湖廣已歷十有餘年。地勢民情、各項政事原委。稍可窺伺。尚可強爲支持。從容籌辦。邇來時局多艱。事變緊急。措置一切。事事皆形棘手。以致鬱怒傷肝。怔忡不寐。延醫診視。據稱心血虛

耗。非靜心調養、藥餌遂難見功。合無籲懇天恩。賞假二十日。俾可稍得餘閒。藉資靜攝。以冀早日就痊。所有循例各事。暫委藩司代拆代行。其緊要事件。仍由臣自行辦理。不敢稍涉疏虞。」請頒明旨除滿漢畛域。〔皖案既起。人心惶擾。各省土匪皆蠢動。會日法兩國立協約。聲明尊重中國獨立自主及其土地之保全。御史屢督奏、日法協約、事機危迫。請飭議抵拒之策。外務部電徵意見。公以爲法日之意不過防德。不必深求。欲禦外侮、先靖內亂。探原扼要。惟有請頒諭旨布告天下、化除滿漢畛域。令各衙門詳議切實辦法迅速施行。三十日電奏。奉懿旨立命各衙門將切實辦法議奏。〕七月初二日。奉旨張之洞著迅速來京陛見。有面詢事件。〔是日軍機處來電云、皇上聖躬欠安。各省如有精通醫理人員、卽據實保薦。迅飭來京。〕奉到硃批賞假二十日。假滿迅速來京。〔此奏請給假片硃批也。奏到在內召旨後。〕會奏妥議沿江巡緝章程。〔六月中、奉旨以沿江匪徒充斥、飭各督撫會商查緝辦法。并飭長江提督常川梭巡。勿拘常例。湘撫議請簡廉明剛正之大員授以巡江之任。公謂其人實難。此時重在查緝、不在更張。與端忠敏往返電商、由兩江主稿會奏。略謂宜整頓原有巡緝隊、多養練勇、湘贛皖三省互通消息。不分畛域、以助長江水師所不及。長江提督將師船切實整理、不時梭巡上下游。江鄂各撥兵輪一艘應用。每營發後膛礮五尊。無論何省境內、如需運船步隊一切器械。均由該省酌撥應付。各省應各選派步隊礮兵扼要屯紮、添製輪船一二艘、停泊左近、一有警報、立卽開駛捕擊。其私運軍火者。江海各關加意盤查。嚴防接濟。員弁疏防兵勇通匪者嚴懲。竊獲匪首者擇尤保獎。奏入、奉旨妥速籌辦。湖北設水陸行駐四隊、曰水陸巡緝營。時新設巡警道缺。奏准以知府馮啓鈞試署、委其兼帶。〕遵旨禁煙。議煙膏專賣。請外務部商英使遞減洋藥進口。〔三十二年八月、明旨禁煙。限十年內盡除洋土藥之害。十月。政務處奏定章程十條。曰限種罌粟以淨根株、分給牌照以杜新吸、勒限戒癮以蘇痼疾、禁止煙館以清淵藪、稽查煙店以資稽察、官製方藥以便醫治、准設戒煙會以宏善舉、商禁洋藥進口以遏來源。十二月、民政部奏准於六個月內封禁煙館、逾限不禁者、該管官分別懲辦。湖北省城煙館如期禁絕。各府亦限期嚴禁。江甯議設專賣官膏局。湖北繼之。官爲督熬、商自買

賣。英使有煩言、公電致外務部言無礙洋藥銷路、請商英使、將進口洋藥逐年減成、預算立表。各省按額照減。如未屆期禁絕。應籌議如何停徵。」存古學堂行開學禮。保薦道府鎮協五人。〔節錄原奏。湖北試用道高凌霨、心地光明、才器幹練、剔除積弊、甚有擔當。試用道齊耀珊、見事明敏、才具開張、公爾忘私、不爲利疚。試用道鄒履和、性情誠篤、宅心敦厚、殫心民事、條理精詳。均爲有用長才。湖北候補知府汪鳳瀛、才具優良、識力幹練、每遇中外交涉事件、委令辦理。論事解紛、悉中窳要。臣深資其得力、現署漢陽知府周以翰、守潔才優、周知民隱、辦理漢口警察、規畫周詳、商民稱便、均爲湖北知府中最高出色之員。湖南記名總兵梁國楨、疊著戰功、去年萍鄉匪亂、擾及瀏陽、該員馳往剿辦、布置井然、居民恃以無恐。沅州協副將崧煜、訓練認真、不辭勞瘁、亦係湘省實缺將領中出色之員、以上兩員、均屬才堪專閫。〕會奏合粵湘川鄂四省建鐵路材料機器廠。〔原奏略曰。鐵路之利、盡人皆知。籌款之艱。各省如一。苟可以節省經費、減輕資本、必竭力設法減省。查造路用款、以購買鐵軌車輛橋梁爲大宗。除鐵軌購自漢陽鐵廠外、餘如車輛橋梁又軌、漢廠尙未能造。此外應用鋼鐵材料機器甚多。若一一購之於人、靡費實多。於造路經費不無損礙。現經臣之洞董商護理兩廣督臣胡湘林、護理四川督臣趙爾豐、湖南撫臣岑春煊、暨三省鐵路公司紳董等。凡粵漢川漢甯路所需鋼鐵各料、擬合資建設一廠。自造自用。不必購之於人。已於武昌省城外濱江之下新河地方擇地設廠。將來造成之件。概照工本核實發售。計資本約先需銀四十萬兩、陸續周轉。每省各由股款內提十萬兩先行試辦。由四省派人公同經理。該廠贏餘之資、仍得分還之於股款。謹先將辦理大概情形陳明立案。至廠中所出各料、應援案懇恩准予豁免出口稅銀、以培商力。〕二十七日。奉旨補授軍機大臣。請移光化縣治於老河口。〔老河口水陸交衝。盜賊出沒。而縣城相距十五里。奏請移治於此。其縣學壇廟學堂、概仍舊址。〕請暫免大冶商辦水泥廠稅釐。請獎各學堂畢業生管理員教員。〔湖北文武各學堂開辦逾十年。畢業生在三千人以上。管理員教員任事自三四年至十餘年不等。分別照章請獎。並奏保按察使梁鼎芬辦理學務多年、學畫精詳、勤勞最著。又內閣中書紀鉅維、霍山縣知縣楊守敬、貢生馬

貞榆、通判銜湯金鑄、羅照滄、郎中曹玄英、篤學專精、成材甚衆、尤爲卓著。奏請特予表章。」八月。手書傳示各學堂各營。停造有象銅象。（鄂人議建風度樓、爲公鑄象。手書止之。云：治楚有年、無功德及民。且同心難得、事機多阻。往往志有餘而力不逮。所能辦到者。不過意中十之二三。此舉徒增愧疚。不以君子相期。萬萬不可。）初二日。交卸篆務。（湖北布政使李岷琛護理）。初三日。渡江北上。

甲辰回任。方冀大局稍安、乃未幾而京師有吳樞之案。安徽有徐錫麟之案。沿江人心震動。兩江三年之間。四易總督。乙巳夏、周玉山督部爲言路所劾、內意又議以此席屬公。因電致璽相云、路事甫就範圍。一有調動、全局瓦解。在鄂二十年、人地相習。兩江權分力絀。斷難措手。如必見施行、惟有引疾而退。丁未六月。傳聞項城入軍機、端忠敏督直隸、公調兩江、已內定矣。公電致鹿文端云。鄂省十八年心力、拋於一旦。衰病侵尋、豈能再創新居。惟有乞退而已。因即日具疏請病假二十日。其隱辭兩江而不辭樞府者。張袁並用。宮廷具有深意。去就之際。朝局繫焉。詩集自丙午以後、惟讀宋史讀史絕句若干首。更無登臨飲讌之作者以此。

甲辰之夏、有人倡議會奏、請立憲法。項城密告岑西林、公聞而訝之。丙午六月、考察政治大臣歸國、行抵上海。以立憲事徵公意、公電復云、立憲事關重大。如將來奉旨命各省議奏、自當竭其管窺之知、詳晰上陳。此時實不敢妄參末議。七月、明旨宣行中外、預備立憲。即據載澤等陳奏。初未令各省與聞。蓋建議者逆知各省必有異同。故逕請宮廷獨斷。部院改制、自起草迄於施行。不及兩月。各省官制亦同時草定。主其事者、惟編制處數人。各省雖派參議之員、不得而聞也。議既定、乃舉大綱電詢各督撫。公覆電具見集中。又電致張復慨云、外官改制、窒礙萬端。若果行之。天下立時大亂。鄙人斷斷不敢附和。倡議者必欲自召亂亡、不解是何居心。京電催迅速作復、尤怪。事關二百餘年典章、二十一省治理、豈可不詳慎參酌、何以急不能待、必欲草草定案耶、足下不宜言去。如鄙人之衰朽迂庸、憤懣填膺、無能補救、乃當速乞罷耳。陸副憲寶思疏云。自改定官制以來、大臣不和之事、時有所聞、其機實起於細微、而其害劇

至於傾軋。當茲舉行新政之時，亟宜以鎮定從容爲宗旨。用人尤宜審慎。設或輕作更易，如舉棋之不定。恐人心益復張皇，謠言紛起，奸民生心，將啓變亂之漸。此疏上於丁未六月。公因病乞假。正其時也。丁未春。西林入覲。召對，極言某疆臣權勢日重，自請得留闕下願爲狂犬，守夜當門。太后聞而動容。遂命長郵傳部。未幾，趙侍御啓霖劾新設疆臣銜緣親貴，物議沸騰，辭連慶邸父子。詔以查無實據，革趙啓霖職。臺官皆不平。將繼起劾奏。有旨允貝子載振奏開去農工商部尙書缺及一切差使。手詔慶親王奕劻出軍機。鹿文端叩頭奏言，慶親王有庚子留守之勞。且心實無他，乃已，某疆臣疑岑之內用，趙之彈劾，輒廷必有主之者，密屬某公勸樞臣暗遞報館，授意言官，陰結外援，分布黨羽。於是罷協揆被謹放歸田里。故事，協辦大學士缺出，開單請簡，不及外臣。會慶邸不自安。又別無進言者，而公以持正不阿，力挽學風士習，皇太后屢加褒獎。越二日遂有入閣之命。慶邸既被罷，卽日出都過夏口，欲渡江相訪，公曰，是實朋黨之說也。必不可，乃乘舟船江心。置酒話舊而別。其時人以入相爲公賀。不知幽憂孤憤乃什百於平日也。

丁未五月。懿旨。立憲之道，宜如何逐漸施行。凡有實知所以預備之方，施行之序者。准各條舉以聞。在京呈由都察院衙門，在外呈由各地方大吏詳加甄核，取其切實正大者，選錄代奏。梁按察鼎芬專摺奉陳預備立憲第一義。請罷項城督直，黜慶王出樞府。登摺後公始聞之，太息不已。以朝局杌隳。鄂吏不宜爲此言也。

粵漢鐵路苦心收回而又議借洋款。不得已也。借款造路。而預計洋債償還以後，官股商股永遠各占一半，則所以爲地方計，爲人民計，而非局外之所知也。所謂官股者，指一省之款別於部款而言。戊申之冬，在京議川漢事，電致高澤奮學使云。當初鄙人所以力主路歸鄂省官民自辦者，意在使民股永占一半，爲鄂民總百世之利。湖北官股亦占一半，爲鄂省司局幾籌百十萬之鉅餉，以辦各項新政，即可爲百姓免派累。是公發百世之利，亦即爲鄂民百世之利。又學使告鄂紳。宜呈請代奏，由鄂省籌借外債速卽照辦。卽以路利

籌還借款。永爲鄂官民各半之路。此於官股民股之別、坦然明白矣。

科舉旣罷、學者不復知中國文字可貴。於是湖北設存古學堂、奏摺有云。道微文敝。世變愈危。臣殫心竭慮、籌計經年、商榷數十次、始克擬定大略、以存國粹。息亂源。存古學堂章程教法。示學者以入門之路、漸進之方。視奏定大學堂章程爲密。先後延孫仲容主政爲監督、曹叔彥中翰爲總教習、皆不就、會趙侍御罷職歸、敬其風骨。延之主講。已允矣而不果來。最後奏留楊惺吾大令爲總教習。稱爲鄂省舊學宿儒之首選。定章設總教四人、協總教四人、皆須通儒宿學。開館之日、講席猶虛。蓋師資難得如此、故曲阜學堂雖明旨救辦、竟不及草創規模。非卸責也。乃重難其事也。

抱冰堂弟子記。嘗語僚屬曰。自官疆吏以來、惟在晉兩年、公事較簡。此外無日不在荆天棘地之中。大抵所辦之事、皆非政府意中所欲辦之事。所用之錢、皆非本省固有之錢。所用之人、皆非心悅誠服之人。總之不外中虛勉強而行四字。

# 卷十

八月初五日、至京。〔寓畿輔先哲祠。初六日宿賢良祠。〕初七日。詣宮門謝恩。召對。即日入直。  
〔新任鄂督趙次珊督部在京、以鄂舉告之。〕初九日。側室秦氏卒於武昌。〔諭諸子勿受賻弔。〕十四日。  
奉旨在西苑門內乘坐二人肩輿。十五日、奉旨。管理學部事務。十八日、兩宮幸頤和園駐蹕。〔公移寓  
法部公所。〕二十三日。奉上諭敕學部通籌教育普及善法編輯精要課本。九月二十六日。兩宮移駐西  
苑。〔公仍寫先哲祠。冬寒、入值不便。袁宮保方寓東安門外北洋公所。言公所有別院在錫騰胡同。地近可  
居。乃移寓錫騰胡同。一日袁見客自外省來者、問謁張中堂否、曰、未見公、不敢往。曰、信然。昨見門  
簿。猶無汝名也。〕十一月。奉旨、賞穿帶襟貂褂。奉上諭。比年士習頗見澆漓、不能專心力學。動思越  
越範圍、干預外事。或侮辱官師。或抗違教令。悖棄聖教。擅改課程。變易衣冠。武斷鄉里。甚至本省大吏  
拒而不納。國家要政任意要索。動輒擅寫學堂全體空名電達樞部。以致無知愚民隨聲附和。奸徒遊匪藉端煽  
惑。大爲世道人心之害。欲挽頹風、非大加整飭不可。著學部通行京外有關學務各衙門、將學堂管理禁令廣  
爲刊布。嚴切申明。並將考核勸戒辦法前章有未備者補行增訂。責令實力奉行。總之以聖教爲宗。以禮能爲  
輔。以理法爲範圍。以明倫愛國爲實效。若其不遵、敢違經緯道之論。其究必終爲犯上作亂之人。並着學部隨  
時選派視學官分往各處認真考察。如有廢棄請經請經功誅、荒棄國文不習、而教員不問者。品行不端、不安  
本分、而管理員不加懲革者。不惟學生立即屏斥懲罰。其教員管理員一併重處。十二月。議定津浦鐵路英  
德借款合同。〔梁侍郎與英德公司議分借款造路爲二。別指的款作押。給以現息。以抵餘利行用。使不能干預  
路權。還本還利、仍取給鐵路進款。外務部與三省商定。以每年釐稅三百八十萬作保、公與袁宮保議、應以  
膠濟所載各路線併入津鐵路。德使無異詞。惟聲明原約所載德州至正定、及兗州過濟甯至開封兩段。十五年

內由中國自辦。倘用洋款，須向德華銀行商借。遂照此定議。改稱津浦鐵路。借英金五百萬磅。三十年爲期。十年後可提前清還。造路管理之權全歸中國。聘用英德兩總工程師，其合同由督辦大臣自行獨訂。嗣又奏所有鐵路借款股票在國家清還借款之時。應准三省紳商自集成本，將股票撥與一半，任其收回，卽爲官商合辦之路。明年三月，又奏、鐵路經過安徽，請准皖省紳商將來集股收票，與三省一律辦理。先後奉旨允行。翰林院以經筵講官一缺請旨。奉硃筆圈出張之洞。

光緒三十四年戊申公七十一歲

正月。孫厚瑜生。三月。奏請改津浦鐵路南經安徽、許江蘇商民築路自徐州達清江浦。〔督辦津浦鐵路大臣呂尙書、會公及袁宮保奏言、光緒三十二年、商部奏准江蘇紳士籌辦本省鐵路、曾聲明自江以北由海州經徐州、以達於豫。海徐一路、自應遵照奏案。由蘇路公司籌築。現考諸輿論、采諸衆議。南段路綫必改由皖境取道洪澤湖以西。則江北淮揚海等府州商務繁盛之區、凡在洪澤湖以東者、皆與此幹路隔絕。江北商民未免向隅。請自徐州橫造枝路達於清江、以利江北商民。此路儘先准江蘇商民集款修造。限四年內與幹路一律告成。倘所築軌道尙未能與津浦相接。則官爲集款、卽從徐州築枝路以抵清江。屆時仍酌定年限。准公司限滿備款贖回一半。與津浦幹路均作爲官商合辦之路。以歸畫一而昭平允。嗣又奏、十年後官商合辦。無論何年不得退還商股。均奉旨允准。〕奏上會議幣制說帖。〔銀幣重一兩、重七錢二分、尙無定論。政務處會議、公與鹿文端袁宮保各具說帖以進。此件爲公手稿。本集失載。附錄於此。〕幣制說帖簡明總要 一、宜用兩錢分益。國家取諸民之丁漕、取諸商之釐稅、皆以兩錢分釐計。若更改折算、必多擾累。民間新舊債帳、必多膠葛爭訟。恐致天下擾亂、貽患無窮。一、宜用足色、不宜用九成。收發自應一律。國家既發九成之銀幣。則商民輸納於官者亦均係九成之銀幣、我國官民流通、以此入者以此出。其盈虧尙可不計。惟每年交付賠款數千萬及付購買外洋貨物機械之價、外人斷不肯認我之銀幣爲十足、祇作九成計算。前年英公使已有

照會明言不認。則每年所補太鉅，約須五百萬以外。此款實誰所出。一、中國商民用銀元者，仍以兩錢分釐計算。上海即是如此。他埠可知。一、中國用元之人少，用兩之人多。除沿江沿海商埠外，皆罕用銀元。故銀幣行用多少當以人數計。不當以財數計。內地之繁富雖不如沿江沿海。然民數既多，則改兩爲元，尤多窒礙。且致騷動。一、國幣足色虧耗無慮。州縣交司道庫，外省交部庫。若銀色平頭或有不足者。儘可批迴掛欠。令該省及該州縣照補，斷無人敢於抗違。一、鑄幣工火所虧，可設法彌補。每一兩國幣一枚，工火雜質不過三分。可以補助幣之小銀元餘利彌補之。如尙不敷，可以銅元餘利補之。如再不敷，可以紙幣盈餘補之，更無再虧之理。一、國幣一兩不虛其太重。現擬鑄每枚重一兩者及每枚重五錢者。此二種均爲主幣。又鑄每枚一錢及五分者，均爲輔幣。五錢較七錢二分者，其實更輕，尤便攜帶。合五錢之幣二枚卽是一兩之幣一枚，於輸納官款亦無不便。至或慮長民用奢侈之習一節。更決無此事矣。一、各項銀塊銀元祇作爲生銀。不作爲幣。舊日各省元寶銀錠，及各國銀元，暨各省官局從前所鑄七錢二分大元，以及各項小元。暫聽其行用民間，勿庸收回。但漲落聽之市價，視爲一種生貨而已，惟斷不准繳納官款。於國幣自無妨礙。」

四月。學部奏准停高等教育變通招考之例。（原奏略曰，奏定學堂章程，自初等小學以至大學畢業。升學皆有一定資格。惟因開辦之初，及裕者鮮，而逾時失學者多，故暫定爲變通考選之法。並經逐條聲明，此例於學堂開辦合法五年以後，卽不行用。是學堂本以循序遞升爲正辦。自定章頒行以後，將及五年，臣部考查各省學務情形，大都省城則注重高等學堂，而中學或猶未備。府城則注重中學，而小學或僅數區。州縣設高等小學堂而初等小學或竟未設。其故皆由辦理學務者但知援據變通招考之例，而不問學堂程度果否如奏章所云。遷就招收，寔失本意。而其流弊所及，則各處皆聚一方之財力，辦一二名稱較崇之學堂。於小學不復措意。學生亦不自揣其學力，但冀考入名稱較崇之學堂，以爲僥倖獎勵之地。越級躡升，無由深造。欲救此弊。非立將高等以上學堂變通招考之例先行停止不可。擬請自本年六月爲始，凡學堂之屬於高等教育者。概不得招收未經中學堂畢業之學生，以期深造。至中學以下及各項選科，尙可略寬期限，以待年長失學之人。

惟須明定資格。增設豫科。並由臣部體察情形，分別停止招考。以求漸加嚴密。庶數年以後，普通畢業者漸多，而高等學科乃有精深之望。按學部奏摺，管部大臣領銜，稿皆經公核定。故錄其尤要者。會議政務處憲政編查館雖軍機大臣兼領。而奏事以親王領銜茲不錄。〔兩宮幸頤和園駐蹕。是年春。公於頤和園附近之六郎莊構屋十餘楹。莖花種竹。為退朝燕息之所。門外皆農田。命以十畝種荷。畝給租十兩。明年。隆裕皇太后罷臨幸頤和園之典。公不復至。莊宅遂荒。〕五月。德宗景皇帝有疾。〔命各省保薦良醫。鄂棟擬以呂用賓薦。公以為可。用賓請脈。言虛損已甚。惟進清補之劑。〕學部奏新定刑律草案有妨禮教。請救修訂法律大臣與舊有律例詳慎互較。擇善而從。〔四月。薦吏部主事勞乃宣學問淹通。心術純正。詔以四品京堂候補。在憲政編查館行走。嗣選派資政院議員。乃宣議刑律。以不悖禮教為主。爭之最力。〕六月。〔學部奏准設女子師範學堂於京師。暫招簡易科兩班。〕二十日。奉旨諭。陳啓泰奏粵漢鐵路宜定統一辦法懇速派廉副大員督辦路務一摺。粵漢幹路關係南北交通。最為重要。前經張之洞收回自辦。極費經營。乃數年來官紳商董意見參差。迄無成效。長此因循。必至貽誤路政。著派大學士張之洞兼充督辦粵漢鐵路大臣。會商郵傳部及三省督撫。督飭在事官紳商董。認真籌辦。所有路務大端。由該大臣通籌三省全局。體察情形。隨時主持裁定。七月。學部奏分年籌辦京師分科大學。〔原奏略曰。奏定學堂章程內開。京師大學堂為各省弁冕。規模建置。當力求完善。以樹風聲。現在京師大學預科學生。本年冬間即當畢業。自應遵章籌辦分科。以資深造。查分科大學列為八科。經學、法政、文學、醫科、格致、農科、工科、商科。皆所以造就專門之人才。研究精深之學業。次第備舉。不可缺一。所有開辦經費及常年經費。允宜指定的款。分年籌辦。以宏造就。明知度支奇絀。但念人才為百事之根本。現在整飭吏治。籌議邊防。儲備外交。振興實業。若不養成以上各項人才。則雖日言變法。龜勉圖功。恐事事乏才。斷無成效。臣之洞與臣載澤等再三商酌。分科大學實難緩辦。擬懇准由度支部撥給開辦經費二百萬。分為四年撥給。或不至為難。而建築設備所需。更可以從容籌備。又奏曰。大學分科。明年必需設立。德勝門外校場地方。前經奏准撥用。該處地方廣闊。遠隔

市廛。以之建造經法文醫格致工商七科、均屬敷用。惟農科大學應以附近林麓河渠之地爲宜。查阜成門外望海樓地方、葦塘、官地約計十六七頃、若就其地勢開濬溝渠。堪爲農事試驗場。附近民地、亦可購買、建築農科大學。惟該地係歸奉宸苑收租、當經商閱該管理王大臣、請以撥用。擬懇恩准賞給開辦農科大學。又奏派翰林院編修高衍瀛學部主事何燿時前往日本考察大學制度及一切設備建築事宜。均奉旨允准。〔初三日、啓用督辦粵漢鐵路大臣關防。〕鐵路經粵省者、紳商集款有著。湘鄂兩省起武昌迄郴州路長一千七百餘里、官款籌撥無幾。民股亦祇百數十萬元。不得已仍議借款。鄂紳言借洋款不如用部款。告以部款仍從借款而來。撥部款則利歸於部。無益外省。洋款非不可借。祇須嚴定限制。如津浦合同之例。路權絲毫不失。鄂紳無異言。是時郵傳部籌贖京漢鐵路、借匯豐匯理兩銀行英金五百萬鎊。奏明以八成爲預備補足還鐵路借款。以二成爲自辦工藝實業之用。指直鄂江浙四省雜捐充款作抵。銀行不得有絲毫問事之權。公謂部款卽洋款者以此。〕學部奏定考試游學日本畢業生、先試普通學及日文日語之例。〔原奏略曰。日本私立大學日多。所以中國學生、程度每多遜就。且往往有名雖在學而終年在外游蕩。實在到堂聽講歸齋自習之日、並不甚多。甚有入學一二年而已自專門部升大學畢業者。若非嚴加甄核、輒准其一體與考。弊混以欺世、則謬種流傳、大有害於後進之人才。冒濫而得官、則濫竽盈庭、何足以供國家之任使。擬令在日本私立法政各大學畢業之學生、除由普通畢業升入、呈有普通畢業文憑者外、概於考試之前、先由臣部考驗普通學之大要及日文日語一場。合格者均准考游學畢業。以重名器而杜弊端。尋旨依議。〕九月。奉上諭顯奕武王夫之黃宗義均從祀文廟。〔上年正月御史趙啓霖奏、請將大儒王夫之黃宗義顯奕武從祀文廟。旨下禮部議。嗣禮部考舊案、禮部左侍郎郭嵩燾湖北學政孔祥霖奏請夫之從祀、江西學政陳寶琛奏請宗義奕武從祀、均經議駁。因移會各衙門開送說帖。則主並准從祀者十之九。至是覆奏言、夫之宗義奕武皆有闡明聖學傳授道統之功。而奕武尤醇乎其醇者。奕武所著宅京記肇域志郡國利病審。所言皆天下大計、卓然名論。惟夫之所著黃書、其原極諸篇託旨於春秋。宗義所著夷待訪錄、其原君原臣諸篇復取義於孟子。語近偏激。請宗俎豆。矜式

方來。恐學子昧於論世知人，將以夫之宗義爲口實。至於流傳刊本，聞留墨匡。疑涉指斥。或爲該故儒病，則聖朝向不以文字語實罪人。豈有轉設文網以繩前朝遺老。臣等以爲是非聽諸天下，固見公論於人心。予奪出於朝廷，尤待折衷於宸斷。擬將願炎武從祀請旨准行。王夫之黃宗羲等一律從祀，恭候聖裁。禮部右侍郎郭邦新單銜疏言、三儒持論雖有異同，大旨並無踳駁。崇祀三儒。於尊孔之旨正相發明。疏入，旨旨均准從祀。公翊贊力也。」禮部學部會奏文廟工程辦法。（學部尙書榮慶辦理文廟工程。大成殿前地狹不便展拓。禮學兩部會商定議。參稽禮制、相度地形、采九楹三階五陛之規，以備典禮。不加行廊夾室。先師神牌改金地青書。餘皆朱地。改崇聖祠殿五楹爲七楹。與大成殿皆覆黃瓦。屏垣垂柱等飾改用黃色琉璃。）二十六日。兩宮移駐西苑。（公移居地安門外白米斜街。）十月初四日。奉上諭。前以粵漢鐵路最關重要。特派軍機大臣大學士張之洞爲督辦大臣。近詢該大學士籌辦鐵路情形。據稱該路專權紛歧、議論淆雜。諸多窒礙、等語。該路交通大有關係、詎可長此延緩。嗣後該路籌款用人、與利除弊各事宜。悉責成張之洞統籌全局、方任勞怨、嚴定期限、各就三省情形分別妥訂章程、因時制宜、主持定斷。郵傳部暨湖北湖南廣東各督撫須均實力協助。不得掣肘。所有各該省原派之總理協理均聽節制。在事官紳商董、倘有營私舞弊、煽惑把持、以致妨害路政各情事、卽著張之洞據實參辦。二十一日。皇帝崩於瀛臺。二十二日。皇太后崩。（景廟氣血素虧。上年秋間不豫。徵各省良醫診治無效。皇太后自是年夏秋間時有不適。眠食失宜。然十月初六日。上御紫光閣。賜達賴喇嘛宴。初十日。皇太后萬壽。宮中聽戲。猶無恙也。萬壽節後。皇太后遽以疾聞。十三日。卽命慶親王奕劻驗收普陀峪工程。景廟病亦劇。至十八日而傳聞兩宮皆垂危。十九日。上諭。奉皇太后懿旨授醇親王載灃爲攝政王。命王長子在宮內教養。二十一日酉刻。宮車晏駕。皇太后命攝政王監國。以王長子入承大統。承繼穆宗毅皇帝爲嗣。兼承大行皇帝之祧。二十二日。嗣皇帝登祖母皇太后爲太皇太后。兼祧母后爲皇太后。太皇太后諭、嗣後軍國政事均由攝政王裁定。遇有重大事件、必須請皇太后懿旨者。由攝政王隨時面請施行。是日未刻。太皇太后崩。距景廟上賓僅一日。此數日中。

公入宮議事。無間晝夜。受遣定策。其詳不得聞。第聞景廟崩後。軍機大臣入障。皇后自內出。卒然問曰。嗣皇帝所嗣者何人也。諸臣未卽對。公對曰。承嗣穆宗毅皇帝。彙祧大行皇帝。又問曰。何以處我。對曰。尊爲皇太后。曰。旣如是。我心慰矣。遂哭而入。時王大臣有議調兵入衛者。公謂毋庸。惟請度支部放款周轉京師地面。安定人心。公薨後論祭文有云。自兩宮之奄棄。彌巨職之憂勞。七閩不驚。共球無恙。陳師傅爲公墓誌。稱公以顧命重臣、鎮綏內外。文字可徵者止於如是。其功則非臣下所敢居。不詳可也。安徵兵變。攻省城。十一月。匪平。〔自遭國卹。申嚴宮衛之禁。而沿江沿海匪徒思逞。造言生事者甚衆。詔步軍統領順天府尹各省督撫飭所屬嚴密訪緝。安慶營兵遮乘機叛亂。撲攻省城。皖撫督兵剿辦。叛軍向皖北而遁。餘黨尙五六百人。詔以皖北多伏莽。倘煽惑乘脅。立成大股。飭各營彙程追剿。防其設伏困圍。逾月而匪平。方事之亟。湖北派兵艦出境官剿。先是趙次珊督部議公造江防諸艦廳費鉅益。及是水陸助剿。頗得其力。陸軍部鐵尙書欲以湖北艦隊直屬於部。公向慶邸方陳不可。慶邸爲尙書言之。乃已。〕初九日。嗣皇帝登極禮成。以明年爲宣統元年。是日。粵漢鐵路開工於長沙。會議監國攝政王禮節。二十六日。以恭上隆裕皇太后徽號。奉上諭。軍機大臣等忠清亮直。竭贊維勤。勞怨不辭。深堪嘉許。張之洞著賞加太子太保銜。賞卹紫纒。是月。設督辦粵漢鐵路公所。〔在地安門內油漆作。原設之鄂省粵漢鐵路總局。改爲粵漢鐵路駐鄂分局。公薨後。路事移鄂傳部接辦。梁節庵先生擬編通書。改公所爲廣雅書局。其五年。以費絀停止。〕議湖南北境內粵漢鐵路借款。〔借款事商外務部以爲可行。駐漢口英領事派中英公司經理人璞蘭德來。公奏派來京引見之湖北施德道會廣鎔。並奏請湖北提學使高凌霨來京與議。〕十二月初六日。奉上諭。陳夔龍奏鄂境川漢鐵路與粵漢鐵路相輔爲用。請簡大臣兼充督辦一摺。鄂境川漢與粵漢兩路本屬相輔。自應聯絡一氣。方能安速成功。著派張之洞兼爲督辦鄂境川漢鐵路大臣。會商鄂傳部湖廣總督。督修在事官紳。認真籌款兵辦。卽責成張之洞力任勞怨。別議弊端。嚴定期限。因時制宜。主持定斷。鄂傳部湖廣總督均須實力協助。不得掣肘。〔川漢鐵路經鄂省者。幹線自宜昌經荊門襄陽

至廬山、與京漢接軌。支線自荊門經沙市至漢陽、共長一千六百里。宜昌以上議定歸川省代修。凡二千三百餘里、川省已完股一千二百餘萬。而湖北應修之路、估計需三千萬兩。已收之款僅六十六萬六千餘元。除開支外。實存四十四萬餘元。存官錢局生息。不敢甚鉅。謹借洋款興修。俟粵漢議定、以次籌辦。是歲學部設藏書之所於淨業湖濱。〔先是江南創建圖書館。購致東南藏書家舊本。時歸安陸氏爾宋樓藏書已爲日本富人以重金罄載而去。常熟瞿氏鐵琴銅劍樓藏書亦有觀觀者。僅購致杭州丁氏八千卷樓。藏書度之館中。會學部設圖書館。江督端方敏公願購瞿氏書致之京師。公大喜。電復云。留瞿氏書備京師圖書館儲藏。真不朽盛業。此又勝於丁書矣。懇竭力圖之。瞿氏之裔字良士者、謝曰。先人世守也。勿敢失。乃購湖州姚氏揚州徐氏書。先後運京。實淨業湖濱廣化寺東院爲藏書之所。時以暇日。與賓客僚吏欣賞其中。明年、議建圖書館。又電致江督購瞿氏書、許以優獎。不允。〕清理內閣大庫舊檔。〔內閣檢庫藏順治初攝政典禮。舊檔。不得。謂其無用。奏請銷燬。翰苑諸人入庫檢本人試策。偶得宋玉牒寫本殘葉。檢討章毅照印贈人。公見之。問事部參事羅振玉曰。大庫有宋玉牒、何也。對曰。此宋史藝文志之仙源集慶圖宗藩慶系錄也。南宋亡。元代試行海運。先運臨安國子監藏書。故此書得至耳。且明代文淵閣即今內閣大庫。既得此書。此外所藏必多。因以文淵閣書目進。公亟命閣僚清釐。片紙隻字不得遺棄。然視爲可毀者。積於庭中。猶高若邱阜。移度學部。凡八千袋。〕

### 宣統元年己酉公七十三歲

正月十九日。啓用督辦粵漢鐵路大臣兼督辦鄂境川漢鐵路之關防。二十三日。恭上孝欽顯皇后尊諡禮成。恩詔加一級。二十九日。恭上德宗景皇帝尊諡禮成。恩詔加一級。二月初一日。以恭修德宗景皇帝實錄。奉旨派爲總裁官。初八日。奉頒賞孝欽顯皇后德宗景皇帝遺念服物。奉旨總司核定進呈講義。〔光緒三十三年十月。從御史趙炳麟請。派孫家鼐、榮慶、陸潤庠、張英麟、唐景崇、寶熙、朱益藩、翰班

進講經史及國朝掌故。以裨典學而資治理。至是廣續舉行。改進講爲撰擬進呈。添派熙彥、喬樹勳、劉學琛、吳士鏗、周自齊、勞乃宣、趙炳麟、譚學衡、翰班撰擬。公與孫相總司核定。旋擬上進呈講義事宜。奉旨著按照圈出各書另行分認。自閏二月初一日起。按詩義凡分七班。頭班四子書大清律例、榮相喬左丞任之。二班貞觀政要陸宣公集、劉監督陸文端任之。三班資治通鑑西洋通史、張總憲吳侍讀任之。四班國朝掌故外交、唐侍郎周參議任之。五班日本明治維新史憲法、寶侍郎勞京堂任之。六班通鑑紀事本末國朝掌故。朱宗丞趙侍御任之。七班經世文編軍學、熙侍郎譚副使任之。周而復始。先二日具講義稿送公核定。議定以洙昭運煤鐵路爲粵漢枝路。(郵傳部既設、督辦關內外鐵路大臣袁世凱督辦京漢滬寧各路大臣唐紹怡先後將京奉京漢滬寧京張正太汴洛道清各路關防文卷移交接管。惟洙萍一路爲運煤而設。雖用官款修築。仍由盛侍郎經理。副洋郵煤礦合併爲漢冶萍鐵礦公司。專歸商辦。郵傳部謂官商股本應畫清界限。三十四年二月。奏准歸部管轄。是時萍鐵大槽已通。日出煤可二三千噸。漢廠擴充需煤尤廣。而運船自洙湖南下、迂道湘潭。水淺舟滯。部議擴盛侍郎咨。自洙湖至湘潭之昭山籌官款築路四十里。湘人憤激。五月、在籍紳士黃緝渠等呈都察院代奏云。粵漢路經三省。湘線最長。需款最鉅。廣州漢口、水陸四達。客貨如雲。號召路勢不難。湖南境內無一著名商埠。猶幸萍鐵運道必由湘境。湘路原議由長沙取道湘潭之易家灣以達洙湖。藉萍煤運費挹注。然後路利較厚。股款易集。今萍路改歸部轄。並由部展築洙昭。是湘路於失萍運之外。又受同向並行之害。盛宣懷歷年奏案、萍路至洙湖而止。與幹路相接。使湘路而仍在美公司之手。盛宣懷必不爲展築洙昭之計。可以斷言。郵傳部今以施於湘路公司。官奪商利。其謂之何。十月。郵傳部請公委員履勘。公委湖北道員李寶沆查。知水漲時萍煤至洙湖即由水運。水涸時過易家灣以下。仍須經幹路而行。萍洙萍昭、得失無幾。如用雙軌煤貨並運。即令湘省添築應用。可以解紛。部覆允許。遂會奏將洙昭路線交粵漢鐵路承修。此摺由公主稿。今佚。)粵漢鐵路借英款無成。改借德國商款。(自上年十一月後、高學使等無日不與瓊蘭密議。先聲明經手人員無絲毫費用。瓊蘭德不按光緒三十一年原議。開價與他國比較。姑欲

包工以覽修路之權、繼欲用款必總工程師簽字。皆受詞拒駁。然未便舍英他商。會傳聞英欲合各國設公司干涉中國主權利權。思乘其未定議而挽救之。德國方示好於華。德華銀行經理人柯達士請承借。英德方不洽。璞蘭德負氣翻臉。謂儘可另商他國。遂即日與柯達士訂定大概辦法、仿津浦合同而息扣尤減。柯達士立函單爲信。其夕璞蘭德自悔、請展期一日。允之。及期而復訊不至。遂罷議。二月。學部奏分年籌備教育事宜。〔原奏略曰：臣部職司教育、大綱分爲二端。曰普通教育。曰專門教育立憲政體。期於上下一心。必教育普及、然後國民知識道德日進、程度日高。地方自治選舉各事乃能推行盡利。而庶政公之輿論始無弊端。此普通教育亟宜籌備者也。立憲之效、必以富強爲歸。富強之政。斷非人才不舉。中國大利未興、百端待理、忠社專門之學未精。專門之才太少。若不研究高等之學術。即不能得應用之人才。此專門教育亟宜籌備者也。臣部經費支絀、而教育爲憲政中根本之根本。斷不敢因循敷衍、致誤九年立憲之期。謹就臣部應行籌辦之事及開大局各省應同時並舉者、按年分條繕單、恭呈御覽。請飭下憲政編查館核議施行。〕查辦粵省鐵路公司弊端。〔廣州總商會善堂勸業公司弊端、請查嚴懲辦。公電致粵督請飭縣將被控之人傳案看管、委員清查。時梁震東京卿總理其事。累電請辭。復電囑力任勞怨。凡遇爲難處。必爲主持。〕三月十二日。德宗景皇帝梓宮奉移梁格莊行宮暫安。恭送於阜成門外。〔先期奉旨、無執事之王公百官毋庸隨行。〕學部奏定變通初等小學堂章程。〔其原有小學簡易科酌擬兩類辦法。以期學徒日多。教育漸臻普及。〕學部奏定變通中學堂課程。〔分文科實科、仍照定章十二門分門教授。十二門之中、各分主課通習二類。文科以讀經、講經、中國文學、外國語、歷史地理爲主課。以修身算學博物理化法制理財圖書體操爲通習。實科以外國語算學博物理化學博物爲主課。以修身算學博物理化法制理財圖書體操爲通習。實科以時刻較多。通習時刻較少。皆以五年畢業。〕四月。議定湘鄂境內粵漢鐵路鄂境川漢鐵路借款合同底稿。〔英款既停議。英外部與其駐使先後向我外務部及駐英使臣詰責。方德商來議時。公聲明如英商方爭、則粵漢仍借英款、而德款用於川漢、將以兩路合借爲兼籌並舉之策。故徵示英人如改派他商來議。照德商辦法、

仍可接受。嗣英使改派匯豐銀行代表人與禮爾來，而原議之中英公司本英法合辦。照禮爾願與法商匯理銀行合借、允之。然猶枝節橫生。兩月始定。凡英法德三國銀行合借英金五百萬鎊、粵漢用英總工程師、川漢用德總工程師、分借款造路爲二事、另指的款擔保。以湖北湖南釐金各二百萬兩、川淮鹽局江防加價四十萬兩、新加鹽釐捐三十萬兩、振賑捐鄂款二十五萬兩、湖南鹽道庫正釐二十五萬兩爲抵押。將來還本還利、仍取給於鐵路進款。所借之款。川漢粵漢各用其半、另借五十萬鎊。收還比國金元小票利息。俱長年五釐。九五折扣。二十五年爲期。十年後可全數還清。畫押後開工不得逾六箇月。建造工程及管理一切之權全歸中國國家自行辦理。訂用總工程師合同亦由督辦大臣核定。十九日。立草合同、送外務部覆核。初意俟借款議定、湘路即分段開工、同時並舉。至是尅期簽字、而美使忽謂外務部曾許川漢築路可借美款。請通融加入。然外務部原案、明言各國公司商辦中國鐵路、應由中國酌定。不能以請辦未定之案視爲應得利益、並爲日後儘先承辦之據。公請據此駁之。逾一月、英法德銀行來函言、美商在倫敦已商允三國銀行認川漢借款四分之一。美銀行必欲并粵漢四分之一而分認之。公謂分認川漢尙有商案可稽。若粵漢自美贖回、又借美款修造、斷不能允。未幾、俄國又藉詞漢口茶務、強欲分認。枝節愈多、而公疾作矣。二十一日。奉旨嗣後應行驗看人員、由各衙門帶領引見。大學士張之洞鹿傳霖均免其帶領引見。改訂粵路公司董事選舉章程。〔舊章多流弊。請廣東同鄉京官詳細駁改。另擬新章送核。核定後發認股各鉅商閱看。俟衆議僉同、頒布遵守。〕五月。會議德宗景皇帝升祔典禮。〔命學部小京官傅嶽棠撰說帖、經內閣會議具摺入奏。〕會湖廣總督出示宜昌擬購鐵路用地。〔此川省代修鄂境之路。〕六月初四日。因病請假數日。〔自遭國卹、樞臣以恭儉恤下輔導王躬。明旨崇節儉。戒浮華。覈名實。停各督撫鹽政織造關差等一應貢獻。飭懿親宗族毋得越禮犯分、變更典章、淆亂國是。海內喁喁望治。既而親貴聯翩進用。公憂形於色。陝甘總督升允奏陳立憲利害。自請開缺。公謂所言雖過當。在滿員中究屬正派一流。所請宜不允。慶邸素嫉其人。監國是慶邸言、竟如所請。公意頗抑鬱。五月中。忽右脇作痛。數日變甚。醫曰、此肝病也。不治、將入胃。服藥不效。

且轉劇。然猶強起入直。會設立軍諮處。諭旨有依憲法大綱朕爲大清帝國統率海陸軍大元帥暫由監國攝政王代理之語。公固爭。又陸軍部奏、各省設局製械、新舊錯雜。請簡派大員督辦。內定加朱恩毅三品京堂。督辦各局。公言其不可。乃改爲加三品卿銜、前往各省製造軍械各局廠切實考查。又給事中高潤生劾津浦鐵路總辦道員李德順營私舞弊。并及督辦大臣呂海寰。親貴舉才堪繼任者。公謂與情不屬。盛國曰、此直隸紳士語耳。公曰、不然。輿情不屬、且激變。曰、有兵在。公退而歎曰、不意聞亡國之言。咯血而出。勝藩益甚。不入直者三日。是日具摺請假。奉旨賞假五日。初九日。續假五日。十四日。續假十日。二十四日。續假十日。學部奏酌擬考試畢業游學生章程。〔略仿科舉取士之遺。兼用學堂積分之法。〕學部奏設青島特別高等專門學堂。〔德國政府議建大學於青島。分設四科。一工程科。二醫科。三政治法律科。四農林科。並設預備一科。派福爾格萊華籌商。德國先籌開辦費三十萬馬克。其常年經費七萬五千馬克。望中國政府贊助。學生畢業者、請獎以進士出身。學部議此較與外人私立不同。大學之名、未便輕許。學生功課、宜由中國派員駐堂稽察。學生入堂之始。須山東提學使選送。其畢業者、或准升大學、或酌量任使、毋庸議及出身。開辦之費、學部認籌四萬馬克。常年經費。認一萬馬克。直隸山東各認一萬五千馬克。德政府皆允諾。〕章程十八條。中德合辦。奏派員外郎蔣權充駐堂總稽察。學部奏定簡易識字學塾試辦章程。〔時學部猶秉承治事。以上三件、皆經公核定者。〕七月初四日。奏請續假。奉旨大學士張之洞因病續假。朝廷實深廬念。若再賞假二十日、安心調理。假滿卽行銷假、照常入直。〔脇痛延至臍中。拒按腰際皆脹。強起識鐵路事。俄人必欲承借路款。公請外務部力拒。學部編國民必讀課本、親定體例條目。籌建圖書館。手定疏稿。〕選師友遺詩爲思舊集。〔在鄂時選詩九家。曰昌黎韓果靖公、獻縣劉仙石太守、劉伯洵拔貢、桐鄉陸眉生給諫、桐鄉嚴繩生主政〔辰〕、巴陵謝廉伯編修〔維藩〕、忠州李季仙大令〔士葵〕、獻縣崔次龍〔銘善〕、族孫旼民〔祖繼〕、命官書局刻之。〕紀香粵中翰〔鉅維〕、任校響、旣而商體例、酌款式、稿定而增損者數四。至是增選八家。曰邱任李稚和觀察〔義鈞〕、遂義唐鄂生宮保〔炯〕、富順朱眉君舍人

(鑑成)、宗室竹坡侍郎、伯蕭太史(壽富)、任邱邊寶航大令(涂慈)、綿竹楊叔嶠京卿銓、濰州石公冰茂才(堅)、又求張幼樵副憲黃再同編修詩皆不得。以選本屬高學使攜鄂付中翰。疾既亟、郵寄促之、按前九家見戊申十月致高學使電文。後八家見思齋集刻本。紀中翰泊居贛稿、有與人書言選詩事。書云、文襄公在鄂選朋舊詩、初祇十家。已刻陸生李芋仙韓果時刻伯洵張勵民謝際伯六家。嚴繩生詩亦刻成。崔次龍先生詩僅刻一半。劉仙石楊叔嶠稿均未校。後數家乃文襄易篋之前草草選錄。須詳校重編。數家中記有唐鄂生李稚和朱眉君袁爽秋黃再同。尚有一家記憶不清云云。此書言入選諸家。與刻本微異。○手定廣雅堂詩集。(詩稿最初經袁忠節輯刻。曰廣雅碎金。顧德龍伯鸞(鳳鑣)又刻之、曰廣雅堂詩集。癸卯入京以後。時有改正、至景刪定、命工寫印。間識朱國於題上。病亟時有讀白樂天詩一首。則據屬補入者、應在卷末。)孫鳳燦。取法貢生。二十三日。子權補禮部郎中。(具摺謝恩。手改摺稿。)二十四日。續假二十日。(中醫屢治無效。改延日醫。又延英德醫參酌之。日醫始治有效。然飲食漸減。精神益不支。)學部奏籌建京師圖書館。(錄原奏、圖書館為學術之源、京師尤繫天下觀聽。規模必求宏遠。蒐羅必極精詳。庶足以供多士之研求。昭同文之盛治。國家稽古右文。遠邁前代。聖祖仁皇帝、世宗憲皇帝臨雍講學。特頒圖籍、藏之成均。高宗純皇帝開四庫之館。晉萃載籍、建閣儲藏之數綜十六萬八千册。又於熱河及鎮江揚州杭州等處並建藏書之閣。頒給圖書各一分。士子就閣讀書。得以傳寫。所以嘉惠藝林。啓牖後學者、至周至渥。後東南三閩悉置於兵。私家藏書、往往流播海外。近年各省疆臣、聞有創建圖書館、購求遺佚。以供衆覽者、江寧省城經調任督臣端方首創盛舉、不惜巨款、購置丁氏八千卷樓藏書存儲其中、卷帙宏富、尤多善本。并購得湖州姚氏揚州徐氏藏書數千卷。運寄京師。以供學部備藏。並允仍向外省廣為勸導搜采。茲者京師創建圖書館實為全國翰林冠冕。尤當旁搜博采、以保國粹而惠士林。無如近年經籍散佚、徵取良難。部款支絀、搜求不易。且士子近時風尚、率趨捷徑、罕重國文。於是祕籍善本。多為海外重價鉤致捆載以去。若不設法蒐羅寶存。數年之後。中國將求一刊本經史子集而不可得。馴至道喪文散、患氣

潛盜。此書等所儲備沒沒。日夜爰懼。而必思所以挽救之者也。竊查中祕之書。內府陪都而外。惟熱河文津閣所藏。尙未遺失。近年曾經熱河正都統總管世網。副總管英麟查點一次。與避暑山莊各殿座所設書籍一併查明開單具奏在案。擬懇聖恩俯准將文津閣四庫全書並避暑山莊各殿座陳設書籍。一併實交臣部祇領。建館存儲。庶使奇好古之士。得窺石室金匱之藏。實於興學育才。大有裨助。至建設圖書館地址。必須近水遠市。方無意外之虞。前經臣等於內城地西相度勘尋。惟德勝門內之淨業湖。與湖之南北一帶。水木清曠。適隔巖崖。以之修建圖書館最爲相宜。尤足以昭穩慎。擬於湖之中央分建四樓。以藏四庫全書及宋元精槧。另在湖之南北岸。就雁通祠地方另購民房添築書庫二所。收儲官私刻本。海外圖書。勿庸建造樓房。以節經費。其士人閱書之室。館員辦事之處。亦審度地勢。同時照修。查淨業湖雁通祠兩處。均歸奉宸苑暨內務府經理。擬懇恩飭下奉宸苑內務府。將淨業湖雁通祠各地址移交臣部。以便剋期興築。該處水面頗寬。并擬督飭該館會商奉宸苑隨時疏濬。以期上無礙於水源。下不虞其淤塞。並祈飭下熱河都統。將臣部所請書籍檢齊。齎送到館。以備尊藏。至各省官局刻本。卽由臣部行文咨取。開辦以後。如有報劾書籍及經費者。擬請撥乾隆時進書之鮑廷博。光緒時進書之廣東高廉道陸心源獎勵成案。由臣部視其書之等差。款之多寡。分別請獎。以示鼓勵。又奏翰林院所藏永樂大典。在乾隆年間已多殘缺。庚子以來。散佚尤甚。今所存者。僅數百冊。而其中尙多希見之書。又查內閣大庫所藏書籍甚夥。近因重修大庫。經閣臣派員檢查。除近代書籍之外。完帙蓋希。而其斷爛蕪殘。不能成冊。難於編目者。亦間有宋元舊刻。擬請飭下內閣。將前項書籍。無論完闕破碎。一併移送臣部。發交圖書館妥慎儲藏。其零篇斷帙。卽令該監督等率同館員逐一檢查。詳悉著錄。尙可考見版刻源流。未始非讀書考古之一助。按圖書館之設。經書已久。此摺亦幾經斟酌。是時公病亟。學部庶公有不諱。此舉必敗於垂成。遂以二十五日入奏。並請派編修繆荃孫充監督。國子丞徐坊充副監督。學部郎中楊熊祥充提調。又請仿乾隆三十九年將進到各書於篇首用翰林院印。面頁記年月姓名之例。飭下禮部鑄學部圖書之印。尊藏鈐用。疏入。均奉旨依議。八月十四日。奏請續假。(并屬門人陳會壽

傅出表其擬摺摺。口授大意。謂平生以不樹黨援不植生產自勵。他無所戀。惟時局艱虞。民窮財盡。伏願皇上親師典學。發憤日新。所有因革損益之端。務審先後緩急之序。滿漢視爲一體。內外必須兼籌。理財以養民爲本。恪守祖宗永不加賦之規。教戰以明恥爲先。無忘古人不戢自焚之戒。至用人養才。尤爲國家根本至計。務使明於尊親大義。則急公奉上者自多。尤願登進正直廉潔之士。凡貪婪好利者。概從屏除。正氣日伸。國本自固。十七日。胃納銳減。十八日。服藥而吐。飲食亦吐。十九日。稍愈。命具摺請開差缺。二十日。索閱摺稿。伏枕改數字。命速遞。二十一日。奏請開去各項差缺。原奏略曰。數日以來。肝胃痛楚益劇。飲食愈形減少。嘔吐泄瀉。諸病雜呈。中外各醫。迭進方藥。均未能稍見功效。自揣病勢漸入膏肓。伏念臣屢次請假。業經兩月有餘。疊荷聖慈。曲加體恤。聖恩高厚。感激悚惶。惟時日遷延。病情反覆。各項差缺。均關重要。惟有懇恩俯准將軍機大臣、大學士本缺、及管理學部事務、督辦粵漢兼鄂境川漢鐵路大臣兩差、並其餘各項差使、一律開去。俾得暫釋重負、療養兼資。奉旨。大學士張之洞公忠體國、夙著勤勞、茲因久病未痊、朕心時深廬念。著再行賞假、毋庸拘定日期。安心療養。病痊卽行銷假入直。並賞給人使二兩、俾資調攝。所請開去差缺之處。著毋庸議。是日。監國攝政王親臨視疾。大學士世續以視疾請。王至、謂公曰。中堂公忠體國。有名望。好好保養。公曰。公忠體國、所不敢當。廉正無私。不敢不勉。王出。陳師傳入、問曰。監國之意若何。公無他言。第歎曰。國運盡矣。蓋冀一悟而未能也。亥刻。公薨。酉刻。忽起坐、下床更衣畢、就臥、汗出如瀉、戕刻汗止、進諸子戒以勿負國恩、勿墮家學、必明君子小人義利之辨。勿爭財產、勿入下流。人各二語。言訖、令一一覆誦、有誤者改正之。又命讀遺疏及邸鈔數則。諸子哽咽不能成聲。公慰之。謂吾無甚痛苦也。又曰。吾生平學術、政術、所行祇十之四五。心術則大中至正。已復改政需二字爲治術。語畢、命去衾褥凌亂者、整衣袴、索紙拭鬚髯、自忽上視。亥刻、薨。二十三日。內閣奉諭。大學士張之洞。公忠體國。廉正無私。荷先朝特達之知。由翰林游升內閣學士。簡授山西巡撫。總督兩廣湖廣。權理兩江。凡所設施。皆提倡新政。利國便民。庚子之變。

願全大局。保障東南。厥功甚偉。旋以總督晉陟給廨。入參機要。管理學部事務。宗旨純正。懋著勤勞。朕御極後、深資倚畀。晉加太子太保銜。服官四十餘年。學畫精詳。時艱匡濟。經猷之遠大、久爲中外所共見。近因患病、屢經賞假調理。並賞賜人蔭、方冀克享遐齡。長資輔弼。茲聞溘逝。軫惜殊深。著賞卹經被、派郡王銜貝勒載濤帶領侍衛十員、卽日前往奠醴。並賜祭一壇。加恩予諡文襄。晉贈太保。照大學士例賜卹。入祀賢良祠。賞銀三千兩治喪。由廣儲司給發。任內一切處分。悉予開復。應得卹典。該衙門察例具奏。靈柩回籍時、沿途地方官妥爲照料。伊子禮部郎中張權、著以四品京堂候補。郵傳部學習員外郎張仁侃、著以郎中補用。伊孫選拔生張厚瓌、著賞給主事、分部補用。用示篤念懿臣至意。（各國駐京公使皆奉其國命致哀悼之意、受弔之日、各使均於几筵致敬。）十月。子權等奉喪歸南皮。十一月。四川總督趙爾巽奏請將前在四川學政任內興學育材事蹟宣付史館。（原奏 據署提學使趙啓霖詳、轉據四川在籍紳士侍講學士銜翰林院編修伍肇齡等聯名呈稱。原任大學士張之洞、學術淵深、風規宏遠。歷官各省。無不以崇尚儒術修明文教爲先。其前在四川學政任內、興廢舉墜、明教作人、沾溉之宏、造就之廣、尤有歷久彌繁人思者。先是川省僻處西陲、人文未盛、士林之所馳騫、率不出帖括章句之圖、自同治季年、該大學士與試西來、始拔取績學能文之士、如武謙吳德瀟諸人以爲之倡。士風始爲一變。旋奉命提督四川學政、則會商前督臣吳棠奏設尊經書院。擇郡縣高材生肄業其中。延聘名儒、分科教授、院內章程、及讀書治經之法、皆該大學士手訂、條教精密。略如話經精舍學海堂規模。復以邊省購書不易、捐置四部書數千卷、起尊經閣庋藏之。藉供生徒瀏覽、並開書局刊行小學經史諸書。流布坊間、以備士人誦習之資。自是比戶橫經、遠近景慕、蜀中乃彬彬多文學矣。其校士各屬也、以川省槍替之風、內通經承、外結廩保、不易究詰。特用鉤距之法摘發其姦。一時人驚爲神、無敢犯者、宿弊以清。又自撰論說、勸紳富捐舍學田、優免新生卷費、以恤寒賤。至今州縣興學之資多取給焉。川省學政素號臆缺、該大學士廉介自矢、於例得參費銀二萬兩辭而不受。其他恩優歲貢及錄遺諸費、皆定爲常額、不許婪索、及去任、無錢治裝、出售其所刻萬氏拾書經版、始克成

行以去。該大學士嘗謂人曰、四川督學署積塵盈屋、我第掃除過半耳。蓋其潔已愛士之誠、蠶職祛弊之勇、有如此者。其平日衡文不主一格、凡有一藝之長、無不甄錄。而尤注重於經史根柢之學。故所至考求文獻、禮訪名宿、惟恐不及。每值士人晉謁、輒優假顏色、殷殷焉以讀書稽古相教勉、並爲指示途徑、俾有遵循。所著書目答周翰軒語二書、流傳海內、幾於人手一編、卽該大學士在蜀後士時所隨時撰錄、道士人以求學之津梁者也。所取之士、如范溶張祥齡宋育仁諸人、皆經明行修、極一時之選。爲該大學士所深器。嘗引之左右、躬自督課、其後或置身通顯、爲國家文學侍從之臣。或潛心著述、以紹明絕學師表人倫自重。類能守其緒餘、克自樹立。教澤所及、全川化之。迄今學校大興、人材蔚起、文化之程、翹然爲西南各省最、蓋非該大學士陶鑄誘掖之力斷不及此。紳等景仰前徽、緬懷遺澤、理合臚陳事蹟、請予奏懇天恩、宣付史館、以光志乘而垂不朽。等情、前來。奴才伏查原任大學士張之洞。起家翰苑、慶掌文衡、迄後數歷中外、勳猷懋著、其文章政蹟、久在聖朝洞鑒之中。無待贅陳。願其生平精神所寄、尤在振興教育、儲養人材、以備國家緩急之需、而救當世空疏之習。凡所施設、皆儼然有古大臣風。故其在粵則設有廣雅書院。在鄂則設有兩湖書院。與蜀中之尊經書院鼎足而三、後先繼美。皆以啓迪新知保存國粹爲百年樹人之計。正不徒補苴目前而已。奴才夙聆該大學士之論議、輒用心折。比年疊膺疆寄、自鄂而蜀、皆踵該大學士教成之後。見其造端宏大、訓迪有方。愈歎敬以爲難及。而川省處交通閉塞之區、值兵燹疊經之後、該大學士薰陶培育、用能以數年之間、澤余陋以詩書、化樸陋爲才俊。文化幾與東南各省埒。其程功尤非易易、近年推行新政、廣厲學官、莘莘學子、咸以通貫爲榮、以拘墟爲恥。而老成尙有典型、文學猶存矩矱。經史教授之選、皆取資於本省而賂足。卽平日聞見所及、其中亦不乏淹貫宏通傑出不羈之材、足以儲爲世用。使再需以曩時、進步正未可盪。事固有致力於數十年以前、而收效於數十年之後者。此類是也。以該大學士豐功偉績、誠非與學一端所能盡。卽就興學之事言之、其功已有不可沒如此者。合無仰懇天恩、俯准將原任大學士張之洞前在四川學政任內事蹟宣付史館。編入列傳、以補史官考訂所不及。出自逾格鴻慈。奉硃批著照所請。二年。

月、兩江總督張人駿奏請於江寧省城建立專祠。（原奏、據在籍江蘇紳士翰林院侍讀學士黃恩永等聯名呈稱、已故大學士前署兩江總督張之洞、早撥亂科、收歷中外、凡所敷施、難以罄述、而兩江被澤宏遠、民不能忘。光緒甲午十月、調署江督。下車之初、適中東事起、海防北路以海州爲急、南路以金山乍浦爲急。維時江南統領鎮將、半湘淮軍舊部、承平既久、暮氣已深。乃分別撤換。奏調前雲南提督馮子材率粵軍防海州。任宿將朱洪章防金山。沿海賴以無恐。復聘德國將弁練自強軍二千六百餘人。並以江防之寶山江陰鎮江等處礮臺皆舊式窳敗、一律改修。購置泰西新式礮五十餘尊、城北獅子山幕府山亦創修新式礮臺二十餘座。設立總分臺官、專司防空、江南兵士之有新操及臺礮之有西式利器者、均自此始。道子寅十月、再次署任。整飭離網、裁撤蓋弊之大通蕪湖各鹽掣卡、釐定十二圩鹽棧新章。奏派大臣認真緝私、南鹽每歲增銷十餘萬引。入告之疏。遐邇傳誦。謂與曾國藩之整頓南鹽、寓綱於票、沈寶楨之整頓北鹽、畫分三版者、先後媲美。庚子賠款、兩淮鹽政擔任一百二十餘萬。支應局撥補無著之款每歲六百餘萬、江北十三協餉銀數十萬、皆賴此挹注、成效彰彰在人耳目。其他如修江寧省城及上海市馬路以便交通、並於南市設立巡警、杜外人侵入華界、以保政權。裁停陳舊輪船、訂購日本廠兵輪四艘、以壯海軍。至今猶利賴之。庚子之役、風鶴頻驚、張之洞時在兩湖、與前任江督劉坤一往復電商。咨會商約大臣今郵傳部侍郎盛宣懷、與駐滬各領事堅明要約、力任保護各國人命財產。不任洋兵闖入華界一步。厥功尤偉。江蘇人士、追懷舊德、感慕靈猷、允宜請建專祠、以永謳思、等情、呈請具奏前來。臣查已故大學士張之洞、兩次署任江督。爲時雖屬未久、而於江防海防軍政鹽政諸要端、規畫靡遺。尤以庚子保護東南大局、關繫至鉅。其功實與劉坤一相埒。今江蘇士紳舉其江南政績、請伸報祀、實出於愛戴至誠。合無仰懇天恩、俯准如該紳等所請、爲已故大學士前署兩江總督張之洞在江寧省城建立專祠。由地方官春秋致祭、以彰靈績、而順輿情。出自鴻施逾格。）奉硃批、著照所請。十一月。鑲紅旗蒙古副都統吳祿貞等奏請於湖北省城捐建專祠。（原奏、原任大學士張之洞、自同治七年視學湖北、光緒十五年總督湖廣、先後宣鄂二十餘年、在官最久、政績最著、所以繫人民

之去思者亦特深。自該故大學士入閣後、學界立有抱冰堂、軍界立有廣雅堂。以表甘棠之念。聞該故大學士卒於位、則皆私設木主、春秋致祭、猶援賢臣祀典功德在人與建專祠之例、函商臣等同鄉京官、以爲宜具奏請旨、建立專祠。臣等竊維該故大學士履事先朝、公忠廉正、內贊大計、外鎮兼圻、與故直隸督臣李鴻章、皆以宣勤最久、勛望相埒。凡所施設、類能先天下而獨憂、登斯民於衽席。溯自粵匪倡亂、湖北屢被蹂躪、克復以後、故撫臣胡林翼竭力支柱、特以供給中原、雖戰守有資、而瘡痍未復。該故大學士蒞任、鑒外侮之紛乘、圖內訌之充實、休養生息、民困漸蘇。其爲政務於開濬利源、使政費有出、事業無廢、而民不覺擾累。比年以來、湖北以小省而負擔義務特重。皆故大學士擴張官營事業爲收入大宗、輔以消費各稅、故貧民之加擔有限、公家之歲入驟增、近因稅源納諸中央、官業日即收縮、財用告匱、新政漸停、益知故大學士之苦心焦思、爲鄂民籌數筭之資者、其功德終不可沒也。平生事蹟、不可殫書、謹就臣等聞見所及、分條陳之。一曰學政、教育一端、該故大學士最所置重。自視學湖北、即建經心書院、講明經術。及在總督任內、首建兩湖書院及武備自強各學堂。規模宏遠、成就甚衆。值與學命下、復廣建師範實業方言諸學。省垣之內、廣廈如林、猶恐地方教育未能普及、力籌賠款、而以各州縣認捐款項撥還就地辦學。於是鄂省境內立校始遍。歲選茂異分赴東西洋就傅。費資頗巨。造士之多、亦甲於天下。京內外舉行新政、率皆借才爲用。此其辦學之功效也。一曰軍政。光緒二十一年、湖北陸軍改用新法、該大學士首注意於將材軍器。廣徵軍學。資遣出洋學生以資教練。創設槍廠無煙藥廠植中國軍械專廠之根基。又購置兵輪魚雷艇以重江防。長江上下特以鎮懾。此其練兵之實績也。一曰實業。通商以來、武漢浸成巨埠。而輸入日增、漏卮難塞。該故大學士創建紡紗織布繅絲製麻各廠、以抵制外貨。外設勸業善技益智各場以啓迪民智。修水利以防氾濫。鑄銀幣以資運轉、倡辦京漢之路以利交通。開採煤鐵諸礦以開地利。凡有興作、不避艱鉅。此其振興實業之惠政也。他如建言定策、條陳時政、利賴所及、更僕難終。而最關係大局者、尤在庚子變亂、保護東南和平之舉。維持半壁、轉危爲安、其功固在朝廷、而不限於一隅。然全鄂人民獲免塗炭。以是尤思該故大學士不

置。此次請修祀典，實出於愛戴誠。合無仰懇天恩，俯准於湖北省城捐建該故大學士專祠，由地方官春秋致祭，以隆報享而順輿情。出自逾格鴻施。」奉旨諭，已故大學士張之洞前任湖廣總督，先後二十餘年，政績最著。遺愛尤深。著准其於湖北省城捐建專祠，由地方官春秋致祭。十二月十五日，乙酉，葬縣西南原雙妙村。（石夫人唐夫人王夫人合祔。御賜碑文。陳師儻撰墓志銘并書丹。墓在宅東北里許。去贈公墓百餘武。地廣十餘畝。本支族屬塋兆多在此。）

丁未之冬。措置滬杭甬鐵路事。頗爲棘手。此路自光緒二十四年督辦鐵路大臣盛京堂與英商怡和洋行訂草合同，聲明與滬寧辦法一律。三十一年，浙紳請籌辦全省鐵路，商部奏准立案，旋即開工。以御史朱錫恩請廢合同。有旨責成盛宣懷收回自辦。而英公司不允。三十二年，移京商議，分辦路借款爲二，江浙紳民堅持廢約。以奉旨爲詞。責望於公者甚切。蘇紳致公電云，借款造路，既分兩事，即不必在蘇杭兩省指款抵押。公於外部主持借款時，本未預議。近聞力持正論，急圖挽救。舉國仰望，若聽其始終偏執，蘇禍且興。又云，自公入掌大樞。願全大局。維持善類，天下想望。路事如不轉圜。禍兩省事小，禍全局事大。報載公數日不入直，或言將外簡。恐大局益不可知。善類更不可保。願強起入朝，勿遽引退。此事頃戊申十二月。項城開缺回籍。先是監國攝政王承皇太后命。飭軍機擬旨。禍且不測。公反覆開陳。始命回籍養病。公退，語人曰。主上冲齡踐祚。而皇太后啓生殺黜陟之漸。此端一開，爲患不細。吾非爲袁地。爲朝局計也。

己酉二月，有旨命前禮部侍郎朱祖謀前內閣學士陳寶琛來京預備召見。是時奉旨。凡光緒三十四年以前，緣事降調革職，及遣戍釋回已未錄用，除業經病故，及已復原官者外，餘由吏部查明原案，開單呈覽，朱陳兩公不待開單而宣召，乃特旨也。公在樞府日，振拔幽滯，蓋非一人。如前御史趙啓霖之起用。已革兩淮鹽運使洪汝奎已革湖北巡撫曾餘已革河南巡撫李鶴年已革戶部尚書協辦大學士翁同龢之開復原官。皆以

放廢及病故之員。得邀異數。又如軍機處開呈咸豐同治以來勳臣子孫未顯達者、及查明前雲貴總督劉長佑等後嗣凡四十餘人、皆請旨錄用。說者謂明是非而彰公道。非公啓沃不及此。

陳師傅張文襄公墓誌。公抱體國之忠。救時之略。膺疆寄垂三十年。英流碩彥、羣冀公持鈞軸奠區夏者、殆十年二十年。公平日論學、以法聖崇王爲體。以進夷子竊致國富強爲用。爲政經畫恢宏。而綜理微密。千條萬端。一心默識。用財繁浩。大率取之中飽私規。不竭民膏。不侵庫款。抗懷千載。所在祠其名賢先哲。若晉杜成侯、陶桓公、唐裴李、宋韓范司馬、無日不流連心口間。爲學兼師漢宋。去短取長。惡說經襲公羊、文字撫六朝。謂爲權詭亂俗。癸卯入覲。恍然於中學式微。道法將墜。手訂學堂章程。於經史兩科尤注意焉。比還朝。益亟亟於普建存古學堂圖書館。公之忠規密謨。關係斯文之興壞。匪獨天下安危而已。

抱冰堂弟子記。學術兼宗漢宋。於兩漢經師國朝經學諸大師及宋明諸大儒、皆所宗仰信從。漢學師其翔實而遺其細碎。宋學師其篤謹而戒其騷妄空疎。故教士無偏倚之弊。梁節庵先生曰。公開府兩廣。設書院書局。皆以廣雅名。又以自名其堂。廣者。大也。雅者。正也。大而能正。公無愧焉。

中華民國三十三年五月初版  
中華民國三十四年六月再版

(91004渝熟)

張文襄公年譜一冊

渝版熟料紙

定價國幣肆元貳角

印刷地點外另加運費

\*\*\*\*\*  
\* 版 翻 \*  
\* 權 印 \*  
\* 所 必 \*  
\* 有 究 \*  
\*\*\*\*\*

編著者 許同莘

重慶白象街

發行人 王雲五

商務印書館

印刷所

各地

發行所 商務印書館

11233

重慶市圖書雜誌審查處  
審查證安圖字第六二九號

